

НАЗАР ЭШОНҚУЛ

ШАМОЛНИ ТУТИБ БЎЛМАЙДИ

Қисса ва ҳикоялар

Тошкент


Алишер Навоий номидаги Ўзбекистон
Миллий кутубхонаси нашриёти – 2005

84(54)6-44-Ўзбек адабиёти жар-
лари - Жикозлар - Қиссалар

Назар Эшонқул ўтган аср 80-йилларнинг охирларида
адабиётга кириб келган авлодга мансуб. Сизнинг эътиборингизга
ҳавола этилаётган асарларида шу даврга хос туйғу-кечинмалар
билин бирга анъанавийлик ва авангардликнинг синтезлашуви акс
этган. Бу сўз қўллаш, мураккаб биримали жумла қуришдан
тортиб, воқеликка, метофарага, тасвир ва ифодага
муносабатгача сезилади. Ўйлаймизки, бу асарларни ўқиётганда
сиз ҳам бадиий мушодода кенгликларини дис этасиз, ҳаётга,
инсонга қарашингиз кенгаяди, дунёнинг ганимат эканини, уни
мазмунли ўtkазиш зарурлигини яна бир бор англайсиз.

Нашрга тайёрловчи ва мастьул мұхаррир:
Жаббор Эшонқул

Мұхаррирлар:
Малика Рустамова,
Гулноза Сатторова



10 32624
2

© Назар Эшонқул. Шамолни тутиб бўлмайди. Алишер
Навоий номидаги Ўзбекистон Миллий кутубхонаси
нашриёти – 2005

ШАМОЛНИ ТУТИБ БҮЛМАЙДИ

Юз йилдан бери терсоталикларнинг ғуури ва фахри бўлиб келган, замонавий қилиб қурилган равоқли уйлар қаршисида юздаги чипқондек қишлоққа кўримсизлик ва кексалик бағишлаб турган, номаълум ва мудҳиш синоатларга тўла қадим қўргонни эслатувчи Байна момонинг уйини худди унугтишга ва йўқ қилишга маҳкум этилган хотираdek ниҳоят бузиб ташлашга киришишди: темир тирноқли булдозерлар уйнинг деворларини қулатар эканлар, уй билан қўшиб, ўзларининг ҳам нималаринидир бузиб, вайрон қилишаётгандек, терсоталиклар бир чеккада жимгина кузатиб туришар ва нақ эллик йилча тақдирнинг бешафқат ўйинига қарши кураша – кураша дунёдан ёлгиз ва изсиз ўтиш азобини қўтариб келган, ҳаёти ўзларига ҳамон тушунисиз ва мавҳум туюладиган Байна момони эслаган аёллар кўзларига ёш олиб, болаларини бағирларига босганча, олис ва ғамгин хотираларга берилиб, мунғайган алфозда ўтирадилар.

Байна момо тириклигида гарчи бу аёлларни, эрининг полвонлик лаш – лушлари ва кийим – кечаклари ётган, полвонинг ўлимидан сўнг ҳечқачон чироқ ёнмаган, туйнуғи шуваб ташланган ана у ҳужра каби қоронғу мусибат тўла уйи ичкарисига киритмаган бўлса – да, улар қаҳр ва газабини ситам билан итиға ютиб келган бу кампирни ҳурмат ва эҳтиром билан эслашарди. Бу уй Терсотада қурилган биринчи уйлардан эди ва Райим полвоннинг отаси Шукур оқсоқол бундан бир аср муқаддам түғилажак фарзандларига кенг уй ва йилдан – йилга кўпайиб бораётган йилқиларга отхона солиш мақсадида Терсота сойининг офтобрўясига қишлоқнинг биринчи пойдеворини қурганди. Райим полвон зса отасининг ишини давом эттири: уйнинг орқасида боғ барпо этди ва отхона ёнида қирга туташтириб, ёзниг жазирамасидан гўшт ва ёғларни, қимиз ва айронларни

асраш учун кенг ертұла, уйнинг олди тошдан баланд супача, от кириб чиқадиган узун, устундор айвон қурди. Байна момо заллик йилга яқин ёлғизлиқ даврини ана шу айвондаги устунларга суюниб ўтқазды: у эри ва ўғлининг жудолик азоби қийнаган пайтлар шу устунларни қучганча йигларди. Кейинчалик күз ёшлари ҳам тугаб қолгач, ҳаётида гүё суюнчиғи ва орқасидан йиглаб қоладигани йўқлигини одамлардан яшириш учун ёки энди йиллар силсиласига дош беролмай пугтурдан кетаёттан уйни буткул вайрон бўлишдан асраб қолмоқчилик, елкасини устунга суюган ҳолатда хотирасининг синиқ парчаларига тикилиб, кўзларини юмганча ғамгину мустағриқ ўтиради.

Райим полвоннинг ўлимидан кейин түғилган ва у ҳақда кейинчалик буткул эсларидан чиқиб кетган чўпчаклар – нигина эшитиб улғайган авлод уйларини равоқли ва пишиқ гиштдан қура бошлагач, бир пайтлар Терсотанинг кўрки ва ғурури бўлиб турган бу уй бирдан кўримсиз қиёфага кирди ва энди Байна момо каби уй ҳам қишлоқдаги уйлар олдида ёлғизланиб қолганди: фақат бири – бирини босиб – туртиб кириб келаёттан шошқолоқ йиллар бу авлоднинг сарқаш қалбига қандайдир олис хотирани ёқиб қўйиш учун беҳуда уриниб, уй деворларига маҳзун битиклар ёзар, бекаси билан бирга бу макон ҳам аллақачон ўзининг олдинги қудрати ва виқорини йўқотиб бўлган, унут ва ташландиқ масканга айланганди. Терсоталиклар энди аэропланлар ҳақида гаплашишарди. Улар замоннинг алғов – далғовларига гарқ бўлган, ҳаётларида юз бераёттан янгиликларни ҳазм қилиб улгурмасди. Йиллар билан бирга ҳамма нарса ўзгарар, фақат Байна момогина уни сезмас, гүё унинг учун вақт ўша ҳолича қотиб қолгандай, уни ҳамон ўша заллик йил олдинги – зри ва ўғлининг ўлигини аскарлар тепкилаб ўтишган устун олдидан топиш мумкин эди.

Миршаб ва аскарлар уйнинг ҳар бурчагидан ёпирилиб келишганда Байна момо эрининг мурдаси устида туради. Райим полвонни қўлга туширолмай юрган Замон отбоқар уни уйидан чиқаёттанды отиб ўлдирган, энди полвон ростдан ҳам ўлганми, йўқми миршаблар билан пусиб – пойлаб, айвонга яқинлашиб келарди. Бироқ шу пайт яна ўқ овози жаранглади ва Райим полвондан кўз узмай келаёттан аскар

оёғини қучоқлаганча бақириб йиқилди. Байна момо мәжмонхона эшигидан чиқаверишда отасини отиб ташлаштанини күргаң, уйга югурғиб кириб кетган, қўлига отасининг милтиғини тутиб турган ўғлини кўрди – ўғлининг кўзларида ҳам эриники каби газаб, телбалик ёнарди. Байна момо ўғлини огоҳлантиришга улгурмади. Бирданига бир неча ўқ овози унинг қулогини битириб қўйди ва ўғли отасининг устига юзтубан йиқилди – йиқиларкан, энди сабза урган мўйлови титраб кетди, онасиға бир зум қўрқув ва ҳижолат аралаш тикилди. Замон отбоқар югурғиб келиб, унинг бошига тепди ва милтиқни бир четга улоқтириди. Қишлоқда аскарлардан бошқа ҳеч ким кўринмас, одамлар гўё сувга чўккандай ғойиб бўлган, фақат деразаларга тортилган қора пардалар бу мудҳиш жиноятта лоқайд ва бефарқ бокиб турарди. Байна момо терсоталикларни кечира олмади – кўкраги илма – тешик бўлган ўғлига қарата Замон отбоқар яна бир неча бор ўқ узаркан, у мадад излаб, уйларнинг туйнукларини ёпиб турган қора пардаларга бир – бир кўз тиқди, бироқ у ердан совуқ сукутдан бошқа ҳеч нарса кўринмас, зулматта чўккан туйнуклар бу мисли кўрилмаган қотилликни жимгина томоша қилиб турарди. Миршаблар Райим полвон ва ўғлининг ўлганига ишонч ҳосил қилишгач, отларига миниб жўнаркан, Замон отбоқар эри ва ўғли мурдаси устида чўкка тушган Байна момонинг елкаси оша қамчи туширди:

– Энди хору зорлиқда ўлиб кетасан, – хириллади у. – Молингни топшир, деганда эринг қўлига милтиқ ушлаб биз билан сичқон – мушук ўйнади. Мана, энди унга ҳеч нарсанинг кераги йўқ.

Миршаблар Райим полвоннинг қўрадаги подаси – ю отларини ҳайдаб кетишиди. Замон отбоқар отларни қувиб кетаркан, бир йўла отаси билан унинг қасосини олиши мумкин бўлган ўғлини ҳам отиб ташлаганидан хурсанд эди – у шу кетиши билан қишлоқнинг кўп нарсасини ҳайдаб кетди – энди қишлоқ бирдан минораси қулаган шаҳардек гарив ва нотавон кўринарди. Ўн беш йиллардан сўнг Замон отбоқар қишлоққа қайтиб келганда қишлоқдан файз кетиб, одамлар яна ҳам ожиз ва ҳуррак бўлиб қолгандиа. У Райим полвондан сўнг ташландиқ ҳолатта келиб долган сой

бўйидаги боғга кенг қилиб уй қурди: у боғда уй қуриш учун ҳеч кимдан рухсат сўраб ўтирмади. Энди у ўзи бу қишлоққа олиб келган замон ҳавосидан яйраёттган қишлоқдошларини кўриш учун отда изидан бир тўда ов итларини эргаштириб айланиб юраркан, қоя остида елкасига ўтин кўтариб келаёттган Байна момога дуч келди. Байна момо қариб қолган, аммо ҳали ҳам кўзлари худди ўн беш йил аввалгилик қаҳрли ва нафрат тўла эди.

— Сен менга бундай қарама, — Замон отбоқар қамчисини ҳавода силкитар экан. — Эринг бу ерда бўлмаса бошقا ерда барибир ўлган бўларди. Сен эса ҳавотир олма, ўлсанг итларим кўмади. — Шундай деб у бўрибосарларни кўрсатди.

Аммо у Байна момони бу сафар урмади. Байна момо ҳам унга бир оғиз ортиқча гапирмади. Умуман эри ва ўғлиниң ўлимидан сўнг камгап ва одамови бўлиб қолганди. У Шукуроқсоқол ўз феълига яраса кент — кенг қилиб қурган хоналарда худди бир нарсасини йўқотган каби мақсадсиз кезиб юрарди: у энди бу алғов дунёда ёлғиз ва қаровсиз қолганди: лекин ўзининг ожизлигини ҳеч қачон билдирамас, ўзидан кўнгил сўраганларни ёмон кўрар, гўё ҳаёти ҳеч ким қиё боқа олмайдиган даҳлсиз салтанатдек у ёқда бирон кишини ҳатто сўзи билан ҳам, киришга йўл қўймасди. Эрта баҳордан то кеч кузгача саҳармардондан олдига беш — олти кўй — қўзи, эчки — улоқ ҳайдаганча дарё бўйидаги юлғунзорга тушиб кетар, у ердан қуриган шох — шабба териб, қоронгу тушганда уйига қайтар, бир йилда икки — уч марта тегирмонга буғдой кўтариб бораради. Унинг буғдой кўтариб юрипидан ори келган Олломурод тегирмончи Байна момони инсофга чақирди:

— Сиз бундай овора бўлиб юрманг, — деди у. — Бирон эркақдан бериб юборсангиз, тортиб, ўзим уйингизга олиб бориб ташлайман.

— Бу қишлоқда эркак йўқ, — деди Байна момо зарда билан, сўнг елкасидаги буғдойни тегирмонга кираверища туширди. Гапираёттганда овози титраб кетди. Тегирмончи тилини тишлаб қолди. Байна момо бир пайтлар фақат қишлоқ эмас, бутун тоғли ҳалқнимиг орини кўтарган, номини чиқарган Райим полвонни қулоқ дея таъқиб қилишларига, сўнг итдай хор қилиб отиб ташлашларига йўл қўйгани ва

ўғли билан эрини замоннинг згаси, бир пайтлар Райим полвоннинг малайи Замон отбоқар ихтиёрига бериб қўйгани учун қишлоқдошларини кечиролмас, уларга бўлган нафрати сусайиш ўрнига, йиллар ўтиб, ота – бола ўлдирилган оқшомдан узоқлашган сайин кўпроқ ўрни ва қадри билинаётган, ўзини ҳаётнинг барча қувончидан бир йўла маҳрум этган, ёлғизликнинг кўр мусибати аро тобора авжланиб, Байна момонинг кексалиги билан бирга инжиқ ва йўриқсиз бўлиб борарди. У баъзида қишлоқдошларини очиқ масхара қиларди: «Э, сенмисан, Салом чавандоз, хотинингнинг иштонини кийиб юрибсанми дейман!», «Ҳаким отчопормисан, бунча ургочи байталга ўхшаб қийшанглайсанг...» «Бу қишлоқнинг аёллари энди фақат хезалак туғади». Бу масхара ва нафрат йиллар ўтиши билан Байна момони қишлоқдошларидан бутунлай ажратиб қўйди. Энди у ёлғиз ва кимсасиз қолди. Уни ойлаб бирор йўқламас, фақат эрталаб эчкиларини юлғунзорга ҳайдаб бораёттанидан, кечқурунлари қишлоқни тутган қайнаётган сут ҳидидан ҳали унинг тирик эканини билишарди. Байна момо ўз ёлғизлиги ва мусибатини ҳаётнинг бадбўй, забун, хор этилган ҳиддари анқиб ётган йиллар даҳлизидан етаклаб ўтди. Қишлоқдошлари баҳор келиши билан эски яйловларга кўчиб чиқишар ва ер шудгорлар, ҳар ким ўз ташвишига берилиб кетарди: қишлоқда қолган Байна момо эса бу пайтда ёлғизлик даштини шудгорлар, у ерга ҳар йили Замон отбоқар ҳукумат одамлари билан келиб, эри ва ўғлини отиб ташлаган оқшомни экар ва сўнг ёлғиз ўзи ҳосилини йигиб оларди. Байна момо ҳар кеча кўз ёшлари билан тўлган қайиқда йиллар қоялари орасида қолиб кетган эри билан ўғлининг илма – тешик бўлган мурдаси ва Замон отбоқарнинг музаффар қамчиси ётган қонли ҳалқоб билан тўлган айвонга сузиб борар, эрталаблари ҳўл бўлиб кетган ёстигини худди қадим аждодларнинг унут яловидай уйининг олдидаги – орадан йиллар ўтгач, уйини бузажёттанилар қўпориб ташлашга кучлари етмагач, ковлаб олишга мажбур бўлган – баланд толга осиб, офтобда қуритарди. Қишлоқлари ғамлаб қўйган ўтини етмаган кунлари у кўрпага сёғини тиққанча хотирасига исиниб жон сақларди. Ражаб чўпон қариндошлиги қўзиб, бир неча йил олдин ғамлаб берган ўтини омборхона

ортида, тахлаган жойда тахи бузилмай турарди — уни Байна момо қазо қылганда маъракага яратишди ва барча терсоталиклар Райим полвон тириклигиде ҳамманинг маслаҳатгүйи бўлган, уйи ҳамиша меҳмонлар ва полвонваччалар билан тўлиб — тошадиган бу аёлнинг бунчалик нафрати ва тавқи лаънатига сазовор нима гуноҳ қилишганини бир умр билолмай ўтиши. Байна момо қиплоқдошларига кўз — кўз қилмоқчидай, бу уйнинг эркаги ва орияти ўлмаган дей таъкидлаётгандай эри ва ўғлининг полвонлик яктакларини ҳар ойнинг охирида шусиз ҳам ҳамманинг кўзига ташланиб турадиган уйнинг шашпартайига осиб қўярди: яктаклар ҳам бора — бора йиллар ҳовурига ҳамда ҳар ойда қайта ювадиган нафрат тўла чанглалларга дош беролмади: Замон қассоб ўлимидан бир кун олдин яктаклар торда увада — увада бўлиб осилиб турар, улар энди кийимдан кўра кўпроқ қабрлар устига илиб қўядиган лаҳтакка ўхшаб қолганди.

Замон отбоқарнинг ўлими ҳам Байна момонинг қалбини юмшата олмади: унинг ўлими тўғрисидаги хабарни келтиришганда Байна момо ўз ҳужрасида келинлик сандиги ёнида чўкак тушганча мусибату фамга кўмилиб ўтиради: унинг шу туриши азоб — уқубатнинг бир тўплам уюмига ўхшарди. Ҳужрага бош суқдан Розия момо унга Замон отбоқарнинг ўлими ҳақидаги хабарни етказди. Барча аёллар ҳозир қувончдан ҳаммани бир — бир қучиб чиқади деб ўйлашганди. Аммо Байна момо хабарни маликалардек хотиржам қабул қилди: у бу хабардан ажабланмади ҳам, ўтирган жойидан остонаядаги аёлларга бурилиб ҳам қарамади — ҳайкалдай, тошдай қотиб ўтираверди. Фақат унинг бармоқлари қалтираб турар, хонага қон ҳидидай ноxуш ҳид ўтириб қолганди. Аёллар ундан жавоб кутиб, узоқ ўтиришди. Орадан анча вақт ўтгач, Байна момо уларга ўтирилиб ҳам қарамай, гўё уларни кўришдан ижирғангандай ва жиркангандек алфозда «Боринглар, ўликларингга йигланглар» деди. Унинг қаҳр тўла товуши кўпдан бўён одам қадами етмаган ҳужралар ичига сингиб кетди: у ердан йигирма етти йиллик чангут губор гўё зардали овоздан қалтираб кетгандек жойларидан бир қимиилаб қўйди, сўнг яна ҳужраларга бу хонадон бошига тушган фам — андуҳдай

абадий чўқди. Шундай дея Байна момо мусибат ва ғам адо қилган, йилдан – йилга кичрайиб, қариб бораётганидан ва юзини тилим қилиб ташлаган ажинларидан уялгандаи фаслма – фасл ранги ўзгариб, худди бекаси каби туссиз, рангсиз кўринишга келиб қолган ва ҳеч қачон елкасидан тушмаган желаги билан юзини аёллардан тўсиб олди; шу билан у терсоталиклар ва одамлар билан ўрнатилажак барча мулоқотлар эшигини тақа – тақ ёпди ва фақат ўзигагина маълум, бошқа ҳеч ким англай олмайдиган, бошқа ҳеч ким англашга қодир бўлмаган ўз дунёсига кириб кетди.

Байна момо сўнгти нафасигача ўз нафратига содик қолди. Замон отбоқарниңг ўлимидан сўнг ҳам қишлоқдошлари билан илакишиб кетолмади. Умрининг охирида бу ўжар кампир барибир ўзлариникига кўчиб бормаслигини сезгач, синглиси билан күёвининг ўзлари кўчиб келишди: аммо бу пайтда Байна момо бутунлай оёқдан қолган, фақат кун узоги кўзини шифтта тикканча чўзилиб ётишга яради.

Байна момони эри ва ўғлининг қабри ёнига қўйишди: эллик йил аввалги қабрни осонгина топишиди; қабр деярли ҳар ҳафта тозалаб турилганидан бошқа қабрлардан якъол ажralиб турар ва ундан мискин бир андуҳ анқирди. Унинг Райим полвондан сўнг деярли янгиланмаган, ҳатто уларга ҳам мусибат ва ёлғизлик ҳиди ўтириб қолган кўйлакларини ҳалқ лапарларини йиғиш учун келиб, қуриб кетишган ва ўша талаба қизлардан сўнг бирон марта фойдаланилмаган торга узоқ жанглардан сўнг мағлуб бўлган қўшиннинг ўзларига ўлжа қолган туғларини осиб қўйишгандек ва қишлоқдошларидан эллик йил нафрат қилган аёл устидан ниҳоят галаба қилишгандек бирма – бир осиб чиқишиди. Талаба қизлар ўшанда Замон отбоқарникига йиғилган, пишириқ – мишириқни бошлашган аёллар қий –чув қилишаётган оқшомда келишганди. Уларнинг келиши билан Замон отбоқарницида бошланган тўй ташвишлари қўшилиб кетди. Бироқ қизлар қишлоқ иримларини назарига ҳам илишмади. Байна момоникига кела – солиб, кир ювишга тушдилар – улар ичкўйлак, рўмол, яна Байна момога ғалати кўринган шимларини шундоқ ҳаммага кўз – кўз бўладиган жойга бемалол осиб қўйишди – улар Мели ўқитувчининг ҳишилоқдаги энг кекса аёл» деган бир оғиз гапи билан

Байна момониқига келиб ўрнашиб олишган, афтидан, ҳали – бери кетишмоқчига ўхшамасди. Байна момо улар билан очилиб гаплашмади ҳам. У кечқурун эчкиларни соғаркан, қизлар ҳайратдан қий – чув қилиб юбордилар: уларнинг биронтаси ҳам эчки соғишини кўрмаганди. Қизларнинг бир – иккитаси Байна момога яқинроқ келиб, унинг эчки елинiga бориб келаётган қоқсуяқ кўлларига қарадилар: кейинчалик миршабларнинг ҳафсаласини пир қиласан, худди уйнинг девори каби йиллар уқалай – уқалай жимитдек қилиб қўйган гавдасини сал олдинга эгиб турганидан унинг ўзи ҳам қари ва озғин эчкига ўхшаб қолганди.

—Агар ўғлингиз бўлганида мен сизга жон – жон деб келин бўлардим, – деди қизлардан шаддоцроги Байна момонинг эчки соғишидан завқи келиб.

Байна момо унга ўқрайиб қаради ва кўзларида бирдан алам ёнди: қизлар қўрқиб кетиши: кўз олдиларида Байна момонинг бутун танаси бирдан тутаб жўнагандай туюлди. Қизлар дуд ҳидини аниқ сезишиди. Байна момо ўрнидан турди – да, қўлидаги кадини супага қўйиб, ичкари кириб кетди ва шу киргани билан эртасига эчкиларини юлғунзорга ҳайдаб кетмагунча ҳайтиб чиқмади. Чошгоҳ пайти эчкиларини ҳайдаб кетар экан, қизларга бир оғиз ҳам гапирмади. У худди ойпарастга ўхшаб кетиб борар, эчкилари юлғунзорга эмас, Пўлат чолнинг бедапоясига қараб кетаёттанини ҳам сезмай, юлғунзор тарафга йўл олганди. Пўлат чол қорни шишиб кетган эчкиларни ҳайдаб келганда Байна момони уйдан тополмади: у алламаҳал, ой атрофни сутдай ёритганда шарпадай кириб келди ва уйга кириб кетиб, то миршаблар сўраб келмагунча уйдан чиқмади. Қизлар бир ҳафта унинг оғзини пойлаб овора бўлишгач, бирон нарсага эришолмай ҳайтиб кетишиди. Улар уй олдида пайдо бўлишлари билан уйнинг таназзулга юз тутгани бирдан билиниб қолди. Улар навқирон ва гўзал эдилар, уйдан ва Байна момодан чиркинлик ва мусибат ҳиди келар, навқиронлик олдида бирдан уй ҳам, Байна момо ҳам кексайиб қолгандай эди. Улар бу уйга ўрнашиб қолган ёлғизлик ва мусибатни чўчитиб, сўнг қувиб юборишмоқчидаётинмай хохолашардилар. Талаба қизларнинг очиқ – сочиқлиги ва лорсиллаган таналарини кўз – кўз қилиш учун

кийиб олган тор шиму кўйлаклари, калта соchlari – ю ғалати, оппоқ пайпоқлари ҳам табиатан текин томошани яхши кўрадиган терсоталикларнинг эътиборини тортолмади: уларнинг шаҳар атири уфуриб турган ноз ва таманнолари сирли тарзда ўлдирилган отбоқарнинг азаси орасида кўзга ташланмай қолди. Узоқ вақт фарзандсизлик азобини тортган отбоқарни қирқдан ошиб дунёга келган уч ўғлига бирваракайига дабдабали тўй килиш учун казо – казоларни шахсан ўзи айтиб келиш мақсадида шаҳар тушиб кетгандан икки кундан сўнг эрталаб дарё бўйидаги юлғунзор ичидан чавақланган ҳолда топиб олишганда аллаҳачон тўй қозонлари қурилиб, узоқ манзиллардан баъзи меҳмонлар кела бошлаган эди. Узоқ йиллар ўзларига суюнчиқ бўлиб келган отбоқарнинг ўлими худди душманларидан ўзларини асраб турган қўргонлари қулагандек терсоталикларни бирдан мунғайтириб қўйди – улар ҳарийб чорак аср раҳнамо ва пешволари бўлиб келган одамнинг ўлимидан қаттиқ қайғуга тушдилар. Эртасига етиб келган миршаблар қишлоқдаги ҳар бир эркак билан гаплашиб чиқиши, сўнг улар Байна момоникига йўл олдилар – улар йигирма етти йил муқаддам отбоқар туфайли эри ва ўғлидан ажралган аёлни тўсатдан эслаб қолишганди. Бироқ улоқлар ичida улоқдан ҳам кичик жуссали, юзига йилларнинг бешафқат муҳри босилган ҳамда ёлғизликка маҳкум этилган, ҳар бир сониянинг мусибату андуҳи асорати порлаб турган кичкина, жимитдай, соchlari оппоқ бўлиб қолган кампирни кўришгач, негадир ботиниполмади – улар қаршиларида рамақижон кампир билан девдай Замон отбоқарни қиёслашиб, ўз шубҳаларидан уялиб кетиши, чоғи, индамай изига қайтдилар. Улар, гарчи Байна момони сўроқ қилганларида ҳам ҳеч нарсага эриша олмасдилар – у кейинги йилларда бир оғиз ҳам гапирмаган, сўзлар ва уларнинг маъноси унинг хотирасидан чиқиб кетгандай ёки ўз моҳиятини йўқотгандай, ўз қайғу ва азоби билан кунларни зўрга енгиб яшаётган эди. Замон отбоқар итдай ўлим топганди. Жасаднинг шу туриши аввал ўзи, кейин тепаси қулаб тушган улкан минорни эслатарди – кийимлар пора – пора йиртилган, аврати узиб ташланган, ўнта бармоқнинг ҳаммаси кесиб олинганди...Барисир бармоқни излааб топишполмади.

Жасадни бармоқсиз кўмишга тўғри келди: бутун қишлоқ нақ қиёмат майдонга айланганди: аёллар уввос солиб йиғлашар экан, энди соchlари қордай оппоқ, деяраи арвоҳга айланган, қишлоқдошларининг хотирасидан ҳам чиқиб кетган Байна момо том устида Райим полвонни итдай отиб ташлагларидан бир неча дақиқа олдин отини эгарлаш учун олиб чиқаётгіб, ўққа дучор бўлган, йиллар пора – пора қилиб ташлаган жабдуқ устига чўкак тушганча тўй деб келиб, аза устидан чиқаётган меҳмонларни, тўй бераман деб, энди аза берәётган қишлоқдошларини кузатиб, худди қутлуғ бир вазифани ўтаб, энди дунёда армони қолмагандек, йиллар гижимлаб ташлаган юзида бир жунунваш ифода қотиб қолган ҳолда терсоталиклар ҳаётига йигирма етти йил соя соглан том ҳайкал каби қылт этмасдан ўтиради.

Ниҳоят бу кампирнинг ҳам ситамгар китоби ўқиб бўлинди – лайлутулқадр кутилаётган оқшом ёғоч ва кўп йиалик андуҳлар ҳиди ўтириб қолган, содиқ қўшиңдай эзлилк йилнинг бирон куни ҳам тарк этилмаган фамнок ва аламли салтанати – келинлик тўшагида жимгина жони узилди – фақат ўлиши олдидан синглисини чақириб йигирма йилдан бўён очилмаган, олтмис етти йил олдин тераклилик Кўр Сафар уста ясаган, ярим вайронга сандиққа имо қилди ва бир сўз демай тўшакка бош қўйиб жимгина жон берди. Уни эртасига тушга яқин чиқаришди. Удумга кўра азага Ўранинг барча қишлоғидан одамлар терилиб келишди – амир замонларини кўрган, нариги асрнинг сўнгти ёдгори бўлган қишлоқдошларини сўнгти йўлга кузатиш учун барча кекса – ю ёш йигилди. Йигилганлар орасида Райим полвон билан ўғлини ҳимоя қилолмай, Байна момонинг бир умрлик нафрatiга дучор бўлган, ўша пайтда навқирон, энди шарти кетиб, парти қолган чоллар ҳам бор эди. Улар орадан эзлик йил ўтгач, бу унут ва музтар гўшага биринчи бор қадам кўйишган ва тобут ортидан гуноҳкорона бўйин эгиб борипарди.

Мурдани ювиш олдидаи сандиқни очишиди. Аввал ўлимликка аталган кийим – кечакларни, кафанни олишди, сўнг дастаси қорайиб қолган қамчи, сопига гавҳар ўрнатилган ханжар, эркак кишининг тер ҳиди келиб турган калапўши, кўкракка тақадиган зебигардон, кампирнинг

күлида ҳеч қачон күрінмаган көлінлік билагузуғи, этаги
каштали, ёқасига тасма урилған кенг күйлак, ангишвона ва
сарғайыб кеттган құръонни олишди. Эң охирда сандиқдан
богичини чирк боғлаган, қаптарнинг юрагидек кичкина,
матоси зар сим билан тикилған, күп йиллик қон қотиб қолған
тумор ва тиғи занглаган қайчи, күп йил турғанидан бүғин –
бүғин бўлиб, фақат сұяқнинг ўзи қолған, у ҳам қорамтири
тус олиб, нақ кукунга айланиш арағасига келған, чорсининг
йиртиғига пала – партиш ўраб ташланған ўнта одам бармоги
ҳам топилди...

ЯЛПИЗ ҲИДИ (Туркум ҳикоялар)

I

САРОТОН

Дам олиш куни хонасида китоб ўқиб ётган Самандарнинг димогига бирдан ялпиз солинган шўрва ҳиди урилди ва саккиз яшарлик пайти баҳор кунларининг бирида ҳаёт¹ ларининг бурчагидан отасининг бир қулоқ ялпиз териб келгани ва онаси кечқурун ялпиз шўрва қилгани эсига тушди – ю, китобни ёпиб, ҳавони бурнига торта бошлади. Сўнг ўрнидан туриб, дераза пардасини сурди ва у ердан кўриниб турган, ҳали тўла сарғаймаган дараҳтларни кўриб, кўнгли чўқди. Боғга ҳафсаласизлик билан кўз югуртириди. Боғдаги дараҳтлар сийрак, лекин сершоҳ зди; қаровсиз қолганидан боғни чириган чакалаклар босган, айни саратонда бу манзара нохуш таассурот қолдирап, кўп йиллардан бери қуёш кўрмай касал бўлиб ётган шол кампирнинг қўлидек қуруқ ва кўримсиз зди. Самандар улардан нигоҳини дарроғ олиб қочди. Шоҳларнинг синиб, сарғайиб, мунғайиб ётишини ортиқ кўргиси келмади. Негадир юраги ғаш бўлди. Деразага яқин иккита дараҳт узун маржон шаклида мева қилган, меваси ҳали фур ва дараҳт тусига нисбатан яшилроқ ва ялтироқ зди. Дараҳтларнинг остида ботаётган қуёшнинг тангача шуълалари ўйноқларди. Боғнинг ярми жўка, дуб ва Самандар ҳали номини ҳам билмайдиган дараҳтлардан иборат зди. У шаҳарда ҳар қадамда учрайдиган бу дараҳт

¹ Ҳаёт(шева) тоғли қишлоқларда ҳар хил экинлар эки – ладиган томорқа.

турларини бир – биридан зўрға ажратарди. Жўка дарахтини узоқ йили озғингина боғбондан билиб олганди. Боғбон ҳам боғдаги дарахтларнинг кўпчиллигининг номини билмасди. У фақат шарқона дарахтларнинг қийналмай санай оларди. Самандар эса ёшлигидан таниш бўлиб қолган олча, олма, шафтоли ва ёнғоқ дарахтларнингина таналарига қараб ажратиб берарди. Бироқ боғга дарахтлар аралаш – қуралаш экиб ташланган ва у боғдан кўра алланечук қаровсиз хиёбонга ўхшаб кетар, мевали дарахтлар деярли йўқ эди. Самандар деразага яқин, ҳали меваси қизарар – қизармас боғ ичидан ўтаётган мактаб болалари талааб кетадиган олча дарахтини ва панжара тўсиққа қаватма – қават экилган, лекин ҳеч қачон ёлчитиб мева қилмайдиган жийдани ёқтиради. Олча дарахтининг танаси кексаларга хос ғадир – будир, сершоҳ, сермева эди. Жийда эса баҳор пайтлари бутун шаҳарни ўзининг ҳиди билан тўйдиради. Самандар деразадан кўринаётган олча дарахтининг осмонга тулашиб кетган юқори қисмидаги баргларининг сарғая бошлаганини кўрди. Шоҳда барглар қатор тизилганди ва Самандарга яқин бўлгани учун осмонни тилимлаб турган дастасиз ханжарга, барглари эса осмон саҳнида улкан мовий кўлга бир – бирининг тумшуғидан боғлаб, қатор териб қўйилган кичкина қайиқчаларга ўхшарди. Бу ҳозир Самандарга боши оғриб тургани учун ёқимли манзарадек бўлиб туюлди. Ҳатто баргларнинг қайиқчаларга ўхшашини кашф этганидан хурсанд бўлиб кетди. Баргларнинг худди денгиз тўлқинида солланиб турган қайиқлардек тебраниб турганини ва осмоннинг жуда ҳам мовий, боғнинг бўм – бўш, дарахтларнинг сукутда экани бир зум жуда ноёб гўзалликдай бўлиб туюлди. Ҳозир Самандарнинг қулоғига нарироқдаги катта йўлдан трамвай ва троллейбусларнинг тақа – туқлаб ёки гувиллаганча ўтиб бораётгани ҳам, машиналарнинг сигнали ҳам, болалар боғчасидан келаётган шовқини ҳам кирмасди: у ҳозир мана шу ноёб гўзалликни бутун онгиға, шуурига сингдирмоқчилик, фақат боғ ичида дарахтлар ва барглар шитиригагина бутун зътиборини жалб этганди. Жўка дарахтининг қуёш тегиб турган қисми сарғиш, бошқа қисмлари қорамтири – пистоқи тусга кирганини англаб қолди. Жўка дарахтининг сербарг

новдалари орасида унинг шохлари деярли кўзга ташланмас, дарахт у турган деразадан ярми қора, ярми сариқда бўялган эски гумбазга ўхшаб кўринарди. Самандар бир ҳафтача олдин К. майдонидаги хиёбонга борганини эслади. Хиёбонда ҳали ҳамма нарса ям – яшил, гүё баҳор ҳали кетмагандек, гуллар очилган, арчалар хушбўй ҳид таратган, майсаларда намчил тафт бор эди. Хиёбон шу даражада гўзал, рутубатли, ҳар хил рангта беланганд ажаб бир манзарага зга эдики, айниқса, қуёш ботган маҳали бу манзара яна ҳам гўзаллашар, кўзларини яшнатиб, юракни қитиқларди. Бироқ баҳри – дилини очиб юборадиган бундай гўзалликда қандайдир ясамалик бор эди. Самандар бу гўзаллик ўзига юқмаганини сезди. Ҳар хил шаклга солиб экилган гулзор ва майсаларнинг жозибасини ўзига сингдиролмади. У майсалар ичида ёки арчаларнинг доимо соя тушганидан зах бўлиб қолган жойларида биронта ҳам бегона, ёввойи, ўз ҳолича ўсиб ёттаи ўтларни кўрмади. Ҳатто кўм – кўк бўлиб оқаёттан хиёбон ичидаги кичкина жилғачанинг атрофи ҳам жуда зътибор билан тозаланган ва тартибга келтирилган эди. Тўрт бурчак шаклидаги майдонда майсалар қулф уриб яшнаб ётарди. Майсазорда фақат майса, гулзорда фақат гул ўсган, улардан одамнинг юзига роҳатбахш салқин ҳаво уфуар эди. Ўша куни Самандар худди ҳозиргидаи қишлоғининг чеккасидаи доимо сув сизиб ётганидан нақ чангальзорга айланган ва ёввойи гулларга бурканган тўқайни эслаганди. Тўқайда майсалар товон урар, ҳар хил гуллар аралаш дасталари сувга қониқиб, бутун бир тўқайнин ҳиди билан маст қилиб турган, тарсилмаган ёввойи ялпизларни, печакгул ва шамакгулларни, тўқайдаги юлгун, зирқ ва харсанглар соясида офтоб тегмаганидан сарғиш тусга кирган қоқигулларни эслаганди. Негадир болалигида унга қадрли бўлмаган тўқайдаги ўша анвойи гуллар, энди ҳатто ўсимликлари, гуллари ҳам тартиб билан ўсадиган шаҳарда унга алланечук ардоқли бўлиб туюларди.

У балким бир ҳафта олдин қишлоғининг четидаги тўқайда ўсадиган бўлиқ ялпизларни эслаган ва сўнг унугани учун ўша куни юзага чиқар – чиқмас, яна яширинган – ҳали ўзи ҳам нима деб аташни билмаган ботиний туйгулари ва хотиралар бутун китоб ўқиб ётганида ўз – ўзидан шуурини

банд этиб, бир зум сувга яшириңган пўкақдек хаёлига лиш этиб қалқиб чиқдану, унга ялпиз солинган шўрва ҳидини эслаттандир? Ҳар қалай, Самандар ялпиз солинган шўрва ҳидини қўмсарди. Шу сабабли бўлса керак, уйнинг орқасидаги болалар боғчасига қарашли қаровсиз боғ унинг кўнглига яқинроқ эди. Йўқ, у қариб саккиз йилдан бери шу ерда яшаёттани учун бу боғ қадрдон эмасди, балки, ўша, ҳатто одам тушунтириб бера олмайдиган, майсалар билан гуллар ўртасидаги ҳали буткул чегара ўрнатилмаган, ўсимликлар ўз эркича ўсиб ётган, баъзи кунлари деразани очиб, ишлаб ўтирганида ялпиз ҳиди келиб қолгани учун мана шу қаровсиз боғ Самандарнинг кўнгли ва хотираларига яқин эди.

Ўшанда у биринчи синфи тутатаёттанди. Ёмғир эндиғина ёғиб ўтган, боғдаги майсаларнинг кафтларида маржон – маржон томчилар жилваланар, отқулоқлар баргида ҳовуч – ҳовуч томчиларни кафтларига олиб, кўз – кўз қилиб турганга ўхшарди. Отаси билан ҳаётнинг отхона жойлашган қисмiga боргунча кичкина этиги худди яп – янгидаёт ялтираб қолган, бундан суюниб кетган Самандар ҳаётдаги ўтларга этигини тобора кўпроқ ишқаб ялтираттан, узун чопонининг жиққа ҳўл бўлгунча ўтлар ичида мастона – мастона ағнаганди. Ўшанда отаси отхона девори остидан бир қучоқ ялпиз териб олган ва онаси кечқурун ялпиз баргларини солиб шўрва қилганди. Ялпизларнинг дастаси бўлиқ ва серсув эди. Самандар ўша кунги шўрва таъмини бошқа ҳеч қаерда туймади ва жуда кўп қўмсади. Ялпизли шўрванинг қурут солинганидан бироз тахир таъми ўша куни унинг оғзида бир умр ўрнашиб қолди. Онаси кейинчалик ҳам ялпиз солинган шўрва қилиб берган, лекин ҳеч қайсиси ўша кундагидай Самандарга хуштаъм туолмаган ва дарров эсидан чиқиб кетганди.

Самандар олдинлари ҳам ўз хотиралари билан қаровсиз боғ ўртасида қандайдир уйғунлик борлигини кўп марта ҳис қилганди. Лекин бу қандай уйғунлик ва қандай ўхшашлик эканлигини ўзи ҳам билмасди. Боғнинг қаровсиз экани – ю, ўзининг доимо иккиланиб, шаҳар ҳаётига кўниколмай яшаёттани ўртасида қанчалик мутаносиблик борлигини ва нима учун бу ташландик боғга бунчалик кўнгил кўйгани –

ю, бөг нима учун ўзига азиз ва мўътабар туюлишини билмасди. Лекин кейинги ойлардан бөг унинг бирдан – бир ҳамдарди, унинг сўзсиз сұхбатдошига айланди. Кўнгли қачон ёлғизликни ёки қишлоқ хотираларини қўмсаб қолса, Самандар бօғга кирар ва қаровсиз дараҳтларга қараб, болалик пайтларини эсларди. Самандар дараҳтлардан анқийдиган чиркин ҳидни түяр экан, новдаларга, шох – шаббаларга, ҳазон уюмларига тўлиб ётган, дараҳтлари бўталаб кеттан бу бөг унга ҳар қандай сўлим ва бежирим хиёбонлардан гўзалроқ туюларди. Куз ёки баҳор пайтлари шаҳарга адашиб кириб қолган довуллар, боғдаги кекса дараҳтларнинг шоҳларини, қасир – қусур синдирап экан, Самандарнинг кўнглида ҳам нималардир қасир – қусирлаб кетарди. Шундай пайтлари уйқуси учиб, туни билан безовта бўлиб чиқар ва эрталаб бекатта чиқа туриб, довулга дош беролмаган шоҳларнинг мағлуб ботирнинг синган найзасидай ерга осилиб турганини кўради; шундай лаҳзаларда дараҳтларга азбаройи раҳми келганидан, бу йилдан бошлаб бօғбон тайинлашларини сўрайман, деб аҳд қиласди. Жиккаккина бօғбон эса уч йил олдин қазо қиласди. Ундан кейин бөг ўз харажатини қопломагани учун ташландиқ бўлиб қолди. Лекин баҳор келиши билан бөг ёввойи гулларнинг ва ям – яшил дараҳтларнинг нафис – муаттар ҳидларига тўлиб кетар экан, Самандар ҳамиша ўз аҳдини унугиб қўяр ва бօғнинг гўзаллигига мафтун бўлиб қоларди. Дараҳтлар шу даражада зич, тарвақайлаб кеттан эдики, синган – чириган новдалару ям – яшил барглар, ранго – ранг гуллар ичидаги дараҳтнинг ўзи кўринмай қоларди. Баъзан бу ердан бир иккита адашиб чиқиб қолган ялпизни ҳам топиш мумкин эди. Бироқ ёввойи гуллар кўп эди. Самандар ялпизни кўрганида ҳамиша ҳаяжонга тушар, ютоқиб ҳидлар, кўнглида жўш урган хотиралар чўғига шу билан сув сепмоқчи бўларди. Бироқ ялпизнинг ҳиди у куттандай димогини куйдириб юборадиган даражада ўткир бўлмасди. Аксинча, ялпизда кўпроқ заҳ ҳиди ўрнашиб қолған эди. Шунда Самандар беихтиёр отаси отхона девори остидан териб қелган ялпизларни ва ялпиз солингган шўрва ҳидини эсларди ва кечки пайтлари бөгда сайр қилишни яхши кўради. Шоҳлар тарвақайлаб кеттанидан бөг ичидаги

йўлаклар ҳам ёпилиб қолган, Самандар боғни айланиб нариги томонга ўтарди. У томондан боғнинг ичига кирадиган йўл очик эди. Боғ ўз кексалиги ва ташландиқ эканлигини одамлардан яшириш учун атрофни шох – шабба билан ўраб ташлагандек эди. Бу ерда йўлак бўйлаб, тифиз қилиб пўстағидан ҳамиша рутубат анқиб турадиган тераклар экилган, йўлак орқали боғ тўрига кириш ва болут дарахти остида ўтириб bemalol хаёл суриш мумкин эди. Самандар ўтиргичда соатлаб китоб ўқир экан, гоҳ жийда, гоҳ дубдан таралаётган сокин кўклам ҳиди ёки ёввойи гулларнинг анвойи ҳидини сезарди. Бундай пайтлари чиркин шох – шабба ва ҳазонларнинг ҳам ҳиди хушбўй бўлиб кетарди. Дарахт шоҳларида мунҷоқдай – мунҷоқдай ёмғир томчилари баргларнинг қорачиқлари қаби ўйнаб, ялтираб турарди. Баъзан томчилар баргларига сирғалардай осилиб оларди. Самандар бу ерда ўзини эркин ҳис қиласар, ҳар қандай хушту – хаёлларига эрк бера оларди. Гоҳида унга боғдаги гўзалликда ҳам қандайдир нуқсон бордай бўлиб туюларди. Бу қандай нуқсон эканлигини унинг ўзи ҳам билмасди. Самандар қишлоқдан шаҳарга келган пайтларини, у пайтдаги туйгуларининг нақадар поклигини ва ҳаёта завқ – шавқ, ҳайрат билан қараганини армон билан эсларди. У ишга борар, вақтида қайтарди, мана етти йилдан бери ҳудди шу аҳвол эди. Маълум тартибига тушшан: вақтида ишга борар, иш тугаши билан қайтар, дам олиш кунлари китоб ўқир ёки бирон дўстиникига борарди. Етти йиллик таржимаи ҳоли мана шу битта жумладан иборат эди. Кейинги йилларда ўзидан норози бўла бошлаганди. У ўз ҳаётидан қониқмас, умрининг кун билан туннинг ўзгаришидай бир хил эканлиги уни тобора ҳафсаласиз қилиб қўйган, тез – тез қишлоқ хотираларига бериларди. Хотирага берилиш билан тезда гуп этиб ялпиз солинган шўрва ҳиди димогига урилар ва беихтиёр ҳапқириб кетарди. Шунда бирдан юрагида ҳар хил туйгулар ғалаён қилиб қолар, у ерда изнисиз довуллар бошланар, тўрт томони ҳам девор бўлган каталяқдек уйда юраги сиқилиб кетар ва секин бокқа чиқарди; оқ, ҳарир гулабаргларнинг ҳудди қуш патидай учиб тушишларини ва сўнг жажжи қушлар қаби оҳиста ерга қўнишини кўриб, бу бир лаҳзалик гўзалликдан кўнгли завқ – шавққа тўлиб кетар.

умрининг беҳуда ўтаётгани ҳақидағи ўй – хаёлдан аста – секин форигланиб борарди. Балки, мана шу сабаб бор билан Самандарни бир – бирига яқин қилиб қўйгандир?! Бор ҳам Самандарнинг назарида унга ўрганиб қолгандаи эди. Уч йилдан бери у билан суҳбатлашар ва Самандар ўзи енгил тортгани сайин бор ҳам ташландиклигини унутаяпти, менга дардларини айтиб бераяпти деб ўйларди. Чунки у кирганда дараҳтлар унга нелардир деб, шивирлай бошларди ва унинг кўнгли ҳам овозсиз шитир – шитирларга, чаҳ – чаҳларга тўлиб кетарди. Шундай лаҳзаларда Самандар бор билан ўзининг қалби айнан бир нарса эканлигига сира ҳам шубҳа қилмасди.

Самандар отасининг отхона девори тагидан ялпиз териб келганини ва ўзининг барра гул бедага то чопони ҳўл бўлгунча ағнаганини, майса қулоғидаги ёмғир томчилари унинг бўйнидан ичига тушиб, қитиги келганини орзиқиб эсларди. Бедага ағнагани худди ялпиз солинган шўрва ҳидидай унинг эъзозли хотираларидан бири эди. У бошқа, ҳеч қаерда, ҳеч қачон ўша кунгидай завқ билан, шодлигидан қийқириб, ўзини батамом баҳтли ва эркин ҳис этмади.

Талабалик йиллари тоққа чиқиб, майсаларни кўрганда болалиги тутиб кетган, майсаларга мастона – мастона ағнаганди, лекин бу ағнаш унга бедага ағнаганчалик завқ бермаганди. Богдаги майсаларнинг қулф уриб яшнаб ёттанини кўрганда Самандарнинг ёшлик ҳумори тутиб кетар, лекин у энди бола эмас эди, атрофдаги баланд – баланд бинолардан аёллар ва эркаклар эрмак учун шунчаки борни томоша қилиб ўтиришар ва эsnаб қўйишарди.

Мана энди бу манзаралар у одатдагидай дам олиш кунларининг бирида китоб ўқиб ёттанида, булат ичига яширинган қуёш каби хаёлига балқиб чиқдан ва бутун хотираларини ёритиб юборган ҳамда тоҳ болаликка, тоҳ отаси ялпиз териб келган олис оқпомга, тоҳ қаровсиз қолган боққа ўҳшаб кетадиган ажиб бир хотиранинг торини чертиб юборганди. Самандар бу торнинг кўнглида борлигини илгарилари ҳам сезганди. Энди эса бу ўйчан ва ҳазин оҳангта қўшилиб, ўзи ҳам саркашлик ва ўйинқароқлик билан ўтган, лекин ҳозиргига қараганда мазмунлироқ, ва баҳтлироқ,

бўлган болалик кўчаларига ва ўша олис оқшомга мана бу ташландиқ боф орқали ўтиб борарди. Боф энди унга фақат хогиралар макони эмасди, балки, умрининг бир қисми ҳам эди, ким билади, эҳтимол умрнинг айнан ўзи ҳамдир.

II

ҲАЗОНРЕЗ

Куз қандай келганини Самандар деярли сезмай ҳам қолди. Мезон ойининг бошларида сафарга кетди – ю, ўн кунлардан сўнг қайтиб келди. У қайтиб келган куни шаҳарга ёмғир ёққанди. Ёмғир шу даражада енгил ёғандики, гүё кимдир бутун шаҳар устига ҳўл рўмолчасини бир силкитиб олгандай эди. Шаҳардаги дарахтлар ҳали ўз рангини йўқотмаганди. У кечқурун боф айлангани чиқди – ю, тоңг қолди: бу ерда куз аллақачон бошланган, қуриган новдалар чирт – чирт узилиб тушарди. Энди боф ёздагидан ҳам кўра аянчли тусда эди. Ёмғир тафти аралаш ер ҳиди келаёттан бўлса – да. Самандар кўпроқ қуйинди ҳидини сезарди. Бу ҳид фаррош аёл болалар боғчаси атрофини супураётганда боғдан учиб борган ҳазонларни ёқиб юборган жойдан – кекса ёнғоқ дарахти тагидан келаётганди. Самандарга бу ҳид ноҳушиб нарсадан даракчи бўлиб туолди.

Бир ҳафталардан сўнг столида уч дона номозшом гуленинг сўлиб ётганини кўрди – ю, ногаҳон куз келганини ва бунга ўзининг ишонгиси келмаётганини англади. Гулларни уч кун олдин қизи болалар боғчасидан – гулзордан узиб келганди, сўнг отасига мақтаниб кўрсаттани эди: қизи гулни ҳадеб искарди. Самандар ҳатто ақли етмаган гўдак ҳам гўзалликка бунчалар шайдо бўлишини кўриб, ҳаяжонланиб кетганди. Қизининг юзи ҳам эндинигина очилган гунчадай яшнаб турарди; қизи унинг китоблари билан овора бўлиб, гулни стол устида унугиб қолдирган, у келтиргандага гулларнинг сарғиш гулбарглари ҳали сўлим эди. Самандар уч кунча олдин гулларни столида кўриб, ухлаб ёттан учта гўдакка ўхшатганди; энди эса, қожираб қолганда улар болаларга яна ҳам кўпроқ ўхшар, фақат уларда қаётдан

асар ҳам йўқ эди. Гуллар қуриб,mallat тусга кирганди. Самандарнинг уларга кўнгли ачишди – ю, столи устидан олиб ташлагиси келмади; гулларнинг биронта ҳам барги тўкилмаганди, улар ўлим билан мардонавор жанг қилганди. Бу йил куз, унинг назарида, бошқача келди. Энди тўкилаёттан ҳазонларни у кузнинг тириклик ва ўлим ҳақидаги қасидаси деб эмас, балки ҳарир қуилак кийган, хаёлидаги ва боғдаги мусиқага мос рақс тушаётган фаришталар деб ўйлай бошлади. Самандар кечқурунлари ишдан қайтар экан, троллейбус деразасидан баргларнинг қандай тўкилаётганини кўриб, юраги орзиқар, уларнинг бунчалик тез тўкилаётганидан ҳайратта тушарди. Автобус ва троллейбус шарпасидан йўл бўйидаги дараҳтларнинг барглари дув тўкиларди. Кечки қуёш шуъласида Самандар баргларнинг қандай ялтираб кетганини ва ҳавода узоқ пирпираб турганини кўрганда, бир пайтлар қандайдир кинода кўрган денгиз ҷагалайлари эсига тупарди. Ҷагалайлар ҳам кўм – кўк денгиз устида оғирликларини гоҳ у – гоҳ бу қанотига солиб учар ва тонги қуёшда уларнинг оппоқ қанотлари жилваланиб кетарди. Тўкилаёттан барглар эса қандайдир улкан идишдан узлуксиз тўкилиб турган тафтсиз митти юлдузчаларга ўхшарди ва ҳавода узоқ пирпираб туриб қоларди. Самандар шунда таниш ёш шоирнинг куз ҳақидаги сатрларини эсларди ва ҳаёлан бу сатрларни такрорлар экан, шеърдаги ташбеҳдан ҳамиша ҳаяжонга тушарди.

Баъзида деразадан саратонда ўзи бир – бирига тумшуқларини тираб, боғлаб қўйилган қайиқларга ўхшаттан шоҳ энди шип – шийдам бўлиб қолганини кўриб, қайиқлар Денгиз бўйлаб қаёққадир сузид кетган, кўрфаз бўшаб, энди фақат феруза Денгизгини қолди деб ўйларди. Бу Денгизда ҳам тез – тез бўронлар бўлиб турар, уни қоп – қора довуллар қоплар, қийқирганча тўда – тўда булуғларни қайгадир қувиб ўтиб қолар, жала пайти эса боғдаги ҳазонлар ростдан ҳам қайиқчалар каби қаёққадир оқиб жўнарди.

Самандар кўнглига оқиб кираётган шу тахлит кечинмалардан ўзини маст бўлиб қолгандек сезарди. У бу туйғулар қалбига оқиб кирган сайин мулоҳазалироқ, мулоим, дилгир бўлиб бораётганини англарди ва ҳозирги ҳаёти аввалги ҳаётидан мазмунлироқ туюларди. У авваллари

йиллаб бирон марта ҳам чин юрақдан гүссага түшмаганини, ҳайратланмаганини таажжуб билан эсларди. Ваҳоланки, ўшанда ҳам шу бор зди. Куз ўшанда ҳам худди шундай сирли тууларди. Сабабини ўйларди – ю, тагига ета олмасди, лекин менинг бунчалик хазонришта бўлиб қолишимиға ўша саратондаги яллиз солинган шўрва ҳидини эслаганим сабабчи бўлди, бўлмаса, мен бу оламда гафлатда ўтиб кетардим, бу гўзалликларни сезмай қолардим, деб ўйлай бошларди. Баъзида эса куз ҳам, боғдаги сукунат ҳам, хазонларниг рақсга тушаётгани ҳам, кўнглидаги кечинмалар ҳам ва ўзи ҳис этаётган ботиний гўзаллик ҳам – ҳаммаси кўнглидаги ўтпа тутанмас қўшиқнинг давомидай бўлиб туулар ва ўша қўшиқ кўнглини энди тобора забт этиб олаётганини сезиб қоларди. У кузнинг аста – секин уйига ҳам бостириб кираётганини дафъатан сезиб қолди. Бир ойча оддин хазон боғнинг ўзида уйилиб ётганини кўрганди. Бир неча кундан сўнг эса хазон уй билан боғни ажратиб турган панжарадан ўтиб, йўлкага ҳам сирғалиб ўтганини кўрди. Бир ҳафтадан сўнг эса кечаси довул бўлди. Эрталаб у ишга отланаёттанида даҳлизда иккита хазон ётганини кўриб қолди ва шунда куз ҳатто уйга ҳам бостириб кирганидан хурсанд бўлиб кетди. Хотини эса унинг кечаси деразани очиқ қолдирганидан норози бўлиб, хазонларни супуриб олди – да, ахлат челакка ташлаб юборди, сўнг худди юқумли касалликнинг жойини тозалаёттандек даҳлизни яхшилаб артди. Самандар шунда бу хазонлар боғдан менинг уйимга мадад излаб учиб келган деган ўйга борди. Лекин бу ўйини хотинига айтиб масхара бўлишдан қўрқди.

Самандар бир кечаси дераза қаттиқ тақиллашидан уйғониб кетди. У ёттан жойидан шопиб турди – ю, гарантсиб деразани ва юпқа ёғоч тўсиқни очди, юзига ёмғир ҳиди, сўнг томчилар урилди. У зим – зиё тунда деразани қоқкан кишини қидириб аланглади, лекин ҳеч ким йўқ зди. Шунда у дераза менинг хаёлимда тақиллаган деб ўйлаб, хотиржам тортид. Бироқ эртасига яна кимдир деразани шопиб қоқди. Самандар деразани очиб ҳеч кимни кўрмади. Яна ёмғир аралаш хазон ҳидини сезди ва энди ўзидан хавфсирай бошлади. Фақат учинчи кунгина «безори»ни тутишга муваффақ бўлди: бу – деразаси ёпида ўсган кекса ўрикнинг

шохчаси эди. Шамол турганда шохча силкиниб деразани тақиллатарди. Самандар шохчани ушлаб кўриб, унинг ғадир – будир, совуқ эканини сезди: шохчада ҳаёт асари сезилмасди. Азбаройи шохчага раҳми келганидан унинг бандини бир – икки силади – ю, шохчага тегинмади. Унинг назарида куз ўзини безовта қилишга ҳаққи бордай эди. Шохча ўзини эслаганидан хурсанд ҳам бўлди. Бир куни ипдан қайтганида шохчанинг узиб олинганини, қора чирик пўстлоғи қўли кесиб олинган енгдай осилиб турганини кўрди – ю, бу хотинининг иши эканини билди. Эрталаб хотини бир ҳафтадан бери дераза тақиллашидан ухлай олмай чиқаёттанидан нолинган эди. Самандар шунда хотини билан ўзи орасида катта жар пайдо бўлаёттанини англади: бу жар тобора катталашиб борарди, назарида хотини ҳеч қачон ўзини тушунмагандай туюлиб кетди. “Гўзалликни бўғиб қўйиш ҳам, гузалликка нисбатан куч ишлатиш ҳам ер юзидан ҳаёт илдизларини сугуриб ташлаш билан баробардир”, – дея ўйлади Самандар қандайдир китобдан ўқиган сўзларини хотирлаб. Самандар шу кунларда бутун вужудига қайдандир келаётган хазин оҳанглар сингиб бораёттанини сезарди. Бу оҳанглар қаровсиз боғдан тараалаётгандай эди.

Самандар вужудида қандайдир тараңг тортилган торлар бору, торлар боғдан келаётган оҳангларга акс – садо бераётгандай туюларди. Баъзан торлар гўё танбур торларидан гўнғиллаб кетарди. Баъзида эса ёмғирнинг боғни ҳафсала билан чўмилтираёттанини деразадан томоша қилиб турар экан, ёмғир ўзининг кўнглидаги губорларни ҳам ювиб кетаёттанини ҳис этарди.

Октябрнинг иккинчи ҳафтасида кун бирдан исиб кетди. Ердан, айниқса, боғдан буғ ва ҳовур кўтарилди. Ҳовурдан чирик хазон ҳиди анқирди. Ҳатто одамлар кўйлакчан юра бошлиши. Бу мавридсиз ҳароратга алданган боғнинг чеккасидаги майсалар яна қайтадан ям – яшил бўлиб бош кўтарди. Самандар ишдан эртароқ қайтаркан, қўёш ҳали ботмаган, майдалаб ёмғир ёғарди. Бутун шаҳар рутубат қўйнида эди. Самандар ишхона ёнидаги хиёбон оралаб кета бошлиди. Хиёбон ўртасидаги фаввора атрофида одамлар гавжум эди. Ёмғир томчилари бошқа кундагига нисбатан бутун негадир одамларнинг завқини қўзғатиб юборганди.

Томчилар юзлардан оқиб, ёқаларининг ичига кириб кетаёттанды болса ҳам негадир ҳеч ким жунжикмасди. Ёмғир томчилари илиқ ва роҳатбахш эди. Самандар фаввора ёнида томчиларга кафтини тутиб турган яшил ёмғирпүшли етти – саккиз яшар боланинг бошида тождай порлаб турган камалак ёйини кўриб, ҳайратланиб бир зум йўлак ўртасида тўхтаб қолди. Камалак боланинг бошида тождай ярақлар ва томчилар фонида товус патидай жимирилаб кетар эди. Бошида тоҷ борлигини боланинг ўзи ҳам билгандай, юзида, кўзларида гурур ва ҳайрат жилваланарди. Қўли билан ёмғир томчиларини қучоқлаб олмоқчидаи шахти бор эди унинг. Салдан кейин бола катак – катак соябон кўтарган онаси билан зинадан кўтарилиб кетаётганда камалак ёйи боланинг белига осилиб қолди. Бу гўзал манзара эди. Бола ҳам ёмғир томчиларига юзини тутиш учун бир зум тўхтаганда камалак боланинг ёмғирпүши билан уйгуналишиб, яхлит бир сурат ясади. Энди камалак боланинг белида қиличдай осилиб турарди. Бола эса онасининг торғқилашларига қарамай ҳамон юзини осмонга тутиб турар, белида эса рангин шамшир ўйноқлар, бола ҳаракатига мос қилич бир йўқолиб, бир пайдо бўлгарди. Самандар токи бола зинадан гойиб бўлгунча унга маҳлиё бўлиб қараб турди. У кўпдан бери бундай манзарани кўрмаганди. Кўрган бўлса ҳам парво қилмаганди; олти ойча олдин табиат инъоми бўлмиш ҳар бир манзарада инсонни покладиган қандайдир синоат бор дейишса, у ўша кишининг устидан мазах қилиб кулган бўларди; ҳозир эса ташландиқ боқقا қараб, ўзини қашф этар экан, гафлатда бунчалик узоқ қолиб кеттанига ҳайрон бўларди. Камалак энди зинанинг ўзида қолган ва енгил ҳилпираб турарди. Самандар хиёбондаги фаввораларда пайдо бўлган яна бир неча камалакка кўзи тушди. Фавворалар юқорига отилар экан, ёмғир томчиларига урилар, ёмғир томчилари эса ўзидан ранг – баранг камалакларни таратарди. Қуёш қия ботаётганидан Самандар турган жойдан фаввора устида ловулаб атиргуллар очилгандай бўлиб кўринди.Faқат бу атиргулларнинг гулбарглари турли рангда эди. Фаввора атиргули ёмғир томчиларини енгиб, бир юқорига кўтарилилар, шунда атиргулларни яшил гулбарглари кўпаяр,

бир пасга солланиб эгилар ва қызил гулбарглари ловуллаб кетарди. Самандар бир неча сония қотиб турди ва юраги җапқириб кетди, назарида фаввора устига осмондан қучоқ – қучоқ атиргуллар ёғилаётгандай бўлади. Хиёбондаги майсалар яшил кўйлак кийган болалардай завқ билан юзларини чайишарди.

Самандар бекат томон борар экан, яна икки марта бурилиб фавворага қаради. Энди у ерда камалак жилваланмасди.

Самандар кейинги кунларда ҳам шу манзаралар таъсирида юрди. У баҳорда ёки сараторонда эмас, айни бутун борлиқ хазон бўлишга, чиришга, сўлишга юз туттан фаслда ўз қалбидағи фаввора устига тушаётган гулларни кўрганидан хурсанд эди.

III

БАҲОР ГУЛЛАРИ

«Буюклик ва гўзаллик ҳамиша ёнма – ён турса керак», деб ўйлай бошлиди Самандар шаҳарда ўриклар гуллаб, йўлакларни оқ – қизғиш гулбарглар қоплаб олган ва қўнглида ўзидан кўра улугроқ бир шижаот уйғонаёттанини англаган, ҳар бир гўзаллик бутун таровати ва фусункорлиги билан қўнглига оқиб кираёттанини ҳис этган пайтлар. Боф баҳор келиши билан бирдан ўзгача яшилланиб жўнаганди. Самандар ҳатто ўтган йили қуриб ётган дарахтларнинг қовжираган шохларида ҳам куртаклар ўсиб чиқаёттанини кўрганди. Гарчи чиркин ҳиди ҳамон таралиб турган бўлса – да, энди боғдан кўпроқ кўкат ҳиди келарди; бир ёввойи гурур билан очиалиб яшнаган анвойи гуллар ҳам боғта ўзгача фусункорлик багишлиганди. Гулларни, айниқса, ялпизни кўрганда Самандар завқланиб кетарди. Ялпизлар ҳам бу йил ҳар йиагидан кўпроқ эди. Болалар боғчасидан оқиб келиб, боғнинг этагини айланиб ўладиган ариқча атрофида бир қулочча жойда ялпизлар гуриллаб ўсиб чиқданди. Бу жой кекса жўка дарахтининг орқасида, кўздан пана жойда

бўлгани учун ялпизни бу йил ҳеч ким юлиб ташламаганди. Самандар боғдаги гўзалликдан руҳи тиниқлашиб бораёттанини сезарди. У кўнглида уйронаёттан туйгуларнинг булоқларини боғдан топгандай эди. Энди у ҳар куни боғта чиқар ва ярим соатча боғни айланар, кўнглида бирдан ҳеч кимга айтиб бўлмайдиган кечинмалар пайдо бўлаёттанини ҳис этарди; бу кечинмалар шунчалик нафис эдики. Самандар бу нафисликни бехосдан йўқотиб қўйишдан қўрқанидан боғ ичида оҳиста қадам ташлар; кўксидан жуда нозик гуллардан терилган гулдастани кўтариб юрганга ўхшарди.

Самандар ўз хаёлидан ва боғдан таралаёттган олам билан уйғунашиб борар, уйғунашган сайин қалбида кўпроқ ташналикини ҳис этарди. Самандар бир неча ойдан бери зариф туйгулар билан яшарди, у бу туйгуларни қайта йўқотиб қўйишдан қўрқар ва шунинг учун ҳар лаҳза қарисисидаги қаровсиз боғнинг битта гўзал томонини кашф этар ва тобора у билан уйғунашиб борарди.

Бир куни ишдан қайтиб, хотинига хонасининг боғга қараган деразаси олдига жой қиласиди: столни тахтлаб бўлгач, оромкурсига чўйканча, боғни томоша қила бошлади.

Хотин чой олиб келди; изидан ўзи ҳам курси келирди – да, эрининг ёнида ўтирди. Тўсиқ – панжара билан қатор қилиб экилган, лекин қаровсизлигидан шохлари панжара – лардан ошибб тушган гуллар улардан атиги бир неча қадам нарида яшнаб ётарди.

— Гуллар негадир бу йил бошқача очилди, — деди хотини унга қарамай. — Негадир бу йил кўнгилга жуда яқиндек туюлаяпти.

— Ҳар йили ҳам шундай очиларди, — деди Самандар,
— фақат биз зътибор бермасдик.

— Билмадим. Ҳар қалай, бу йил жуда бошқача, — деди хотини, — қараб турсанг, ҳар бир гул панжаралардан бошини узатиб қараёттан қизалоқларга ўхшаб кетади.

— Тўгри, улар билан болалар ўртасида қандайдир ўхшаплик бор, — Самандар хотинининг топқирлигидан завқланиб кетиб, унга кулиб қараб қўйди. Хотини увнинг гапини деярли эшигмади ҳам. У ўзининг таассуротларини бирдан гапириб қолишга ошиқарди, чоги.

— Қараб турсангиз, гуллар ҳам бир – бири билан жуда берилиб гаплашаёттанга ўхшайды; – деди яна хотини, – қулогинга қиқир – қиқир кулгандари эшитилгандек бўлади, агар бирон гул тебраниб қолса, ҳаммаси бирга қўшилиб тебранишади.

— Гуллар ҳам худди биз каби яшайди. Тўғри, бизга қараганда қисқароқ, лекин яшайди. Олдинлари гулни маъшуға қизга ўхшатишган. Қаранг, қандай гўзал.

Самандар аруздаги икки байтни бармоқ оҳангига солиб ўқиди.

— Бу кимдан? Бизда одамни гулга ўхшатмайди, шекилли, – деди хотини, – мен одамни гулга ўхшатишни қандайдир япон ёзувчисидан ўқиганман.

— Бобурдан. Мен ҳам илгари шундай ўйлардим, – деди Самандар ва хотини бир пайтлари ўзи билан адабиётларга муносабат масаласида ҳеч келиша олмаганини эслади. – Лекин тўқиз ой олдин Навоийни ўқий бошлигач, бу фикримдан қайтдим.

— Одам гулни кўрганда кўнглида нимадир туғилади – ю, сўнг дарров йўқолади, афтидан, у йўқолмаса керак, бизнинг ўзимиз унутсак керак, – деди хотини яна гулзорга қараб.

Самандар хотинига ҳайратланиб қаради.

— Баъзида гулни кўрганда кўнглинг шундай яшнаб кетадики, бирдан яшариб қолгандай ҳис этасан ўзингни. Шунда ўзинг – ўзингта хунук кўриниб кетасан, бирдан бошқача яшагинг келиб қолади.

Самандар хотинига баттар ҳайратланиб боқди. Чунки хотини унинг кўнглида кечаёттан, у бир неча ойдан бери тушуниб етолмаган нарсаларни жуда содда қилиб тушунтириб берган эди.

Бирдан хотини билан ўзи ўртасида жар кўрган ўша куз оқшомини эслади. Балким, ўша жар уларни айрича қилиб яқинлаштиргандир? Жар кўп нарсаларга тўсиқ бўлган – у, лекин уларнинг айнан бир нарсани ҳис этишларига, айнан бир нарса ҳақида бир хил фикрга келишларига йўл очиб бергандир? Ҳар қалай, Самандар ҳозир ҳижолат тортди.

— Ростдан ҳам, оқ атиргул гўзал бир қизга ўхшайди, – деди у ўзининг қизариб кетганини хотинидан яшириш учун.

— Қаранг, ана у гулбарглари — қат — қат сочлари, қизғишроқ яллиги бор гулбарг эса юзи... Соч юзни оҳиста ҳовучлаб турибди... гўзал бир ҳикоя чиқаркан... Нима дедингиз? Сўзга уста бўлсан, ўзим ёзардим.

Хотини унга яйраб тикилди. Самандарнинг ҳаяжони унга ҳам кўнганди, юзи қизил туман чангланиб кеттандайин, кучсизгина қизарди.

Қизи эшиқдан югуриб кириб, ўзини онасининг қучогига ташлади.

— Ойижон, мен оламушук куйдим, — деди у тилини ясаб, эркаланар экан. Онаси унинг бошини силади. Лекин гулзордан кўз узмай:

— Гулларнинг номини жуда топиб қўйишади — да, — деди, — тутмагачу, гулибеор, қирқогайни, оқжалирғоч... ростдан ҳам қалдирғочга ўхшайди. Ёшлигимда менга нуқул оқжалирғоч совфа қилишса, деб орзу қиласдим.

— Мен эса атиргул совфа қиласман, — эслатди Самандар, хотинини илк бор оппоқ кўк гулли кўйлақда учратгани кўз одига келди. «Ростдан ҳам ўша пайт оқ қалдирғочга ўхшарди», ўлади у дафъатан.

— Тўгри, — деди хотини, унга бир кўз ташлади — ю, уялиб, олиб қочди. — Карамга ўхшаган улкан атиргул эди. Лекин ҳиди ҳалигача димогимдан кетмайди, ўша гулни эсласам, негадир анови атиргуллар кўримсиз бўлиб қолади. Балким бу ёшлик хотираси бўлгани учундир?

— Анови гуллар қуёшчаларга ўхшайди, — деди қизчаси, дераза раҳига осилганча, қўли билан панжара ағнаб ётган жойдан кўринаётган гулларни кўрсатиб. У отаси билан онаси нима ҳақида гаплашаёттанини дарҳол англаб олган эди ва унинг чарос кўзлари ҳам ҳайрат, ҳам тўдаклик аралаш порлаб турарди.

Самандар қизи кўрсатган томонга қараб, сарик мойчечакларни кўрди.

Мойчечаклар митти қуёшчалар каби яшнаб турарди ва ҳозир Самандарнинг кўзига бу митти қуёшчалардан таралаётган нурлар бутун боғни чароғон нурларга тўлдириб юборгандай бўлди.

У қизнинг гапидан энтикиб кетиб, уни қаттиқ кучиб олди. Ўзининг ҳаяжондан ёшлигантан кўзларини хотинидан яшириш

учун күзларини оқиста юмди. Бирдан күз олдини ялтираб турган үргимчак уясидек түр қоплаб олди; түрнинг ҳар бир катагидан яшил шуълалар тараларди. У қобогини озгина ҳаракатта келтириши билан яшил шуъла алвонлашар ва бутун күз олди қип – қизил рангта тўлиб кетарди. Бу унинг юзига тушаётган қуёш нурларининг киприкларида акс этаётган жилвалари эди. Хотини унга худди энди кўраёттандек қараб турар, қуёш нурлари эрининг юзини оппоқ атиргулдай яшнатиб юборганидан дафъатан ҳайратта тушганди. Самандар күзларини очганда хотини ўзига тикилиб турганини кўрди. Кўнглини хотинининг кўзларидан таралаётган ҳайрат ва фароғат эгаллади. Ўзи ҳам хотинига ҳайрат билан боқди. У ҳеч қачон хотинининг кўнглини ўзига шу дақиқадагидек ҳамоҳанг ва яқин ҳис этмаган эди.

У дераза олдида юзини сўнаёттан офтобга туттганча ўтиради. Хотини билан қизи ошхонага ўтишди. У ердан қизининг қандайдир қўшиқни хиргойи қилаёттани эшитилди. У курсига яхшилаб жойлашиб олди.

Ҳавода кўкат ҳиди аралаш гул ҳиди бор эди.

Қуёш уфқ ортига яширинди. Уфқ алвон ранга беланди: ҳозир феруза осмон фонида бу ранг жуда тиниқ ва равшан эди. Феруза рангдан ҳам алвон рангдан ҳам мусаффолик тараларди.

У уфқда қараб ўтирган куйи беихтиёр бир йил муқаддам курсдошлари билан бир дўстининг қабрига боргандарини эслади. Марҳум тенгдошлари ичидаги энг ювош ва келишган йигит эди. У машинасида тўсатдан фожиали ҳалок бўлганди. Сабоқдошлари билан етиб боргандга марҳумни энди чиқаришаётган экан. Марҳумнинг барваста гавдали отасининг йигиси Самандарнинг юрак – бағрини эзид юборса ҳам негадир у йиглай олмаганди. Бу хабар бутуни тенгдошларини тўсатдан эсанкиратиб қўйганди. Улардан ҳеч ким йигламади. Ҳамма бошини эгиб тураверганди. Бу бошқаларга шумшук қўринаёттан бўлса – да, йиглашаёт – гандардан кам қайғуришмаганди.

Самандар марҳумни кўмишаёттандада оппоқ кафанинг ичидан унинг юзини кўргандек бўлганди: юзи ҳам оппоқ эди. Кейин кўмиб бўлишгач, кимдир қабр бошига бир тувак сариқ атиргул қўйди. Самандар ўша куни гулга

унчалик эътибор бермаган эди. Бироқ зартасига яна сабоқдошлари билан қабрга боришганда, кечаги гулмарнинг ичида фақат биттасигина бир кечада қовжираб қолганини кўрди. Бошқа гулмарнинг гулбаргларида ҳам сўлғинлик акс этса – да, улардан ҳали ҳаёт нафаси уфуриб турарди. Қуриб қолган гулнинг барглари ҳам тўкилиб, қабр атрофига сочилиб кеттан эди. У ўша куни гул билан одам бир – бирига жуда ўхшаш эканлигини ҳис эттанди. Бир кун олдин қўйиб кеттан гуллардан бири қабр бошида бир кечада тўкилиб бўлгани унинг хаёлидан ҳеч кетмади. У марҳумни эслаган сайин кўз ўнгига унинг оппоқ, келишган юзи келар ва ўлимига ишонгиси келмасди. Лекин у марҳумни эслави билан ҳаёт ва ўлим ораси бир қадам эканлигини ҳис қилар, ўзини ҳам қовжираб бораётгандай сезар ва вахимага тушарди. Сўнг у бу туйгуга кўнишиб қолди. Қачон гул билан қабрни ёнма – ён кўрса, ҳаёт билан ўлим ораси бир қадам эканлиги эсига тушар, гул ва қабр, марҳумнинг юзи ҳеч хаёлидан кетмай қоларди. Унинг хаёлида аста – секин гул, қабр ва марҳумнинг оппоқ юзи ўйғунлашиб кетди: назарида аввал марҳум гулдай қовжираб тўкилаган, изидан эса гул тўкилганди. Қабр билан гул орасига атиргулнинг сариқ гулбарглари тўкилиб тушарди. Ўша пайтда у сариқ атиргул билан қабр ўрасидаги бу қадар мутаносиблиқдан ҳайратта тушганди.

Бу манзаралар мана ҳозир у худди уфқа тикилиб тургандай, хотиралари деразасидан унга муралаб турарди.

Ҳозир ҳам у марҳумнинг юзини эслави билан хотирасига лип этиб гул ва қабр қалқиб чиқди. Шунда у ўлимнинг бир қадам нарида турганини ҳис этди – ю, умрнинг бунчалик қисқа эканлигидан бирдан вужудини титроқ босди. «Бу иккаласининг ораси бунчалик яқин, – деб ўйлади у, – одам бир марта тўйиб нафас олишга ҳам ул урмайди». Сўнг уфқа қараб хотирасидаги ва кўнглидаги вахимани қувмоқчи бўлди. Бироқ ловуллаб ёнаётган уфқда ҳам сариқ атиргул ва қабр пайдо бўлди. Сариқ атиргулнинг гулбарглари оҳиста тўкилар, ловуллаб ёнаётган уфқдан қиши – қизил чўтга айланиб ерга учиб тушарди. У хаёлидан гул ва қабрни ҳайдаш учун кўзларини юмди; бироқ гул ва қабр кўз олдидан кетмади; аксинча, уфқдаги қип – қизил олов

бирдан асов шамол гирдобига тушган қип – қизил лолаларга айланди; лолалар у ёқдан бу ёққа тебранар экан, бир зум қоқ ўртада турган сариқ атиргул ва қабрни ютиб юборар, яна гул ва қабр қалқиб чиқаверарди. Самандар бундан ларзага келди: бу манзара хаёлида энди узлуксиз давом этишини англади ва кўзларини яна қаттиқроқ юмиб олди; шу дақиқада бу манзарада қандайдир ҳузурбахш гўзаллик таралаётганини, кўнгли бирдан ҳамма нарсадан холи ва айни дақиқада ҳамма нарсага алоқадор, ўзи, вужуди билан кўз олдидағи манзаранинг бир бўлаги эканлигини, буни ҳис этиш қалбида тараҳдум ва зариф туйгулар уйғотаёт – ганини ҳис этди.

«Ҳар бир инсон қалбида олам билан уйғунлашишга ташналиқ бор, – дея ўйлади Самандар, – бу ташналиқ хунуқлик ва турмушнинг кундалик туманлари ичиди гарчи йўқолиб кетгандаи туюлса – да, у бор, унинг борлигини билиш учун инсон ўз қалбини излаб кўриши керак; инсон умрининг мазмуни аслида ана шу ташналиқдадир...».

Осмон бинафша рангта кирган эди; боғ устида сариқ атиргулнинг бир дона гулбаргидаи ой қалқиб турарди.

Самандар буларнинг ҳаммасида теран бир умумийликни англади; у ҳамон қаровсиз борни – кўнглини тинмай кузатарди.

У кейинги кунларда ўзини ҳам гул деб ўйлай бошлади; буни аввал у боғдаги панжара орқасидаги қаровсизликдан шохлаб кетган атиргулнинг ҳиди димогига урилганда, кўнглида ҳам қандайдир бир нарса яшнаб очилиб кетганини сезган пайтда ҳис этганди; кейин бу ўхшатиш унинг миясида чарх уриб айлана бошлади ва Самандар ўзининг ҳам гул эканлигига энди шубҳа қилмай қўйди. Ўзини гул деб ўйлаш энди унга бачкана ҳам, беўхшов ҳам туюлмасди. Аксинча, бу ўхшатиш жуда табиийдай эди. Ҳатто у ўзининг қалбида қандайдир гул пориллаб очилганини, бутун танасига қучоқ – қучоқ ҳид таратаетганини сезгандай бўларди. Бу гул унинг назарида лолага ўхшарди. Лоланинг гулбарглари ҳовучида бир томчи шудринг ўйноқларди; шудрингдан тонгнинг мусаффо ҳавоси таралар ва Самандарнинг вужуди бу гўзаллик қарписида мадорсиз бўлиб қолар, танаси ҳузур қилар, гул эса тобора яшнаб борар, кўксида пора – пора

чайқалар, бутун вужуди шу гулнинг нозик гулбаргларидек, оҳиста титраб кетарди.

Бошқа бир куни у панжара ортидаги атиргулни узиб олди – да, хонасига жўнади. Қизи ҳали боғчадан қайтмаган эди. Хотини унинг қўлидаги гулни кўрди – ю, тувак келтириб берди.

— Умиданинг хонасига қўя қолинг, — деди у кўзлари яшнаб гулни ҳидлар экан.

Самандар бош чайқади; ўзи ҳам гулни шунинг учун келтирганди. Гулни қизининг хонасига тувакка қўйди – да, қизининг кароватига ўтириб, уни томоша қила бошлади.

Қизининг гулни кўриб, қанчалик қувонишини ўйлаб, қўнгли яшнаб кетди.

У жилмайиб қўйди.

Юрагининг қуюқ туманлари орасидан – қаровсиз боғдан бу кўримсиз гулни топиб олганидан хурсанд эди.

Гул ёлқинланиб, хонани безаб юборгандай туюлди.

«Қизимга бу гулни сўлитма, дейман – дея ўлади у, – ва гулни қандай парвариш қилиш. кераклигини ўргатаман».

Самандар гулга қараб эгилиб олган, хотини эса эшикдан гўё хонадаги иккита гулни томоша қилаёттандай гулга ва зрига ҳайрат аралаш тикилиб турарди.

БЕВАҚТ ЧАЛИНГАН БОНГ

I

Посёлкада биринчи марта пайдо бўлганда унинг юзида ҳали навқиронлик шамлари учмаган, бадани ва серажин бўйнига чириган ёғоч иси ўтиришиб қолгаю, димогидан ёқимли тамаки ҳиди келиб турар, гарчи ўткир ва азобли кўзларидаги ёввойи мушукдек ёт мунг уни одамлардан четта тортиб турса – да, очиқ истараси ва салтисувай суни – сумбати кишида танишиш ва суҳбатлашиш истагини туғдиради. Лекин у одамлар билан илакишиб кетолмади. Ким унга ўзини яқин тутса, у шунчалик ўз қобигига ўралиб, олам ва одамларга қоронғу бўлган ҳаёти каби бурчақдаги қуёш нури тушмайдиган пастаккина ҳужрасига кириб кунбўйи чекиб ўтиради: ҳужрага ҳам терчил бадан ҳамда тамаки ҳиди ўрнашиб қолган, ўзи эмас, ғалати осойишталик ва жимлик билан кунузги шифтда сузисб юрадиган ҳидлар унинг ёлғиз ва сўққабош ҳаётини тўлдириб, бу бесаришта ва ипириски хонага тириклик бағишлаб тургандай эди: зотан унинг кўниумага айланган сокин ва ёлғиз ҳаётини бу йилларда ҳеч ким буза олмади. – бу эшиги қайси томондалиги номаълум бўлган тўзиган қўргонга ҳеч ким киролмади.

Баҳорнинг чувоқли кунлари котиб уни балиқ овига олиб борар, одамлар бегим кунлари тонг пайлари тамадди тўла рўзгор халтасини зўрға кўтарганча кўлга қараб кетаётган қоровулни ва узун эгма қармоқларни елкасига ташлаб, хас шляпани олифталарча чаккасига қўндириган котибни кўриб қолишарди: найнов, даққи бўлиб кўринган қоровул бугун инон – ихтиёрини унинг қўлига бериб қўйгандаи котибнинг изидан борар, унга ақалли қаёқча кетишаётганларининг ҳам қизиги йўқдай бошини эгиб, қўнжи қайтарилган қизил этикниш пошналарига қараб йўлни топар ва секин

лўкилларди. Улар одатда кўлнинг ялангликка туташ жойини танлашарди; бу ерда қоёшнинг аёвсиз жазирасидан асрайдиган иккита тасодифан ўстан ёввойи жийда дарахти бор эди. Котиб ҳамиша қармоқ олдида бўларди. У эса ўчоқ бошида куймаланаар, яқин орадан тезак териб, пуфлар, ачишган кўзларини котибга маҳрамона эҳтиром билан тикиб қўярди. Тамадди пайтлар улар деярли гаплашишмасди, еб—ичиб бўлишгач, ов зериктирганидан жийда остида ёлғиз ўзи ичкиликни давом эттираёттан котиб, нарироқда пўкакка юрак ҳовучлаб тикилиб турган қоровулга қараб, қаҳ—қаҳ қотиб юборарди; у эса ўзини янам ношуд ҳис этар ва беўхшов жилмаяр, лекин нега жилмайганини ўзи билмасди.

— Сени яхши бир аёлга уйлантириб қўяман, мана кўрасан, ҳали онаси ўпмаганига, — дерди котиб унинг елкасига худди қари отни қамчилагандай қарс—қарс уриб.

У индамас, ёш боладай хўмрайиб оларди. Бироқ пир—пир учайтган киприклари ва ёйилиб бораётган лаблари унга бу таклиф ёқиб тушганини фош қилиб турарди. Кечқурун ови юришмай жаҳди чиққанидан тўйиб ичиб олган, хурмачаси тўлиб қолган котибни у суяб, судраб меҳмонхонага олиб келар, котиб эса уни қучоқлаб ўпар ва қўшиқ хиргойи қиласи ва шундай пайтда нуқул аёллар эсига тушпарди; диванда ярим ёнбошлиб аёллар билан бўлган ишқий можароларини гўлдираб айтиб берар, ора—сира ўзи билан бирга ўқиган олис юртлик қизга уйланолмай доғда қолгани, шунинг аламида ичишини, ундаи қизни бутун дунёни ҳам ахтариб топиб бўлмаслигини қайта—қайта таъкидларди.

— Сен билан бизнинг дардимиз бир, — дерди котиб уни чўлп—чўлп ўпаркан. — Шунинг учун сени яхши кўраман. Сен менинг... жигарим — м — сан, йўйқ, акам — м — с — сан, ке — л, яхшилаб ўпай.

Қоровулнинг йиглагиси келар, лекин йигламасди. Баъзида худди ёш болага ўхшаб қоладиган бу одамга нисбатан кўнглида меҳр пайдо бўларди. «Иккаламиз ҳам баҳтсизмиз, иккаламиз ҳам сарсонмиз», деб ўйларди қоровул кўзларини четта олиб қочаркан, ростдан ҳам котибни худди ўз жигаридаи тўйиб—тўйиб қучгиси, худди гўдақдай оғушига олиб овунтиргиси келарди.

— Мана бу ерим аламга тўлиб кетган, — дерди котиб кўкрагига муштлаб. — қанча аёлни қўлимдан ўтказдим, лекин ундаини тополмадим. У оламда битта.

— Оламда битта, бешқа ҳеч жойда йўқ, — дерди у ҳам котибнинг гапини тасдиқлаб. — қани, ечиниб ётинг.

Сўнг у котибнинг кийимларини ечишга ёрдамлашар, музхонадан қатиқ олиб ичирар, бошини боғлаб қўяр, шунда ҳам тинчимай кечалари уч — тўргт марта ҳабар оларди.

— Сиз ишга кетаверинг, — дерди эрталаб котибга у қусуққа боттан полни ва гиламни артиб олар экан, — ўзим ювиб қўяман.

Котиб қилган ишидан энди уялаёттандек тунд қиёфада чиқиб кетар, ювиб қўйилган ич кийимларига эса худди шундай бўлиши керакдай эътибор ҳам бермас, индамай кийиб оларди.

Баъзан котиб унга атайлаб шаҳардан яхши навли тамаки ёки пиво кўтариб келганда унинг чеҳраси ёришиб кетарди.

— Бу нимаси, овора бўлибсизда, — дерди юзаки хижолат билан, бироқ ичида ўзича фуурланиб қўирди, у котибнинг калондимоғ одам эканлигини билса ҳам унинг шу тантлиларини жуда ҳурмат қилар, гапини икки қиласай бажаришга уринар, калласи қизиб қолган котиб оғзидан боди кириб, шоди чиқиб, уни «қўйтир така» деб сўксса ҳам сира хафа бўлмас, аксинча, қийшайиб қолган оғиздан вишлаб чиқадиган бу сўз уни котибга яна ҳам яқинлаштирас, эртасига у худди ҳеч нарса эшитмагандай хонага маймоқланиб кириб келарди.

II

«Онаси ҳосилотнинг ўйнаши бўлган»... У қулоқларига ишонмади; янгилип эшитмадиммикин деб ўйлади. Лекин эшик орқасидан котибнинг овози жуда аниқ — тиник эштилиаб турарди. У котибнинг чиройли, хумор кўзларини, бадқовоқ юзини кўз олдига келтирди; диванга ярим яланғоч чўзилганча; ўзига айттириб, изидан «Окаси, жонидан» дея бақиришлари эсига тушди. Сўнг худди тутиб бўлмайдиган кўзёшдай котибни бекатда илк марта кўргани, эгнидаги оқ мўйнадан тикилган пўстини эсига тушди —

у котибни айиқдай бефаұм одам бўлса керак деб ўйлаганди. Лекин бундай бўлиб чиқмади – котиб унинг ўтмиши билан қизиқмади. Кейинчалик инспектор келиб огоҳдантиргач ҳам у бунга эътибор бермади, уни янги қурилган меҳмонхонага қоровул қилиб қўйди. У кўп йиллардан бери ўз ўтмиши билан қизиқмаган одамни биринчи бор учратиши эди ва улар тезда иноқ бўлиб кетишиди.

Посёлкада ҳали янги уйлар бўлмагани учун котиб меҳмонхонада яшаб қолди, кейинчалик уй битгач ҳам у негадир оиласини олиб келмади – ойнинг бошларида уч – тўрт кун йўқ бўлиб кетар, сўнг яна қаҳрли, тунд ва ҳўмрайган қиёфада пайдо бўлар, посёлкада у кетиши билан тўхтаб қолган ишлар яна жонланар, паҳтазорда улоқиб юрадиган сигирлар боғланар, дўконлар ўз вақтида очиларди. Котиб одамшавандга киши эди, тезда қоровул бунинг гувоҳи бўлди. У шеригига бироз такаббурона тикилар, лекин ҳар қандай кишининг кўнглига йўл топадиган улфатижон йигит эди: «Агар бу дунёда муруватли ва қалби тоза йигит бўлса, у мана шу котиб» деб ўйларди қоровул.

Котиб бир сўзли одам эди – у қоровулга берган ваъдасининг устидан чиқди; инспектор ва райондагиларнинг харҳашасига қарамай, меҳмонхона қоровулигига олиб қолди; уч йил бадалига унга бирон марта ёмон гапирмади; котибнинг бор алами ичида эди, шунинг учун деярли ҳар куни ичар ва қоровулга ҳам ичирар, сўнг то эрталабгача қотиб ухларди.

III

Ичкаридан хўрсиниқча ўхшаш йиги овози келарди; қандайдир аёл кимдандир ноҳақ ҳақорат эшитаёттандай ўксиниб – ўксиниб йигларди – у эса аста – секин лойқаланаётган дарё ёки дағдага ва ваҳима билан бопланишдан олдин гўё бу қари ва кекса дунёни бир боплаб лақилатмоқчилик бирдан осойишта бўлиб қолган бўрон ёки эндинина ҳилпирай бошлаган байроқдек ичида нимадир тошиб, ҳапқириб келаёттанини ҳис қилганча торлари узилган фижжак каби сассиз, садосиз қотиб турарди – у барваста,

мушақдор, қирғийбурун, юзи рақами ўчиб кеттән тантагачадек күримсиз, ичкаликтиннинг ва қаочонлардир бошидан кечирган мусибатларнинг асорати бўлиб газак олган ярадек гезарган, узун қўллари энди бу дунёда ушлаб оладиган нарсаси қолмагандек ёки қандайдир номсиз мусиқани ҳеч кимга эшиттирмай чалаётгандай билинар – билинмас қалтираб турарди. У чорак соатча оддин котибнинг ёшгина бригадир қиз билан меҳмонхонага кириб кеттанини кўрган эди – салдан сўнг доим қулфлоглик турадиган ва баъзи – баъзида келиб қоладиган зътиборли меҳмонларга мўлжалланган хонанинг қалитини сўраб келганда, котиб унга маънодор кўз қисиб қўйди – унинг юзи ҳирс ва дагаллиқдан қизариб кеттган эди.

—Ёки сени киритиб юборайми? – деди котиб ичкарига ишора қилиб. У ёйилиб қулди. «Бизларга йўл бўлсин, сиз турганда дегандай елка қисди. Сўнг уларга ҳалакит бермаслик учун боф эшигини занжирлаб, ҳужрасига кирган жойида бирдан ичкаридан аёл йигисини эшитиб, тақда тўхтаб қолди – у беихтиёр даҳлиз бўйлаб ўнг тарафдаги хонанинг эшиги олдига борди, у менинг бирон ёрдамим керак эмасмикин деган хаёлда эди. Ичкарида йиги аралаш котибнинг сал қизишган жазавали товуши эштиларди. У қизга ниманидир уқдирав, тўғрироғи, нимадир деб овунтиравди; қоровул эшикни итармоқчи бўлди, лекин бирдан қўлинни тортиб олди.

— Ҳамма шундай қиласи, – деди котиб палағда овозда.
– Бошқача йўли йўқ. Шуни билки, бўлмайди ҳам. Бунинг учун ҳеч ким сени айбламайди, сен қўрқма, ҳаммасига ўзим жавоб бераман.

Қиз, афтидан, йиги аралаш котибни жеркиб ташлади. Ичкарида нимадир тарақлаб қуласи: у «курси ағанади» деб ўйлади, сўнг шундоқ эшикнинг тагида котибнинг ҳансирашини эшитиб, даҳлиз орқали кичкина айвонга чиқиб турди – бироқ эшик очилавермагач, яна узалиб даҳлизга қаради; полининг бўёғи кўчиб қолган, қалин баҳмал парда осилган деразадан ойнинг хирагина шуъласи тирқираб тўкиларди. Ой ҳам онда – сонда меҳмонлар ташриф буюргандагина очиладиган бинонинг дид билан безатилган хонасида нималар бўлаётганини ўз кўзлари билан

күрмөңчидек қалин парда орқали даҳлизга хомуш мўралаб турарди.

Котиб меҳмонхонага кўп аёлларни бошлаб келганди, бироқ биронтаси ҳам йиглаганини ёки ортиқча шовқин кўтарганини қоровул эслолмасди.

Қиз тез – тез, жеркиб – жеркиб гапирап ва ора – сира пиқиллаб қўярди. Унинг йигиси меҳмонхонанинг жипс деворидан зўрга сирғалиб ўтиб, айвон орқали боққа ўрмалаб чиқар ва ўзидан салқин ҳаво тарататётган ҳовуз атрофидаги дараҳтлар орасига сингиб кетарди.

У қизнинг сўнаётган гулхан каби ожизгина йигисини айвоннинг бир четида устунга суянганча тинглаб турар ва котиб қурғур худди айғирга ўхшайди – я, деб ўйларди. Хона эшиги икки – уч марта қаттиқ – қаттиқ урилгач у яна даҳлизга мўралаб қаради, бошқасига журъат қилолмай айвон бўйлаб у ёқдан – бу ёққа юра бошлади. Сўнг бояги жойига бориб устунга суянди – да, гўё тун китобининг зуамат тўла варақларидан нима қилиш зарурлигини ўқиб билмоқчилик ухлаб ётган боққа тикилиб қолди.

IV

Ўшанда йигитларнинг ҳаммаси ичиб олган эдилар – улар орқаворотдан «Ота безор» деб ном олган бу янги посёлканинг илк қўналгачилари эди; оталари билан гап талашиб ёки мўмайроқ пул топиш илинжида Терс отани ташлаб келган, чўлнинг шавқсиз ва жазира ҳаётига ўрганиб қолган ва шундан бошқача ҳаётни тасаввур ҳам қилишомайдиган, ҳатто, болаликларини ҳам худди бир пайтлар ўқиган, лекин номидан бопқа ҳеч нарсаси эсларида қолмаган дарсликдек эринчоқлик билан элас – элас эслайдиган танбал ва ҳали мутлақо бўз йигитлар эди – улар бири қўйиб, бири олиб, ундан посёлкадан чиқиб кетишни талаб қилишар, йўқса тушига ҳам кирмаган ҳангомаларни кўришини, ўзларининг ҳеч нарсадан қайтмасликларини дўқ – пўписа аралаш таъкидлашар, улар бу ерга кимнингдир йўриғи билан келганиларини, афтидан, унчалик яширгилари ҳам келмай меҳмонхонанинг одд зинасигача бостириб келипган ва мўътабар маҳмосилар учун

атайлаб қурилган бу ҳашамдор бинонинг зинаси уларга номаълум ва қоронғу бўлган бошқа дунёга бошлиб борадиган йўлақдек зинага чиқаверища таққа тўхтаб қолишган ва у ердан ҳатлаб ўтишга ботинолмай устунга суюниб ўзларини синовчан хўмрайиб кузатиб турган ундан ва нақ кираверишдаги пештахтага осиб қўйилган, кечки шабадада салобат билан ҳилпираёттан алвондай байроқдан бироз ҳадиксираб туришарди.

У эса йигитларнинг худди хўқиз етаклаб келишаёттандай биткўз йигитни олдиларига солиб туртиб, итариб келаёттанини кўрган дақиқадаёқ нима гаплигини англаган ва ўзини иложи борича хотиржам тушишга қарор қилганди.

— Қишлоқдан чиқиб кет! — бақиради бошига қалин исқирт пляпани бостириб кийиб олган қоп — қора йигит. У қандайдир пўписа тўла ҳагни ўқиб берәёттандек қисиниб — қимтенинб, айни пайтда ўзини дадил тутиш учун димогини ҳаддан ташқари юқори кўтариб олганди. — Бу қишлоқда сен билан бирга яшашни истамаймиз!!!

— Яхшиликча чиқиб кет, — дерди бошқа бир жириллаганроги. — қанча тез чиқиб кетсанг ўзингга шунча яхши. Биз аяб ўтирмаймиз.

— Тўрт томонинг қибла, котибининг ялоқхўри! — пихилаб гапиради бошқа бири — тўпланганиларнинг ичида ёпи каттароги ўша эди — унинг кир — чирга боттан соқоли ичида чувак юзи зўрга кўринарди — у боплаб гапирдимми дегандек ҳамроҳларига бир — бир қараб олди, лекин ҳамроҳлари бу зўр гапга унчалик эътибор беришмади. Унга қайрилиб ҳам қарашмади — ҳаммаси лўнда ва кесиб — кесиб гапириш учун зўр бериб кучанишар, шу сабабли бир — бирларининг гапларини деярли эшитишмасди.

— Яна бизни қўрқаяпти дема, — деди биткўз йигит. — Сен у ёқда ўтириб келган бўлсанг ҳам аямаймиз... умуман, биз сендан қурқмаймиз, шундай, келган ерингга даф бўл!!!

Бу гапи билан йигит уни «у ёқда ўтириб» келганидан чўчиб турганини сездириб қўйди.

— Котибининг ювиңдисини ичиб жуда керилиб қолди, — деди озгинроқ, юзи қув йигит. — Ўзини бизларга хўжайнин деб ўйлаяпти.

- Бутун сигарет сўради, эртага бошқа нарса сўрайди;
— деди бояги юзичуваги ҳамроҳларига кўз ташлаб оларкан.
— Бизни менсимай қўйди.

У йигитларнинг ўзларини ҳурмат қилишдан ҳамда шу кичкина посёлканинг хўжайнлари деб эътироф этишдан бошқа ҳеч нарсани талаб қилишмаёттанини ва агар ҳозир «Мен бу ерда сизларнинг борлигингиzin билмабман, узр, посёлка сизларники, энди такрорланмайди, қуллуқ» деса, ҳамма «Ҳа, шундай бўлсин, кўз каттароқ очиб юрилсин», деб тўнғиллаганларича, худди бу ерга келиб кўп иш қилиб ташлагандай ўзларидан миннатдор бўлиб тарқаб кетишини англади, бироқ у йигитларнинг чанг—ғубор босган, парвариш кўрмаганига ҳам анча вақт бўлган юзларига зимдан синовчан тикилди: у бу жанжал беҳуда чиқмаганини, кимдир уюштирганини биларди, зотан жанжалга сабаб бўладиган бирон айб иш қилганини ҳам эслай олмасди. Посёлкадагилар билан деярли олди — берди қиласди, совхозга кираверишда — посёлканинг бир четида жойлашган меҳмонхона ва боғдан деярли чиқмасди. У ўз умрининг чалкаш сўқмоқларини кезиб юргандек ҳар куни куз ва қиши пайҳон қилиб ташлаган боғда кезиб юрарди — уни шу дақиқаларда кўрган одам у мана шу пайҳон ва чиркин боғ қўйнида қандайдир азиз нарсасини йўқотиб қўйгану энди уни излаб дайдиб юрибди деган ўйга борарди — гоҳида эса тўсатдан бошланган зилзиладан қулаб тушаёттган иморатлар каби омонат ифодалар унинг заҳил ва сўлғин чеҳрасини буткул эгаллаб оларди; шундай лаҳзаларда унинг афти тутаб ётган ғўлага ўхшаб кетарди.

Одамларга, унинг олдинги ҳаётию уруғ — аймоти номаълум эди, посёлка инспектори — сал довдир ва олифта йигит — уни посёлкага хавфли ва ишончсиз одам қилиб таниттанди. «Бу одам анақа рўйхатларда туради. отаси бутун қишлоқни қириб ташлаган. — дерди у ҳар сафар сартарошхонага кирганда. — Бунинг устига ароқхўр, ароқ деса онасини сотади. Шунинг учун хотини ташлаб кетган, бу одам жамиятимиз учун хавфли кишидир».

Бу хабардан сўнг совхоздагилар у билан эҳтиёткор бўлиб муомала қиладиган, иложи бўлса умуман яқинига

йўламайдиган булишди, унинг ўзи ҳам унчалар одамшавандада змасди.

Фақат баъзи – баъзида уни қишлоқ ошхонасининг бир четида ифлос кружкада пиво ичиб ўтирганини кўриб қолардилар. У гўё атрофидаги дунё билан аллақачон алоқасини узгандай ва фақат ўзигагина маълум ўзга оламда яшаб юргандай, сара қўшилар қўриқлаб турган ўтиб ва забт этиб бўлмас девордек одамни ҳеч қаҷон ўзига яқинлаштиrmайдиган ҳуркак ва ёт бир мунг чўкиб ётган кўзларида тошдай қотиб қолган дилгир бир қайғу ёниб туради.

Инспектор уни қаттиқ қистовга олди ва посёлка ошхонасида пиво ёки бирон ичимлик ичипни ҳам таъқиқлаб қўйди, бироқ у ҳар куни кечқурун ошхонага пиво ичгани келар, дуд ва чанг қоплаган бурчакда кўкрак тутмалари ечиб қўйилган, бир – бирига тинмай бақиришаёттан, кўзларида ҳаётнинг чигал ва тушунксиз саволлари қотган, худди умрлари каби жизганак ва тўзонли саҳрода ўзининг улуғ гулханларини бир – бир ўчираёттан кечки шафақ остида исқирт курсиларга мук тушган, саҳро офтобига ўжшаб жizzаки бўлиб қолган одамларга бир сўз демай кружкани ютоқиб хўпладб ўтиради – унинг кўзларини юмиб олиб, ҳузур қилиб хўплашига қараб туриб, у дунёдаги ҳамма нарсани мана шу кружкадаги салтанатта алмаштириб юборган ёки адолат излаб бутун дунёни кезиб чиқдану ниҳоят мана шу салтанатдагина адолат боқий ва муқаррар деган холосага келган дея хаёлга бораради – худди Рим қўшинлари ўлика айланган Искандарияга ҳеч бир қаршиликсиз кириб келгани каби инспектор беиш – олти ёш – яланг пиво ичиб ўтирган ошхонага шаҳдам қадамлар билан кириб келди ва қоровулнинг қаршисида тўхтаб унинг қўлидан кружкани тортиб олди.

— Сенга бу ерда ичиш таъқиқланган, — деди кружкадаги пивони бир четта сепиб юбораркан. — Умуман, сенга одамлар орасида юриш таъқиқланган.

Қоровул аввал инспекторга, сўнг пиво тўкилган жойга қаради ва секин ўрнидан турди ҳамда бир оғиз гапирмай, яна пиво олиб келиш учун буфетта қараб йўл олди.

— Тащқарига! — Бақирди инспектор, унинг қайсарлигидан жаҳли чиқиб, оддини тўсаркан, тирсагидан ушлаб олиб,

ташқарига судрай бошлади, бироқ бир қадам ҳам босмай түхтаб қолди.

Қоровул инспекторнинг қўлларини озғин, қалтироқ, кучсиз панжалари билан ушлаб олган, кўзлари жаҳдан каттариб кетганди; ундан худди шу вазиятда ҳар нарсанни кутиш мумкин эди — инспектор буни сезди ва унинг тирсагини қўйиб юборди.

— Сизнинг ҳаққингиз йўқ, — деди қоровул унга бироз қалтираган товушда. Унинг гапида алам, азоб ва мусибат оҳанги бор эди. Сўнг индамай хонадан чиқиб кетди.

Инспектор бари бир унга ошхонада пиво ичишни таъкидлаб қўйди. Бироқ котиб уни пивосиз қолдирмас, баъзан меҳмонлардан қолган ҳали бир қултум ҳам ичилмаган шишани олиб чиқиб берарди. Инспектор қоровул билан зимдан олиша бошлади — совхоздаги икки ўғирликда ҳам аввал унинг ҳужраси тинтиб чиқилди. Испектор бу ишни ошкора амалга оширди, зеро у посёлкадагиларнинг ичидаги қоровулни энг ишончсиз кимса деб билар ва ундан тезроқ қутулиш учун одамларни унга қарши киши билмас гиж — гижлай бошлади. Терсоталик ёшларнинг қизиқон ва жizzаки, гуппи йигитлар эканини яхши биларди. Посёлка йигитлари қоровулни кўрганда неларгадир тайёрланиб турадиган бўлиб қолишли, бироқ у мутлақо бефарқ эди, уларга ҳатто эътибор ҳам бермас, можаро излаб унинг олдини намойишкорона тўсаётган йигитларнинг қаршисидан индамай ўтиб кетарди.

Аммо бир куни биткўз йигитнинг олдидан — у бу йигитлар қаердан эканлигини, нима иш қилишини — қаерда яшашини ҳам билмасди, бу уни қизиқтириласди ҳам — ўтиб кета туриб, бир дона сигарет сўради; тамакидони хонада қолган, йигитни кўриб жуда хумор қилиб чеккиси келганди. Биткўз нима деярини билмай шошиб қолди. Яқин атрофда жўралари кўринмасди — қўлидаги сигарета қолдигини бир чеккага улоқтириб, қайларгадир лаланглаганча югуриб кетди. У йигитнинг хатти — ҳаракатига эътибор ҳам бермади. Ҳали ҳужрасига ҳам кирмаган эдик, изидан ўн бешга яқин йигит тўғри бокқа талмовсираб, пала — партии бостириб келишди: улар афт — ангорларидан кимнидир қуваётганга эмас, нимадандир қочиб келаётганларга кўпроқ ўхшарди.

Терсоталиклар уни боплаб дүппослаб кетиши. Уни котиб энди қизара бошлаган анорзор остидан несту забун ҳолда топиб олди. Ҳужрага олиб кириб бир пиёла ароқ тутди. Пешонасидаги ёриқ узоқ вақттата тузалмади. У энди боғдан деярли ҳеч қаёқда чиқмай қўйди. Дўппослангани ҳам тезда эсидан чиқиб кетди. Котиб шундай қылдики, жанжални бошлаган жўрабошилар пиво кўтариб келиб у билан ярап битимини тузиши; ювош ва беозор, сиғинди ва найнов, қилиқлари телба – тескари бу одамни нима учун қалтаклашганларига уларнинг ўзлари ҳам унчалик тушунмасдилар.

«У менга жой берди, ўзи билан тенг кўриб, одам үрнида қабул қилади, мендан бурнини жийирмади, унинг кўнгли нурдай тоза, бундай улуғ одам яна қаерда бор?!» – ўйларди у. Мехрибон ва одампарвар, танти ва нурафшон қалбни – котибни у худди қораҷўига думалаб тушган марвариддай асрарни истарди. Унинг ҳазонга айланган қизғалдоқ баргидек бу жазира чўл қўйнига, ёввойи ва телба одамлар орасига учеб тушган умри давомида топган мушфиқ ва мурувватли, суюнч ва раҳнамо бўладиган ёлғиз одам мана шу марварид эди ва ўзининг омадсиз несту мустар ўтмишини ҳеч қачон юзига солмайдиган, унинг умр йўлидаги ҳазон ва ҳасларни супуриб, ўзига ҳаёт ва умид сари йўл очишга дадил ва қатъий унданган соҳибкарам ҳам мана шу марваридда мужассам эттанди, унинг қалбида шу раҳнамо туфайли уйғонган эҳтиромга چулғанган ҳислар узра унинг бутун вужудига ёғду ҳам мана шу марварид эди. Бу сиймо ҳар нарсага қодир ва камтарин, хокисор ва шафқаттўй, танти ва мағрут эди, бу сиймо қиёфасида жилваланаётган шамс кўнглини хушнуд этадиган кўп юлдузли бодадан сўнг уни саодатли ва хушбахт, эзгу ва орзуманд қиладиган, хаёлининг кўпдан буён қуёш тегмаган зах ва тойгоқ унгурларини иситадиган хуёл офтоби каби мунаввар ва серёғду эди.

Бу талъат адашган инсониятта ҳақ ва најжот йўлини кўрсатишга мустаҳиқ этилган, ўқтам ва сергайрат, лошидан ҳоки туробигача ёғуддан иборат, қуёш ва ой бир – бирини мангуб қувлаб юрадиган, умид ва хаёл саҳросида жизғанак бўлиб қолган мана шу хиёнат ва жаҳолат зулмати ғарқ қилган заминга тириклик ва яшнаш уруғларини сепиш учун

юборилган, қўлида зафар ва шижаот сухуфлари бор, ўзи дунёга келмасдан минг йиллар олдин нури яралган, дунёда зўрлик ва адолат ўртасига девор ўрната олган, мағлублик ва матлублик ва ундан ҳамиша ўзини олиб қочган шоншавкат ва шафқат тулпорини миниб туғилган ўша Халоскорнинг айнан ўзи эди.

— Мен хароб бўлган одамман, — бақирарди у котибнинг илтифотидан талтайиб кетиб, пиёлани зарб билан сипқораркан. — Мени хароб қилишди. Мен тамом бўлдим. Мени ўчириб ташлашди...

Сўнг пиқиллар ва бирдан — бир ёлғиз ва ёрқин, ҳали ҳеч кимга айтмаган хотираси — онасини ҳосилот қандай урганини ва ўзининг музлаб қолган қулогини ушлаганча яланг оёқ қор кечиб қандай чириллаб йиғлаганини, тиши синиб тушган онаси қандай қилиб уни этаги остига яштиргани, оғзидан оқсан қон идорадан то уйларигача оқиб келгани ҳақида сўзлар ва йиғларди. Ўшанда ҳосилот онасининг қорнига тепган, нимадир деб сўккан эди, афтидан... «Боласи отасига ўхшаса, тугилмай ўлгани яхши» деганди...

— Улар уч киши эди, иккита солдат ҳам бор эди, — пиқилларди у пешонасини столга қайта — қайта ураркан. — Биз ун сўраб боргандик... уч кун туз тотмаган эдик.

— Улар қишлоқни ўраб олишди, сўнг дуч келганини ота бошлишди, — у бошини эгиб олар, котибнинг юзига қарамасдан юрагини эзиз ёттан хотираларни ютуғи аниқ бўлган қартадай бир — бир очиб ташларди. Зеро унда ҳеч ким забт этолмаган, ҳеч ким ҳукмронлик қилолмаган, ҳеч ким топтай олмаган, кўп йиллар оша ўзидан бошқа фуқароси бўлмаган ёлғиз мамлакат ҳам шу эди. Бу мамлакатта ёт кишилардан биринчи бор котиб кириб келди ва худди азобга ўхшаш узун кўчаларидан ўтиб борди, шу билан кўпдан буён осойиш ёттан салтанат ҳам забт этилди. Бироқ у котибга кўз ташлашга қўрқар, кўз ёшларидан уяларди.

— Бутун қишлоқ дарё бўйига қочиб чиқди. Аскарлар дарё бўйини ўқса тутишди. Мени акам тўсисб қолганди — унинг ичаги титилиб кетганди, қишлоқда икки — уч аёлдан бошқа тирик жон қолмаганди... Қайси қишлоқда нон сўраб борсак «Босмачининг боласи, бари бир босмачи бўлади,

нон берманглар» деб ҳайдашарди. Охири онам ҳосилотнинг олдига борди... Улар онамни кўз олдимда калтаклашди...

Котиб унинг пиёласини тўлдириб қуяр ва ўзи устма — уст босиб ичарди, кейин унинг елкасига ҳамдардона урганча:

— Улар аблაҳ одамлар, — деб бақиради. — Уларнинг ҳаммасини отиб ташлаш керак эди.

Бу гап қоровула майдай ёқар, йиллар аро юрагини ёқиб ётган алам шу бақириш билан босилгандай бўлар, кўнглидаги гапни айттани учун жасур ва мард котибга тўйиб — тўйиб қарар, шунда ўзи болалиқдан орзу қилган, ўзини тирикликнинг оч панжасидан қутқариб, саодат баҳш этадиган ўша осмондан тушгувчи илоҳ котибнинг қиёфасига кирар ва вужуди нурдан бўлган котиб олов сочаёттан қасос қиличини кўтарганча кўз олдида намоён бўларди.

Кейин ҳаммаси ўрнига тушарди, эрталаб у тамаки ҳиди билан бирга субҳидамнинг мусаффо ҳавоси кезиб юрган бесаришта ҳужрасида кўз очар, хира зулматни тилимлаб дарчадан оқиб кираёттан тонгнинг симобдай бир тутам ёғдусини узоқ томоша қилиб ётар, қишлоқнинг ичкарисидан хўрзанинг бўғиқ қичқириги эштилар, ёғду эса ҳали эркак кўзи тушмаган қизнинг ялангоч баданидай гўзал ва жозибали бўларди. Бу лаҳзалар чўл қўйнида қурилажак котиб айттан янги ҳаётнинг ilk онлари ёхуд ул олис шамснинг ilk шуълалари каби яширин ва хушанишин эди.

V

Посёлкага келганининг учинчи йили унинг ўтмиши одамлар учун бироз ойдинлашди; йигим терим тугаш арафасида совхоз босқони Омон Жуманинг хонасига музофотнинг нариги четидан бир аёл ўн беш — ўн олти яшар боласини етаклаб кириб кеди: аёл қирқлардан ошган, чиройли юзида ҳали сўлимлик ва эҳтирос сўнмаган, кўзлари ўйчан, ўзини тутишидан мулоҳазали ва ақлли аёл эканлиги кўриниб турарди. Бола эса гарант эди. Аёл Омон Жумага совхозда эри ишлаёттанини ва уни уйга қайтаришга ёрдам беришини сўради.

— Неча йилдан бери уйга қадам босмайди, — деди у курсига ўтирмаёқ. — Кунини ичиб ўтказади. Сизга бир

она сифатида мурожаат қилаяпман.

Аёл йиглашга түшди ва ўғлини күрсатиб:

— Бу худо қарғаган болани ёлғыз ўзим катта қилдим, энди чарчадим. Бунга ҳам ота керак, — деди.

Аёлнинг йигисидан таъсирангган Омон Жума қоровулни қанчалик қистамасин у аёл билан бирга кетишдан бош тортди.

— Бекорга овора бўлманглар, — деди бошини этган кўйи қатъий қилиб: — Биз аллақачон эр — хотинликдан чиқанмиз.

У аёл билан болага қайрилиб ҳам қарамади. Омон Жумани танг қолдирганча — бое ичига кириб кетди ва у ерда шохлаб кеттан тутларни хотиржам бутай бошлади. Аёл унга томон журъатсизгина интилди — ю, сўнг жойида тақда тўхтаб қолди — унинг умид ва ишончсизлиқдан қизариб кеттан кўзларида эса Омон Жумага ҳам, бу чўл одамларига ҳам ва чўлга ҳам номаълум бўлган саргузаштларнинг кўланкаси порларди; уни бу ерга бошлаб келган умид ва эрининг юзидағи ёт бир важоҳатдан туғилгани ишончсизлик бир зум иккилантириб қўйди, сўнг у боласини етаклаб боғдан шитоб билан чиқиб кетди.

Ўзининг дўқ — пўписаларини ишга солиб ҳам инспектор қоровулни кўндиrolмагач, ойлик маопидан юбориб туришга ваъда қилиб Омон Жума аёлни изига қайтариб юборди. Бу пайтда котиб посёлкада йўқ эди. Қоровулнинг хотини келиб кетганини эшитдию: «Тўғри қилибсан, улардан қанчалик узоқ юрсанг, шунчалик эркин бўласан, ҳозир дарахтни силкитсанг хотин ёғилади. Ўзим уйлантириб қўяман», деди ва қоровулга кечқурунги бош оғриқ учун беш сўм пул берди. Бироқ посёлкадаги ҳар бир одам мишмишни ўзича изоҳлашни истарди: бу тунд ва ароқхўр қоровул ҳосилдан чарчаб чиқсан чўлкуварларнинг қиши бўйи эрмаги бўлди.

Аёл эрини олиб кетиш учун иккинчи марта келганда (унинг эгнида бу марта тўзигиган ёмғирпўш осилган, ўзи ҳам устидаги кийим каби афтодаҳол, бир йил олдингига қараганда жуда тез қариган, юзларидағи малоҳат шамлари сўна бошлаган эди) участка инспектори ўзининг яқин танишидан бу оила ҳақидаги жамики сиру асрорни билиб олишга улгурганди.

У қишиң күнларининг бирида сартарошхонада пайдо бўлади. Навбат кутиб тураркан, ҳар доимгидаи ўзи билган янгиликлардан одамларни огоҳ этишни лозим деб билди.

—... Онаси ўлгач, у узоқ йиллар чойхонада дастёрлик қилиб юради. Чойхоначи номи қора бўлган қизини унга қўшади — ю, бир эски уй сотиб олиб беради. Шу билан тинчиди. Ўзи сал овсарроқ бўлгани учун хотиннинг кўз пардалари йиртилиб кеттанига унчалик эътибор бермайди. Орадан икки — уч йил ўттач, хотинини ёт эркак билан тутиб олиб, паншаха санчиб ўлдириб қўяди ва узоқ йилга қамалиб кетади. Қамоқдан қайтиб келганда хотини кимдандир бола орттириб ўтирган бўлади. У маймоқ ҳаммасига қўл силтайди — да шаҳарга кетади, у ерда ароқ учун одамларнинг қора ишини қилиб юради. Дайдиб — дайдиб, шу ерга келиб қолади. Котиб уни арзимас пулга меҳмонхонага қоровул қилиб қўйди. Хуллас, худо қарғаган чоғи, боши ҳозиргача маломатдан чиқмайди. Бор гап шу.

Қизиги шундаки, инспектор бу марта негадир қоровулга анча хайрхоҳ оҳангда гапирди.

— Болига қийин савдо тушган экан, — деди Тогай муаллим бош чайқаркан, оғзига кирган соч толасини туфлаб ташлади.

Инспектор аёлга бу можарога варалаша олмаслигини ва бу ўта шахсий масалалар эканини рўйи — рост бўйнига олди.

— Биз одамнинг хоҳиш — истагини ҳурмат қиласиз, — деди у хонасидаи чиқар экан, қўлига фуражкасини олди: унинг юзи кўп гапирганидан бўғриқиб кетган, семиз бўйни тердан пўрсиллаб қолганди. — мен уни мажбур қилолмайман.

— Сиз оиласи сақлаб қолишингиз керак, бу сизнинг бурчингиз, — аёл унинг изидан ташқарига чиқар экан, инспектор гапирган оҳангда сиёсат қиляди. Лекин инспектор пинагини ҳам бузмади: эшикни қулфлаб, зина орқали пастта тушди ва ўзини дарахт соясига олиб, ниманидир ўйлаб турди — да. — Менинг кучим етмайди, — деди, сўнг пивохонага қараб кетди.

Аёл бу сафар узил — кесил рад жавобини олди. Ўзи ҳам узилган оила риштасини қайта боғлай олмаслигига, эри билан яшаган ўтов аллақачон куйиб кул бўлганига кўзи етди шекилли, яна ёлғиз қайтиб кетишга мажбур бўлди.

VI

Уч ойлардан сўнг меҳмонхонага янги қоровул тайинланди — бу қоровул ҳам мўмингина одам эди, уни шахсан инспекторнинг ўзи тавсия қилганди. Меҳмонхонанинг кичкина боғида куз ва қишининг ўзаро олишуви бопланган, ёмғир суви янгиламаганидан яшил тоб тусга кирган ҳовуз саҳнини чириган ўт — ўлан босиб кеттан эди: узун йўлакнинг ўзи эса хазонлар билан тўлганди, ҳовуз бўйидаги гулзорда ҳам тўзғоқ барглар ва сўнгти мезонлар учиб юрар, боқча кираверишдаги ялангликда қарғаларнинг ноҳуш қагиллашлари эшитилар ва батъзи — батъзида қарғалар нақ боғ устида тўпланиб шубҳали йигинлар ўтказишарди. Меҳмонхонанинг пештоқига илингган байроқ ҳам тўзиб бўлган, ёмғир ва саратон шамоли ҳуда — беҳуда ҳилпирата — вериб унинг рангини номаълум тусга киритиб қўйган, шундай бўлса ҳам у пештахтада ҳамон салобат билан ҳилпираб туради: бироқ на қувраб — қовжираф тўкилган боғ, на тўзиган байроқ деворларига дабдабали чақириклар илиб ташлайган меҳмонхонанинг ҳаипамига ҳеч бир гард етказа олмаган, унинг узун дахлизига қимматбаҳо поёндоz тўшалган, хоналари ҳамишадагидек шинам ва тоза эди: ўртадаги хонанинг гилами янгиланган, деворлари қайта бўялганди: хонада кичкина кийим жавони, иккита курси бор эди ва стол устига аввалгисига қараганда каттароқ ва бежиримроқ шиша сувдон қўйилганди. Бу сирли ҳашамлар сари талпинган ташқи дунёни ва ёруғликни тўса — тўса чарчагандек, ҳорғин тебраниб турган қалин парданинг ранги униқиб, гуллари учиб кеттан, диван эса ҳамон тажовузкор қиёғада ўртада қад кериб туради; у кирган ҳар бир одамни енгилтак аёлдек бағрига чорлар ва уларга неларнидир ишора қилиб, ўзи билан содир бўлган қандайдир гаройиб бир воқеани эслатмоқчи бўларди. Фақат кираверишдаги ҳужрада бесаришта ҳол ҳукм сурарди: кийимлар ва тўшак ўша куннинг эртасигаёқ милиционерлар томонидан титиб ташланган ҳолича бетартиб қалашиб ётарди: хонани чанг ва губор қоплаган, тўшакларни ва шифтни қурум босган, пол тахталарининг ораси хонага кириб келганларнинг устидан кулаёттандек қадам товушларига жавобан норози

бўлиб, гичирлаб қўярди: дераза ёнидаги миҳда қоровул терсоталик йигитлар билан пиво ичган куни кийиб юрган гижимланган коржома осилиб турар, шим эса ерда ётарди; ҳужрага куйинди ва тамаки ҳиди билан бирга одамларга алланечук шубҳали бўлиб туюлган кишининг ҳиди ҳам урнашиб қолган, ҳужранинг ўта бесаранжомлиги ва торлигига қараб туриб, у мана шу иприсқилар ичида. Уч йил мобайнида бирон кимса қадам босмаган, одамлар ёдидан кўтарилган шу кичкина бошпанада қотиллик қилиш учун ўзига куч тўплагандай ва уни қотилликка мана шу куйинди, губор, тамаки ва сўққбош эркакнинг ҳиди анқиб турган, унинг ўз умри каби ҳароба ҳужра ундаландай таассурот қолдирарди.

VII

Котиб хуфтон пайти меҳмонхонага ҳар доимгидаид индамай, бироз ҳўмрайиб кириб келди: унинг қизарган кўзларидан ва кўпчиган юзидан ичиб келгани аниқ эди — у ичган пайтлари жуда мулоим бўлиб қоларди; унинг касби чўлқуварликка ҳеч бир алоқаси йўқ, табиатан қўрс, қўпол муомаласи билан чўлга келиб орттирган манманлигига тақаббурлик қўшилиб уни одамлардан беҳдириб қўйган — у, вазифасига кирмаса ҳам ҳар бир ишга бурнини тиқаверар, ўзича кўрсатмалар берар — туман саркотиби келганда далаларни Омон Жума эмас, у бирга қўшилиб айланар, негадир саркотиб олдида ўзини жуда эмин — эркин тутар, ҳатто ҳазил — ҳузул ҳам қилиб қўярди. Уни олис шаҳардан мана шу жумард ва жанжалкаш одамларга йўлбошчи қилиб жўнатишганди; посёлкадагилар ичида саркотиб билан қалин эмиш, уни шахсан ўзлари тарбиялаб, бу ерга олиб келганиши. Яна қандайдир қариндошчилик томонлари ҳам йўқ эмас эмиш, агар уч йил режа кетма — кет бажарилса, уни Омон Жуманинг ўрнига ёки ҳеч бўлмаса янги хўжаликлардан бирига босқон қилиб сайлашармиш, фалон эмиш, писмадон эмиш, хуллас, суяги тоза эмиш деган гап — сўзлар юрар, исқирт қоровул билан ғалати яқинлиги обрўсига бироз соясолса — да, ундан Омон Жуманинг ўзи ҳам ҳадиксирад, бу уни янга ҳам салобатли ва муҳтарам қилиб қўйганиди.

Котибнинг изидан озғингина, лекин истараси иссиқ қиз ҳам келарди – у пахталик кийиб олган, котибнинг шляпаси чанг, кўзлари ҳорғин эди – улар тўғри даладан келишаёттан эди, чамаси, эгни – бошидан пахта ва губор анқиб турарди.

— Менга ўрта хонанинг қалитини бер, – деди котиб.

Котибнинг орқасидаги қизни у дарҳол таниганди. У қизни олти ойча оддин байрамона тусда ўттан сайлов тантанасида кўрган ва гарчи танимаган, кўрмаган бўлса ҳам қўлидаги сайлов қоғозини индамай қутига ташлаганди: сайлов одди йиғини мактаб биносининг кенг ва шинам залида ўттан, қиз эса котиб билан раиснинг ўртасида қисиниб – қимтиниб ўтиради. Ўшанда у бўй – бастига қараб бу қиз ҳали мактаб ўқувчиси бўлса керак деб ўйлаган ва нега айнан шу қизни сайлашаёттанига ҳайрон бўлганди. Лекин, қиз йигирма учга кирган, фаол ишбоши, фирмә възоси ва ҳоказо эканлигини кейин билди. Котиб қизни шундай келништириб таърифладики, уни сайламасдан бошқа илож қолмади ва шундай ҳам бўлди: қиз юз фоиз овоз олди. Унинг озгин, қотма суқи – сумбати, буғдойранг юзи, таъсирчан кўзлари одамда қандайдир яқинлик уйғотар, истараси иссиқ ва сулувгина қиз эди.

— Биз бу чўлни бўстонга айлантирамиз; фақат бахтли ва эзгу ниятли одамлар яшайдиган янги ҳаёт қурамиз, янги ҳаётни мана шундай ёшлар қуради, биз эса фақат уларга йўл кўрсатамиз. Хуллас, сизларни уялтирмайди, фақат пахтани эмас, одамни ҳам яхши тушунади, ҳалқпарвар. Баъзида, – котиб қизга қараб кулимсиради, – биз билан ҳам торгишиб қолади. Камчилигимизни шартта бетимизга айтади. Мен уни ана шу мардлиги учун ҳурмат қиламан.

Қоровул ўша кунини ва котибнинг юзидағи ифодани яқдол эслаб қолганди ва ўша куниёқ қизнинг қопқонга тушганини, котиб айёр айғирлардан эканини, у кўп йиллик тажрибасидан билар ва негадир бундан ғурурланганди. Котиб уни кўриб, кўз қисиб қўйди. Қоровул ҳам унинг ёришиб кетган юзига боқиб тўймас, гапираётган худди ўзининг жигаридай, ҳар гапга ёйилиб жилмайиб қўярди. Сайлов тутагач, котиб уни бир чеита тортиб ўн сўмлик берди:

— Бугун менинг номзодим ютиб чиқди. Мен учун тўйиб ич, – деди.

Кечқурун күп ичганидан боши қизиб, бөгөн хиргойи қилиб юрган қоровул зўрға юриб келаёттан, юзи қизариб кеттган котибга дуч келди, оғзи қийшайиб қолганидан қоровул унинг тайёр бўлиб келаёттанини билди, сяб ҳонасига олиб кирди, ечинтириб қўйди; котиб гўлдирар, уни чўлп – чўлп ўпар ва «Юракни бир титиб юбор», деб бақиради.

Қоровул хириллаб қўшиқ айтар, гарчи бу хиргойи кувурнинг қурумлашидай хунук ва ярашиксиз бўлса ҳам, котиб шавқ билан қичқириб қўяр, кимларгадир, афтидан, хотирасининг бир бурчагида қолиб кеттган кимгадир «окаси жонидан» деб бақирад, қоровул эса бу худбин, олифта, ўзбошимча, тийиқсиз ва танти одамни шу лаҳзаларда қандайдир зил – замбил оғриқ эззёттанини билар ва кўпроқ кўнглини олишга ҳаракат қиласади, баъзан котибнинг гайрати унга ҳам ўтиб, у ҳам котибга тақлидан «о – каси, жонидан» деб хириллар, худди котибдек пиёлани кўзларини юмиб бир сипқоришда ичиб юборар эди, сўнг котибга монаңд томоқ қириб қўярди, баъзан эса унга котибнинг ёш, навқиронлиги юқиб ўзини, бутун вужудини – энди ўзларини ҳеч ким безовта қилмаслигини кун ўттан сайин тобора кўпроқ англашаёттан ажинлар ва чандиқлар уюми қийқириб ётган пепонасига, ўтаёттан кунлар аста – секин ўз муҳрини босаёттан ва тобора шалвираб, куйган чармга ўхшаб бораёттан кўказак юзига, бу дунёда ҳеч бир из қолдирмай ўтаёттанидан атрофидаги оламдан ва қоқ тепасида жуфт – жуфт бўлиб учиб юрган қушлардан уялгандек кир ва жуладур кийимлар ичига яна ҳам кўпроқ ботиб бораёттан қадди – қоматига ва очиқ қолган китоб янглиг унинг барча сиру асрорини ҳар дақиқада ошкор этиб турадиган кўзларига, гўё ўзи босиб ўтган бутун ҳаёти давомида еча олмаган умр сири яширингандай ёки беҳуда ва бесамар ўтган кунлари учун кимдандир ўч олишни истаб, ғазаб билан қисиб олингандай доимо асабий тугилиб юрадиган мушгларига битилган пайҳон этилган умр ҳақдаги бу тўзғоқ ва шалдироқ ҳатни гижимлаб ташлашни истаб қоларди.

VIII

У даҳлизга яна бош суқиб қаради – ичкаридан таниш гўнгиллаш эшиттиларди.

— Менга қара, ноз қылсанг, қымасанг бу ердан соғчиқмайсан, барибир ҳеч ким эшиптайди. Агар анати қари түриқдан најот кутаёттан бўлсанг, овора бўласан. У менинг одамим. Агар унга бир шиша ароқ берсам, қизини қўйнимга солиб қўяди. Бир ҳовуч ун учун ҳосилот онасини ўйнаш қилиб олган. Ишонмасанг, ана ўзидан сўра, бир қултум қўйиб берсам, буларнинг ҳаммасини ўзи сенга гапириб беради. Ё чақириб берайми?..

Қиз нимадир деди, сўнг ночор пиқиллади — унинг овозида ўчаёттан шамнинг ялиги каби заифгина қаршилик бор эди ва бу йиги унга таниш эди...

Юрагига муздай нимадир сирғалиб кирди ва вужудида гўё лойка сув қўпди; у ерда мактаб болаларини ўз бағрига чорлаган тонгти қўнғироқдек нимадир жаранглаб кетди ва бу бевақт жаранглаган бонг садоси боқувдаги от каби кўпдан буён пайт пойлаб ёттан унинг ёввойи бир гурурини ва олис хотирасини уйғотиб юборди — мактаб ҳовлисига болалар қийқириб киргани каби у энди бир умр ташлаб кетдим ва у ерларга энди қайтиб бормайман деб юрган ва кимсасиз орол каби олисларда қолган ҳаётининг навқирон адирларида қолиб кеттан нелардир унинг юрагига ҳам ҳайқириб кирди — кўп йиллар бурун хотинининг ўзини оқлаш учун ичкаридаги қиз каби ночор ва ожиз аёлга айланиб йиглаганини, юзини тимдалаб ташлаганини эслади. «Булар бунчалик калтафаҳм бўлишмаса, — ўйлади у негадир бирдан хотиржам тортиб, — ҳаммасининг усули бир хил!»

У ялангоёқ, ялангбош қаҳратон қиши кунида ўзларини қишлоқдан ҳайдаб чиқаргандарига ҳам, онасининг совуқ, кимсасиз ҳужрада қон қусиб жон берганига ҳам ўзини кўниктирган эди, кун ўтказиш учун чойхоналарда исқирт ва қора ишларни қилишга, одамлар «етим», «ўгрибачча» деб атасига, чойхоначининг онасини ўрта қўйиб сўкишларига, кейинчалик ёш, суалув хотинининг «ислиқи» дея жаврашларига, ҳамалиб чиққаҷ, қўлларини бигиз қилиб кўрсатишларига, ҳар бир ўғирлиқдан сўнг тинтув қилишларига, ҳужжатларини боп чайқаб, елка қисиб қайтариб беришларига, ичиб, қўчаларда ухлаб қолганда болаларнинг устига пешоб қилиб уйғотишларига — ҳаммасига кўниккан эди, буларнинг барчасини тақдири

азалга йўйган, қандай тўгри келса, шундай яшаб кетаверган эди, гоҳо онасининг ўн йиллар бошидан тушмаган қора шол рўмоли ўша олис йилларнинг ва ўзлари босиб ўттан аянчли қисматнинг байроғидай тез-тез кўз олдида ҳилпирай бошлар, у ўз ҳаёти, онаси ва отаси учун кимлардандир ўч олишни жуда истаб қоларди, бироқ бу туйғуга ҳам ўзини кўниктирганди. Туйгулар, хотиралар, дарду армонлар тошиб келганда у хилватда бекиниб тошиб кўпиривичар, сўнг ҳамма нарсани унутар, ҳужрасининг бир четига ўтириб жимгина йиглар, эртасига тонг маҳали яна ҳеч нарса кўрмагандек котиб билан балиқ овига жўнарди.

У яхшилаб чекиб олди, ёнини пайпаслаб кўрди. Сўнг эшикка тикилганча узоқ туриб қолди.

У аста – секин эмас, бирдан ҳаммасига тушунгандай бўлди; хотинининг кўзларидағи тундликка ҳам, котибининг «окаси жонидан» деб қийқиришига ҳам, унинг чиройли кўзларига ҳам, ўзининг нима учун бу ерларда юрганига ҳам, нима учун сарсону саргардон бўлганига ҳам ва ўзи каби одамларнинг нима учун саргардонликка маҳкум этилганига ҳам. Унинг бирдан хўрлиги кеди. Ахир ҳаммаси кундай аён – ку, нега шу пайттача фаҳмламади экан? У ўзининг болалигини, баджаҳл отасини, хотинининг эгнидаги хориж камзулини, онасининг қора шол рўмолини эслади – у зинадан кўтарилаёттандай хотиралардан сирли ва мавҳум юксаклик томон бир – бир кўтарилиб борди: у кўтарилган жойдан ҳаммаси яқъол кўринарди ва шунингдек ҳаммаси тушунарли эди.

У барча саволларнинг жавоби яширинган тилсим бўлиб қаршисида иddaо билан қад кериб турган юмшоқ чарм қопланган эшикка қараб юрди, сўнг худди ақддан озгандек икки йирик мушти билан тўсатдан эшикни ногорадек ура кетди. Анчадан сўнг ичкаридаги овозлар тиниб қолгач ва шивир – шивирлар бошлангач, эшикнинг қулф эканлиги эсига тушиб қолди ва орқага ўзини олиб ром ва қулфни зарб билан тепди, – эшик иккинчи тепқига дош беролмади – салдан кейин у ўзини серҳашам қилиб безатилган, ўргадаги столда гўшт қодиқлари ва арақ шишаси турган, жунбуш ва тер ҳиди қоплаган хонада кўрди.

Котиб эшикка яқин келиб турарди – унинг костюми ерда ётар, түзиган диванда эса эси оғтандай серрайиб қолган, юзи ҳаддан ташқари оқариб кеттан, сайлов арафасида у ўқувчи қиз бўлса керак деб ўйлаган нимжонгина қиз ўтиради; у ҳансирааб турган кўзларида жунун ўйнаган қоровулни кўриб ўрмонда адашиб қолиб, ногоҳон ўзини излаб юрган отасини учраттан ва ўпкасини босолмай йиглаб юборган арзанда қиз каби бирдан тирналиб қолган юзларини бекитиб, ҳўнграб йиглаб юборди.

Котиб эса хона ўртасида ўзининг азми иродасидан бирор марта четта чиқмаган, ўзи айттанидек хонаки тўриқ каби ювош, фаҳмсиз, ислиқи ва ароқхўр, қулдай итоаткор қоровула газаб билан қараб турарди. Унинг кўзларида ўлжасидан айрилган бўриникидай очкўз ва қизганч бир ифода ёнарди; лаблари газабдан титрат, тутгалари узилиб тушган кўйлаги остидан эса дўппайган қорни оҳиста кўтарилиб тушарди – унинг чеҳраси ҳозир ўзи турган бинонинг пештахтасида ҳилпираб турган байроқдай таҳдидаи қизариб кеттан, гёй байроқ пештахтада эмас. Жиззакилик ва қийиқлиқ билан ёнаёттан унинг чеҳрасида ҳилпираётандай зди.

— Сиз менинг онам ҳақида гапирдингизми, — сўради қоровул худди қарз сўраётандай бироз тутилиб мулойим ва заҳарли оҳангда.

— Хўш, гапирсам нима қилиби, — деди котиб унинг кирга боттан бўйнига қараб афгини бужмайтиаркан гапни беписанд кесди. Кейин кўйлагининг тутмасини ўтказа бошлади.

— Бир пиёла қуиби берсам ўз оғзи билан айтиб беради, дедингизми? — сўради қоровул яна ювош тортиб олга интиларкан.

— Нари бор. — Бақирди котиб орқага тисарилиб. — Бўлмаса пушаймон бўласан.

— Чакки айтдингиз шуни, — деди қоровул, — онам ҳурдай аёл эканини яхши билардингиз... мен сизга минг марта айттанман. Чакки қилдингиз шуни...

У аста – секин гаранг ва караҳт қиёфада котибга яқинлаша бошлади, тўсатдан қўллари ўрнида қон истаб жаранглаган қиличлар ўсиб чиқсандек, ҳамда кўзлари битиб,

ўрнида ачимсик гүр ҳиди келаётган лаҳм ичига ёқиб қўйилган бир жуфт кўртақир шам пайдо бўлгандек, у дароз, найнов, тутоқсан ҳолда маймоқ юриш билан котибга тобора яқинлашиб борар, олдида ўзига ҳамон менсимай, қаҳр билан тақаббурона қараб турган одамни ушлаб олиб, бир ямлаб ютиб юборадигандай важоҳатда эди — котиб унга бир муддат беписанд тикилди, кейин орқага чекинди, нимадир излаб стол устини пайпаслади — да, сўнг суви ярим бўлиб қолган графинни олиб, чоғланганча, гўё бир урища бу сўлақмондай гавдани парча — парча қилиб юбормоқчиdek қулочкашлаб, тўғри унинг юзига отди...

IX

Ақлдан озгандек сочи ва кийимлари бир ҳолатда тўзиган, кўркқанидан юзлари кўкариб кетган қизнинг алмойи — алжойи сўзларидан нима гаплигини зўрга англаб, ҳар эҳтимолга қарши таёқ тутган уч — тўртта одам, қўлига ҳеч қачон отилмайдиган тўппончасини қисиб ушлаб олган инспектор ва бош ҳисобчи меҳмонхонага чўчинқираб бостириб кирганимизда даҳлизда ҳамон ой шуъалари ўйноқдарди, жуда яқин кишиси кетаёттан кеманинг изидан маъюс термулиб бандаргоҳда қолган алвон кийимли аёл каби ёки бир неча соат олдин бу хонадан, бу даҳлиздан, бу содда ва жоҳил одамлар орасидан киши ақли ҳам, шуури ҳам етмас қайларгадир қандайдир бир кема бош олиб жўнаб кеттани унинг ҳарир ва алвон елканига ҳасад қилиб, ўзи ҳам қайларгадир сузиб жўнамоқчи бўлаёттан пардани дераза тирқишидан оқиб кираётган шабада оҳиста ҳилпиратар, пол тагида чигирткалар бири қўйиб, бири олиб тинмай ҳултак чаларди, — бурни қонаган одамдек қулфи ва роми титилиб кетган эшик кўпдан буён бизларни кутиб тургандек ланг очиб қўйилган, хонада эса қонга белангган қўлларига графиннинг бир парча синигини ханжардай тутиб олган, тўсатдан бошланиб, ҳамма нарсани остин — устун қилгач, ўзидан кейингиларга чант губор қоплаган даланиию шоҳ — шаббалари синган дарахтлар билан тўзиган ҳазонларни қолдириб сўнгтан бўрондек юзида телбалик ва жазава тўниб қолган қоровул диванда ҳорғин ҳам мағлуб

алфозда ўтирар, хонани қон ва тер ҳиди тутған, қон гиламдан сизиб ўтиб, бурчакдаги очиқ жойда ҳалқоб бўлиб тўпланиб қолган, унда чироқнинг акси липиллар, графин синиги бармоқларини тилиб ташлаган қоровулнинг юзида эса бир неча сония оддин қилган қотиллигининг муҳридек бир томчи қон қотиб қолганди.

Ўртада эса бир муддат ухлаган – у, ҳозир уйғониб қоладигандек чап тирсагига омонаттина бош қўйганча, ўзига ўхшаш ва ўзиdek яшаб ўтган, яшаётган минглаб, миллионлаб одамларга умрни қандай якунаш кераклигини бир кўрсатиб қўймоқчилик ёки ўзи кўғариб оқкан умр жилғаси ойлар оша, ийлар оша қайлардадир адашиб, улоқиб сузид юргану, ниҳоят ҳавосида ҳамон жунбуш ва наҳснинг дўй – дўй мароми сақланиб қолган чўл ўргасидаги мана шу овлоқ бинода елкасида кўтариб юришдан ниҳоят чарчаган, уни ўнгайсиз мағлуб ҳолича ташлаб, ер остига буткул сингиб кеттандай лабининг бир четида бир вақтлар изидан ўзиdek ўсмир ва такасалтанг йигитларни зргаштириб, кўчаларда жанжал ва тўполон қилиб юрган пайтларида ортирган тириқ орасидан ўзига қўрқув ва ваҳм билан тикилиб турган остононадаги одамларнинг ҳамда ўзини сўқир тиламчилик аввал болаликнинг офтобрўя кўчаларидан, сўнг йигитлик – нинг турли машмашалари ва гуноҳ дарахтлари гуллаб ётган ўрмонидан ва ниҳоят бир сакраб ўтилган ботқоқ каби қисқа уфунотта ғарқ ақл – идрокнинг ғаразга боттан тўшагидан етаклаб ўтган ва ўзининг ўлими учун аянчли саҳна тайёрлаган қисматининг устидан боплаб кулаёттандек оғзининг бир учидан заҳарханда табассум қогиб қолган ва ўнг қўлига гўё умр бўйи интилиб етишган нарсаси шундай тер ва кирга боттан сарғиш соч толасини чанглалаб олган котибининг совуган жасади ётарди.

ОЧИЛМАГАН ЭШИК

*Сенга қандай жаннат яратиб
берардим, билмайсан!*
Ф.М.Достоевский

Келинчак ўз эрини мұрақкаб ва сийқа бир китобни үңиёттандай маشاққат билан баъзан адашиб, гумонсираб, рашқ қилиб ўқирди. Бироқ охир – оқибатда ҳаммасига құл силтаб лоқайд вә бепарво бўлиб қоларди: эрини энди истамай, безиллаб, бундан ҳам бешбаттар юраги совиб кетишідан қўрқиб, хижил ва ланжлик билан ўқирди. Ким билади, у балки бу сирла ва чигал китобда эрининг бегона аёл билан бўлган саргузаштини ҳам гўё ҳар куни қўриб юрган ҳодисадай, гўё ўзига мутлақо алоқаси йўқдай, гўё юз марталаб ўқилган сийқа бир хатни ўқигандай, гўё шундай бўлиши табиийдай хотиржам ва бепарво ўқиб чиққандир? Балким кўнглидаги рашқ, алам ва ўзга аёлга ҳасад туйғуси эрининг юзидан бу саргузаштни бутун сиру – асрори билан ўқиб бўлгачгина йўқолган ва ўрнини номаътум, ўзига ўхшаш муштипар, эрининг хушомадларига осонгина асир тушган аёлга ачиниш ҳисси эгаллагандир? Келинчак баъзи – баъзида ўзига «кундош» бўлган у аёлни хаёлан тасаввур қилар ва кўз олдида дунёда энг гўзал аёлнинг сиймоси пайдо бўларди. Эрининг назари тушган аёл бундан ўзгача бўлиши мумкин эмас эди. Аёлни хаёлан тасаввур қилар экан, ўзи хаёлида яраттан бу илоҳий суратта баъзан ўзи мағтун бўлиб қоларди ва бундай аёлни севмаслик, унинг кўнглини қолдириш ҳеч кечириб бўлмайдиган гуноҳдай туюлар ва эри шундай аёлни севганидан фахрлангиси ҳам келарди. Кўнглига яқин келинчакларга бу аёлни ялмогиздай доғули, жодугар, эримни макр – ҳийлалар билан домига илинтирган деб қарғар, оғзига келган сўзлар билан ҳақорат қилар, ўлимини яраттандан ҳам, яратмагандан ҳам тун бўйи

тилаб чиқарди. Эри унинг бирдан – бир хазинаси эди. У эридан қачон бўлмасин, ажралишни хаёлига ҳам келтирмас ва бу хазинанинг фақат ўзиники бўлишни истарди. Шу ёзниг ўрталарида хазинасини иккига ажратиб ташлаган қилич унинг қалбини ҳам иккига бўлиб ташлаган, унинг иштиёқи – ю, ҳаётини муаллақ қилиб қўйган эди.

Келинчак ҳар кечада ўзи турган қирғоққа бир муддат қўниб ўтгандан сўнг, яна узоқ сафарга отланган кемадек ўзидан кундан – кун узоқлашиб, номаълум манзил сари кетиб бораётган эрини, унинг сўнгги пайтларда пайдо бўлган терс, қўпол, жizzаки феъл – авторини, бир вақтлар эри билан жуфт қанот бўлиб учиб ўтсан, ҳозир эса узоқ – узоқларда ташлаб кетиаган ўтовдек кўринаётган баҳтли ва осойишта кунларини эслаб то тонггача йиглаб чиқарди: тонгда йигидан қизариб кеттан кўзларини арта – арта оғир кетмонни ҳолсизгина кўтариб, руҳсиз ва афтода алфозда ишга жўнарди ва кун узоги яна ўша эрининг эс – ҳушини ўғирлаган аёл билан хаёлан мунозара қила – қила, аёлнинг эрига қўйган тузоқлари, макрлари ва жодуларини ҳамда умрининг гулгун лаҳзаларини бегона ўтларга қўшиб, чопиб қайтарди. Келинчак ҳамиша ўзини шаҳарлик аёлга қараганда ожиз ва хунук бўлсан керак деб ўйлар, эрининг ақдини олган аёл назаридан ўзидан гўзалроқ, меҳрибонроқ, ишвалироқ, жозбалироқ ва нафосатлироқ бўлиб туоларди. Ўзига қараганда қўпроқ билади, ўқимишли, эрининг кўнглидан чиқа олади, тоза ва озода кийиниб юради, ўзидек қатиқ билан бош ювмайди, баданидан тер ва гўза ҳиди келиб турмайди, ўзига қараганда ёш, юзи қуёшда куймаган, соchlари сарғайиб кетмаган, қўллари ҳам ўзиникидек дагал, қўпол эмас, тафтли, ҳароратли, майнин, нозик – бундай қўлни ушласа эрининг бир йиллик ҳордиги чиқиб кетади: шундай пайтларда келинчак ўзига ўзи бечораҳол, бўшанг, уқувсиз, инжиқ ва йиглоқи бир келин бўлиб кўринарди.

Баъзан у ўзига ҳеч алоқаси бўлмаган, гоҳида изтироб, дикқат, фаромушлик, гоҳида шиддат, жўшқинлик, хушбахтлик чулғаб оладиган эрининг тунд юзидан қуюқ туман ичида секин сўнаёттан гулхан янглиғ ўзига аталган ва аста – секин изсиз сўнаёттан заифгина эҳтиромни кўриб қоларди.

Келинчак тўрт йилнинг чанг – губорлари, ёмғир – қорлари остида қолган, бу уйга энди келин бўлиб тушган пайтларидағи эрининг эдтиросали муҳаббатини худди ўт – ўланлар орасидан йўқолган игнасини ахтараёттандек, эрининг қув кўзларидан баъзан саргашта бўлиб излаб қоларди. Лекин сувга чўккан тошдек, бу муҳаббат қаёққадир гойиб бўлган эди. Баъзан келинчак ёнида ёттани совуқ ва тунд эркакка қараб ногаён эрининг күёвлик пайтлари эсига тушар ва шунда ўша навқирон ва қувноқ күёвболага ҳеч алоқаси йўқ ёт бир эркак билан ёттандек, бирдан сесканиб тушар ва ёнидаги эркакни қаёққадир ташлаб кеттан шўх – шодон, қувноқ күёв болани излаб сигирини ахтариб юриб, қуюқ ўрмонда адашиб қолган эртакдаги ўтай қизчадек эрининг худбинлик ва заҳархандалик билан қизариб турадиган юзини, оҳиста билинар – билинмас ажинлар қоплаёттани пешонасини, темирчининг омбуридай совуб қолган лабларини секин пайпаслаб излаб қоларди.

— Бу нима қилганинг, — жеркиб юзларидан қўлларини силтаб ташлади уйғониб кеттан зри унга зарда билан тикилар экан: — Ҳалиям ёш болага ўхшайсан. Ўзингни сал босиб олсанг – чи.

У юзини тескари ўтириб олди – да, яна пишиллаб беозор уйқуга кетди, келинчак эса бўғзига тошдай тиқилиб турган йигини босиш учун тишларини қаҳр билан бир – бирига босиб турар, агар тишларини қўйиб юборса, бўғзидан бутун уйни, бутун ҳовлини, бутун қишлоқни, бутун дунёни бошига кўтарадиган аянчли йиги отилиб чиқишини англар, бироқ юзидан ёш томчилари сим – сим тўклиб бўйинлари орқали бир эркалашга, бир ардоққа интизор бўлиб сўлиб қолган кичкина, заиф кўкракчаларининг ҳовучига бориб қуйилаёттанини сезмас эди.

— Эрингнинг сендан кўнгли совуганига сабаб – бефарзандлигинг, — дерди кўнглига яқин келинчаклар, унинг гўзалар орасида кетмонни қучоқлаб худди оқ фалакка чалинган бир туп гўзадек мунгайиб, сўлиб, тушкун ва умидсиз юм – юм йиглаб ўтирганини кўрган пайтлар, – битта бола туғиб берсанг, сенга парвона бўлиб қолади.

Келинчакнинг ўзи ҳам шундай ўйлар эди. Лекин айб кимдалигини ҳам, нимага шунча йилдан бери бола

кўрмаёттанини ҳам, нима учун бошқалардай пешонаси ёруғ змаслигини ҳам, ўзига оналик шодлигини нима учун раво кўрмаёттанини ҳам билмас эди. Бунинг учун эри ҳам, ўзи ҳам сабабчи бўлиб туюлмасди — сабаби ўзидан ҳам, эридан ҳам ўзга хилқат бўлиб туюлар ва ўша хилқатдан баъзан баҳт ва дориломон кунларга қўшиб, бола ҳам сўрар эди. У ҳам она бўлишни истар, у ҳам қорнини қаппайтириб кўчалардан бошқаларнинг ҳавасини ва ҳасадини келтириб керилиб ўтишни орзу қиласди.

Эри эрталаб бир даста қалитларни олиб, бир ҳафтадан буён очилмаётган омборга қараб кетди. У ердан асабийлашиб, хўмрайиб қайтиб келди.

— Ё қулфдан воз кечиш керак, ё эшикдан, — деди у ўзига — ўзи гапиргандек. — Ҳеч очиб бўлмаяпти. Қулф ёмғирда очиқ қолиб, занглаған. Бирон нарса билан ўраб қўйишга эса сенинг ақлинг кўплик қилган.

У «етмаган» демади, айнан «кўплик қилган» деди. Унинг хунук бўлса ҳам жуда мустаҳкам қулфга ичи ачиёттан ва буни яширмай таъна қилаёттан эди.

— Қандай қилма, бари бир очилмайди, — дея тўнғиллади у ва уйнинг орқасига ўтиб кетаркан. — Пулни қўкка совуришни биласизлар фақат. Сизларни ҳамиша бирор тергарб туриши керак.

У томорқа тарафда ҳам яна узоқ нималардир деб жавради. Келинчак эрининг бу марта шаҳардан жizzакироқ кайфиятда қайттанини келган куниёқ сезган эди. Балким, шаҳарлик аёл билан оралари совугандир, эҳтимол, бошқа сабаби бордир? Келинчак чин дилдан биринчи сабаб юз беришни истар эди. Шу сабабли эрининг овга бориб, қуруқ қайтган овчидай бузилиб қайтиши ёзнинг бошларида келинчакларнинг маслаҳати билан ҳамиртурушга игна қадаб ташлаганининг каромати дея ўйларди. У муштдай ҳамирга игна қадаб сувга оқизиб юборганди. У эрининг шаҳарлик аёлдан кўнгли совишини, уни ёшлигиданоқ сифинишга, гуноҳлари учун тавба қилишга ва бошига кулфат тушганда мадад сўрашга ўргатишган, ўша сирли ва ҳеч қачон қиёфасини тасаввур қилолмаган ҳилқатдан ёлвориб сўрар, ҳар бир нарсадан илинж, чора, мадад излар, ҳамма иримларга қаттиқ риоя қиласди.

Қачонлардир келинчак ғалати түш күрганды ва эри ёнида ёттан пайтлари негадир ўша тушни күп эсларди. Тушида эри худди қайсицир бир кинода күргандек бағоят сулув ва ловуллаб турган қип – қизил, ҳарир күйлак кийган аёл билан кенг лолазорда бир – бирига жилмайиб тикилганча кетиб боришарди. Эри аёлнинг елкасидан оҳиста қучиб олган: унинг юзида маҳрамона ифода порлаб турар, аёлни қулдириш учун нимадир гапирап ва оддин ўзи хохолаб кулар эди. Аёл эса эрига қараганда фироги баланд, кибрли ва келинчакка чиройли юзи бир оз совуқ бўлиб туюлганди. Улар қўлларида бир даста лолани силкиттанча гулбарглари тўқилаётгандан бехабар ўзаро сұхбатлашиб, узоқда кўринаёттан қир томон кетиб боришар, уларнинг изидан учеб тушаёттан гулчамбарларни териб ёшгина бир қизча ҳам борарди. Қизча жуда ёш, озгин ва пучуқ эди. Қизча улар тўккан гулчамбарларни битта қўймай териб олар, эри эса сўлиб қолган лолаларни аёлнинг қўлидан олиб, изига қарамасдан боши узра орқага улоқтирап ва аёлга янги лола узиб бериш учун дамодам эгилар эди. Улар пучуқ қизчага деярли эътибор ҳам беришмасди. Келинчак эри аёлни қип – қизил лолалар ичига секин ўтиргизганда ва сўнг лолалар ичида улар кўринмай қолиб, аёлнинг қип – қизил кўйлаги лолазорда ҳиллираб учеб кеттанды ҳамиша димиқиб ва ҳўрлиги келиб уйғониб кетарди. Қизча эса аёлнинг кўйлагини тутиб келаман деб шамолнинг изидан югуради, гоҳида қизча аёл ёттан жойга қўрқа – писа мўралаб қарап ва кўнгли рапшқдан азобланиб ҳўнграб юборарди. Келинчак ногаҳон пучуқ қизчанинг ўзи эканлигини англаб қолар, ҳўл бўлиб кетган ёстиқни қутоқлаганича уйғониб кетарди.

Келинчак эри аёлнинг алвон ҳарир кўйлагини қўлида узоқ айлантириб отиб юборганини, сўнг эри билан аёл қизғалдоқлар орасига сингиб кеттанини, қизчанинг эса шамол олиб қочаёттан алвон кўйлакни тутаман деб, югуриб бораётуб йиқилиб тушганини кўриб турар эди. Назарида кимдир қизчанинг юзини оҳиста эркалаётгандек бўлди. Сўнг кимнингдир бадбўй иссик нафаси юзига урилди ва юзида нам сезди. Келинчак уйқу аралаш секин жилмайиб қўйди. Ўзини қучаёттан, эркалаёттан, сўнг ўзига билинтирмай ечинтираёттан қўллар эриники эканлигини сезмаслик, ўзини

билимасликка олиш учун ғафлаг уйқусида қоттандек ғингшиб қўйди ва туш аралаш ийқилиб тушган қизчанинг ўрнидан тураман деб туролмаёттанини, қандайдир оғир куч устидан босиб турганини элас – элас илгар эди. Сўнг қизни ҳам назарида ечинтиришаёттандек бўлди: келинчак уйқу аралаш ўзини ечинтираётган қўлларни секин ушлаб, ноз қилаёттандек сўлғин жилмайди ва ногаҳон қўлларнинг эриникидай юмшоқ, ингичка, силлиқ эмас, дағал, яра – чақа босган катта эканлигини сезиб қолди – да, юзига кимдир бир коса муздек сув сепиб юборгандай, сесканиб кўзини очди. Аввал тепасида чарақлаб турган қуёшдан кўзлари қамашиб кетди ва ўзининг қаерда ётганини, атрофини гўза ўрмони ўраб олганини тўсатдан англаб қолди. Кўзларни тик қуёшдан пана қилиб иргиб турди – ю, қандайдир бир зарб билан яна жойига ётиб қолди ва ўзининг ярим ечинтирилганини, таниш тракторчи ўзини қайта ётқизиш учун зўр бериб елкасидан босаёттанини, ёввойи айғирдай пишнаёттанини кўриб қолди ва қўрқиб кетди: иккала оёги билан тракторчининг оғзи ва бурни аралаш тепиб юборди. Тракторчи «их» деди – да, қўлларни қўйиб юбормади, унинг уйғонганини кўриб жон – жаҳди билан қўпол ҳаракат қила бошлади. У бурнидан оқаёттан қон келинчакнинг очилиб қолган сонига тушаёттанини сезмасди ҳам: келинчак ўз шаънини зўр бериб ҳимоя қиласади. Кийимбошию бутун вужудидан бадбўй дори ва керосин ҳиди келаётган тракторчи эса уни охиригача ечинтиришга уринар эди. Аёл чайир ва чақон эди. Тракторчи кучли ва найнов эди. Ўзларни кўмиб турган гўзалар ҳам уларнинг ўзаро жангини томоша қилаёттандек нафас чиқармай қотиб қолганди: узоқдаги шийпондан аёлларнинг тушлик овқат устидаги қувноқ кулгулари токи улар олишаёттан қартагача ёпирилиб кирар, лекин улар бу кулгуларга эътибор бермас, ҳар бири ўз мақсади* учун ёниб тиришиб курашар эди. Эркак кучини беҳуда ишлатиб чарчаб қолгач, бирдан умидсиз ва тажант оҳанѓа шивирлаб, хушомад қила бошлади:

— Ахир эрингнинг шаҳарда аёли борлигини ҳамма билади – ку?

Келинчак унинг гапидан сесканиб тушди, номус ва аламдан ларзага келди, бирдан қўлидаги қилични бирор уриб

туширгандай бемажол бўлиб қолди. Худди ҳазина яширинг ғорнинг тилсимли жумласидай бу жумлага унинг барча мудофаа аъзолари бирин – кетин асир туша бошлади: у эркакнинг қўлларига ортиқ қаршилик қилмай, гўё яшашдан энди умид узгандай, ўзининг ихтиёрини унга топширганини билдиргандай кафти билан юзини тўсиб, ҳўнграб йиғлаб юборди. У тракторчига ёқар эди. Иккаласига икки хил қисмат, йўл, пешона ва юлдуз берган тақдирга гоҳ – гоҳида енгил, оғзининг қулфи – калити йўқ, хунук хотинининг етмиш яшар кампирниридай маза – матрасиз жағрапларидан, инжиқликларидан тўйиб кептан пайтларида ҳўрсиниб – ҳўрсиниб лаънат ўқирди. У ҳўрланган, алданган ва ҳали ўн гулидан бир гули очилмай баҳтсизликка маҳкум этиаган, бир пайтлар ўзининг хаёлидан кетмайдиган қизнинг – келинчакнинг умидсизлик билан ўксиниб йиғлаб ётишига қараб туриб, вужудидаги жунбуш секин сўна бошлади: у келинчакнинг тақдирни ўзиникидан ҳам аянчлироқ эканлигини англаб турарди, унга ачингиси, ёрдам бергиси, эркалагиси келарди. Бироқ, келинчакнинг бутун далани тўлдирган йигисига қулоқ солиб туриб, ўзининг келинчакнинг дарду аламига ёт, бегона эканлигини, бу сирли ва азобли қалбни ҳеч қачон тушунолмаслигини, ўзининг эркаловчи ҳар бир сўзи унинг баҳтиқаролигини тасдиқловчи садодай бўлиб жарангланини сезди.

Келинчак токи боши оғриб вужуди бушашиб қолгунча тракторчининг асов эҳтирос билан ўзини кесакка қўшиб зэғилаб ташлашини кутиб, ингичка товуш билан аразлаган ва ҳўрланган алфозда йиғлаб ётди. Сўнг боши оғригач, йигидан тўхтаб, бир нафас ён – атрофга ғамбода ва ҳайронга кўз югуртирди: ёнида энди ҳеч ким йўқ, згатлар ичига жосусдай шарпасиз енгил шабада ўрмалаб кирган, қуёш эса унинг оёқлари учига ўтиб, худди ўз аксини кўрмоқчидалай згатни тўлдириб оқаётган жилағадек тўлғониб ётган, муқаррар ҳодисани кута – кута чарчаган оппоқ сонларини ва кичкина қоринчасини берилиб, завқ билан томоша қилар эди.

Эри ҳали қайтмаган, қайнонаси нариги уйда ухлаб қолган бир кечаси келинчак ётоққа ўтирайдай сирғалиб кирди ва эшикни маҳкам занжирлади. Ойна олдига келгач, қошу

кўзини синчиклаб кузата бошлади. Назарида ўзига ўзи бип – бинойи, ҳар қандай аёдан гўзалроқ кўриниб кетди. У шаҳарлик аёlda бор ҳислатларнинг ҳаммаси ўзида ҳам борлигини англади. У секин кўйлагини ечиб, ўзини ойнага солди: ногаҳон кўзгудан ўзига тикилиб турган қип – ялонғоч, ҳурдай парини кўриб қолиб уялиб кетди ва ердан кўйлагини олиб, секин кўкракларини тўсди: сўнг орқа ўтириб, ён томондан қараб, ўзининг силлиқ ва сўлим қоматига ўзи маҳлиё бўлиб қолди; кўйлакни яна қайта ерга ташлаб энди ҳеч нарсадан сесканмай муштдай кўкракларини оҳиста ушлаб кўрди: кўкраклар уясидан бошини чиқариб турган мурғак палапонлардай, дафъатан яланғочлиқдан жунбушга келиб безовта титраб турар эди. Кўкраклари ҳам, қоринчаси ҳам, улкан қоядан тўкилаётган шаршарацек селкиллаб турган қалин, тарам – тарам соchlари ҳам ҳеч қандай аёлникидан қолишмайдигандек эди. Келинчак эрининг шаҳарлик аёдан ўзида йўқ яна нима топганига ҳайрон бўлди, шаҳарлик аёлнинг ўзидан ҳеч қандай ортиқча ери йўқдай эди. Ҳатто ўзининг сийналари у аёлникуга қараганда дуркунроқ эди. Келинчак кийиниб бўлгач, болалигидан қолган одати бўйича бу ўлик чиққандай ҳувиллаган уйдан, бу зугумали дунёдан қайларгадир учиб чиқиб кетмоқчилик, қўлларини қанотдай ёзиб, силкиб – силкиб қўйди. Унинг худди қушдай учгиси келарди. Учиб – учиб ўзи қизлик пайтлари хаёлида яраттан оппоқ эртаксимон дунёга бориб қолиши, у ерда маликалардай баҳтли ва осоиишта кун кечиришини, бири – биридан гўзл, мард, паҳлавон шаҳзодалар тутиб беришни орзу қиласади. Бу хаёлий, лекин унинг учун ягона таскини дунё эди. Бироқ у учиб кетиш учун қанотларини силкиттан сайин, тобора кўпроқ бу сокин ва хиёнаткор ҳаётта қоришиб борарди.

У қозоннинг тагини узоқ пуфлади. Тутундан кўзлари ачишиб кетди: кўз олди шуълаланиб милкларига ёш қалқиб чиқди. У қоракуя теккан бармоқларига зътибор ҳам бермай, кўзларини уқалади, пешонасига тупған сочни бир чеккасига танғиб қўйди. Сўнг гутурт олиш учун уйга кирди. Эри қандайдир журнал варақларди. У худди ўз умрини варақлаётгандай, журнални имиллаб – эринчоқлик ва ҳафсаласизлик билан варақларди. Эркак унга бир қаради –

ю, кўзларида ўт порлаб кетди ва зарда аралаш тагдор қилиб жилмайди.

— Пешонангни қора қилиб қўйибсан, — деди ним табассум билан, сўнг ўзининг сўз ўйинидан ўзи завқланиб ёйилиб жилмайди ва нимадир эсига тушиб, юзига бирдан қаҳр юурди. — Нима бунча ивирсиқ бўлмасанг, бирон нарсани эполмайсан, доимо шу — исқирт кир — чирга ўралашиб, бева хотиндай шалвираб юрасан. Бундай ўзингга қарасант бўлмайдими?

Келинчак эрининг гап оҳангидаги таҳқирни сезиб, кўксида нимадир сингандай қулоги шангиллаб кетди. Сочиқ билан пешонасидағи бармоқ изларини артди — ю, бўғзидағи ранжу — аламни ютиш учун секин ўчоқ бошига қайтиб чиқди. Эрининг дағаллигидан хўрлиги келиб ўчоққа, лопиллаб ёнаётган оловга фаромут тикиди. Олов ўчоқда эмас, ўзининг кўксида ёнаётгандай ва бу қоп — қора, ишлатилавериб хароба бўлиб қолган ўчоқ эмас, ўзининг юрагидай оловга мафтун бўлиб тикилиб турди: орқасидан қайнонасдининг вазмин қадам товушларини эшитиб, ўрнидан иргиб турди — да, қайларгадир учишга чорланган хаёлларини пиёзга қўшиб қозонга ташлади ва шошилиб қовура бошлади. У шундагина кўп йиллардан бери ўзининг хаёллари қозон устида пиёзга қўшиб қовурилганини, аввал ўттай укалари ва меҳмонлар, энди эса эри ва қайнонаси ўзининг бу зерикарли ҳамда серкулфат турмушдан халос бўлиш учун озод қуш каби эрк ва ҳурлик истаб юксак — юксакларга учиб жўнайдиган, бироқ охир — оқибатда яна барибир қозонга келиб тўкиладиган хаёлларини еб қўйишганини дафъатан англаб қолди.

Ёзниг охирларида эри уни ўзи ишлайдиган, иморатлар пала — партиш, ҳам тартибли қурилган катта шаҳарга олиб борди. Келинчак шундагина эри ўзи билан юрганидан жуда ҳам ҳижолат бўлаёттанини сезиб қолди. Эри танишлари учраганда қизариб — бўзариб кетар ва унга зарда билан қараб — қараб қўярди. Улар қандайдир бинога кириб наубатта турипди.

Уларни худди ички дунёларини ўқиб олишмоқчилик, турли асбоблар билан обдон текширишди. Сўнг эртасига яна боришиди. Яна текширишди. Оқ ҳалатли нўғай аёл эрига нималарнидир узоқ тушунтируди. Эри унинг олдидан юзи

қизарыб, умидсиз қиёфада чиқди. Токи уйга қайтиб келгүнларича чурқ этмади. Келинчак эрининг юзидағи ва күнглидаги үзиге аталған сүнгги тор ҳам энді буткул узиаланини сезди.

Шу көчеси келинчак биринчи марта эрининг олдида үзини тута олмади. Ноңақ хурланғандек узоқ йиглади. Унинг йигиси тұхтаб – тұхтаб учайдан бесаранжом қүнгиздек, бутун уйни тұлдырди. Ёзниң чанги үрнашиб қолған дераза тирқиши – ларидан ҳовалиға ўрмалаб чиқди: у ўксис – ўксис, ноз билан, ишва билан, дилбарлық ва араз билан йиглади: эри эса уни овуттиси ҳам келмай шифтта тикилғанча нималарни дір үйлаб ётди.

— Энди фойдаси йүқ, — деди у кимга гапирганини үзи ҳам билмай. — Ахир бир умр шундай үтголмаймиз – кү?

Келинчак күксидеги эрига нисбатан шу вақттача асраб юрган эхтиром пиёласи жаранглаб синганини эшилди ва оғриқни ҳам билмай, алам ва умидсизлик билан бармоқларини тиғшлаб ташлади.

Келинчакнинг китоб ўқишига на вақти, на қунти бор эди. У бир варақ китоб ўқиса, уйқуси келар, шу сабабли китоб ўқигандан кашта тұқыган ағзалроқ эди. Бироқ у гоҳ – гоҳида, туш пайти, шийлонда дам олиб ўтиришпанида, шунчаки эрмак учун аёллар журналини ўқиб турар эди ва у қачонлардир эри синглиси билан үйнашиб юрганидан номусста чидалай олмай, үзини ўдирған аёл ҳақидағи қандайдыр мақолани ўқиган эди. Эрининг шаҳарлық үйнаши ҳақида ўйлар экан, бу воқеа бот – бот эсига тушарди. Шунда үзининг синглиси йүқлигидан, гарчи синглиси бўлған тақдирда ҳам эри бундай пасткашлиқ қиласлағини билса ҳам, үзини дунёга келтирар – келтирмас ўлиб кеттан онасининг ягона қизи эканлигини эслаб, ич – ичидан хурсанд бўлиб кетарди. Гоҳида эса ўттай онасининг ёшлигида «Илоё, баҳти қаро бўл, илоё қирчиллама ёшингда қайрил, илоё баҳтинг очилмасдан бева қол», деб ер муштлаган қарғишларини эслар экан, мени қарғиш урмадимикан деган ўйдан ваҳимага тушарди. Балким уни баҳти қаро қылған – онаси дір? Чўлоқ, уқувсиз ўттай онаси үзининг қўлидан бир иш келмагач хаёлпараст ўттай қизини бутун қишлоқ эшигадиган қилиб қарғаб юради, унинг хотирасида болалиқдан бирон нарса эсида қолмаганди; эсида

қолғанлари уни уззукун таъқиб этиб юрадиган қарғишлар эди. — У бу қарғишлардан, кattаларнинг сассиқ ва құланса дүнёсідан қочиб, ўзини нима ҳимоя қылса, ўша ерга бекинарди: бироқ худди ялмогизнинг супургисидай қарғиши уни гоҳ молхонадан, гоҳ сомонхонадан, гоҳ улоқлар орасыда писиб ўтирган жойидан топиб олар ва бўйнидан ушлаб, қип — қизил тили бутун қишаоқ устида чархпалақдай айланәёттган маймоқ онасининг олдига етаклаб чиқарди. Баъзан эса бола қалби билан у ўтгай онасининг эртакларда айтилгандек унчалик жоҳил эмаслитини, эркалашни билмагани туфайли ҳам эркалаш, ҳам етимлитини билдирипаслик учун ўзини қарғишини англаб қоларди. У болалик дунёсідан кattалар дунёси томон деярли сакраб ўтган эди. Энди кўзини очишга, ақлинни йигиб олишга ҳам имкон бермай бошига тош каби ёғилаёттган маломатлардан, хўрликлардан ўша болаликнинг хилват бурчакларига, — қарғишиларининг зич ва қуюқ ўрмонига ўзини яширади.

Келинчак қандайдир журнал варақлай туриб қошу кўзи тимқора, қўғирчоқдай ораланган, соchlари ёйиаган, тунгги камзулдаги аёлнинг суратига кўзи тушганди. Аёлнинг соchlари елкаси оша, салгина бўртиб турган кўкраклари оша тўклиб турарди. Сурат остида аёлларнинг орастга бўлиш, эркаклар кечаси аёлларнинг соchlарини ёйиб, эркалааб ётишига мойил бўлишлари, аёлларнинг ҳамиша ёқимли, ёш, ҳамда сўлим бўлиб қолишлари учун нималарга зътибор беришлари тўгрисида кattагина мақола бор эди. Келинчак мақоладаги кўпгина сўзларга тушунмаса ҳам қизиқиб ўқиб чиқди. У суратдаги аёлнинг тиниқ ва гўзал чеҳрасига ҳавас билан тикилиб турар экан, шаҳарлик аёлларнинг ҳаммаси мана шундай бўлса керак деб ўйлади.

Эри ҳали меҳмондорчиликдан қайтмаган эди. У тошойна олдига ўтириб олиб, соchlарини ёйиб таради, сўнг кўзига қора сурма сурди. Лабини беўжшов қилиб бўяди, кўкрагини ярим очиқ қолдириб, камзулининг ёқасини қайтариб қўйди: юзига билинар — билинмас упа — элик сурди: қорамтири, бугдойранг юзида пардоз ола — була бўлиб қолса ҳам унчалик зътибор бермади ва журналда ёзилганидек, бўйнига, лабларига, сочига атире сепиб, икки кишилик тўшакнинг бир четига ўтириб, эрини маҳтал бўлиб кута бошлади.

Эри алламаңалда қайтди. Чироқни ҳам ёқмай ечинди. Келинчак күзидағи ёшларни артиб, уйғоқ эканлыгини билдириш учун секин хұрсаниб қўйди. Бироқ эри ўрнига чўзилди – ю унга тескари ўтирилиб олди. Келинчак узоқ жим ётди. Сўнг эрининг ҳали ухламаганини билгач, елкасига секин боғ қўйди. Эри унга ҳайрон бўлиб тикилди – да, ўтирилиб ётди ва истамайтина соchlарини силай бошлади. Келинчак эрининг кўкрагига бош қўйди. Эри унинг юзини ҳовучига олиб шаштани қайтармаслик учун секинлик билан лаб босди.

— Бу нимаси, — келинчакни силтаб ташлади у тўсатдан, ифлос нарсани тишлаб олгандек, бир четта туфлар экан, ёнидали тун чирогини узалиб ёқди ва хотинини газаб билан кўздан кечира бошлади.

— Бу нимаси, — деди у яна, — нима бу? Худди кўча аёлларига ўхшаб бўяниб олибсан?

Келинчак юзига тарсаки тортиб юборгандай, бир зум серрайиб, эрига чўчинқираб тикилиб турди – да, югуриб ташқарига чиқиб кетди: у сўнгра товоқда турган сувга ашил – тапил юзини чайди, сўрининг бир четига ўтириб чорвоя теграсига суюнганча пиқиллаб йиглаб юборди. У онаси ноҳақ урган қизчадек узоқ йиглади, йиглаб – йиглаб боши оғригач, гарангсиб ўрнидан турди, секин эшикни оча туриб ўзига ҳайрон бўлиб қараб турган ҳилолни кўрди, туннинг эркаловчи қўшиғидай жилдираёттан ариқчадаги сувнинг маҳзун навосини эшигти; оёқлари остида тўшалиб ёттан бепоён тун, миллионларча юлдузлар, минглаб чигирткалар – нинг чирилдоқлари, қурбақаларнинг масхараомуз нағмалари, итларнинг безовта ҳуришлари, шовуллаёттан дарахтлар ва сокин ухлаб ёттан уйлар орасида ўзининг ёлгиз эканлыгини дафъатан ҳис қилди. У бу туйғуни ичкарига киритмоқчи эмасдай, югуриб кириб, эшикни занжирлаб олди.

Эри хотиржам ухлаб ётар эди. Келинчак унинг андак солқи юзларига узоқ тикилиб турди. Эрининг лашкарлар қўриқлаб турган қароргоҳда бамайлихотир пинакка кеттан шоҳдек ухлаб ётиши унга эриш туюлди – эрининг сокин уйқусига ҳаваси келди. Бир йил муқаддам эри ўзини мана шу баҳтиёрлик ва осойишталик қароргоҳидан бир умрга ҳайдаб чиқарганини англади, эри билан ўзи бошقا – бошқа

Дунёнинг одамларида туюлиб кетди. У тўшакда шифтта ҳолсизгина тикилиб ётар экан, ташқарида қолдириб, ўзи қочиб кирган ёлғизлик туйғусининг эшиқдан сирғалиб кириб ўзлари ётган тўшакни, худди ўзининг келинчак пайтидагидек ифрат, ҳаё билан тебраниб турган дарпардани, эри билан ўттан осойипта кунлар ва қизлик дунёсининг ҳиди келиб турган ёстиқларни, эрининг хушнуд ва баҳтиёр чеҳрасини, ўзининг яқингинада синиб биттан баҳтаи лаҳзалари яширган чиройли кўзларини ва бутун уйни қийналмасдан забт этанини ҳис этди ва кўм – кўк осмон қўйнида улоқиб учиб юрган қузгундек олдинги осойишта ҳаётидан узилиб, энди ўзи ҳам қаёққадир, манзилсиз томонларга учиб жўнаганини сезди. Ва умрида биринчи марта ўлим ҳақида ўйлади. Шу кеча тушида ҳам ўзининг жизғанак бўлиб ётган саҳро узра бепоён осмонда ёлғиз учиб бораёттанини, учиб бораёттанини кўрди.

Келинчак айвон ойнасидан эрининг омборнинг қалитини бураб, аччиқланган қиёфада қулфни силтаб ташлашини кузатиб турар экан, негадир у омборда ўзининг шу кунлардаги гумонлари, шубҳалари, аламлари, қалбини тобора эгаллаб бораёттан, эрига нисбатан ишончсизлиги ва топталган орзулари солиб қўйилгандай қулфнинг очилишини сира ҳам истамай қолди. У эрининг ўзини тушунадиган пайтлардан энди жуда йироқлашиб кеттанига шубҳа қилмади.

У энди ҳар куни туни билан йиғлаб чиқар, кўзёшлиари унинг кўнглидаги ишонч, садоқат ва муҳаббатни секин ювиб борарди. Гумон, шубҳа, ранжу – аламлар оқими эса уни номсиз томонларга оқизиб кетмоқда эди.

Эрининг феъми кундан – кунга айниб борарди. Келинчак энди эрининг ўзидан бутқул совиб кеттанилигини англади. Келинчакнинг кўнглида рашик ҳам, қизғаниш ҳам йўқолган, аксинча, эрининг хатти – ҳаракатларидан ғапи келарди. Эри ҳам унга таъна билан тикилиб – тикилиб қўяр, худди дарёнинг тубидан бир кўриниб ўтган ва тангачалари қуёшда ялтираб кетган кичкина балиқдай унинг тунд юзига гоҳида қандайдир сирли ифодалар у ёногидан бу ёногига билинар – билинмас югуриб ўтарди. Эри кейинги пайтларда шаҳарда

ҳафтагалаб қолиб кетарди. Келинчак сўрамаса ҳам иш кўпайиб ётиб қолишга тўгри келаяпти, деб қўярди. Баъзан ҳар куни келиб турар, у зрининг ўзига нимадир демоқчи бўлиб, айтолмай кетаёттанини сезарди. Шу билан бирга эри нима демоқчиалигини ҳам билар, гарчи энди йўлини йўқотган йўловчидаи қаёқда юришини билмай ора йўлда қотиб турган бўлса ҳам ўзини эрининг у сўзларини эшишишга, масалани у ёқда ёки бу ёқда буришга тайёр деб сезмас, буни тирик туриб эътироф этиси келмас эди.

— Тезроқ берақол, — деди эркак унга зарда билан тикилар экан.

Келинчак қўлидаги икки жуфт қатламани узатар экан, гўё эрига ўзининг сўнгти қувончлари ва шодликларини узатаёттацдай бўлди. Бир пайтлар ўзининг баҳтини олиб бориб тоғширгандай эрининг бу патирларни ҳам ўша шаҳарлик аёлга олиб бориб тоғширишини ич — ичидан ҳис қилди: ким билади, аёл унинг қанчадан — қанча патирларини еганикин. Унинг патирларига егани ўзига ўлим тилагандир? Эрининг ўзини кўпроқ яхши кўриши, қишлоқни унугтиши учун патир қилган қўлларни атайлаб, қичик қилиб мақтагандир: эри эса ўзига ойда ҳам бир марта раво кўрмайдиган ширин сўзларини унга сахийлик билан, юзи — кўзи, сочи, лаблари, қомати ва бутун уйи тўлгунча айтавергандир.

У зрининг кейинги пайтларда ифлос бўлган лабларини қандайдир кераксиз латтага артгандай хуморсиз, истамайгина ўпишларини эслади; у тўсатдан бир неча ойдан бери шаҳарча ўпинчлардан, турли хил мушк — анбарлардан, упаю бўёқлардан, номаълум гўзал аёлга қилинган ялатоқона хушомадлардан ифлос бўлган исқирт лабларни артиш учун ўзи билиб, кўриб туриб латта бўлиб хизмат қилганини англаб қолди ва бутун баданини жирканч, шишимшиқ нарса қоплаб олгандай, ҳаром билан харишнинг фарқига бормайдиган аёлга айланаб қолгандай ҳис этди ўзини. Келинчак кўксидаги йигини босиш учун гилт этиб ютинди, эрига ўзини курсанд кўрсатиб кузатди.

Қайнонасини қўпнисиникига жўнаттач, у уйига кириб ичидан бекитиб олди. Тўй куни кийган оппоқ кўйлагини кийди, сўяг ўзига атир сепди ва кишини абадий баҳтиёр

қыладиган ва қайсиdir китобда шундай деб ўқиган, қозозга ўроғиқ огуни стаканга солди ва чойнакни сирқитиб қуиди. Худди узоқ сафарга отланаёттандай, бир зум тек қотди: стаканга бир нафас даҳшат ва вахима билан тикилиб турди: сўнг кўзларини чирт юмди – да, стакани бир кўтаришда ичиб юборди. У бўғзини, сўнг кўксини куйдириб ўтган ўтдан ҳолсизланиб борар экан, парчаланиб кетаётган гира – шира онгида шаҳарлик аёлнинг кибрли чеҳраси ва унга тинмай лола териб бераётган эрининг маҳрамона турқини кўз олдига келтириди ва улар ўтлоқ ичига секин чўзишишар экан, келинчак бу манзарани ортиқ кўрмаслик учун мажолсиз қўлларини ҳанотдай силякитиб, ердан оҳиста кўтарила бошлади ва гарчи энди бутун танаси ҳаракатдан тўхтай бошлаган бўлса ҳам, ўлжасига шиддат билан отилган қарчигайдай охирги кучларини йигиб, тез – тез ҳанот қоҳа бошлади ва ўзини ҳарир, камалак нусха, чимилидик янглиғ шоҳи пардалар ичидан учиб ўтганини ҳис этди – сўнг эса қизлик пайтлари орзу қилган ва бу илтифотсиз оламдан бир умр излаб ўтган баҳтта ўхшайдиган жилвадор, хаёлий ва алланечук оппоқ дунёга сингиб бораёттанини, сингиб бораёттанини, сингиб бораёттанини элас – элас илғаб қолди.

А Ж Р

«...Сен қўшиқ айт, Зубайда, ёниб – ёниб қўшиқ айт – ўзинг кўрмаган бу дунёning ранглари ҳақида, офтоб нури, булоқ суви, дарахт гуллари, чечаклар ва қизғалдоқлар ҳақида қўшиқ айт; сен йиглаб – йиглаб хиргойи қил – у, бу қўшиқ мени мана шу тўқайдаги қоқи гулига, ҳечқурса ёвашонлардан бирига айлантирсин, мен сени кўриш ва мудом бирга бўлиш учун токи шу юлгунзорда қолиб кетай, сенинг оёқларинг тагига қовжираб тўкилай, майли, губорга айланиб соchlаринита қўнай, фақат сенинг бўйнингдан уфураётган гул ҳидини ҳидлаб турсам бўлди, сенинг баҳту мұҳаббат истаб титрат турган кўкракларинита боқиб турсам бўлди...

Мен сени овута олмайман, Зубайда. Сени қушлар чугури, ҳандай очилишини сен ҳали кўрмаган гуллар, сенинг шивирларинг каби ер юзига бодраб чиқдан майсалар, соchlарингни соғинган шабадалар, жимир – жимир ёғаёттан ёмғир, тонгти шафақ овутсин...

О, нафақат сен, назаримда яратган ҳам унугиб қўйган бу тўқайга қўёшнинг бир парчаси синиб тушган, йўқ, йўқ, сени парвардигор юлдузлар ичидан топиб олган. Сенинг оғушинг офтобнинг ётогига ўхшайди, баданингдан беҳишт ялпизининг бўйи келади, кўкрагингдан олма ҳиди аниқиб туради...

Мен сенинг кўзларинита термулиб – термулиб ўтиргим келади, сенинг кўзларингдаги кўлга чўкким келади. Сен бу зулмат дунёда сакраб – сакраб ўйнаб юрган нурсан, бу тубанлик шоми чўккан дунёning бағрига тушиб турган ёғдусан. Ҳали бу мудҳиш дунёга қувилмасдан олдин, чечаклар гул – гул очилган ва дарахту кўкатларга, ҳашароту ҳайвонларга ҳали исм қўйилмасдан бурун, ҳали ўлим ва ҳаётни касб қилиб олмасларидан олдин одамзотнинг фаришта бўлгани тўғрисида фалакнинг бир туйқус иқрорисан сен... Сен жамики тириклик ўлатдан қирилиб

кеттан, жамики ўсимлик қувраб – қовжираб қолган, қип – қизил бўлиб жизганаги чиқиб ёттан саҳрода, қарғиш теккан бу биёбонда очилган бир тўп нафармон гулсан.

Кўзларингда фаришталар чўмилган қора туннинг бир парчаси қолиб кеттан, йўқ – йўқ, сенга тайдо бўлганиларни ҳибс этиш учун фалак сенинг кўзларингда зиндан қурган. Лашнатта йўлиқдан биёбондагиларни огоҳ этиш учун эса сенинг кўкракларингда бу дуиёга бир жуфт машҳар қўнгирогини жўннаган, неларга қодирлигингни кўрсинлар деб, сени – беҳишт гулини қабр устига қўйгандек бу олам остонасига ташлаб қўйган, йўқ, йўқ, борлиқ сенинг ҳаршингда чала туғилган гўдақдай хунук бўлиб қолишини билаган фалак бу аянч дунёни кўрмасин дея сенинг кўзларингни боғлаб қўйган...»

...Атрофга сиёҳранг тун чўккан эди. Йўл дала узра олтин калавадек чўзилган – ҳаво дим ва теварак жизганак бўлиб куйиб ётарди, юлдузлар лишиллай – лишиллай сўнардилар – ҳаводан куйинди ҳиди келар ва қоқ ўртасидан ёлизоёқ йўл кесиб ўтган дала тутаб ётарди. Йўлда ялангоёқ кетаётган барваста гавдали одам тутуннинг аччиғидан ўпкаси узилаётгандек тез – тез ва пўк – пўк йўталарди. Унинг эгнида жуда оҳорли камзул осилиб турар, кўйлагининг зарҳал тутмалари сўнаётган юлдуз шуъласида ярқиллаб кетарди. Унинг елкасида патак соқолли, беқасам чопон кийган, жиккаккина чол оёқларини осилтириб ўтиради.

Кеч тушганига анча бўлганига қарамай, тупроқ иссиқ эди, барваста одам ҳансираб – ҳансираб, зўрга кетиб борарди.

— Эсингдами, — дерди чол ўғлиниг ҳарсиллаб қолганига юраги ачишаётгандек ва атрофдаги муддиш сукунатдан чўчиётгандек шивирлаб, — ўн ийлча оддин шу йўлни туш кўрган эдинг. Айнан шу йўлни. Ўша тушни сен билан бир кечада мен ҳам кўрган эдим — ахир қонимиз бир – да! Ўшандаёқ сенга раҳмим келган эди, ҳам бағрим манави даладай тутаб кетганди! Анави тепалик ҳам кирган эди, эсингдами, ўзинг ҳам бир ҳафтагача ўша тушни эслаб, хуфтон бўлиб юргандинг. Ҳар қалай шу тушингни сотиб емагаңдирсан? Ё, уни ҳам бирон нарсага алмаштириб

юбордингми? Йўл, дала, тутун, ўқириклар, йиги – сифи – эсингдами?

— Эсимда, — хириллади ўғил, — ҳаммаси эсимда.

— Ўшанда мен ҳам бир неча кун ухлай олмаган эдим, бу йўлдан қандай ўтаркансан, деб. У туш эмас, ёзиқ эди. Ўша кечасиёқ сенинг пешонанга ёзиб қўйилганди. Мен шундан қўрқкан эдим. Сен ахир у пайтлари пешонанга ёзилгани шу деса кулар эдинг – да. Сизлар бу дунёдаги ҳамма нарсанинг оёгини осмондан қилиб ташладиларинг. Ҳамма нарса муаллақ бўлиб қолди. Қаёқда қарама, ёвуз ниятини кўрасан. Сизлар қилган ва қилаёттан ишларни кўриб, одамзод ҳамон яшаб келаёттанига ишонмай қоламан. Ахир сизларнинг кўнгилларингизда тирноқча эзгулик қолмаган бўлса, бошқа қандай хаёлга бориш мумкин. Олдинлари одамлар ишонишарди, яхши қунаар келишига, болаларига, қўшнисига, бир – бирига. Сизлар мана шу ишончни ўтираб қўйдиларинг. Энди одамлар ҳеч нарсага ишонмайди, ё тавба, ҳатто боласига ҳам. Орият, номус қолмади одамларда. Сизлар уларни иштон кийган ҳайвонга айлантиридиларинг. Қандай иснод! Тўрт кишига бошлиқ бўлиш учун хотинини қўшиб қўйищдан ҳам тоймайди булар. Ҳаммаси сенга ўҳшаганларнинг касофати. Ё гапим ёғонми, а?

Ўғил индамади – икки – уч марта ич – ичида инграб қўйди. Қаеридир чидаб бўлмас даражада оғриётгандек кўзларини юмиб очди. Пешонасидан оқиб тушган тердан кўзи ачишарди. Дармони қуриган, йиқилай – йиқилай деб кетиб бораради. Теварак – атрофга қулоқ битиб қоладиган даражада бир неча сонияга сукунат чўқди, гўё тун ҳам, тураб ёғтан дала ҳам, гоҳ – гоҳида қайдандир эшитилиб қоладиган бўриникига ўхшаш увилашлар ҳам ўғилнинг иқрорини эшитиш учун бир зум тин олгандай эди. Ҳар қандай савол ҳам жавобсиз қолмаслигини, эртами – кечми, барibir жавоб топилишини, фақат саволга жавоб бергани, уни ошкора тан олгани одамнинг юзи чидамаслигини, бироқ кўнгилнинг бир чеккасида бу саволдан аланталанган жавоб бутун юракни куйдириб туришини чол ҳам, ўғил ҳам сезар, шундай бўлса ҳам ўғил миқ этмас, гўё гапирса йиқилиб тушадигандай ҳансирар ва шип – шип эттан товушдан бошқа сас чиқмасди ундан.

Сукунатни яна отанинг товуши бузди.

— Ҳеч нарса дейлмайсан! Қайси юз билан гапирасан?! Сендейлардан туғилмасларингдан олдин воз кечиш керак эди. Лекин, афсус, сизлар туғидиларинг, униб — ўсдиларинг, сўнг униб — ўсган ерларингга тупурдиларинг, униб — ўстирган одамларни ...диларинг. Яна кўкракларингга муштлаб «халқпарвармиз, ... парвармиз» деб даъво қилдиларинг.

— Бўлди... — ингради ўғил. — Бўлди, бас... қирқ йилдан бери шу бир гапни такрорлайсиз... Чарчаб кетдим. Бас!

— Мен — чи, мен ҷарчамадимми? — Чолнинг товуши зорланиб чиқди. — Менга осонми?!

— Ахир қирқ йил бўлди! Қирқ йилдан бери шу савонни такрорлайсиз... қирқ йилдан бери шу гап, шу таъна! Адоғи борми бу йўлнинг?! Мен ҳам одамман ахир...

— Оз қолди. Жуда оз қолди. Елкангдан тушаману мен ўз йўлимга кетаман, сен ўз йўлингга... Бошқа қайтиб кўришмаганимиз ҳам тузук. Мен ўзим ўстирган теракнинг қандай ёнаёттанини кўришни истамайман. Мен ўша, сен билан охирги марта юрган ҳоя остидаги горга кетаман, менинг у ерлардан бош олиб кетишпим мумкин эмас, менинг қоним тўкилган у ерларга. Ўша ҳоя эсингдами? Сен мени Бухородаги табибга кўрсатиш учун олиб чиқсан эдинг, эсингдами?

— Эсимда! — хириллади ўғил. — Ҳаммаси эсимда! Нега бунча эзасиз?

— Хайрият, — деди чол, — ақалли шунга ҳам шукр. Ҳар қалай ўша кунни сотмабсан, шунга ҳам шукр. Ёки бунинг — ислиқи бир чолнинг ўлими тўғрисидаги хотиранинг ҳеч кимга кераги бўлмадими? Ёки сотишига, ўзингни ошкор этишга қўрқдингми?! Майли, шунга ҳам шукр, баъзан қўрқоқлик ҳам имонни асраб қолади. Майли, шукр...

Сиёҳранг тун қуюқлашиб борар эди. Тутун кўзни ачиштирас, димогни куйдирар, ўғил тинмай йўталарди, теваракка пала — партиш ташланган яланг оёқларнинг бесаранжом саслари тараларди. Ҳаво дим ва бўғиқ, йўл эса бениҳоя эди.

— Сизларнинг катта хатоларинг шуки, Уни таъқиб қилдиларинг. Унга қўшиб, ҳамма нарсани таъқиб қилдиларинг. Аслида ҳамма нарсанинг босланғичи У эди. Чунки У дунёning исми эди, У бу азалий дунёга исм берган, зеб берган уста эди. Дунёни Ундан ажратиб олиб бўлмасди... Сизлар буни тан олмадиларинг...

— Чарчадим, — деди ўғил астагина. — Бунчалик оғир бўлмасангиз? Елкам эзилиб кетди. Оёғимда дармон қолмади.

— Буни мен эмас, сенинг ўзинг истагансан... Ўзинг менинг шунга ундадинг. Ўша куни бу менинг хаёлимда ҳам йўқ эди. Сендан ҳатто миннатдор эдим — касал отасини кузатиб бораёттандай ўғлим бор деб... Бу йўлни сенинг ўзинг танлагансан.

Ўғил ихраб — ихраб кетарди. Унинг пишнаши демаса ҳамон ваҳимали сукунат ҳукм сурарди, фақат атрофда қандайдир сассиз шарпалар айланиб юрар, улар жуда кўп эди, афтидан. Бутун дала бўйлаб югуриб юришар, лекин қадам товушлари эшитилмас, баъзан йўлга яқинроқ бостириб келишар, сўнг ҳансираш ва пишнашни эшитиб орқага чекинишарди.

— Ўшанда мен харсанглар орасидаги ташландиқ форга кириб кетдим, — давом этди чол, — кун совуқ эди, ундан кейин бирор менинг шарпамни сезиб қолишидан қўрқардим. Биринчи кунлари жуда зериқдим, атрофда гаплашадиган ҳеч ким йўқ эди; кундазлари тоғма — тоғ сакраб тоғ, эчкиларини қувиб юрардим. Токи онанг хабар толгунча, мен шу ҳолатда ёлғиз яшадим. Бир куни кечқурун форга онанг кириб келди — худо раҳмат қилсин, у жуда яшариб кеттан эди, у ҳаммасини кимдандир эшитибди, шу сабабли мендан ҳеч нарса сўрамади, фақат «қоядан нарироқ, юрсангиз бўларди — ку, ахир унинг бир куни шундай қилишини билардингизку?» деди. Шўрлик, қанчалик қилимингдан эзилмасин, сени ногаҳон қарғаб юборишдан қўрқарди; иккаламиз ҳам тилимизни тиярдик, ўша кунни эсламасликка ҳаракат қиласардик, агар озгина қарғасак ҳам у дунёю бу дунё куйиб кетарди. Онанг ўша кезлари ҳар куни келиб туради, у ёқларда қаёқдан келяпсан деб сўралмайди, бунга ҳожат йўқ, ҳамма марҳумларнинг борар ва келар жойи битта. Биз форда тошга бош қўйганча сенинг

қандай туғилганингни, қандай той – той бўлганингни, чўига қўлингни қандай босиб олганингни эслаб ўтирадик: у ёқларда фақат хотирагина кишига ҳузур беради, бошқа ҳеч нарсанинг мазмуни қолмайди; мен сенга ачинаман, сен ахир бу дунёдаги қилган ишларингни қандай қилиб эслайсан – эслашинг билан арвоҳлар қузғуни бошингга балодай ёпирилади. Сенга ачинаман... сени ҳеч ким аямайди... бир неча кундан сўнг кечаси форга қилич – қалқон тақсан отлиқ кишилар кириб келишди; улар уч кунгача форда қолиб кетишди, негадир форда мени кўриб ажабланишмади; улар бу форда ҳар хил қўноқларни учратишга одатланиб қолгандилар чоғи, бизнинг тилимизда, сал бураб гапиришарди, дубулгачиларнинг бири оқсоқ эди; менинг форга келиб қодиши саргузаштимни эшитишгач, сендан жуда газабланишди, ҳатто оқсоқроғи ҳозир бориб чопиб таштайман деб иргиб турди, лекин мен кўнмадим, ўғлим айбор дэвониши эмас, ўзим йиқилиб тушдим деб алдадим. Дубулга кийганлар мен билан уч кунча яшашди. Улар ҳам менга ўхшаб ўз ажали билан ўлмаган эдилар, гапларига қараганда бири жангда, бири суиқасда, бири касал бўлиб ўлганди. Отлиқлар юз йиллардан бери бир вақтлар ўзлари забт этган мамлакатларни айланиб юришаркан ва ҳар йили қиш тушиши олдидан Чинмочинга юриш уюштиришар ва ҳар доим мағлубиятта учрашаркан. Кейин улар мени ўзлари билан олиб кетмоқчи ҳам бўлишди, бироқ оқсоғи кўнмади, афтидан, у менга ишонмади. Бир қанча вақт ўттач, яна юриш уюштириш учун ўзларининг ўликлардан иборат лашкарларини йигишга жўнаб кетишди. Мен форда яна ёлгиз қолдим. Фақат кунора хабар олгани онанг келиб турар, менга сен ҳақингда ва шотирларинг ҳақида ҳикоя қилиб берарди; мен унинг гапларига ҳеч бир ажабланмасдим, шусиз ҳам сенинг қиласишингдан хабардор эдим; ўҳӯ, сен қанчадан – қанча одамларга жабр қилмадинг, қанчадан – қанча бегуноҳларни қамаб ёки отдириб ташламадинг. Сен қилган ҳар бир иш учун мени уларнинг ота – боболари қистовга олишарди, мен эса ўша ёқда энди ёвуз ниятингнинг навбатдаги қурбони ким бўларкан, унинг марҳум қариндошлари кўпмикан деб, юрак ҳовучлаб турардим. Сени қанчадан – қанча арвоҳлар қарғамади. Сен одамларнинг

ўзингдан қўрқишини, зор титраб туришини орзу қиласдинг, уларнинг ожизлиги ва ноchorлиги сенга ҳузур бағишларди. Улар ҳаётда ўз ташвишларидан ҳам муҳим нарсалар борлигини хаёлларига ҳам келтирмасди, сен буни билардинг, билиб туриб қиласдинг барча ярамасликларни. Сендан ёвуз одамни бу тоғлар ҳали кўрмаган... туф... Энди ҳам кўрмасин... Сен охиргиси бўл! Сенинг қилаётган ишларингта қараб туриб ҳар доим ўлик сенми ёки менми деб ўйлардим, тани ўлгандан сўнггина одамнинг ўлик ёки тириклиги маълум бўлади. Хомтама бўлма, лекин сен фанода бирор марта ҳам тирикларга хос иш қилганинг йўқ, сен нимаики қилган бўлсанг, ўзинг учун қилдинг. Шундай! Ўлим — мангутириклик! Сен ўликлар орасида қайта тирилар экансан, ҳатто оддийгина, «німа учун яшадим? Деган саволга ҳам жавоб беролмайсан. Сени ҳатто оддий ўликлар ҳам ўз сафларига қўшмайди, сен қум қуюни қоплааб олган саҳрода ёлгиз ўзинг абадий кезиб юрасан, абадий! Бу саҳро ҳеч қачон тугамайди; ойлар, йиллар, авлодлар тугайди, лекин бу саҳро ҳеч қачон тугамайди; ана шунаقا. Ҳу, ана, қорайиб кўринаётган бор — ўша саҳронинг эшиги... Йўлинг сени тўгри ўша ёқда олиб боради. Яқинлашиб ҳам қолдик. Мен сени ўша ергача кузатиб қўяман. Даидил бўл. Ҳечқурса гордан ўтаятиб мени уялтирма, шусиз ҳам менинг юзим шувут бўлиб қолган...

— ... Анави қиз ким? Нега тўқайзорда ёлгиз ўзи юрибди? Қадам ташлашлари ҳам бежо.

— Неъмат чўпоннинг тўнгич қизи. Ҳар доим шу тўқайдаги қўзи боқиб юради.

— Нега қўлни олдинга чўзиб юради?! Кўриниши абгор, нима, эси пастроқми?

— Эси — ку жойида, унда балонининг эси бор. Лекин у баҳтиқаро бўлиб туғилган. Ҳамма бало шунда. Бўлмаса бундай сулув қиз бу ўргада топилмайди. Унинг кўzlари басир. Чиппа кўрмайди. Она қорнидан шундай бўлиб тушган. Шунинг учун ҳам қўлларини олдинга чўзиб юради...

— У ҳеч кимнинг кузатувисиз юрадими?! Шу ҳолида — я?!

— Э — э, уни ким ҳам кузатиб юради. Отасининг бундан бошқа олти қизи бор, ташвиши шусиз ҳам етарли... Бу эса

отасига қўзи боқиб беради. У қўзиларни исидан танийди. Қўзилар уни ҳеч қачон ташлаб кетишмайди, шу атрофда ўтлаб юришади. Кеч бўлгач, уйга ўzlари қайтади. Ана шундай у қиз...

Эшикни ямоқ тўн кийган ўрта яшар одам оғди. У ичкарига қўрқа — писа назар ташлаб, ўзига қаттиқ тикилиб турган кўзларни ҳис эттач, секин ичкарига кирди. Изидан эшик секин гичирлаб ёпилади.

— Хўш, нима гап? — деди ичкаридаги овоз.

Тирқишдан сирғалиб кираёттган хирагина ой нурида унинг чарм камзули ялтираб кетди. Кирган одам остононадаёқ тиззалаб ўтириб олди. Гап бошлишдан олдин камзулли одамнинг авзоини билмоқчилик, унга зингил солиб қаради. Бироқ шиалиқ кўзлари барваста шарпа-устидаги қалқиб турган хумдай қорадан бошқа ҳеч нарсани кўрмади; унинг назарида ичкаридаги одамнинг на юзи, на кўзи, на лаби бор эди, фақат чуқур горда ёқиб қўйилган бир жуфт шамдай иккита кўз ўзига қадалиб тургавини ҳис этар ва ўнгайсизланарди.

— Нима гап? — деди яна ичкаридаги овоз.

— Мен... мен... — Келган одам қоронгулик қаърига тикилди, лекин бояги шайтоннинг соясидай шарпадан бошқа ҳеч нарсани илғамади, — мен пастки чорбоғда ўт ўраёттандим... бу йил беда зрта қувраб кетди.

— Хўш, гапир...

— Шундай йўлнинг бўйида. Ой ёргида ҳам ўрақолай деб ҳали уйга кетмагандим.

— Бу ерда нега келдинг? — ўшқирди ичкаридаги овоз.

— Сенга бу ерга келма дегандим — ку?

Остононадаги одам чўчиб тушиб, гапини йўқотиб қўйди, тили оғзига косовдай тиқилиб қодди, уни ҳаракатта келтириш учун хийла қийин кечди, бир неча бор қизариш ва қалтирашдан сўнг бўғзидан дафъатан отилиб чиқсан товуш ҳеч қандай маъно ифодаламади.

— Шу... шу... ўраёттандим... Кейин бирдан... — Ўзини тугиб олди у охири. — Кейин бирдан ов... овозидан танидим. Йўлда Бегмат полвон билан Ҳасан чўлоқ ўтиб боришаёттган экан. Улар эрталаб Кўкабулоқча — Сори Ҳайдарникига таъзияга ўтиб кетишганди, ўз қўзим билан кўргандим. Улар бир — бирига шивирлаб гаплашиб боряпти экан...

— Нимани? Эшитдингми?...

— Ҳа, сизни... сизни, отасини ўлдирган, падаркушлик қилган дейишилди...

Ичкаридаги одам шуыла тушиб турган деразани айланиб ўтиб, бурчакка бориб келди. Яна аввалин жойига келиб деразага орқа ўтириб туриб олди. Ўртага бир зум сукунат чўқди.

— Тұхмат қиласа! Зангар!!!

— Тұхмат бўлса тош боссин. Ичкаридаги одам бошини қуий эгиб олди. Орага яна жимлик чўқди. Унинг нафас олиши оғир ва хирилдоқ эди. Бу сукунат нақадар хатарли эканини сезган остоңадаги одам безовта бўлиб, қимирлаб қўйди. Ичкаридаги одам унга эътибор бермади, тиззаларига тикилганча узоқ туриб қолди.

— Мулла Хидирникида нима гап? — деди у сўнг мутлақо бошқа оҳангда.

— Пойлаб юрибман. — Остоңадаги одам бирдан енгил тортиб жавоб берди. — Сайфул эшон билан Шукур қизил келиб кетди. Лекин нима олиб келганини кўролмадим, ичкарига кириб кетишиди.

— Майли, сен энди боравер, лекин бундан бүён кела кўрма, керак бўлсанг ўзим олдингта бораман. Мулланикини яхшилаб кузат. Ким, Қачон, нима олиб келди, ҳаммасини билиб ол. Агар бирон кори хол бўлса, ўзинг қулоғингни ушлаб кетасан.

Остоңадаги одам итоаткорона бош иргади. Эшикни очар экан, қайрилиб яна ичкарига қаради, яна барваста шарпадан бошқа ҳеч нарсани кўрмади. — Бу ўзи қандайдир шарпага ўхшайди, — ўйлади ичиди у. — Чироқ ёқиб ўтирса нима қиласкин? Ё ёруғлиқдан қўрқармикин.

— Самад ўзинг гуноҳингни бўйинингга ол, шундай қилсанг, жазонг ҳам енгил бўлади.

— Менинг ҳеч қандай гуноҳим йўқ. Ахир буни сенга неча марта айтдим.

— Ўйлаб кўр. Балки эсларсан.

— Ахир ўн кундан бери эслолмадим. Мени бу ерга нима учун олиб келишди, ҳеч билолмаяпман.

— Гуноҳсиз кишини бу ерга олиб келишмайди. Яхшилаб эслаб кўр.

— Йўқ эслолмайман, каллам шишиб кетди. Ё мени отиб ташла, ё қўйиб юбор. Ортиқ бу азобга чидай олмайман. Мени шарманда қилма.

— Буни жиноят қилмасдан оддин ўйлаб кўриш керак эди. Энди кеч. Яхшиси, ўзинг бўйнингта ол. Тавба қилиб келди, деб ёзиб қўймиз

— Айбим бўлса, шартта айту, жазоимни бер. Нега менга азоб берасан! Ҳар нарса тўғрисида ўйлайвериб адойи тамом бўлдим.

— Шукур қизилникида қўшиқ айттанимидинг? Нима деб айттанинг эсингдадир?

— Айттандим. Нима, қўшиқ айтиш мумкин эмасми?!

— Мумкин, мумкин. Сизларга мумкин.

Барваста одам бир уюм қоғозлар ичидан бир варақ қоғоз олиб, Самад бахшига узатди.

— Мана бу қўшиқ сеникими?!

Бахши қоғозга кўз юргутирирди:

— Мен ўқишини билмайман.

— Ўқиши шарт эмас. Дарров эсингга тушди. Ўзинг муғомбирлик қиляпсан. Отасини ўлдирган, ғам — андуҳга тўлдирган ким экан?! Биз эмасми?! Сен бу ерда бизни назарда тутмаяпсанми?!

Самад бахши чўчиб хамроҳига тикилиб қолди.

— Бу қўшиқни бизнинг ота — боболаримиз тўқиган.

— Лекин сен айттансан...

— Мен бундай демоқчи эмаслигимни сенинг ўзинг билласанку?!

— Нега?! Масалан мен худди шундай деб ўйлайман. Кейин буни мен эмас, ўша тўйда бўлган ҳупёр одамлар етказишган.

— Ёлғон! Ҳеч ким бундай демаган.

— Ўқирма, бу ер отангнинг уий эмас. Тўйда қатнашганларнинг ҳаммасини бир — бир чақирдик. Ўн етти киши буни тасдиқлади. Мана, кўр. Улар айнан шундай тушунишган. Хўш, энди тан оларсан кимга сотилганингни?!

— Мен ҳеч кимга сотилмаганмай.

— Унда ўзинг бузғунчи экансанда?! Майли шундай деб ёзиб қўймиз.

— Нега энди билиб туриб зугум қилаёттанингни мен тушуна олмаяпман.

— Тезда тушуниб оласан. Сен күп ақлли бўлиб кетдинг. Ҳар қўшиғиңда қандайдир отасини ўлдирғанлар тўғрисида жаврайдиган бўлиб қолдинг. Энди ақлингни пешлаб кел. Сен қўрқма, Сибирга жўнатмайман, сен чўлга борасан, чўлни ўзлаштирасан. Агар онгли равишда ўз хатоингни ювсанг, қайтиб келишга рухсат беришади.

— Мени шарманда қилма. Тўртта болам бор, уларнинг қарғишига қолма!

— Болаларинг тўғрисида қайғурмай қўяқол.. Ўзимиз ғамхўрлик қиласми. Агар сенинг ёнингда бўлса, уларни ҳам душман қилиб тарбиялайсан.

— Кўзингни оч! Бу туришда яқинда бутун қишлоқ ҳувиллаб қолади.

У яна нимадир демоқчи эди лекин хонага Кирган икки киши уни олиб чиқиб кетди.

— Биз йўлнимизга ким тўсиқ бўлса, ҳаммасини йўқотамиз, ҳеч кимни аямаймиз, — бақирди унинг изидан ичкаридаги одам. — қишлоқ бўшаб қолса, бошқа одамларни кўчириб келамиз...

«Бу қўллар эмас, сени ногирон қилиб яраттан дунёнинг бағрига санчилган ҳанжарлардир, Зубайдা. Киприкларинг у осмон шоҳининг тасбеҳидир, о, йўқ, бу кўнгил қушларига қўйилган тузоқдир...

Мени сендан тортиб олишадигандек бўйнимдан қучоқлаб йиглаганингда, бу овлоқ тўқайни пичир—пичирларингта тўлдирганингда, лабингда тушуниксиз саволлар қотанида, бу сирли оламга ёриб чиқиб ва сенинг оғушингда ёттан мени сенга ҳам ишонмай ўз қўзлари билан кўриш учун жажжигина юрагинг кўксингнинг қафасларига гурс—гурс урганида, бу дунёдан баҳт излаб чўзилган қўлингнинг қон ҳиди тутган соchlарингни силаганида сен уни топдингми, Зубайдা?!

...Кел, мени қучогингта ол, офтобни кўмгандаи мени оғушингта кўм. Майли, кўзларинг қўргонига қамаб қўй, майли, киприкларинг боғлаб қўй, фақат бу дунёнинг қарғишлиаридан мени соchlаринг қатига, лабларинг қаърига яширсанг бўлди.

Мен сени излаб бу ерга ҳар кун келгим, бу тўқайга умр ўтовини тикким келади, сенинг босган изларингта ўзимни кўмгим келади. Кел, панжаларингни кўзларимга саншиб қўй, тошлар тилган оёқларингни кўкрагимга экиб қўй, шивирларингни қулогимга қоқ. Сен менинг излай — излай топиб олган баҳтимсан, сен менинг тўқайзорга қадаб қўйган туғимсан. Майли, ҳамма юз ўтирун, майли, ҳамма ташлаб кетсин, фақат сен мени ташлаб кетма, сен ташлаб кетма... ташлаб кетма...»

«...Сенинг зилол сувларинни ичганимда, кўрпа бўлиб тўшалган кўкатларинг устида яйраб ётганимда ҳаётга қайтадан келгандек бўламан. Мен сенинг тупроқларингдан яралганман, бу улуғвор қоялар ҳам, ундаги харсанг тошлар ҳам, илон изи ёғлизоёқ сўқмоқлар ҳам менинг таним. Мен улар билан бирга нафас оламан. Кўрагон тогидан майин шабада эсияти, кўкатларнинг ҳиди димоқни қитиқлади. Қандайдир қушлар сайраяти. Ҳойнаҳой, мода қакликлар бўлса керак...»

«Афтидан кўклам келганга ўхшайди. Димогимга олма гулининг ҳиди келяпти. Пастдаги тўқайда болалар шовқини эшитилмоқда. Улар чиллак ўйнаётган бўлса керак, ҳар — ҳар дамда қайсисидир фувиллаб югуради. Унинг оёқларининг шитири менинг суюкларимни яйратади, мен бу товушдан ҳузур қиласман, мен унинг майсалар ялаган, шабнам ювиб қўйган жажжигина товонларидан ўлсам дейман, ёттан жойимдан тепага — уларга мўралаб қарагим келади. Улар оёқлари тагида одам суюклари қақшаб ётганини, заҳда чирсиллаб синаёттанини, чириёттанини, энг қизиги, менинг уйғоқлигимни, уларни кузатиб турганимни, товушларини эшитаёттанимни билишармикан? Агар менга у дунёдагидай овоз ато этишганда мана шу гўримда туриб, уларга қаратади: «Сизлар ғафлатда қолманглар, ҳушёр бўлинглар! Боболаринг руҳи уйғоқ, уйғоқ!» дея қичқирган бўлардим...»

«Нариги қабрнинг атрофини кимдир супуриб — сидираяпти, супурги шитири эшитилаяпти. Менинг ёнимда

ётган болакай уйқу аралаш ҳиринглаб кулиб қўйди; кимдир туи кўрди, шекилли, балким тушига онасининг маммалари киргандир; юқоридагилар унинг қуалгусини эшитиши – микин?.. Ер ости дунёси нақадар бепоён! Бу ерга одам қайта ўлмаслик учун келади. Бу ерда у дунёдаги умр кўз очиб юмишдай гап. Яшайверасан, яшайверасан, бу яшашнинг, қани, охир – ниҳояси бўлса. Фақат сен шу зим – зиё қўргондагина ер билан абадий бирга эканингни англайсан...

...Менинг ён томонимдаги қиз яна хўрсиниб – хўрсиниб йиглади. Ошиқ йигити билан топиб олишган акалари уни нақ қоядан улоқтиришган. У дунё нақадар мудҳиш. Одамлар устида ҳамила ёвузлик ҳукмрон бўлади...

...Уҳ яна қандай шовқин?! Нақ устимда қиёмат қойим бошлади чоги. Ниманинг товуши бу?! Мунча ваҳимали?! Э – э, булар мозористонни бузишягти – ку! Ақддан озишибди у дунёдагилар... Ҳа, аниқ, бузишяти, яна, ўша мудҳиш қиёмат товуши тобора яқинлашиб келялти. О, сен, она ерим, момо ерим, мана энди улар мени сендан жудо қиласилар, сякларимни абгор қиласилар. О, ярамаслар, ҳаромилар, падаркушлар!..»

— Ўртоқ бошлиқ биз Неъмат чўпонни олиб келдик.

— У нима гуноҳ қилибди? Нега уни боғлаб ташлади – ларинг?

— У катта қизини мана бу болта билан чопиб ўлдирибди. Қизи кимдандир бола ортирган экан. Боласини ҳам чопиб ташлабди. Бу ўша – биз тўқайда кўрган қиз. Унинг қоқ пешонасидан болта урибди. Тили бир қарич чиқиб ётибди...

Ўғлининг силласи қурий бошлаган эди: унинг пешонасидан реза – реза тер оқар, юзи тобора бўғриқиб, кўкариб борарди, оёқлари чалишиб кетарди. Лекин йўлнинг адоги ҳали бери кўринмасди – бутун борлиқни тун шоҳи тимҳора чодири тагига япириб олган эди.

Йўл нақ жаҳаннамга олиб бораёттандай ҳарорат тобора кўтариларди.

— Биз ҳеч кимга ҳеч нарса қилмаган эдик, — дерди чол ўғлининг жимиб қолганидан ва бу кимсасиз саҳрода ёлғиз

кетаёттанидан бир оз чүчиб. — Биз ҳеч кимнинг ерига бостириб бормадик, биз ҳеч кимга зугум қылмадик. Тинчгина яшаб юрган эдик: қўш ҳайдардик, буғдой янчардик, тириклик тошини секин тортиб юрувдик. Биз эмас, улар бостириб келишди, тинч ҳаётимизни улар бузишли. Сизлардай ақлимиз ўткир эмас эди, ҳар нарсани ҳам дарров тушунмас эдик. Биз фақат эски осойишта ҳаётимизни қуролли кишилардан қурол билан қайтариб олмоқчи эдик. Бор гуноҳимиз шу эди, бошқа ҳеч нарса! Эшитяпсанми, бошқа ҳеч нарса.

— Биламан, — деди ўғил. У фильт этиб ютинди. Юзи кўм — кўк ганч ҳайкал рангига кирганди, товуши бўғизидан эмас, гўё ер остидан, нақ жаҳаннамдан гулдираб чиқаёттандай эшитилди.

— Биласан? А? Демак, отангни билиб туриб ўлдирган экансан. Қойил. Сизлар кимдан таълим олдиларинг, билмадим. Отасининг гуноҳи йўқлигини билиб туриб, атайлаб ўлдирган эмиш? Отам тирик турса, ўша шалоқ курсимга ўтиrolмайман, бошлиқ бўлолмайман деб қўрқдингми, а? Шундан қўрқдингми?

— Бўлди, — инграб юборди ўғил отасини силкиб, ўнгариб кўтарар экан, — бўлди деяпман...

— Тўгри, шундан қўрқдинг. Отанг тирик турса, сенга нозик жойларни ишониб топширмасди, парвозинг баланд бўлмасди, ҳар икки дақиқада отанг учун сўроқ бериб туришинга тўгри келарди. Сен буни жуда яхши англардинг. Отангни деб, сенга ғанимларинг тинчлик бермасди. Ўлиб кетса ҳеч ким нотайин одамни суриштирмасди ҳам. Сен шундай деб ўйлагандинг. Афсус ўша куни — деди қоя орқали олиб ўтаеттанингда буни сезмаган эдим. Сен ҳаммасини осонгина ҳал қилиб қўяқолдинг. Қоя устига келганимизда менинг остимдаги отта қамчи босдинг. От ҳуркиб, олдинга ташланди, мен ҳатто нима бўлганини билолмай қолдим, фақат қоядан топдан — тошга урилиб учиб тушаёттаним эсимда. Сўнг мен бир зум зулмат ичиде қолдим, қайта тирилганимда сен менинг жасадим устида йиглаб ўтирадинг ва нарироқдаги иккита чўпонга нималардир деб тушунтирадинг. Сен жуда қўрқоқ эдинг, қилган падаркушларинги бирор билиб қолмаслик, шубҳаланмаслик учун оғзингни саситиб сўкинганингда, гўё аламдан ақдингни

йўқоттандай, оғзидан қон келиб, ихраб ёттан отни ҳам отиб тағладинг. Сен отдан ҳам қўрқдинг, отаркансан, унинг жавдираган кўзларига қарай олмадинг... Мен эса ҳаммасини кузатиб турадим — шундоқ олдингда, ёнингда кузатиб турадим. Ҳатто икки марта маузерингни олиб, нишон қадалган кўкрагингдан отиб ташлагим келди. Лекин, бундай ҳуқуқ беришмаган. Мен жасадим ортилган аравани Кўкқиягача кузатиб бордим — да, сўнг форга қайтдим. Лекин, сен менинг жасадимни қандай кўмганингни кўриб, сезиб турадим. Сен бошлиқларинг олдида бир томчи қузёш тўқмадинг. «Отам ёт одам эди, ўз ўлимини ўзи топди» дединг. Сенинг аҳволингни кўриб улар ҳам ич — ичидан кулди — ахир уларни ҳам ота яраттан — да. Агар йиғлаганингда ҳам ҳеч ким ҳеч нарса демасди. Фақат сен устаси фаранг одам эдинг. Унсур отасининг устида йиғлаганди деган гапни кўтаргинг, келажагингни ҳавф остига қўйгинг келмади. Сен йиғламадинг, йиғлармикансан, тавба қилармикансан, деб мен уч кунгача уйинг атрофида айланиб юрдим. Йўқ, йиғламадинг. Сендаллар асли йиғлашмайди. Одамларнинг ўлимидан роҳатланишади. Қандай уят?! Ҳали бизнинг ажоддимизда ожизага зуғум қилиш ҳодисаси бўлмаган. Сен эса ҳеч нарсадан тап тортмадинг. Мана, оқибати... Ана кўряпсанми, изингдан қанчадан — қанча арвоҳлар бўридай эргашиб юрибди, ёлғиз қолсанг, таппа босишади. Улар жуда қутурган... Ўша совуқ юртлардан сени деб қайтиб келишган. Энди ҳар кеча йўлингни тўда — тўда бўлиб пойлаб ётишади. Ҳар бирининг сен билан ўз ҳисоб — китоби бор... Сенга ачинаман, бироқ начора бу йўлни сен ўзинг танлагансан...

— Ота, эсингдами мен ҳали жуда — жуда ёш эдим, мишиқиси аримаган қизча эдим, ҳаммаси қўрқинчли тушдек элас — элас эсимда, сен гоз қотиб турадинг, йўлдан эса арава — арава одамлар ўтарди, йўллар тиқилиб кетарди, худди чумолилар инига шошаётгандек аравалар қайларгадир имиллаб борарди, одамларнинг эса ранги қочган, сенга гоҳ сездирмай, гоҳ ошкора адоват билан тикилиб — тикилиб қўярди, сен эса пинак қоқмай тураверардинг, аравалар ҳеч тугамасди, турна — қатор бўлиб тонгдан шомгача, шомдан тонгтача ўтаверарди, ҳатто ярим кечадари ҳам йўлдан араванинг гийқиллаган товуши,

зорланиппи эшитилиб турарди, уларни қандайдыр аскарлар қўриқлаб боришарди, сен эса ўша ерда қотиб тураверардинг, икки кунми, уч кунми вақт ўтиб, аравалар яна кунчиқар тарафга қараб йўл олишарди, йўлдан бирин – кетин ўтишарди, аравачилар ҳам бошларини эгиб олгац, атрофига қарашдан қўрқандай, уялгандай отларини қичаб ҳайдаб боришарди, аравалар гийқилларди, аскарлар сўқинарди, тўда – тўда аравалар кунчиқарга йўл олишарди, лекин бўм – бўш бўларди. бу аравалар, ота, худди кераксиз тошларни қайгадир, хиаватроқ жойга тўкиб қайтишаётгандай, аравалар бўм – бўш бўларди, яна бир неча кундан сўнг арава – арава одамларни олиб қайларгадир жўнарди, сен эса, ўша баҳайбат харсанг олдида гоз қотиб тураверардинг, ўша одамларни қайга олиб кетишарди, ота? Нега уларнинг кўзлари сенга бунчалик кин билан тикиларди, нега сени бунчалар ёмон кўришарди улар?! Эсингдами, ота? Ё тушмиди бу? Мен, ўша мишиқи қизалоқ буларнинг барини туш кўрганмидим?! Ўша аравалар тушмиди, ота?!

— Билмадим, қизим, булар менинг эсимда йўқ.. Ҳойнаҳой сен туш кўрган бўлсанг керак...

— Ўша пайтлари одамлар гўё бу ерларда ёвуз бир шарпа оралаб юргандай ҳамиша нимадандир қўрқиб, ҳадиксираб юришарди. Бир – бирига шубҳа билан тикилишарди, ҳатто болаларни ҳам бир – бири билан ўйнаттани қўймасди, болалар уйларидан чиқмай қўйган эди. Ҳамма худди ёвуз шарпа сенинг тананита яширингандай, сенга қўрқиб – писиб қарашар, сен билан дуч келиб қолса кўзларидаги газабни яшириб, гўё жони сенинг қўлингда тургандай ялтоқланиб, эгизиб – букилиб ўтарди, аёллар эса... аёллар сенинг номингни қўшиб қарғашарди, сени кўрганда этакларини кўтариб, орқаларини кўрсатишар ва энди бу еримни ҳам ол деб шангиллашарди. Нега шундай дейишарди, ота? Нега кечалари қишлоқлар мозористондек жимиб қоларди, ота; нега одамлар бир – бирига еб қўйгудай тикилишарди, бир – биридан нега қўрқарди, ота?!

— Билмадим, қизим. Ҳойнаҳой сен адаштиряпсан. Буларнинг ҳаммаси туш бўлса керак. Ҳаммамиз туш кўрганмиз, қизим, шу сабабли у замонларни яхши эслолмаймиз... эслаганимиз ҳам тузук.

— Мен эса кечалари уйғониб кетаман, назаримда, ҳали ҳам йўлдан аравалар гийқиллаб ўтшёпнга ўхшайди, гоҳида күппа — кундузи ҳам йўлга тикилиб қарасам, аравалар ҳамон ўтиб бораёттанини кўраман, уларга ввал кун ботишга қараб ўтади, сўнг кун чиқарга... Баъзан бу умр бўйи тутамайди — гандек, охири йўқдек туюлади менга. Гўё энди бир умр қулогимиздан аравалар гийқиллаши аримайдигандек, кўзларимиз олдида энди фақат аравалар ўтиб турадигандек туюлади менга. Ярим кечалари уйғониб кетаман.....

— Билмайман, қизим. Мен кексайиб қолдим. Менга бундай саволлар берма! Ҳеч нарса эсимда йўқ! Эсимда бўлмагани ҳам тузук.

— Кимдир шу тарафга келаётганга ўхшайди, ота.

— Улар афтидан икки киши бўлса керак, яхшилаб қара — чи.

— Икки киши экан, бири сал орқароқда келяпти. Сиз қаердан билдингиз?

— Кеча хабар беришган эди. Уларни мен эртароқ келса керак деб ўйлагандим.

Қиз бир зум анграйиб қараб қолди.

— Ким экан улар?

— Чўлга кеттанилар. Бегмат полвон билан Ҳасан чўлоқ,

— Ахир уларни ўлди деб хабар келганди — ку.

— Улар аллақачон ўлиб кетишган, ўлмаганларида бу ерларга қайтиб келмасди...

...Йўлнинг интиҳоси кўринмасди. Шип — шип этган қадам товушлари эшитилар, улар кетаётган йўлга юлдузлар учиб тушарди. Ўғил юриб борар, ота эса унинг елкасида ялпайнб ўтирганча йўлнинг адогига тез — тез кўз ташларди. Афтидан, у ҳам ўғлининг елкасида ўтиравериб чарчагандек эди. Йўл кесиб ўтган дала эса ҳувиллаб ётарди, атроф уларнинг шарпасидан кукундай тўзгиб кетаётган куйинди суяклар билан тўлганди; тонг гўё бу ерларга ташриф буоришини унутиб қўйгандай уларнинг устида бесарҳад тун сим — сими тўшалиб ётарди.

Йўл эса бениҳоя эди...

УРУШ ОДАМЛАРИ (Кисса)

«...Мен катта бўлсам милтиқ сотиб оламан».«Милтиқни нима қиласанъ..»
«Отамни отаман!!!»

I

Қирқ туртингчى йил декабрининг бошларида, қорахат келганидан роса бир йилдан сўнг, ёгин – сочинли кунларнинг бирида терсоталик Нормат полвон бир оёғидан айрилиб урушдан қайтди. Урушдан мажруҳ бўлиб қайтиши одатдаги воқеа бўлиб қолганлиги учун ҳеч ким унинг майиб бўлиб қайттанлигига ажабланмади. Сўнгти уч йил ичида урушга соппа – соғ кетиб, бирон мучасидан ажралиб қайтиш ҳодисаси тез – тез содир бўлиб турарди. Уруш бошланган йили юқори Тераклидан уста Пирназар қўлидан айрилиб қайтганди. Икки йил олдин эса Қўргоности қишлоғидан Мулла Турди кўзидан айрилиб қайтди. Шу йилнинг бошида Янгибой ҳисобчи қишлоқча гилдиракли аравада кириб кеди. Унинг қуллар уругидан бўлган хотини икки – уч ой сочини юлиб юрди – ю, кейин кўникиб қолди. Бироқ, ёз бошларида отланиб Қамашига тушиб кетди, бир ҳафталардан кейин эски юк машинаси – да қайтиб келиб, эрини қаёққадир олиб жўнади.

Ўн кунлардан сўнг бир ўзи якка қайтди. Одамлар унинг эрини Қаршидаги ногиронлар уйига ташлаб келганини билишди. Янгибойнинг соқов укаси ёзниң охирида янгасини ўласи қилиб савалади. Қўшнилари эртаси чошгоҳ маҳали уни оғзи – бурнидан қон келиб беҳуш ётган ҳолда оғилхонадан топиб олишди. Терсоталикларга Янгибой ҳисобчига қараганда Нормат полвонинг майиблиги арзимас бўлиб туюлди. Унинг фақат бир оёғи, шунда ҳам тўпиқнинг

усти кесиб олинган ва ўрнига ясама оёқ ўрнатилган эди.
Шу сабабли чўлоқланиб бўлса ҳам у бемалол юра оларди.

Эртасига қишлоқ чеккасидағи катта айвонли пахса уйда
кичкина тўй бўлди. Қари бўлса ҳам анчагина семиз эчки
сўйилди. Қайноқ шўрванинг ҳиди Терсотага ёндош Олма
ва Супа қишлоқларигача тарашиб турди.

Нормат полвонни кўриш учун келган қишлоқдошлари
ўзлари тасаввур қиласан норгул, барваста, умрида олишиб
кўрмаган, лекин суюги йирик бўлгани учун полвон, деб ном
олган, қишлоқнинг одд чавандозларидан бири, қоматидан
куч ёғилиб турган, ўтиздан энди ошган ўқтам Нормат
полвонни эмас, озиб, мушаклари шалвираб, бўйин
томирларида ажинлар пайдо бўлиб, яра излари қолган, ҳали
дориларнинг бадбўй ҳиди кетмаган, кўринишидан элликни
берса бўладиган, соchlари оқара бошлаган, ўзлари эшитган
урушнинг тирик гувоҳини кўрдилар. Қишлоқдошлари унинг
юзидағи заҳилликка, куйган қулоқларининг орги олакула
бўлиб қолган бўйинларига ва тез – тез сарак – сарак қилиб,
силикниб турадиган бошига ҳеч кўника олмадилар.

Йигилганлар беш – олтига қари қартангдан ва оналари
қошида ёки ҳовлида ўйин бошлаб юборган болалардан
ташқари аксарияти аёллар ва кампирлар эди.

Жойни аввал печкали хонанинг ўнг тарафидаги катта,
кенг совуқ хонага солишганди. Аммо кампирлар келиб,
жойни иссиқдина печкали ётоқ уйга ўтказишиди.

— Шусиз ҳам Норматбойнинг меҳмонхонаси борлигини
биламиз. Бу ерда ҳеч ким бегона эмас. Бизга шуниси маъқул.
Бесаришта, тўзиб ётган уйда ўтирмасак, ўтиргандай
бўлмаймиз,— дейишди улар.

Печкали хона ҳам кенг эди, тўрда тахмонга кир – чир ва
қуроқли кўрпаchalар, турли рангга бўялган ҳосилот
пўстаклар, ҳар хил гуллар чизилган наматлар, кўлда тўқилган
гиламлар йигиб қўйилганди. Хонанинг шифти баланд,
лойсувоқ деворларнинг икки томонига қуш, қийик, бир гувак
бодомгуни ўртага қўйиб, бир – бирига тикилиб турган йигит
ва қизнинг сурати, қўзилар ўтлаб юрган тоғ этагининг ва
кўклам кунларининг тасвири солинган иккита узун сўзана
осилган эди. Кашталар тагидан иккита қизил гулли яшил
рўмол илинган, рўмоллар кўп вақт турганидан деворнинг

нусхи уриб, рангсизланиб қолганди. Сұзанага қараган одам уни тиккан қыз чевар бұлғанини ва бу кашталарда үша чеварнинг қызлик орзу — умидлари барқ уриб турганини, булар келинлилік сарполари эканини сезар, бу кашталарда балогат орзуларини күриб, беихтиёр энтикиб құярди.

Одатдәгідай урушдан қайттанларга қилинадиган ҳұрмат маңында тұрда Нормат ясама оёғини соғ оёғи устига қўйиб, учта лўлаболишларга суюниб ўтирап, унинг иккى томонида ёнбошлаган ёки деворга суюниб олган чоллар Норматни шунчаки гапга солиб ўтиришарди. Печка атрофида эса кампирлар ўнг томонда ўтирган чоллар томон энгашганча қызғин сухбатта берилған зәилар; гоҳида чоллар шумлик қилиб, секин чимчилаб олса, улар ушшайиб қолган, ажин босған юзларига уялған тусини беришганча тилларида «хе, ўл, қарыб суюлмай, соқолинг остида қолгур», деб тиішсиз оғизларини очиб ҳиҳилар, ўzlари эса чолға яқынроқ сурилиб ўтирап, хотиналар ҳам гүё бу ерга бир—бири билан чуғурлашиб учун келишгандай зди: гоҳ ажабланганини, гоҳ курсанд бўлғанини, гоҳ қайғуришаёттанини билдириш учун юзларини буриштириб, қошларини ёзиб, ёқаларини ушлаб, яна қўйиб юборишиб, лабларининг бир четидан «чўл» этиб товуш чиқариб, ҳайратланган бўлишпар, ҳамишагидек кимларнидир гийбат қилишга киришиб кетишган зди. Тащқарида қозон — товоқнинг даранг — дурунги, болаларнинг «Бўлмайди, бўлмайди, қайтадан», деб чувиллашаёттани ва аёл кишининг: «Ҳа, жувонмарг тўқол, укангди ўйнатмай эрларингминан ўйнаяпсанми?» — деган шанғи овози орасыда Шариф кўсанинг нимадир буюрган ёки кимнидир, афтидан, болани: «Ҳап, сеними, отангнинг илигига... Шундай қылаберсанг қизимди бермай қўяман», деган бир оз хирқироқ, қувноқ овози келар, гүё ҳамма бу ерга нима учун келганини бир лаҳзадаёқ унугишигандай ёки унугишига ҳаракат қилишаётгандай туюлар зди. Нормат эса қишлоқдошларининг юзларига сўзсиз, жим тикилиб қўяр, нимадандир изтироб ёки ҳижолат чекаётгандай зди. Ҳамманинг олдида чўзилиб ётиши эп кўрмай, ўрнидан туриб ўтиришга ҳаракат қилар, бироқ ясама оёғи халақит берар, у яна аввалгидай чўзилиб олар, иккى кундан бери келиб — кетаёттаниларнинг, қишлоқдошларининг юзидағы

ачиниш ва ҳамдардлик ифодаларини кўриб, оёгини кесишаёттандек бошланган камситилгандек туйгу уни яна гирдобига олмоқда, ичкарига кириб – чиқиб турган, кечаси билан унинг қўкрагига уриб, оҳ – воҳ қилиб, йиглаб чиқдан, ҳозир ҳам суувлигини йўқотмаган хотинини жим кузатар, ундан тўрт йиллик айрилиқ асоратини ахтарар, лекин негадир излаёттанини илгамаёттандек, бу асорат унга сабаби номаълум бўлган бегоналик ва тундлик билан қоплангандек туюлар эди.

Норматта ҳамма нарсадан ҳам хотинининг ана шу тундлиги ёқмаёттан эди.

— Ичкарига кириб олишинглар, ичкарига! — деб бақирди ташқаридан Шариф кўса қувноқ овозда.— Бепадарлар, силарга айтяпман. Нормат боваларингга кўрсатиб олишинглар, қани, юринглар...

Уичкарига ўн – ўн бир ёшлардаги иккита болани етаклаб кирди. Болаларнинг бири йўл – йўл эски бекасам чопон, барратери қулоқчин, иккинчиси қора сатин чопон, ағтидан, отасиники бўлса керак, кўкиш, катта аскарий телпак кийиб олган, иккаласи ҳам пипнашар, беўхпов ўтирган Норматта ҳадик билан қараб туришар эди.

— Половон боваси, буларга дуо беринг, олишмоқчи, сизнинг қўлингизди олмоқчи, — деди Шариф кўса Норматта қараб, болаларни ўртага, дастурхон етмаган хойга итариб. — Дастурхонни қайириб туринглар... дастурхонни! Нега тимирскиланасиз, сизга айтяпман, Зубай бойбича, қайтариб туринг, ҳеч нарса қимайди... Катта половонлар бовасига олишишни кўрсатсин...

Нормат половон ҳамиша болаларни олимпириш билан бошланадиган, энди негадир ўзига жуда узоқ хотира бўлиб туюлаёттан тўйларни эслаб, жилмайиб қўйди.

Болалар ҳам ҳадиксираб, четдаги одамларга қараб юрди – да, бегона кўрмагач, бир – бирига худди жўжакхўroz – лардай хурпайиб, кичик даврани айлана бошлишди.

— Қани, хаҳ!..—деди Норматнинг олдида ўтирган Келдиёр сўпи. Аскарий қулоқчин кийган бола унинг ўғли эди.— Берган тузимни ҳалолламасанг, бугун кеча энангди ўзим олиб ётаман...

Ўтирганлар унинг гапига қийқириб кулиб қўйдилар.

— Овв! — қувлик билан ҳайратланган бўлди боя Шариф кўса "Зубай бойбича" деб чақирган, буғдойранг, ўттиз бешлардаги аёл. — Энангди отанг бир кеча қўйни — да олиб ётса, кейин энанг қўйнига ёпишиб, чиқмай қолади. Отангнинг қўйнида желими бор...

Қулоқчин кийган бола отасининг гапидан дадилланиб, Зубай бойбичага ўқрайиб қўйди — да, ҳужумга ўтди, беқасам чопонлининг белидан қучоқлаб олиб, орқага итарди. Беқасам чопонли дафъатан ҳужумдан ўзини тутолмай орқасига ўтириб қолди. Сўпининг ўғли унинг устига ўзини таплади. Шариф кўса ажрим қилди. Иккаласи яна давра айланба бошлади.

— Ҳа, уккағар ёҳиё — е! — деди ёнбошлаб мудраб ўтирган, ўртада олиш бошланиши билан сергакланган Мулла Саттор. У элликлардан ошиб қолган бўлишига қарамай, анча норгул эди. Бу йил икки эчки, уч қоп оқ ун бериб, Тиниқ камширнинг ўн беş яшар етим қизига уйлангач, яна яшариб кетганди.
— Нуқул фирромлик қилади — е, тирранчасидан тортиб каттасигача...

У нима учун бундай деганини ҳамма тушунди. Беқасам чопонли бола унга аскарий телпаклисидан кўра яқинроқ эди.

Беқасам чопонли қайта ҳужумда ўзини анча тутиб олди, қип — қизариб, аскарий телпаклининг ҳамма чилларини оппа — осон қайтариб турди. Аскарий телпакли кучи етмаслигига ишонгач, ҳайлага ўтди; беқасамлининг ёқасидан ушлаб, қорнита оёқ тираб, ошириб юборди. Бироқ, беқасамли яна ёнбоши билан йиқилди.

— Бўлди, — деди Келдиёр сўзи. — Катта полвондики шунча бўлади — да, шўйтиб ийқиттанам катта гап.

— Бас — э, — деди Мулла Саттор унга зарда билан, — олиш кўрганмисиз? Дустаман қимаса полвонма?..

Шариф кўса ҳам унинг гапини маъқуллаб, болаларни қайтадан олиштириди. Аскарий телпакли ҳайлеси ўтмагаچ, хўрлиги келиб, кўзларини қисиб, йигламсираб, беқасам чопонлини ўнг томондан қучоқлаб олди. Беқасам чопонлига худди шу керак эди. У аскарий телпаклининг чап қўлини икки қўллаб қисиб, ёnlама чил берди. Аскарий телпакли ошиб кегди — ю, орқаси билан тушди.

— Ҳалол! — бақириб юборди Шариф кўса. — Буни йиқитиш дейди — да! Уккағарди ули, чоржетим — ей, дустаман қилди — я!. Ҳой, Хайруллобой! — ташқарига бўй чўзиб қақирди. — Половондинг жилигини опкелинг...

Беқасам чопонли тушиб кеттан телпагини олиб, бошига кийди — да, атрофга голибона назар ташлаб, кетишни ҳам, кетмаслигини ҳам билмай туриб қолди. Аскарий телпакли эса отасининг олдига ўтиб, хўрлиги келганидан пиқ — пиқ этиб йиглаб юборди.

— Энангдан айрилдинг, — деди унинг баттар аламини келтириш учун Зубай бойбича.

Бола йиғили кўзи билан унга чўчинқираб тикилиб турди — да, бирдан Зубай бойбичани чапанилаб сўкиб берди. Унинг сўкишидан Зубай бойбича кулимсираб, тилини тишлади, қўлини қайчи қилиб:

— Ҳозир... кесиб оламан, отанг тўй қиласман, деб қийналиб юрмайди, — деб пўписалади.

Бола лип этиб, отасининг орқасидан ташқарига чиқиб кетди, Айвонга боргач, эшиқдан бўйнини чўзиб, онаси — дан ўргангандан лақабни айтди:

— Зубай... Зубай.. ма.. ма сенга — масхара қилиб тилини чиқарди. Зубай ўрнидан таҳдида кўтарилач, унинг дўпир — дўпир қочиб кетгани эшитилди.

— Шу ёҳиёнинг боласи ҳам жуда жиртаки бўлади — да, — деб тўнгиллади Мулла Саттор.

— Нормат бовангди олдига ўтири, — деди беқасам чопонлига Шариф кўса. — Боваси, энди унга қўлингиз — ди беринг. Чоржетимдинг обрўйини энди шулар ҳимоя қилсин...

Бола Норматта бегонасираб қаради — да, бироқ голиб бўлгани учун ҳамма жойда суюкли эканини англаб, Норматнинг олдига бориб ўтириди.

— Кимди улисан? — деди Нормат ҳам боланинг олишидан ва ўзига таниш одатлардан завқланиб, болага меҳр билан жилмайган қўйи тикилиб.

— Эшонқулдинг, — деди Мулла Саттор боланинг ўринга. — Қонида бор — да половонлик...

Нормат ўзи билан тенг амакиваччаси, барваста гавдали Эшонқулни эслади. У урушга бошидаёқ кеттан, шундан бери ҳеч қандай хабар йўқ эди.

Нормат боланинг кифтига уриб қўйди:

— Бундан ҳали зўр полвон чиқади...

— Масиддинг кунига шу яраб ётибди — да, — деди Шариф кўса. — Охбута бобо, знангни менга бер деса, эшагининг думидан ўт қўйиб юбориби...

Ўтирганлар боланинг бу ботирлигини маъқуллаб қулиб қўйиши.

Бола ўзи ҳақида гапиришаёттанидан, гапиришганда ҳам мақташпәёттанидан эриб кетди.

— Менинг отамди урущда кўрмадингизми? — сўради бола ҳам эркинланиб.

Нормат унинг соддалигидан қулиб бош чайқади. Сўнг боланинг кўнгалини нимадир деб кўтаргиси келди:

— Отанг келади, мана мени айтди дейсан, шу баҳорда келади, — деди худди ўзи ҳам қайтишига ишпонгандек жиҳдий оҳангда.

Болага катта илик теккач, бу мукофотни бошқаларга кўрсатиб, мақтаниш учун у югуриб ташқарига чиқиб кетди.

Болалар курашидан сўнг суҳбат жонланиб қолди. Кимдир ўғлини мақтади. Кимдир болаларнинг касали қўпайганини гапирди.

— Ҳов, Зубай бойбича, — деди Мулла Саттор гавдасини болишдан кўтариб, оғзидағи носни гиламни қайриб туфлар экан. — Ўринбойдан хат — хабар борми?

— Ҳа, тога, келди, аввали кун келди, — деди Зубай ўзини ҳам эслайдиган топилганидан хурсанд бўлиб. — Келди. Зовут — шабриқада ишләёттанишиш...

— Ўҳӯ, шундай катта ишга кўтарилиб кетибдими?! — ростакамига ҳайратланиб сўради қишлоқ подачиси Ражаб чўпон.

— Ҳа, ака, чин, — деди Зубай. — Ўзи шундай ёзибди, кичкина Шариддинг ули ўқиб берди.

— Ўзи бўладиган бола эди — да. — Гапга аралашибди чўнқайиб ётиб, Келдиёр сўпининг етти яшар қизига бошидаги битларни тердираёттан Қудурат кампир. — Нуқул ўрисчалаб сўкарди. Ўрис мироблар минан ҳам қишлоқда паҳат шу гаплаша оларди. Ҳатто бир марта начайликнинг ўзи елкасига қоқиб, луччи узбекски говори, чем руски деб мақтаганини ўз кўзим билан кўрганман...

— Бу нима дегани экан? — сўради Мулла Саттор, кампирнинг галати талафузда айттан гапларига тушунмай.

— Бу, сен русчани ўзбекчадан яхши биларкансан дегани, — деди донолик билан Келдиёр сўпи.

— А... — деди яна мулла, бош чайқаб. — Унда зовут — пабриқда ишласа ишлайдиган экан — да...

— Вой... қора босгур... — бирдан Қудурат кампир вой —войлаб, битини тераётган қизни чимчилаб олди — да, бошини қирт — қирт қашиди. — Ҳа, тўқалиқ, чочимди юлиб олдинг — ку! Ҳалигача чоч кўришди билмайсан, сени ким ҳам оларди бу ҳолингда. Эринг уриб ўлдиради — ку..

Нормат уларнинг гапига завқи келиб, жилмайиб қўйди. Унга бу соддалик ва самимийликларнинг ҳаммаси таниш, ҳам ҳузурли эди. У шу тўпори гапларни соғинган, тўрг тийл дунё кезиб, хилма — хил одамларни кўриб, ҳеч қаерда она қишлоғидагидай гурунгу гаштакларни кўрмаган, эшитмаган эди. Унинг бу гаплардан юраги орзишиб кетаёттанди.

— Ҳой, Келдиёр ака! — ташқаридан Турсун гуж — гужнинг овози келди. — Улингизни тиясизми, йўқма, улимди знангди... деб сўкибди... Ҳе, отангнинг ҳалиги... жойига нашватир... ҳани, кел... Шу гадинг учун сени иштонимдинг ичига соп қўйман... кейини кўрассан томоншани...

Ташқарида кимдир қувган, кимдир қочган товуш эшиттилди.

— Хайруллабой, ушлаб келинг, оғзига носимди тупурай. — Яна Турсун гуж — гужнинг шанги товуши эшиттилди. — Энангди дейди — я... олдин Шарип бовангдан рухсат ол...

— Бунча сасимасанг!.. — ташқаридан тўйга ҳам баковуллик, ҳам кайвонилик қилиб юрган Бийди момонинг заҳрли товуши эшиттилди. Эрталабдан бери келинларга иш, юмуш буоравериб, танбех беравериб чарчаган, шекилли, товутпи жуда ҳоргин чиқди ва гапириб бўлиб охирида уфлаб қўйди. — Боланг тенгигаям шундай дейсанми, уятсиз. Сизларда ўзи бет деган нарса қолмабди.

— Аммам заҳарлигини қўймади — қўймади — да, — деди гижингандек Зубай бойбича паст товушда. — Бундай ёйилиб гаплашиб ҳам бўлмайди, шаппа оғзига уради одамнинг.

— Қалинингнинг ярмини тўласа, майли, мен розиман. — ўтирган жойида чийиллади Шариф кўса, Бийди момонинг гапига парво ҳам қилмай хотинига.

Норматнинг юрагига ёқимли бир ҳис ёприлиб кира бошлади. У ҳозир ўзини унутиб, яна ўз ташвишлари, гапларига берилиб кетган қишлоқдошларини кўриб, ўзида уруш жароҳатини енгишга қудрат сезди, қалби янги, умидбахш туйғуларга тўлди.

У изма – из келиб – кетиб турган қишлоқдош ва қариндошларини кўрганда ҳам, тушдан кейин бошқа қишлоқлардан у танийдиган одамлар келганда ҳам ана шу туйғуни ҳис қилди. Номига бошланган тўй бирдан хурсандчилик, урушдан олдингидек қувноқлик тусини олганди. Кампирларнинг ҳам сўлиб қолган тириш юзларидағи шўх ва қувноқ боқувчи қўзлари худди сўлиган отқулоқ баргига тушган икки томчи штудринг каби ялтирай бошлаганди.

—Тўй тўйга ўхтасин – да!—деди эрталабдан бери печка олдида иссиқда елкаларини тоблаб, чолларнинг галига қулоқ солиб ўтирган Бўстон момо қайдандир ёриқ чилдирма тоғтириб келиб, тарақ – турүк қилиб, шўх – шўх чалиб, мискину шўх оҳангда қўшиқ бошлаб юборди:

*Шафтолининг таруга
Шамомлаган қайнонам.
Кўп хотиннинг ичига
Жомоннаган қайнонам*

Эркаклар унга нашъя қилиб, қийқириб қўйдилар. Чилдирманинг маҳомига сиакиниб, ўртага Норби кампир туғди. Желагини отиб юборди – да, қўлларини қуш ёзиш қилиб ўйнай кетди. Унинг ўйинига шавқи келган эркаклар яна қийқиришиб қулишди. Келдиёр сўни шу йил шаҳарга тушиб ўрганиб келган ҳуштагини чалди. «Оҳ – ҳа – ҳа – ҳай, ҳушшт!». Норби кампир оёқларини енгил кўтариб, чўзиқ товушда лапар бошлади:

*Оҳ, оғажон, оғажон,
Тутни букиб ўтдингиз.
Менинг ҳам журагимди
Тутдай тўқиб ўтдингаз...*

Бир неча келинчак деразадан бош суқиб қаради. Эшик ва айвон болаларга тўлиб кетди. Улар нимжонгина, ҳозир тўкилиб тушаман деб турган кампирнинг қушдай енгил ўйинидан қиқирлаб кула бошладилар. Тезда хотин – халажлар айвонга чиқиб, даврани катта қилишди – да, қизларни ўйинга тортишди. Норби кампир терма айтиб турди. Терсоталиклар тўрт йил давомида хурсандчилик қилишмаганини ва тўрт одам бир ерга йигилиб сұхбат қурмаганини энди эслаб қолишгандай, аламларидан чиққунча хурсандчилик қилишадигандек шаштлари бор эди.

Эрталабки болаларнинг олишида ҳам, гурунгларда ҳам, кампирларнинг ишшайишларида ҳам, ҳаммасида шу кайфият ҳукмрон эди. Фам – аламга тўлган турли қалблар ўзларини бир зум, ақалли бир нафас хурсанд қилишга уринишар, бир – бирининг гапига шақирлаб кулар, ёш келинчаклар эри қайтиб келиб, оёғи енгил бўлиб қолган Аңзиратта қочирим гаплар қилишар, гаплари гарчи кулагили бўлмаса ҳам кулишар, бу куннинг тезроқ тугаб қолишидан, яна уруш хотиралари ва ваҳималари ётган уйларига қайтишдан, яна ўша тащвишли ёлғиз, ҳорғин ҳаётлари бошланишидан чўчишаёттандек кўринишарди.

Аслида ҳам бу қалбларни бир варақ орқага ёки олдинга варақласа, ҳали урушли ҳаёт бор, ҳар иккала томонда ҳам уруп кезаёттан ва бу қалбларнинг энг яқин кишилари, эрлари, болалари, жигарлари, оға – инилари ана шу урушда ўлаёттан, мажруҳ, ногирон бўлаёттан ёки бирон нарсасидан айрилаёттан эди...

Кечга яқин ҳамма уй – уйигъ тарқалди. Фақат уч – тўртта эркак алламаҳалгача гурунглашиб ўтириди. Ахийри улар ҳам Норматнинг мудраёттанини кўриб, ўринларидан туришди. Нормат чўлоқланиб, уларни кузатишига чиқди. У бутун жуда ҳориган, бироқ ўша ўзи қайтаман, деб ўйламаган урушдан олдинги ҳаётта қайтанидан юраги енгилгина ҳаприқиб турарди.

— Энди нима қилмоқчисан?! — деди ҳаммадан охирида қолган Шариф кўса ошнасининг қўлидан тутиб, четга бошлар экан. — Ўйлаб кўрдингми?

— Йўқ...

— Сенбоп бир иш топилиб турибди. Агар йўқ демасанг...
Обрўли иш...

— Қандай иш?!

— Бригадирлик. Икки — уч қишлоқса...

Нормат урушдан уйига қайттанига ҳали тўла ишонгиси келмай турган бир лаҳзада уни эски турмуш ташвишлари гирдобига олаётган, шу сабабли иккиланаёттан, журъатсиз кайфиятда эди. Буларнииг барчасида қандайдир бошқа бир алломат бор эди. Бу алломат ўзини чорлаб турган урушсиз ҳаёт эканига у ҳамон ишонгиси келмаёттанди.

— Бўлмайди,— деди у ниманидир ўйлаб. — Менга тўғри келмайди.

— Нега?! Айнан сенбоп... Колхоз от беради... сен пақат буюриб юрасан.

— Қўй, ўзимиздинг дедқончилик яхши. Ерди соғинган — ман... Тушларимга кириб чиқади ер... Урупда кўп қон тўқдим, буни ювишим керак... бўлмаса одам қони тутади.

— Раис сўраб кўр деганди... Бу оёқ минан тирикчилик ўтказиппинг қийин — ку?..

Нормат оғир тин олди ва оғнасининг гапини эшитмагандек тунга суқ билан тикилди, ўпкасини тўлдириб нафас олди... Кечани туман қоплаган, совуқ эди. Қишлоқда итлар акиллар, уларнииг ҳуришлари нариги бетдаги зовларгача етиб борар ва уларда акс — садо олиб қайтар эди.

— Қўй, ошина, биздан катта одам чиқмаган, урушдан ер ҳайдайман, бугдой экаман деб қайтдим, от миниб юраман деб эмас, — деди у орзуманд товуцда.

Уйга кирганда Анзират болаларни печка атрофида ухлатиб, тўрга солинган икки кишилик жойнинг бир четида ўтиради. Норматнинг кирганига парво ҳам қилмади. Ўша алфоз ўтираверди. Нормат ечиниб, тўшакка чўқди.

— Анзират...

У қўнгиротларнинг қишлоқ үдумини бузган ўша пайтдаги ягона одам эди; хотинининг исмини айтиб чақираради.

Хотини бошини кўтармай:

— Ҳа...— деди совуқ оҳангда. Бироқ Нормат буни сезмади. У ҳозир сезадиган ҳолатда эмас эди. Унинг қалби эҳтироста тўлиб бормоқда эди.

— Аңзират... — хотинини ўзига тортди. — У жойлар — да ҳар куни сени ўйладим. Болаларди ўйладим... Худога ёлбордим... Шулардинг баҳтига мени омон асра, дедим. Уйда менинг зўр хотиним бор, дедим... болаларим бор дедим... Аңзират... бир нима де! Кеганим бери ҳеч кулмайсан... гапирмайсан.

Хотини ўзини тўшакка ташлади — ю, йиглаб юборди. Нормат гарангсиб қолди.

— Аңзират... сенга нима бўлди?..

Аңзират ётганча пиқ — пиқ йиглади.

— Аңзират!..

— Ҳеч нарса... — буғилиб жавоб берди хотини. — Сиздан қорахат келди... ўлди дейишди...

Нормат енгил тортди. У хотини шу йиглаши билан ўзига даҳшатли бир ҳақиқатни ёки оёғингиз билан менга эрлик қиласизми деб айтади деб ўйлаганди. Қора хат келган пайтдаги хотинининг кайфиятини тасаввур қилиб, енгил тортди. Хотинининг сочини силади.

— Мана, энди олдингдаман — ку... Энди ҳеч қаёқса силярди ташлаб кетмайман... Аңзират...

Аңзират бошини кутарди, ёшли кўзларини унга худди раҳми Келаёттандай тиқди, чукур хўрсинди, сўнг туриб, чироқни пасайтириб кеди.

II

Ўпроқ кўнгиротлар Ҳисор тюгининг этакларида, унча катта бўлмаса ҳам негасир Каттасув деб аталашибган дарё бўйларида ўша Боботог ва Бойсунтоғдан кўчиб келганиларидан бери муқим яшашади. Катта дарё азалий чўқиларидан бошланиб, юзлаб қишлоғни оралаб, Пачкамарга қийлади. Бошида тўпилон ва шиддат билан бошланган дарё Лангардан ўти бориб, кичкина сойликка айланиб қолади. Дарёнинг битта қилиги бор: бадор кунлари тўполон қилиб оқади. Унинг ичи ҳарсанг, сангар тошларга тўла, сув пасайғандга тошлар ҳудди улкан тухумларга ўхшайди. Баҳорда эса улар сувга яшишиниб олади. Сел пайтлари унга одам оқса, сог чиқмайди: тошларининг ўзи уни адо қиласи. Нариги бет билан

мұтлақо алақа үзіләди. Иши чиқиб қолғанлар дарёning шеккі бетида түриб, бемалол гафлашса бўлади ўзан унча катта эмас. Баҳор кунлари нариги бетдаги болаларга байрам бўлади — мактаб ёпилади, бериги бетдаги мактабга келиб ўқишининг ҳеч иложи йўқ. Ўқитув—чиларниң нариги бетга ўтилари келмайди, дарёдан кўрқишаади.

Бундан йигирма йил олдин Олма қишлоқлик — Қобиљ чонининг катта ерларда ўқиб келган ўғли нариги қишлоқларга бориб дарс берган дейишади. Айтишларича, у Терсома қишлоғининг рўпарасидан, саёз жойдан от билан сузиб ўтаркан. Бир куни қаттиқ жала бўлади, шининг увлашидан ажабланган Қобиљ чол кечаси дарё бўйшга — томорқасининг дарёга шуташ жойидаги бодом дарахти остига борса, одамга ўтешаш кўланканни кўради. Кўрқиб кетиб, қишлоқдошларини чақириб бориб кўрса, жасаг ўзининг ўғлишининг жасади экан. Кейин Қобиљ чол қыр ортидаги Ёнгоқли (қўнгиротлар Жонгоқли дейишади) қишлоғига кўчиб кетди.

Баҳор кунларини айтмаса, Каттасувдек сокин ва беозор дарё бошқа ҳеч қаерда йўқ, унинг суви тиниқлигидан ҳатто муз устидан ҳам тагини кўрса бўлади. Катта дарё атрофига келиб ўрнашиб қолган ўтроқ қўнгиротлар эмлик—олтмиш қишлоқни ташкил қиласди. Бу уруг асосан чорвачилик ва дедқончилик билан шугулланади. Чорвачилик ва дедқончилик алоҳига—алоҳига эмас, бир кишининг ўзи ҳам дедқон, ҳам чорвадор бўлиши мумкин. Шу сабабли бу уругда ўта бой ҳам, ўта камбагал ҳам бўлмаган. Камбагал ҳисобига кирганиншыг ҳам ери, ҳам моли бўлган.

Уруг бошқа уругта қиз бермайди. Бошқа уругни ўзлари билан тенг кўришмайди. Шу сабабли қыр ортидаги тоҷик овуллари билан ёшларниң уруг ҳам, тиъл ҳам танламайдиган муҳаббат мажоралари деб тез—тез жанжаллашиб туришади.

Айтишларича, қўнгиротлар бу ерларга бир неча асрлар олдин келиб қолишган экан. Нима учун бу ерларга келиб қолишганини билишмайди—ю, бироқ уруг жуда шўзиб, тарқалиб, ниҳоятда оз қисми келиб

қолган. Чолларнинг чўлчакларига қараганда, аввалги ерларида улар жуда тотув ва фаровон яшашган экан. Улар уч нарсани: ерни, оловни, сувни муқаддас тутишар, ўзларини бу уч муқаддас нарсанинг фарзандлари деб билишар экан. Шу сабабли уларнинг орасига ҳеч қачон ихтилоф чиқмаган. Шу учта муқаддас шўйғу уларни бирлаштириб турар экан. Ерлари ҳам бой, серҳосил экан. Жойларини Нилуфар водий деб аташар экан. Уругни оқсоқоллар бошқаришар, бой—камбагал деган гапнинг ўзи ўйқ экан. Кейин нима бўлибди—ю, уларнинг осоишиша ҳаётига уруш кириб келибди. Уруш уларнинг ҳамма нарсасини вайрон этибди, бир—бирига ёв, душман қилиб қўйибди. Ер ҳосил бермай қўйибди, қурғоқчилик бошланибди, одамлар очликтан ўлиб кета бошлишибди. Уруг билан, аймоқ аймоқ билан, ака ука билан урушга киради. Уруг ўртасига ихтилофлар чиқа бошлиайди, уларнинг тотув турмуш—лари издан чиқади. Эски зъетиқодларидан воз кечиб, бойликка ҳурс қўя бошлиайдилар. Бойлик эса уларнинг бир—бирига муҳаббатини ўғирлаб олади.

Шунда ўша даврлардаги уруг оқсоқоли Бойхун (балки Бойсундир) энди бу жойларда яшаб бўлмаслигини ва қон тўқилган ер энди ҳосил бермай қўйганини, сув ҳам, офтоб ҳам улардан юз ўғирганини, энди бу ерлардан урушсиз юрт излаб кетиш кераклигини айтибди. Унинг гапини ҳамма маъқуллабди. Уруг турли томонга: урушсиз юрт ахтариб тарқалиб кетибди.

Бойхун бошчилигидаги ўтроқлар эса қуёшга, муқаддас оловга томон ўйл олибди. Улар қуёш томонда урушсиз юрт бор, деб ўйлаб, табора тикроқча кўтарлишишибди. Бироқ улар қаерга борса, уруш изларидан қувлаб етар, уларнинг ҳаётига ханф солар, қонларига тобора сингиб борар экан, охири шу Кашта сув атрофига келиб ўрнашиб қолишибди. Бу даврда Бойхун жуда қариб, ўлим тўшагида ётар экан. У: «Агар урушсиз юртни топмасаларинг, унда ака укага, дўст гўстига, хотин эрга, одамлар бир—бирига хиёнат қиласиган, бир—бирини алдайдиган бўлиб қоладилар. Қаерда қон оқса, ўша ерга

хүёнат күп соидир бўлади, баҳт у ердан юз ўтиради, одамлар яшаш илмиши эмас, бир—бирини ўлдириш илмиши ўргани бошлийдилар, сув ўрнига ҳон ичадиган маҳлуқда айланадилар. Уруш — ер юзидағи ҳамма эзгу нарсанни қуритади, сизларни ер юзидан супуриб ташлайди. Сизлар ҳаммаларинг жоҳи ва адашган уруш одамларига айланниб қоласизлар. Шу сабабли сизлар урушсиз юртни топинглар, урушни ораларингдан ҳайданглар, тотув яшаётга ўрганинглар. Билингларки, одамизотининг отаси битта: онаси битта — ҳамма бир—биринга жигар, кимкин урушга қарши бўлса: улар сизларнинг жигарларингиз — урушсиз юрт аҳшариб кетган қўнғиротлар. Уларни қўлланглар. Агар урушсиз юрт топсаларинг, уларни ҳам олиб келинглар...» деб ҳон берибди.

Шундан бери қанча замонлар ўтибди, қанча сувлар оқиб кетибди, лекин одамлар урушсиз юртни топиша олмабди, у ҳеч қаерда йўқ экан. Бошқа уругдошлари ҳам тополмаган шекилли, улардан ҳам дарак бўлмабди. Қўнғиротлар урушнинг қомпи гирдобида ҳамон яшаб келишар, уруш уларни аста—секан ер юзидан супуриб ташлаёшган экан...

Бу чўпчакнинг қанчалик ҳақиқатта яқин эканини ҳеч ким билмайди, бироқ ҳамма шундай бўлганига ишонади, болаларига Бойхун, Бойсун деб исмлар қўйишади ва қаерлардадир урушсиз юрт борлиги ҳақида эртаклар айтишади. Утроқларнинг энг катта аймоғи — тўрт етим аймогининг ўзи ўттиз — қирқ қишлоқни ташкил қилади. Бу аймоқ ўзининг урушқоқлиги ва жангарилиги, бир қолилга сифаслиги, аёлларининг эркаклардек барча масалага аралашиб кетиши, узун ва барвасталиги билан ном қозонган; Шу сабабли бошқалар бу аймоқдагиларни айниқдан таржаган ҳам дейишади. Бу аймоқдагилар яна сал овсарроқ ҳам. Овсарликлари кўпроқ мутомбираликка ўхшаб кетади, лекин ростдан ҳам эсарроқ. Тегирмондан қайтишда унни тупроқда тўкиб юбориб, уч кунгача ундан тупроқни ажратаман деб, шопириб ўтирган машҳур эсар ҳудди шу аймоқдан бўлган. Эркаклари ҳам, хотинлари ҳам жуда бақувват ва басавлат бўлишади.

Ўтган асрнинг охирларида Олма қишлоғидан чорегим Бердишукур қизилбӯ лақабнинг большевикча "қизилга

алоқаси йўқ, ранг, тус маънисида) Беккам оқсоқолдан Терсота шаршараси остидаги ерларни сотиб олиб, қишлоқ қуради. У ҳам ҳам ҳар хил жанжаллардан, келишмовчиликлардан, аймоқлар, қариндошлиар ўргасидаги низолардан безиб, фақат ўғиллари ва невараларидан иборат битта totuv қишлоқ қурмоқчи бўлади. Урушгача ростдан ҳам бу қишлоқ аҳиллиги билан ном қозонган эди. Тупроғи қора, ҳосилдор бўлган ер Берди Шукурни анча давлатманд одам қилиб қўяди. Терсота аста — секин бошқа аймоқликлар ҳисобига ҳам кенгая бошлайди. Уруш арафасида қишлоқда йигирма, йигирма бешга яқин уй бор, лекин жуда сийрак жойлашган, бошқа уйдагилар кўланка бўлиб кўзга ташланарди. Дарахтлари ҳам сийрак, арчазор билан ўралган қишлоқ эди.

Нормат Бердишкур бобонинг кенжасидан ёлғиз (тўқиз қиздан кейин) ўтил эди.

III

Бу ерларга қиши ноябрнинг адогида юз кўрсатади. Сўнг, токи мартнинг охиригача тоғда ягона ҳукмдор бўлиб олиб, хоҳлаган ўйинини ўйнай бошлайди. Лекин анча пайттacha дарёлар музламайди, булоқ сувлари иссиқ бўлиб қолади. Баъзи — базидагина, шунда ҳам чилла кирап ва чиқар пайтларидағина қорасовуқ бўлиб, дарахтларни совуқ уради.

Бу йил қиши декабрнинг бошларида юз кўрсатди. Аввал муз аралаш қор учқунлади. Кейин гушллаган қорга айланди. Эртасига эрталаб одамлар уйғонганиларидан сўнг ташқарига чиқиб, ҳайрат билан узоқ — узоқларга боқдилар: ҳаммаёқ оппоқ қор эди, гўё бутун дунё оппоқ эди. Бу — шу йил ҳисобидан ёқсан биринчи қор эди...

Нормат келганидан бўён бирон ишга қўл урмади. Мумиё ичиб, мадорга кирди. Ўзида қувват сеза бошлади. Юришни машқ қилди. Кучга киргач, Янгибой оқсоқолнинг минилмай ётган Қоратўшини насияга олди. Отда юриш унга анча қулай эди. Отта ўзи мишадиган бўлгунча бирон ёқда чиқмади. Оёгининг оғриши қўйгандек бўлгач, от миниб айланиб келадиган бўлди. Бироқ, келганидан бери юраги хижил эди. Анзират у билан тортиниб муомала қилар; оёқсиз қайттанимга шундай қиляптими, деб ўйлар ва эзилар эди.

Болалари эса ундан бир зум ажралмас, айниңса, Холмат, аста – секин гапириш ва иш қилишда унга тақлид қила бошлаган эди. Кечқурун болалари Нормат полвонни ўраб олиб, нима учун оёғи бундайлигини сўрайвериб, безор қилиб юборар, кейин Ҳожар елкасига чиқиб олиб, ерга ўзини ташлар, бу ишидан завқланиб, қиқир – қиқир кулар эди. Анзират эса шу пайтлари печка олдида индамай урчуқ йигириб ўтирас, кўзларида уни нимадир эзаётгандек кўринарди. Уни кўриб, Нормат полвон ҳам эзилар, лекин юзага чиқармас: сабаби ўзига тақалишидан ва бунинг ошкор бўлиб қолишидан қўрқар эди.

Охири бир куни чидай олмади. Ётганларида хотинидан: «Менинг ўлганим чин бўлганда қовоқ – тумшугинг очилиб юрармиди?» – деб сўради. Анзират бу гапни ёшлитиб, ҳўнграб йиглаб юборди. Нормат полвон нима қилишини билмай қодди:

— Сенга нима бўлди? — деди қўрқиб кетиб. — А, нима қилди?

Анзират анчадан кейин йигидан тўхтади – да, секингина, эркаланган товушда:

— Каклик гўшти егим келяшти, — деди.

Бу гапи урушдан олдинги Анзиратнинг нозли гапига ўшагани учун Нормат хурсанд бўлиб кетди.

Эртасига Нормат милтигини ва Қоратўшни олиб каклик овига жўнади. Уруш бошланганидан бери каклик овлаш одамларнинг эсидан чиқиб кептан, какликлар кўпдан безовта бўлмай қўйган бўлишига қарамай, Нормат Бухор зовларигача биронта каклик учратмади... Бухор зовларига келганда унинг каклик овлами ҳам эсидан чиқди. У бу ерларда ўттан урушдан олдинги ҳаётини, тожик овулларидан кўпкаридан қайттанда тўхтайдиган булоқни қўмсаб, ўша энди сира қайтмайдигандек туюлаётган мунаvvар, серташвиш йигитлик – навқирон йилларининг хотирасига берилиб кетди. Болалигида қўзи ҳайдаб келиб, устига чиқиб ўтирадиган катта қизил харсангтошни, бир – бирига туташиб кеттан зовларни урушда кўп қўмсарди. Зах окопларда ётиб, ўша зовларни яна бир кўрсам армоним йўқ, деб ўйлар, ҳозир эса қалбида гайритабиий шуур уйғонмоқда эди. У йигитлик ва болалик хотирадаларига берилиб, Бухор зовларида

узоқ кезді. Зовлар орасыда хирагина туман бор эди. У виқор түкиб турған қорни катта қирларға ёпишиб олған, тоғык овуллари тарафдан эсаёттан шабада билан дарё томон силжиб бормоқда эди. Ҳавонинг авзойи солиқ, эриниб ёмгир ёғарди. Икки томони қирлар билан үраллан арава йўли тойғаноқ бўлиб қолган, юриш қийин, айниқса, йўл тепаликка кўтарила ганда юриш яна ҳам қийинлашар, от туёғи сирпалиб кетаверар, шу сабабли йўл чеккасидаи саргайиб қолган ўт — ўланлар устидан юришга тўғри келарди. Қорайиб қолган қирлар негадир ғамгин тусга кирган, бу ғамгинлик ранги сўла бошлаган арчаларга қадар ўтганди. Норматта арчалар қора кийиб чўнқайиб ўтирган кампирларга ўхшаб кетди. У болалигида устига чиқиб ўтирадиган кекса арчанинг олдига борди. Арчанинг шохлари тарвақайлаб кетган, баъзи шохлари қурий бошлаган, танасида пўстлоги чириб, нимхуш, ачимсиқ ҳид келарди. Арчанинг шу туриши жуда ачинарли эди. «Қарияпмиз, ошна,— деб ўйлади ичида Нормат.— Асли — да ҳаммамиз ҳам ердан озиқ оладиган арча эканмиз».

Тўсатдан зовлар ичидан какликнинг «қийиқ, қийиқ», деган зорланиши эшитилди, сўнг бу товуш ҳам қоялар ичига сингиб кетди. Норматнинг юраги йўқотиб қўйган онасини бирдан кўриб қолган гўдакницидай брезовта эди. Ҳатто энг кичик тошлар ҳам жой — жойида турған бўлса — да, унинг назарида ҳамма нарса ўзгарғандай, ўз руҳига мос синиқандай эди.

Бухор зовларидан ўтиб, қотнинг устидаги дарага борди. Кейин Терсота сойи бўйлаб, Чигга жўнади. Тоғда сокинлик ҳукмронлик қилар, ўт — ўланлар саргайиб, мевали дарахтлар қип — яланғоч ечинганди. Йўл четидаги ёввойи бодомлар етти — саккизгача мевани ушлаганича, энди буни ҳеч кимга бермаймиз, деёттандай силкиниб — силкиниб қўярди. Фақат арчалар ўша — ўша — ям — яшил эди. Булар ҳаммаси Норматта тинч, осуда ҳаётни эслатди. У завқи келиб, отини ниқтади. Сойлик бўйлаб, отда чопмоқчи бўлди, бироқ қари от лўк — лўк этиб йўргалади — ю, яна аввалги юришига қайтди. Нормат юрагидаги туйғуларни бошқаролмай, ҳе — е — ей, деб бақирди. Унинг товушидан от чўчиб, қулоғини диккайтди, зирк орқасидан қандайдир қуш пир этиб учиб кетди. Бақириғига жавобан зовлар

акс – садо берди. Акс – садо анчагача тинмади, унинг товушини ҳар хил қилиб қайтариб турди. Зовларнинг бу эркалаши Норматта ёқиб қолиб, яна бақирди... Акс – садога қулоқ тутиб, яна бошқачароқ қилиб бақирди. Зовлар унга бошқача жавоб қайтарди. Нормат хурсанд бўлиб кетиб, товушига яна ҳар хил тус бериб бақира бошлади. Томоги хириллаб қолгач, ўзини енгил сезди – ю, нима учун келгани эсига тushiб, Қоратўшни изига бурди. Нормат кечгача иккита, шунда ҳам биттаси оқсоқ каклик овлай олди. Кечга яқин қишлоқ устидаги булоқча келди, отни кекса арчага боғлаб, ўзи булоқнинг бошидаги нам тошга ўтирди. У бугун уруш давомида ўйлаган, орзу қилган тинч, осуда ҳаётта қайттанини энди англади. «Энди бу тинчлигимни ҳеч нарсага алмашмайман, хотинимни ҳеч ҳам ўкситмайман, одамларнинг кўнглини оламан, мана шу тоғлар ҳурмати... энди хотинимни ҳам, мени интизорлик билан кутиб олган одамларни ҳам бошимда кўтариб юраман. Бир умр уларнинг иззатини қиласман, менинг учун энди уруш, қон, ўлим, деган нарсалар тугади», деб ўйлади. Келганидан бери ҳеч ишонмаётган, ҳеч ўзини кўнигира олмаётган, худди бироннинг ўрнида яшаётгандай туюлаётган ҳаёти ўзиники эканини, бегонадек бўлиб қолган Анзират ҳам, мана шу тоғлар ҳам, шу тоғларда яшовчи одамлар ҳам фақат ўзиники эканини ва дунёдаги ҳамма нарса унинг бахти, қувончи учун яратилганини тыйди, энди бу нарсаларни ҳеч нарсага, ҳатто худоси келса ҳам алмашмайман: булар менинг ҳаётимдан ҳам азиз, менга ҳаёт бахш этди, деб ўйлади. У, шу дафъя хотиним мени қандай кутиб олади, деган ҳадиги энди ўтиб кеттанини, хотини дунёдаги энг яхши хотин эканини ҳис этди. Кўнгил дарчаларини яшнаб – яшнаб келаётган ҳаётта тамом ланг очиб қўйди.

Шу куни Норматнинг уйида сал кам байрам бўлди. Анзират ҳам очилиб – сочилиб гаплашиб ўтирди. Унинг товуши хушнуд ва жарангдор чиқа бошлади. Болалари Норматни ўраб олиб немислар ҳақида гапириб беришини сўрайди, уни от қилиб минишади.

Анзират уларни ҳавас ва меҳр билан кузатади, уларга кўшилиб кула бошлиайди.

— Пашист нимага ўхшайди? — деб сўрайди Холмат. —
Малимимиз бўрига ўхшайди, дейди.

Нормат нима дейишини билмайди. Бизга ўхшаган одам,
деса ўғлининг тассавурига птур етадиган, кўнгли
чўқадиганга ўхшайди, ўғлимнинг сазаси ўлмасин, дейди.

— Ҳа, Малик бовонгдинг итига ўхшайди, — дейди.

Холмат Малик чўпоннинг кўринганга қутургандек
ташланадиган итини кўз олдига келтиради. Тушунганга
ўхшайди. Лекин яна сўрайди:

— Уларам тўрт оёқлими — а?

Нормат полвон ўғлининг сергаплигидан, фаросатидан
гурурланади:

— Ҳа, уларм тўрт оёқли, икки оёғида юрса, икки оёғида
ажал олиб юради...

Анзират уларга жилмайиб, ўз ҳаётидан, бахтидан
миннатдор бўлиб қараб ўтиради.

IV

Нормат полвон каклик овидан қайттач, хеч қаёқка
чиқмади. Бузилиб қолган чолғи, ўроқларни тузаттан бўлиб,
ўзини авраб юрди. Яраси газак олиб кетмаслик учун
ташқарида ҳам кўп юрмас, ҳорасовуқ ва об — ҳавонинг
бирдан ўзгариши унинг ярасига таъсир қилган, йиринглай
бошлаганди. Фақат баъзи кунлари Қоратўшни миниб,
қотнинг устига — хар йили дехқончилик қиладиган ерига
бир чиқиб тушар эди.

— Ер ишланмай қотиб кетибди, — дер эди у тоғдан
қайттандан сўнг. — Чакалакзор бўлиб қолибди. Сугуриб
тапладим. Бироқ, томирлари ҳали ҳам одамни роса қийнайди.

Норматни дехқончилик ташвишлари тобора яшартириб
бормоқда эди. У омбордаги занглааб ёттан омочни топиб
олиб, унинг мих — чўпларини қайтадан қоқди ва кўкламга
созлаб қўйди.

Аммо бу ишлар тез тугаб қолди. Унга деярли юмуш йўқ
эди. Молхонани Анзират ёки Холмат кураб қўярди. Ўтин
ёриш ҳам Холматнинг бўйнида эди. Нормат эса кунни уйда
қамалиб, эски чориқларни ямаш, уни синган чойнакларга
тумшук ўрнатиш билан ўтказарди. Бекор пайтлари печка

ёнида ухлаб ёки орқасини пеккага бериб ўйланиб ётарди. У хаёлга берилиб, мудраб ёттанды унинг оромини бузишга ҳеч ким журъат этолмасди. Баъзи кунлари у йўқ ердаги эрмакни ўйлаб топарди. Бир куни ташқаридан лой олиб келди – да, туяга ўхшатиб, ичини ковак қилди. Икки – уч жойдан яна тешик қолдириб, ажабтовур маҳлуқ ясади ва пекканинг остига тиқиб қўйди.

— Ота, бу нима? — деб сўради ҳайрон бўлиб, уни кузатиб ўтирган Холмат.

— Ҳали кўрасан, — деди у сирли қилиб, катта иш қилгандай жилмайди.

Ярим соатлардан кейин пекканинг остида қуриган "маҳлуқ"ни олиб, тузаттан бўлиб, оғзига солиб, пуфлади. «Махлуқ»дан ингичка, аммо ёқимли товуп чиқа бошлади.

Бошига катта рўмол ўраб олган Ҳожар шодланганидан қийқириб юборди – да, Норматнинг қўлига ташланди.

— Менга бейинг, — деди хурсандлигидан ўзини йўқотиб.

— Менга бейинг, менга... менга...

— Сен чалишни билмайсан, — деди Холмат уни орқага итариб. — Отам менга ясаб берди.

— Йўқ, менга, — дея чийиллади Ҳожар ва Холматнинг қўлидан итариб, жонҳолатда ҳуптакка интиди.

Нормат эса уларнинг қувониб кеттанини кўриб, ўзи ҳам суюниб, хунук қилиб, ҳиринглай бошлади. Унинг ҳиринглашини кўриб, Анзиратнинг юраги орқага тортиб кетди: мулла Абдулланинг гунг ўғли Хайруллони бирор елкасига қоқиб мақтаса, шундай ҳиринглаши эсига тушди.

Эртасига Нормат хаёлга берилиб ётди – да, сўнг ниманидир эслагандай, хамир қораётган Анзиратта қаради:

— Ҳе – ей, ийирган ипинг йўқми?

Анзират унга ялт этиб қаради – ю, гапига тушунмагандек, унга тикилиб қолди.

— Ипни вима қиласиз?

— Тўқийман.

Анзират эрига акабланиб қаради.

— Нима қиласиз? — ишонқирамай сўради.

— Тўқийман, — деди Нормат сирли қилиб.

— Энди бир камингиз ип ийиришингиз қолганди, — деди ва жилмайиб қараб қўйди. Норматни ип йигириб

ўтирган қиёфада тасаввур қилди — ю, шарақлаб кулиб юборди. Ўзини кулгидан түхтата олмай, деворга суюниб қолди. Сүнг бирдан Норматта қараб, жиiddий тортди — да:

— Урчук ҳам ийирасизми? — деб сұради.

Нормат унинг айёrona тикилиб туришидан келинчак — лигидагидеk — бирон мугомбирликни ўйлаганини сезиб, хафа бўлиб, хўмрайди.

— Сенга ҳазиллашаёттаним йўқ, — деди хафа алфозда.

— Ипинг бўлса, бачаларга қўлжилоп тўқиб бераман.

Яна кулиб юбормаслик учун Анзират унга синовчан қаради:

— Балким, гиламам тўқирсиз? — деб сўради у яна ўша шўх ва кинояли оҳангда.

— Йўқ, — деди соддадиллик билан Нормат. — Сен ишонмаяпсан. Биз у ёқларда, госпиталда — ёттанимизда, духтур қиз зерикиб қолмаслигимиз учун ипдан ҳар хил парсалар тўқишини ўргатарди. Сават, солдатларга жилоп, қўлжилоп тўқирдик. Баъзилари ўзларига эгнилик ҳам тўқиб олган эди.

Анзират Норматкинг зерикаёттанини, ишга ўрганган бдамнинг бўш тургиси келмаёттанини англар, бироқ ўзи ҳам эрини зериктирасликнинг чорасини топишга ожиз эди.

— Сиз ҳам бундай меҳмон — сеҳмон бўлиб қидирсангиз — чи? — дерди унга қараб ўтириб, ачиниб кеттан Анзират. — Боринг, кўринг, одамнинг тағтини одам олади. Ётаверсангиз, хуниайиб, ҳаммадан ажраб қоласиз — ку.

— Менинг боргим келмайди деяпсанми! — зорланди Нормат. — Борсам одамлар сўрайверишиди, сўрайверишиди. Фалон эмиш, чинми, писмадон эмиш, чинми, одам қони дарё бўлиб оқиб, шаҳарларни селдек оқизилти, чинми, деб. Урушни эсласам, кўнглим айнийдиган бўп қолган. Эсласам, бошим айланади, юрагим куйиб кегаберади. Худди мени бирор ҳозир отиб кетадигандек туюлаверади.. Э... қўй, баҳоргача уйда бўп турай... кейин бир бориб даволаниб келаман...

Анзират бундай пайтда эрини тушунарди. Нормат номусли одам эди. Ўзининг ожизлигидан уялишни ва буидан ниҳоятда қийналишини биларди. Шу сабабли у Норматта меҳмондорчилик тўғрисида бошқа гапирмади. Ҳолмат билан

Ҳожар Норматнинг ёлгиз овунчоги эди. Ҳолмат бўш бўлди дегунча, отасининг олдидан жилмас, у тўқиёттан пайпоқларга ҳавас билан қараб турар, сўнг отасининг қўлидан олиб, ўзи ҳам тўқимоқчи бўларди. Шундай пайтлари Анзират номус қилган бўларди.

Ҳожар юзи лўпти, Норматнинг опаларига торттан, дўймбоқ, тўлаиқдан келган қиз эди. Эсини энди таний бошлаган Ҳожар отасининг севимли «мушуги» эди. У отасининг қўйнидан чиқмас, уни от қилиб ўйнар, юрганда елкасидан тушмас, кечалари ҳур – ҳур этиб, Норматнинг қўйнида ухлаб қолар, Анзират уни ўз жойида ётишга зўрга кўндирав ва уни «отасининг мушуги» деб эркалар эди. Нормат урушдан келганидан бери болалаларига айрича меҳр билан қаарди У Ҳолмат дарс қиляптими, йўқми — муентазам текширар, Ҳолматдан билимли ва ўқимишли одам чиқишни истарди.

— Қани энди шу болалар ҳам катта бўлиб қолса — ю, сен билан мен буларнинг роҳатини кўриб чўзилиб ётсан, — дерди Нормат қариялардек орзу қилиб.— Мен у ёқларда юриб, Ҳолматимни катта бўлса, кемачилликка ўқишга қўяман, Ҳожарди эса дуҳтуранликка қўяман, деб ҳавас қиласардим. Бизда кемачилар бор эди. Матрослар дейшарди, улар жуда ҳурматли, обрўни зўр эди. Доим кемада юришарди, ҳатто бозорга ҳам кемада бориб келса бўларди. Мен Ҳолмат катта бўлса кемачилар ўқишига қўяман дердим .

Норматнинг болаларча орзу қиласпи қолмаган эди. Балки шу сабабли ҳам ҳаётта таіпналийк билан боққандир? Ҳар қалай, у болаларининг катта, ўқимишли одамлар бўлишини истарди. «Ахир, кема яхши — да! — деб ўйларди у. — Дарё бўлса бор, шартта ўтиради — ю, истаган тарфга кетаберади». У фақат бу дарёда кема сузолмаслиги ҳақида ўйлаб кўрмаганди. Орзулари унга ҳаётта тик ва ҳаққоний қараашга халақит берарди.

V

Бир куни тонг маҳал Нормат полвонникига Шариф кўса отланиб, қўлида милтиқ ва анча ташвишли қиёфада келиб қолди.

— Нормат, сени Шўро чақирияшти, мильтингни олиб бораркансан.

— Нима гал?! — деб сўради Нормат ҳайрон бўлиб, шўро раисининг ўзини бунчалик кеч эслаганига ҳайрон бўлиб. Шариф кўса Анзират турган томонга имо қилиб, Норматта кўз қисди. Шунда Нормат бирон муҳим нарса юз берганини англади.

— Иссиқроқ кийиниб ол, — деди Шариф кўса. — Кечгача келмасак керак.

— Ака, чой ичиб олсаларингиз бўларди, — деди Анзират Шариф кўсага, унинг тонг — саҳарлаб, яна миљтиқ билан келганига тушунолмай, хавотирланиб.

— Чойга бошқа вағт. Бизни Олма қишлоғида — идорада кутиб туришибди.

— Эшилтан бўлсанг керақ. Ҳотам чавандоз урушдан қочиб келувди, — деди Шариф кўса йўлга чиқдач. — Уч йилдан бери ушлай олишмаёттанди. Тожикистонда, тоғларда қочиб юрибди экан. Кеча ярим кечаси Сапар ўғри хабар берди, уйга келган эмиш. Бугун ушламасак, яна қўлдан чиқади. Раис сени фронт кўрган, опкел деди. Яна военкоматдан уч киши бор.

Тераклилик Ҳотам чавандознинг урушдан қочгани ва қаерлардадир қочиб юрганини Нормат илгари эшилтанди. Бироқ, бирдан юраги хижил бўлди. «Наҳотки, энди ҳам тинч қўйишмаса?!» деб ўйлади у кўнглининг бир четида норози бўлиб.

Идора олдида тўрт киши уларни кутиб турарди. Иккита қозоқ солдат, ҳарбий комиссарятда ишлайдиган нўғай капитан ва қишлоқ шўросининг раиси Мирзақул ҳам бор эди. Нормат уни негадир урушдан олдин раис бўлган пайтиданоқ ёқтирасди. Нормат қайттандан сўнг уни Норсапар бечоранинг жанозасида кўрган ва «Бунча семириб кетибди?», деб ўйлаганди.

— Нормат,вой, зангар — ей, сенам ҳеч кўриниш берасанми ўзи, — деди Мирзақул ярим чин, ярим ҳазил дўйқ уриб. — Ходинингнинг қўйнидан чиқмай ётаберасанми?

— Раис бова, шу менсиз ҳам кўп экансизлар, бормасамми, деб эдим. Оёғим совуқча чидамайдиган бўп қолган, — деди у танаккалига баҳона қилиб.

— Ҳу — у! — товушига расмий тус бериб, қўлини пахса қилди Мирзақул. У негадир Норматни кўриб, типирчилаб қолганди. — Менинг томорқамга ишга бораёттанинг йўқ. Ҳукуматдинг буйрганини бажаряпсан.. Сенга ўҳшаш зангар урушдан қочиб, ҳаммамизни шарманда қилди.

— Чоржетимликлар ҳали ҳеч кимди шарманда қилмаган, оғизга қараб галиринг, раис, — деди Шариф кўса ўксинган ва ҳақоратланган қиёфада. У жуда оркап, лекин сипо одам эди. Ўзи бригадирлик қиласидаги қишлоқлар ҳақида ёмон фикр бўлишини истамасди.

— Менга деса иккаловинг ҳам борма! — зарда билан қўл силкиди Мирзақул. — Лекин мана, ҳукуматдинг одами келиб, талаб қиляпти, тушуняпсанми, илтимос қилаёттани йўқ, талаб қиляпти. Дизиртирни тутишга кўмак бер, деяпти. Кучимиз камлик қиляпти, деяпти.

Нўғай капитан уларнинг жанжалига эътибор ҳам бермади. У оёғи ясама Норматта қараб, нимадир деб гўлдиради — да, бошини чайқаб, отига минди.

— Давай, канчай, Ташанич! — деди у Мирзақулга. — Поедим.

Олтита қуролланган киши Тераклига қараб йўл олишди. Тонг энди бўзара бошлаган, секинлаб майда қор ёғар, ҳаво баҳридилини очарди.

— Ташанич, — деди капитан Каттасувни кечиб ўтишгац, — кишлиқда отишма нельзя, а у него можетъ оружия. Вот так сделаем, сен адамларинг билан дарага чиқиб, йўлни тўс. Кишлиқни ўраб олиб, уни кишлиқдан суриб чиқарамиз. Дарага блокада этабиз. Сен ана уни олиб, — Норматни кўрсатиб, — дарага боком турасизлар. Биз сенга гонят қилиб борамиз.

Мирзақул Норматта ижирғаниб қаради — да, отни дарага бурди.

— Ташанич, помни, живой нада, понил?

Мирзақул бош силкиди ва дарага қараб — отини йўрттириб кетди. Нормат ҳам унинг изидан Қоратўшини дарага бурди. Ердаги қор ҳали эримаган, отни чоптириб бўлмасди. Нормат оёгининг устидаги қорни тез — тез қоқиб борар экан, безовта бўлар, юрагининг бир чеккасида ўжарлик ва терслик уйғонганди. «Наҳотки, бу падарқусур

урушдан ҳеч қутула олмасам? — деб ўйларди у. — Қаерга борсам, қувиб етади, Ҳа, Бойхун бобом түғри айттан, меҳр — оқибат күтарилган юртдан уруш аримайды деб. Эл қаерга борса, уруш қувлаб етади деб. Одам қони оқдан жойда меҳр — оқибат, барака күтарилади. У ернинг нонини еган қонхўр бўлади, деяр эди отам бечора. Пайғамбарча умр кўриб, одам ўлдирмай кетди. Ҳатто уйини талаёттанданда ҳам қўлига милтиқ олмади. Ким қўлига милтиқ тутса, у уруш одамидир, у одамнинг ўзини ҳам уруш ҳалок қилади, дер эди. Шу одамнинг ўғли мен қанча одам ўлдирмадим!... Аххх — хха! Ўша Бойхун бобомиз айтгани урушсиз юрт бормикан, бор бўлса, қаерда, қайда? Қуёш оддин чиқадиган юртда, дейишарди. Қуёш оддин қайси элда чиқаркин?!»

Нормат булуғли осмонга, қуёш чиқадиган томонга суқ ва изтироб билан боқди. Порох дудини яна ҳидлашни ўйлаганда, кўнгли айниб кетди.

Даранинг оғзига кираверишда сойликда тўхташди. Оддинга ўтиб кеттан Мирзақул ўёқ — бу ёқни кўздан кечирди — да, Норматнинг оддига келди. Унинг боядан бери хўмрайиб олгани бироз ёзилган, юзига қизиллик югуриб, анча мулойимлашганди чоги, очиқкўнгиллик билан бўйруқ бера бошлади.

— Сен нариги бетта чиқ, анови харсанг орқасида тур, отдан тушма. Отингни кўриб, қочиб қолиши мумкин.

Қор ёғиши тезлашган, бир қадам нарини зўрга кўриб бўларди. Нормат қизғиши харсанг олдига келди — да, раиснинг гапларини эсидан чиқарди. Отдан тушди. Харсангга ҳорғин суюнди. Уюшиб қолган оёғини ёзиш учун силкиб қўйди. Бирдан бадани титраёттанини, исигма туваёттанини англади. Эти қалт — қалт титраб, юрагини нохуш бир кайфнят эгаллади. У бўзрангта кирган осмонга, ўқпар бўлиб, учиб тушаёттан учқунларга, оппоқ далаларга, рус шаҳарларида кўрган черков қуббалариdek учбурчак гумбаз шаклидаги чўққиларга қлаб, кўнглига бу гўзалликни сингдириб олмоқчилик, чуқур нафас олди. Кейин бир нарсага аҳд қилгандек, милтигини тошнинг устига қўйди. «Бўлди, шунчаси, агар қирқ йил қирон келса ҳам энди одам отмайман. Ўзлари отаверсин», деб ўлади. Қор қулоқлаш — ганидан даранинг нарига томони зўрга кўзга ташланарди.

— Нормат,— товуш эшитилди у ердан,— бу даюс қор ҳам халақыт берадиган бўлди — да. Йўл умуман кўринмаяпти.

Нормат юрагининг дукиллашини босиш учун ерга ёнбошлади ва ютоқиб қор ялай бошлади. “Йўқ, отмайман, ўзлари отаверишсин, — ўйларди у. — Ҳеч қурса, тушимда тинч қўйинглар, алаҳсирамай, одамларга ўхшаб яшай дейман, хотиним, болаларим ҳаққи, қон тўкмайман. Фашистлар у ёқларда, узоқларда қолди».

— Раис бова, балки бошқа ёқдан қочиб қолгандир? — бақирди у. — Менинг оёғимга заҳ ўтиб кетди. Совуб қолди. Мен кетаверсам, бўлмайдими?

— Бошқа ёқдан қочолмайди, — Мирзақулнинг тантанавор товуши эшитилди. — Бошқа томон очиқ.

— Шу ердан қочади, ўтган йили шу ердан тоғга қараб қочиб кетувди...

У гапини тугатмасдан қишлоқ тарафдан от дупури, «Стой, стой, стрелят — буду», деган товуш эшитилдио, варанглаб миљтиқ отилди. «Бу солдатлар эмас,— деб ўйлади Нормат шошиб турар экан харсанта пусиниб. — Шариф отолмайди, кўли чўлтоқ. Демак, Ҳотамда миљтиқ бор экан — да?» Шу пайтда яна бир ўқ узилди. Отлар дупури аниқ кела бошлади, кимнингдир ҳансираф югуриб келаёттани эшитилди. Нормат қишлоқ томонга қаради — ю, сойлик бўйлаб, югуриб келаётган кўланкани, қўлида косовдек нарсани кўрди. Кўланка Мирзақул турган томонга бурилдио, бироқ осмонга қаратиб ўқ узилағач, йўлинин Норматга қаратиб бурди. Мирзақул Ҳотам билан юзма — юз келипдан қўрқкан ва ўзидан балони узоқлаштирганди.

— Нормат, эҳтиёт бўл!.. — деб бақирди у.

Кўланка Нормат турган томонга жонҳолатда эмаклаб чиқа бошлади. Нормат унинг оқиши пўстинини, қоп — қора соқолини кўрди. Кўланка тошга йигирма қадамча қолганди, у пусиб турган жойдан отилиб чиқди. Кўланка уни кўриб, миљтиқни даст кўртардио, Норматнинг миљтиқсиз, чўлоқланиб турганини кўргач, бостириб кела бошлади.

— Қоч, Нормат, йўлимди тўсма, қоч, отиб ташлайман.

Нормат серрайганча унга қараб турар, фақат унинг озғин юзини, ўсиб кетган соқолини, қонга тўлган кўзларини кўрарди.

— Қоч, Нормат! — деди ёввойи товушда Ҳотам. — Сен ҳам сотилдингми, уккағар?! Кимларга сотиляпсан, қоч. Булар бутун халқни қириб ташлашди... қоч.

Нормат унинг улкан гавдасига, терлаб кетган юзига қараб туаркан: «Мени отмаяптими, демак, оз булсаям имони бор экан», деб үйлади.

Нормат Ҳотамни энг ҳалол ва мард чавандоз деб биларди. Ҳотам кўпкарида гирромлик қилмас, қўнгиротнинг олд отларини минарди. Носир жовканинг тўйида иккови зотнинг тенг ярмисини айиришган, шунда Ҳотам чавандоз Норматта «гирромликни билмас экансан, ке, от алмаштириб чопамиз», — деган ва от алмашишган эди. Шундан кейин иккови ўргасида оғначилик пайдо бўлганди.

— Қоч, Нормат, қонимди қайнатма, — деда бостириб келарди Ҳотам чавандоз.

— От!! — бақирди нариги бетдан Мирзақул. — От. Нормат, отиб ташла, ҳозир қочиб кетади, отиб ташла, энагар!..

Нормат Ҳотамнинг йўлини тўсди.

— Ҳотам, қочишинг бефойда, бари бир отишади. Яхшиси, ўзинг таслим бўл...

— Менга гап ўргатма! — Милтигининг затворини тортди Ҳотам. — Бари бир отиб ташлашади. Ҳаммамизни отишади бу динсизлар...

— Бўлмаса мендан ўтолмайсан, — деди Нормат, унинг йўлини тўсиб. — қани, зўр бўлсант, мени от! Мен сени қўйиб юбормайман.

Ҳотам милтигининг тепкисини ушлади — ю, нимадир эсига тушшиб, ақдан озаётгандек ўкириб юборди.

— Мен сени отолмаслигимни биласан, уккағар, қоч, бўлмаса барибир отаман.

— Йўл бермайман, — унинг милтиғига ўзини ташлади. — Эсингди йиғ.

Орқадан от дупури тобора яқинлашиб келарди. Кимдир русчалаб сўкинди. Ҳотам чавандоз Норматни силкиб ташлади, ундан қутуломагач, орқага чекиниб, қорнига тепди:

— Ўзингдан кўр, чўлоқ!

Киндигининг устидан тепки еган Нормат «их» деди — мильтиқни қўйиб юборди ва қорнини ушлаб юз тубан

йиқилди. Ҳотам чавандоз унга эътибор ҳам бермай, юқорига тирмашди. Харсангни айланиб, йигирма қадам юрмасдан нариги бетдан етиб келган Мирзақұл изидан ўқ узди. Ҳотам чавандоз илкис орқага бурилдию, раисни күриб, хунук қилиб тиржайди — да, чалқанча йиқилди ва пастта думалаб кетди.

Мирзақұл унинг милтигини отнинг устидан узалиб олди — да, атрофга ғолибона назар ташлади. Ҳотам чавандоз боя Нормат ўтирган харсангта таяниб, осмонга қараган кўйи қотиб қолган, қийшайиб турган телпаги остидан ўсиб, патак бўлиб кеттан соchlари кўзга ташланиб турар эди.

Нормат ўзини ўнглаб, ўрнидан турмасдан орқадагилар етиб кељди. Бир солдат отдан тушиб, жасаднинг бошини кўтарди — да:

— Тамом, — деди, — шуля на сердцу.

Нормат ўрнидан туриб, буқчайган ҳолда Ҳотамнинг тепасига борди. Ҳотам чавандоз сёқларини чўзиб, улутвор қиёфада чалқанча тиржайиб ётар, бўйни, оқ пўстиннинг ёқалари қонга беланганди. Норматнинг қонга кўзи тушиши билан бирдан боши айланиб кетди, миясига нимадир урилгандай бўлиб, кўнгли беҳузур бўла бошлади, кўзларини чиртта юмиб олди.,

— Ҳой, даюс! — бақирди унга қараб, от устидан Мирзақұл. — Ҳали сенми, сотқинга ёрдам берадиган? Сен ҳам шу билан қўшмозор бўл! — У Норматнинг юзи аралаш устма — уст қамчи туширди. — Бу ишинг учун Сибирь қиласман!

Юзига тўсатдан тушган қамчи зарбидан Норматнинг кўз олди чараклаб кетди. У секин Мирзақұлга қаради. Кўзлари қонга тўлганди. Мирзақұл унинг юзи аралаш иккинчи қамчини тушириш учун кўтарди, бироқ Норматнинг бақувват қўли қамчини ҳаводаёқ ушлаб олди. Нормат қамчини силкиб торти. Мирзақұл отдан учиб, ерга қулади. Нормат унинг устига бостириб борди. Унинг қулоқлари тагида бирдан гуввиллашга ўхшаган шовқин бошланган, аскарларнинг уларнинг орасига тушганини ва ўзини бир четга тортаёттанини ҳам билмасди. Кейин у бир силикиниб, аскарлар қўлидан чиқиб, Мирзақұлга қараб юрди ва шу дафъа бирдан хириллаганча ерга қулади.

Шариф кўса отдан тушиб Мирзақулни ўрнидан турғизди. Қўрқиб кетиб пишқираётган отига қайта миндириди. Норматнинг оддига бориб, хавфсираб қаради. Норматнинг чакка томирлари бўртиб чиқсан, кўзларининг атрофи кўкариб кетган, оғзининг бир чеккасида сарғиш кўпик пайдо бўлаётган эди.

— Қўйинглар, ўўзимм... — деди у солдатларга ва Норматнинг қўлатигидан олиб, турғизди. Бироқ у Норматни суяб қололмади. Нормат чинқирганча, икки қўли билан чакка томирларини ушладио, гир айланиб ерга қайта йиқилди.

Капитан нима ҳол юз берганини айгладими, Мирзақулга зарда билан қараб, отдан иргиб тушди, Норматнинг чакка томирларини уқалай бошлиди.

— Снег... снег!.. — бақирди у аскарларга, сўнг Шариф кўсага қараб, — втирайте со снегам... втирайте со снегам!.. — деди бор овози билан.

Бу ерда турғанларнинг ҳаммаси, ҳатто Мирзақулиинг ўзи ҳам эсанкираб қолди. У оғзидан кўпик келиб ерда типирчилаб ёттан Норматта қўчиб ва ваҳима билан қараб турарди.

VI

Бийди момо — бутун Терсота қишлоғига Берди Шукур бобо томонидан амма бўларди. Аслида қишлоқ бир авлоднинг унча узоқлашиб кетмагаи шахобчалари эди. Шу сабабли ҳар бир уйда азами, тўйми, кампирнинг ўрни бор, ҳар бир нарсага, хоҳ жанжал бўлсии, хоҳ тўполон — ҳаммасига аралашишга ҳақлиман деб ҳисоблар, ҳеч бир нарса унинг иштирокисиз ёки маслаҳатисиз ўтмасди. Мабодо унинг йўқлигида бирон мажоро ёки қиз узатиш маслаҳатлари бўлиб қолса, у бундан ўзини жуда хўрланган ҳисоблар, ўша қизнинг ота — онаси билан гаплашмай қўяр ёки маслаҳатни қайтадан бошлаб, ҳамма шов — шувига ўзи аралашиб, яна ўзи тинчтиб қайтар эди. Усиз ҳеч ким совчи жўнатолмас, кимнинг зоти паст, кимнинг тоғаси ўғри, кимнинг отаси хотинчалиш, кимдан яхши қайнона ёки қайнота, кимдаи яхши куёв ёки келин чиқади — ҳаммасини билар, ҳаммасии ҳал қилар эди. Унинг бу кайвонилигига терсоталиклар ҳам ўрганиб

қолган, унинг аразидан қўрқибми ёки у ҳар бир ишни жуда осон ҳал қилишига ишонгани учунми, ҳар қалай, улар бу катта аммаларини энг кичик оиласий йигинлардан ҳам қуруқ қоддиришмас, ҳурматини жойига қўйиб, чақириб боришарди. Кўпгина хотинлар унинг аччиқ сўзларидан, койишларидан безор бўлган бўлса ҳам уни ичиде ёмон кўришса ҳам сиртларида жилмайиб туришар, уни кўрганда югуриб бориб кўришар ва шунда ҳам ундан бирон койиш эшитишдан чўчиб туришарди. ҳамиша уни кимгадир, танбеҳ берашиёттан ёки кимнидир уришаёттан қиёфада учратиш мумкин эди. «Шулар ҳам аёлми! — дерди у аёллар ҳақида. — Аёл деган рўзғорни сантдай қилиб юриши керак, булар эса овларини қўрсатиб кўчада ўтиришни яхши кўради». «Эркак деган, эркақдай бўлиши керак, — дерди у эркаклар ҳақида. — Хотинга ўхшаб, мижғов бўлмасин. Бизнинг даврларда эркакларнинг изидан бир ҳафта юриб ҳам бир оғиз сўз эшитмасдик. Ҳозиргилар эса, гап чайнаб юришади». Бийди момо қишлоқда ҳар бир нарсага аралашишга ҳаққим бор деб ҳисоблаши бир томондан аммалиги бўлса, иккинчидан кўпни кўрган, бошидан кўп нарсаларни ўтказган қишлоқдаги энг кекса кампир эканлиги эди. Бошлига тушган қийинчиликлар, кулфатлар унинг қаддини букишдан кўра, тик қилиб қўйган, у ҳали ҳам қарилликни бўйнига олгиси келмас, файратли эди. Баъзи чоллар: «Бийди, кундан — кунга яшариб боряпсан, ке, совчи қўйиб, сенга уйланана қолай, юрасанми ўғилларингди эшигида сарғайиб», — дея тегишарди. Бу ҳазиldaн кўра унинг чиндан ҳам ёшариб бораётганлигига ишора ҳам эди. «Раҳматли Бухор полвоннинг полвонлиги у ўлгандан кейин хотинида қолди», дейишарди чоллар. Авваллари анча тортинчоқ аёл эри ўлгандан кейин бирдан қишлоққа аралашиб, тўй — азасида бел боғлаб хизмат қилиб, элнинг арзандасига айланганди. Бухор полвондан икки ўғил билан жуда ёш қолган бўлишига қарамай, бошқа эр қилмади. Бутун кучини шу ўғилларини одам қилишга сарфлади. У ўроқ ўтар, ўтин ётар, беда ташир, буғдой янчар, тегирмон тортар, оғил қуарар, навбатида мол боқар, тўйларда эркаклардан қолишмай хизмат қилар эди. Одамлар доим уни эрининг эски қора чопонини кийиб, белини чилвир билан боғлаб, ўғиллари ёнида бирон иш

билин шуғулланаёттанини күришарди. Унинг катта – катта тошларни күчириб, томорқасига сув ҳайдаштитанини, Бухор полвоннинг баркашдай кетменини баланд күтариб, лой қориёттанини, эшакка боғ – боғ қилиб ўтин ортиб келаёттанини күришиб, унинг бунчалик күч – қудратни қаердан олаёттанига ҳайрон қолишарди Бўлмаса жикаккина аёл эди. “Бутун гавдасини битта ун халтага жойласа бўлади, лекин ўзи бутун қишлоқча жой бўлмайди”, дерди Ражаб подачи.

Ҳамма босмачидан қўрқиб, ўтин теришга чиқмай қўйгандা, у bemalol қари эшагини етаклааб ўтин териб келарди. Очарчилик бошланыб, бир бурда нон топиш учун бошқалар Маккага бориб келишта ҳам рози бўлган пайтлар унинг дастурхонида нон бўларди.

Ҳеч ким унинг нима учун бунчалик жонини жабборга бериб, куйиб – пишаёттанини билмасди. Қўлини сўраб келган совчиларни бир хил жавоб билан қайтарарди: «Мени эрим талоқ қилмаган, ҳали ҳам унинг никоҳидаман». Ҳеч ким уни бу фикридан қайтаролмади. Орадан йиллар ўтиб, келинли, неварали бўлгандан сўнг у нима учун ўша пайтлар бунчалик куйиб – пишганини ва биронта ўзига тўқ одамга тегиб олиб, умрини ташвишсиз ўтказмаганини келинларига аён қилгандек бўлди: «Қайноталаринг қандай одам эди – я, ҳар бир елкасига тўрттадан одам ўтирарди, икки бети қип – қизил, кўзлари бургутницидай. Ундан ҳатто Амир Олимхон ҳам қўрқарди»... Сўнг доимидай Бухор полвоннинг қандай ўлганини гапириб берарди. Бухор полвон авлоди азалдан полвонлиги ва чавандозлиги билан довруқ қозонган қадим авлодлардан бўлган. Бу авлод ота – бобомиз айиқ бўлган деб, фахрланишарди. Бухорогача довруги кеттан Бухор мерган шу авлоднинг ягона сўнгти вакили эди. Ундан фақат бошқа уруғликлар эмас, Шаҳрисабз begi ҳам чўчиб муомала қилган. У учеб бораётган чумчуқнинг кўзидан урган. Ўчакишган одамидан ўчини олмай тинчимаган. Унинг даврида ўтроқ қўнғирот қишлоқларда бирон марта ҳам босмачилар бостириб кирмаган, қўрбошилар Бухор мерган билан ўчакишишни истамаганлар. Амир Олимхоннинг ўзи унинг қўлидан каклик, тустовуқ оттириб еган. Унинг ҳурматини доимо сақлаган. Амир Бухорога чорлаб, унга

одам қўйганда, у: «Амирингда менинг ишим йўқ, агар иши бўлса ўзи келсин», — деган. Шундай одам кичкина, бор — йўғи калладай келадиган тошнинг остида қолиб ўлган. Тошни ким думалаттанини, ким уни Боқирчининг зови устида ярим кечагача пойлаб ўтирганини чоретимликлар ҳозиргача билишмайди. Билганлари шуки, тош унинг қоқ кўкрагини эзиз юборган, Бухор полвон ўлими аниқлигини, шу тош Аэроилнинг хабарчиси эканлигини билиб, уйигача зўрга етиб келган, етиб келган — у, айттан охирги гави шу бўлган: «Хотин, уйнинг чирогини ўчирма, болаларимни бирорга хор қилма, агар уйимнинг чироги ўчса, тоабад сендан рози эмасман...»

Бийди момо бу ҳикояни неча марта айттан бўлса ҳам, яна айтаверади. Ҳар айтганда қўшиб — чатиб айтади. У, келинларим билсин, айиқ авлодининг чироги мендан кейин ҳам учмасин деб, атайлаб қайта — қайта айтади. Айиқ авлодини ўстираётганларидан, бу авлодга келин бўлганларидан фахрланишларини истайди. Келинларига невараларини ориятли, номусли қилиб ўстиришларини, ҳеч кимга хор қилиб қўймасликни талаб қилади. У набира — ларини боболаридаи полвон бўлиб ўсишини истайди, чунки ўзи болаларини шундай қилиб тарбиялаган эди. У ўғиллари одам қилиш учун қўлидан нима келса, одамзод нима қилиши мумкин бўлса, ҳаммасини қилади. Болаларига бирорнинг бир қошиқ сутини ичирмай, ҳеч кимга хор қилмай ўстирди. Ўзи тиланди, ўзи ямоқ кийди, ўзи хўрланди, лекии болаларини тилантирмади, ямоқ кийгизмади, хўрлатмади. Болалари ҳам ўзи ўйлагандек ориятли, номусли, зийрак йигитлар бўлиб вояга етишди. Каттаси отасининг издан борди, тўйларда олишиб, ном қозонди. Кичиги — мўминроғи чавандозлиқдан ном одди. Ўғиллари биринчи зотларини келтириб ташлаганда, у шунча чеккан заҳматлари бекорга кетмаганини англааб, эри ўлгандан — бери биринчи марта тўйиб — тўйиб йиглади.

Бироқ унинг орзузи энди амалга ошиб, Чорпанби оқсоқолнинг қизига совчиликка бораман деб турганда, катта ўғли Тераклидан Пирназар печкачининг қизини олиб қочиб келди. Бийди момо қанчалик ўжар бўлмасин, ўғли ундан ҳам ўжарроқ эди — сўзидан қайтмади. Пирназар қизини

оқ қилди. Катта ўғлида етишмаган орзусига кичик ўғлида етишди. Мулла Ташаннинг кенжә қизини келин қилиб одди.

Бийди момонинг катта келини оққўнгил бўлгани билан уқувсиз, бўш – баёв, бирон ножўя иш қилиб қўйишдан чўчиб юрадиган соддагина аёл эди. Ўгай онанинг ҳамиша бошига муштлаб қарғашпидаи қилпанчиқ бўлиб қолганди. Тезак териш, молхона кураш, сув ташиш, ўчоқ ёқиши каби қора ишларни қилиб юриб, қўли овқат қилиш, тикиш – бичиш, уй тутиш ишларидан узоқлашиб қолганди. – «Сен менинг суқсурдай ўғлимни хор қилдинг, – дерди унга Бийди момо. – Сен кўзингни сузиб, иштонингни тагингта тўшаганингдан кейин, у нима қиласин? Агар сендан бошқа бўлганда, менга келин бўлганидан миннатдор бўлиб, қўлимни совуқ сувга урдирмасди. Сен бўлса... Изингдан бирор ишингни қайтадан қилиб юриши керак».

Бийди момо токи кенжә келин тушгунча, катта келиннинг кунини бермади. Уни койир, йиглатар, йигласа, яна койир, унинг ожизлигини кўриб, ғаши келар, чунки унинг ўзи ҳеч қачон ожизлик қиласан эмас, гап қайтарса, ўғлига айтиб урдиради. «Сен Бухор полвон авлодининг давомчисисанми? Бу ҳолда Бухор полвоннинг шўри қурийди. Бурнингни тортишни билмайсан, ҳандай қилиб бола ўстирасан?» Ёки жаврагиси келиб турганда, қарғишининг қуюнини чиқариб ташларди. «Илоё у дунё – бу дунё ўнгланма. Сен менинг бутун йигирма йил чеккан заҳматимни бир этагингни кўтаришинг билан чиппакка чиқардинг, менинг хонумони – мни куйдирдинг. Бухор полвоннинг арвоҳини чирқил – латдинг. Бу авлоднинг кушандаси бўлдинг. Илоё, ажалинг ўзингдан бўласин. Сен Бухор полвоннинг авлодини хор қиласидиган бўлдинг».

Катта ўғли оғир одам эди. Энасининг жаврашларига жилмайиб қўярди, холос. Баъзан нимжон хотинини ўлардай савалаб, ўзининг уйига киритиб ташлардида, индамай ишини қиласиверарди. Хотини ўласи бўлиб қолса ҳам, гинг демай, на эрига, на қайнонасига сўз қотмай, икир – чикирларини қилиб кетаверарди. Бийди момо унинг шу хусусиятини – эрига содиқлигини ёқтиради.

Кичик келин тушгандан кейин у негадир яна ўша уқувсиз, ўзининг орзу – умидига зомин бўлган келин билан

қолди. Кичик ўғлига эса ҳаётнинг ўртасидан жой қилиб берди. Уй ажралган билан қозон бир ерда қайнади, бир дастурхонда овқат ейилди, бир товатошга нон ёпилди.

Кичик келин – ўзи орзу қилиб олган келини келишган, ширинсўз, хушмуомала чиқди. Бийди момонинг айттанини айттан, деганини деган қилиб бажарар, унинг ишидан бирон қусур топиш қийин, шундай бўлса ҳам номига унинг бундай эпчиллигини койиб қўярди. Кичик келин одобли, фаросатли, одамнинг ичига кириб кетай дерди. Бир оз керилиб юришга мойил бўлса ҳам, Бийди момонинг олдида ўл деса ўша заҳоти ўларди. Ҳаммага меҳрибон, одамнинг кўнглидан чиқадиган келин эди. Катта келин тушганидан бери унча борди – келдиси йўқ, қишлоқдошлари билан у бир ойда чиқишиб кетди, худди азалдан шу қишлоқда туғилгандай. Ҳамма кичик келинни ёқтириб қолди. Катта келин эса ҳали ҳам ҳуркак, ўз соясидан чўчигандек бўлар, бу эса Бийди момонинг ғашини келтиради. Ўғлига неча марта бунингни олиб бориб ташла отасиникига деса ҳам ўғил гапга кирмади. Изма – из туғилган болалардан кейин Бийди момо ҳам тақдирга тан берди. У "ҳамма умидим кенжака келиндан, Бухор полвоннинг давомчиларини шу тарбиялади" дерди.

VII

Бийди момонинг ўғимларини урушнинг биринчи йилиёқ бир пайтда олиб кетишганди. Келинлар энди Бийди момонинг қаромогида қолди. Кенжака келин бу пайтда бу уйга тушганига энди бир йил бўлганди. Бошида онда сонда келиб турадиган хат кейин таққа тўхтади. Бир йил бурун эса унинг уйига Абдулла почтачи билан шўро котиби Панжи чўлоқ кириб келишди. Улар анчагача жим ўтиришди Гўё бу уйга нега келганини ҳам эсларидан чиқаргандек эди. Иккита келин ҳам печка ортида қулоқларини динг қилиб туришарди. Бийди момо эса дастурхоннинг попугини ўйнаб, улардан гап кутиб турарди. Охири у чидолмади. Абдуллага қаҳрли кўзларини тиқди. Абдулла унинг қарашидан довдираф қолди.

—Момо, ўзи яхши юрибсизми? Оббо, сизей... — деди у титраб — қақшаб.

— Гапни чұзма! — ўша оқанғда деди Бийди момо — Нима бүлди?.

Абдулла ұмам ерга қаради. Қийналди:

— Каттандын қорахат келди.

Бийди момо сесканиб кетди — ю, лекин үзини йүқтімади. Почтачи билан чұлоқ кириб келганды у намоз үқиёттан эди. Ўша пайтдаға булар беҳудага келмаганини сезган ва үзини ҳар нарсага тайёр туришга ҳозирлаганды. Бу аёлмижозлар олдида үзини йүқтіб құймасликка — чидашта қарор қылған эди. Катта келин, вой, деб юборди — ю, деворга сұяниб қолди Унинг ранги оқариб кетганды. Кичик келиннинг юзи қызырыб, ҳеч кимдан яширмай, эркин нафас олди: юзида хурсандык аломати ярқ этиб кетди.

— Вой, акажоним, — деде у овозига ясама тус беріб, үйграб юборди.

Бийди момо худди намоз үқиёттандек, яна узоқ күз юмис турди. Үйграб юборған келинларита үқрайиб қаради. Сүнг яна бардам, худди ҳеч нарса юз бермагандек, Абдулла сариқта тикилди. Иккови ұмам бошини эгиб ўтиради. «Йұқ, бу ерда яна бошқа сир ұм бор, агар фақат шу гап бўлса, сариқнинг үзи ұм келтириб бераверарди. Чұлоқ, бу ерда нима қилиб юрибди?»

— Шуми? Йұқ, сенлар яна бир нарсанни яширяпсизлар. Айтинглар, менга ҳеч нарса қилмайди... Мендан яширсаларинг тириклай ўлдирасилар... гапир, гапир!..

Абдулла сариқ гапирайми декандек Панжи чұлоққа қаради. Панжи чұлоқ бошини этгана үтиради.

Бийди момо бўғзидаги куйикни зўрга ютди. Үзини йүқтіб қўйишдан қўрқандаек, бир қўлига сұяниб, Абдулла сариқ ва Панжи чұлоққа еб қўйтудек қаради:

— Вой, чурра — ей, вой чурра — ей, отанг сипочилик қилмаган, энанг сипочилик қилмаган, шўрликлар бир парча ноңга зор бўб, бир иштонни алмаштириб кийиб юришарди... Сенга ким қўйибди сипогарчиликни, чурра...! Айтавермайсанми тўғрисини?!

Кичик келин үйглашдан тўхтаб, уларга қулоқ содди. Панжи чұлоқ оғринди. Ҳатта шўро идорасида ұм унга Панжи Турдиевич деб муомала қилишса — ю, унинг қўл остидаги бир исқильт кампир унинг нозик касалини эслатиб,

ҳақорат қилиб ўтиrsa... Бошқа пайт бўлганда у кенглик қилган бўларди. Бироқ, ҳозир у ўзини хўрланган ва ҳақоратланган, деб ҳисоблади. Бунинг учун ўзининг ким эканини эслатиб, аламини олмоқчи бўлди.

— Бўлмаса, момо.. кўпга келган тўй экан... азани иккита қилинг. Кичигингиздан олти ой олдин қорахат келган экан. Абдулла aka сизга беришга қўрқиб юрган экан..

Кичик келин ўкириб, ўзини ерга ташлади. Печка орқасидан катта келин ҳўнгиллай бошлади.

— Ташқарига чиқинглар! — ўшқирди Бийди момо — Чиқ, кўзимга кўринма! Кимларнинг олдида йигляяпсанлар?! Шу нокасларга кўрсатиб йигляяпсанларми, чиқинглар, икковларинг ҳам чиқ, чиқ!.. Куйдиргилар... вой.. шўрпешонам!..

Икки келин ҳам унга биринчи марта қулоқ солишмади: ўкириб йиглай бошладилар.

— Вой, шунқорима! — бақириб, ўзини ерга ура бошлади кичик келин. — Вой, бургутима, арслоним — ай, арслон — гинам — ай... Мени ташлаб кетдингми — я, мени кимга қолдириб кетдинг — а, сен ўлгунча мен ўлсам бўлмасмиди, арслоним — эй!..

Бийди момо бошқа ҳеч нарса демади. Панжи чўлоқ фотиҳага юз тортди. Бийди момо уларнинг далласига ҳам, чиқиб кетаётгиб айтган гуноҳкорона «Момо, бизда нима айб, катталар бориб айтинглар, яхши бўлади, дейишганди». Деб мингирилаб кетиганларига ҳам, келинларнинг йигисига ҳам эътибор бермади. Бир нуқтага тикилиб ўтираверди. «Уларнинг олдида манави шаллақиларга ўхшаб айюҳаннос солмаганим яхши бўлди... бирорга сиртингни берма, деб ўргатарди Бухор полвон. Ҳа, бечора Бухор полвон, шундай ўргатарди. Э, Бухор полвон, энди мана иккимиз ҳам бечора бўлдик. Сенинг орзунгни амалга ошироладим, мендан рози бўларсан. Қўлимдан келганини қилдим. Мана энди сенинг Айиқ авлодингта ҳам чек қўйилди, Пешонада ёзилгани шу экан, Бухор полвон».

...Эртасига Бийди момо икки ўғлига аза очди. Жаноза ўқитиб, қора кийди. Шундан кейин у қишлоқда бошқа ишларга аралашмай қўйди. Кун бўйи уйида, бир — бурчакда, ўғилларининг кийимларини титиб, аллаким биландир

гаплашиб ўтирадиган ва одамларга бегонасираб қарайдиган, одамлардан хавфланадиган ва уларга адоват билан тикиладиган одат чиқарди.

VIII

Нормат Янгибай оқсоқолни кўриб келиш учун Қизилийримгача борди—да, довондан ўтолмай қайтиб келди. Ҳаётининг Келдиёр сўпи билан туташ қисмига гўнг таший бошлиди. У дарадаги воқеадан кейин ўзини анча олдириб қўйган, юзидаги заҳиллик яна ҳам ортганди. Анзират тушгача унга ёрдам берди, сўнг уй йигиштиришга туцди.

Тушдан кейин Анзиратнинг олдига Шариф кўсанинг хотини Турсуной гуж — гуж чиқди. Анзират меҳмонхонада чаңг босиб ётган келинлик кўрпаларини ағдар — тўнтар қилиб, уй кўтармоқда эди.

—Келин, — деди Турсуной меҳмонхонага бурни узун бошини суқиб. — Нима ташвиш қиляпсиз? Вой — буй, кўчаяпсизларми?..

—Куриб кетсин, куя еб катяпти буларни, — деб зорланди Анзират. — Индамай десанг, кўзнинг нури сингган, индасангиз, кўриб турибсиз. Уф... ҷарчаб қолдим...

—Роҳат қиз кўрибди, юринг, аёллар йигини бўлаёттан эмиш.

—Вой, қиз эканими? — Анзират ўтириб қолди — да, суюнганидан чапак чалиб юборди. — Орзусига етибди — да. Бечора ҳаммаси ўғил, деб куйиниб юрарди.

—Юринг, бугун чақирган экан, — деди Турсуной гуж — гуж қат — қат кўрпаларга ҳасад билан кўз югуртирас экан.

—Ҳозир мана бу дардисарларди йигиб олай. — Анзират кўрпаларининг орасига куядори сепди. Ҳонани ачимсиқ ҳид тутиб кетди. Анзират кўрпаларни бувлаб жойига қайтиб йига бошлиди. Қуроқли кўрпалар оғир эди. Тезда у ҳансирағ қолди. Турсуной гуж — гуж ичкарига кириб, бир бўхчанинг устига ўтирди — да, Анзиратта қараб ўзи ҳам уфлаб қўйди.

—Муслим эри ўлганини эшигандан бери қадамини суюқ оляпти эмиш, — деди у яхшилаб ўтириб олгач. — Ойхол айтди. Эркак ўтса, изидан термилиб қолармиш.

—Унгаем қийин—да, — деди Анзират Бийди момонинг кичик келини ҳақида аввал ҳам шунга ўхшаш гапларни эшиттанини эслаб, кўнгли ғаш тортди. — Бир йил ҳам келин бўй яшагани йўқ, шўрлик.

—Бийди момонинг ўзи ҳам буни билса керак? — гумон қилди Турсуной гуж—гуж. — Ўзиникини яшириш учун бошқалардан йўқ жойдаги айбни бетига айтиб, қопиб олаётган эмиш.

Анзират Бийди момонинг Турсуной гуж—гужни ўшакчилиги учун ёқтираслигини ва ҳамиша уни муззам қилиб юришини, биларди. Бийди момо бор даврада Турсуной гуж—гуж ўтиромасди. Турсуной гуж—гуж заҳил—қизгиш юзли, узун бурун, кўп гапиришидан лаби доимо тупукланиб юрадиган бу аёлга миш—мис сув ўрнида эди. Қишлоқда ва қўшни қишлоқларда нима ҳодиса юз бергани, ким хотин қўйган, ким хотин устига хотин олган, кимнинг қизи ким билан кулишиб турган, кимни зри урган, ҳаммасини шу аёлдан билиб олиш мумкин эди. Хотини Шариф кўсанинг акси эди. Шу сабабли уни доим пешонаси шишган ёки моматалоқ бўлган, яъни эрининг жаҳлининг асоратларини кўриш мумкин эди.

—Бийди момо ҳам қариди. Олдинлари жуда одил эди. Энди ўзимники тўғри дейди, ўзиникини зўрлаб ўтказади.

— Турсуной гуж—гуж гап мавзусини бошқа мавзу билан улаш учун бидирлай бошлади.

—Аммамга ҳам қийин,— ёнини одди Анзират кўрпаларни тахлар экан. — Бирдан икки ўғли... туф—туф, худо кўрсатмасин. Бу дунёда ёлғиз шуларни деб, яшаб юрибди. Энди нимаям қиссин, ўзини ураврга чўқ тополмай юрибди. Келинаригаям ишонмайди. Шунинг учун ичини ит тирнаб ётибди. Ўх—ўх—ў...хў...ў...ў!..

Анзират гапини тутатмасдан бошини ушлаб ўтириб қолди, бир қўли билан оғзини ушлади.

—Вой, келин! —Турсуной унинг оддига келди. — Нима бўлди сизга?! Вой, ўлмасам...

—Ў...ў...ў!..— Анзират зўриқсанидан кўзларидан ёш чиқиб кетди. Ҳеч нарса демай, югуриб айвонга чиқдай—да, бир бурчакка бориб, “ў—ў—ўхў”, деганча шариллатиб қайд қилди. Изидан югуриб чиқсан Турсуной гуж—гуж унинг

бошини икки құллаб ушлади.

— Вой, ўлмасам, бу нимаси?! — унинг юзига чүчинқираб назар ташлади Турсуной.

— Ий... ис... — деди Анзират. — Ис күнглимин күттар — ді. Бошим айланиб кетди.

— Келин?.. Келин, бу нима деганингиз? Бошингиз айланди?!

У Жанғил табибга ўхшаб, Анзиртанинг қорнига косовдай құлларини жүнатди ва худди бир нарса топмоқчидек, ҳаммаёгини ушлаб чиқди.

— Ие... ҳмммм... қани, уйга кириңг — чи... Вой, мен ўлай, бўйингизда бор — ку, юринг... юринг... ётинг.

Анзират зўрга ўрнидан турди. Атрофіда айланаётган Турсунойнинг гапларини деярли эшигмади. Эшилса ҳам нима деяёттанини тушунмади... У Турсуной гуж — гужнинг ёрдами билан зўрга ўрнидан турди — да, печкали хонага кирди.

— Қатиқ борма, қатиқ ичинг,— деди Турсуной гуж — гуж. Уни ётқизиб, қорнини яна секин пайпаслаб кўрар экан, бирдан қўлни тортиб олди — ю, Анзиратнинг юзига қараб, бирпас безрайиб қолди. Сўнг югуриб катта қадидан ёғоч косага қатиқ солиб келиб, Анзиратта ичириди.

— Ичинг, босади, ичинг,—деди у парвона бўлиб. — қачондан бери шундай бўлаяпти?

Анзират ҳолсиз ва яна айниётган кўнглини босиш учун беихтиёр жавоб қайтгради:

— Бир ойча бўлиб қолди, — шундай деб яна ўхчиди.

— Бир ой? — Турсунойнинг кўзлари ола — кула бўлиб кетди. Анзиратни энди кўраёттандек, анграйиб тикилиб қолди. Кейин унга қатиқ ичириди. Ўрин солиб берди — да, унинг кўзини юмиб, мадорсиз ёттанини бирпас кузатиб, лип этиб ташқарига чиқди. Айвонга чиқиб, нима қилишини билмай, тараффудланиб турди, сўнг қишлоқнинг нариги чеккасига қараб шошиб жўнади. Тез юрганидан икка марта қоқилиб кетаёзди. Унинг юзида қандайдир ташвиш билан бирга безовталик акс этмоқда эди. У ичида гап ётмайдиган аёл эди. Шу сабабли у ўзи олдин гувоҳи бўлган воқеани кимгадир тезроқ айтиб ёрилгиси келарди. Унинг бундан бошқа нияти ҳам йўқ эди.

—Турсуной бойбича, мунча тиржаясиз, отангиз тирилиб келдима? — деди йўлда учрашиб, тўқнашиб кетаёзган Аляр чол. — Сал кўзга қараб юрсангиз — чи, тилла топгандай ҳовлиқмай.

—Вой, тоға, кўрмай қопман, — деди Турсуной ишлайиб.— Лекин тилла топгандайм каттароқ нарса бор. Ҳали эшитасиз.

Аляр чол унинг галига ҳайрон бўлиб, тўхтаб изидан қараб турди: «Сочингдан осилгур, бу ҳовлиқма яна нима машмаша топди? — ўйлади чол. — Бийдиникига бораялпа? Ҳа, Бийдиникига. Нима бало? Бийдининг бирон боласидан хат кеп, ўлгани ўтрик чиқдимикии? Шундайга ўхшайди, бу тўқалакни Шарип қандай қилиб хотин қип юрибди экан, нақ тог эчкисининг ўзи — я!»

Алёр чол оғилхона эпиги олдида катта ёғоч куракка суюнганча уларни кузатиб турарди. «Бийди қургур чўкиб қолди — да! — ўйлар эди у. — Эҳ, шундай кампир икки ойда чўпдай бўлиб қолди — я? Ҳудди тутдай тўкилди!» Аляр чол чуқур хўрсинди — да, сақолини қувлик билан силаб қўйди. У Бийди момонинг уйига кириб кеттанини, бошига йўл — йўл жалак ташлаб, Турсуной гуж — гуж билан ўзига қараб келаёттанини ва унга етмасдан, сал наридан бурилиб, Норматникига қараб ўрлаганини кўриб турарди. Аляр чол ўрнидан туриб, оғилхонанинг устига чиқди. У Бийди момони бунача тез юрганини кўрмаганди. Чолнинг қишлоқдаги қизиқ бир воқеадан қуруқ қолгиси келмаётганди. Иккала аёл Норматнинг уйига кириб, анча йўқ бўп кетишганини, уйга кириб чиқсан Бийди момонинг тиззасига уриб, бақириб — чақираёттанини, унинг бақиришига одамлар тўпланаёт — ганини кўриб турарди. Қулоги оғир эди, эшитмади. Лекин юраги ёмон бир нарсани сезгандай, ғаш тортди. У Бийди момонинг ҳаёти ўртасида чўлоқданиб гўнг ташиб юрган Норматнинг олдига бориб, нималардир деб, ер тепиниб, ўтириб олганига, юзига кўрсаткич бармоғини тираб, ер муштлаёттанига қараб турарди. Норматни уйига томон етаклаб жўнаганини, уйига кириб кетган Норматнинг Анизиратнинг социдан тортиб айвонга чиқарганини, буралиб тепаёттанини кўриб турарди. Ҳаммасини кўрарди — ю, ҳеч нарсаг тушунолмасди. «Булар ақлдан озибди, — деб

ўйларди чол. — Анови туёғи йўқ, шайтондинг ургочиси бекорга юргилаб қолмаган экан — да...» Чол оқсоқлана — оқсоқлана одамлар йигила бошлаган Норматнинг уйига қараб жўнади. Жанжалга йигилганларнинг аксарияти болалар ва аёллар эди. Аляр чол қулогини динг қип бораверди. «Одамлар кўп бекор қолса, тез — тез шундай ақлдан озиб туришади, — деб ғўлдиради чол. — Бу лўлилар яна бир ўйинни бошлашди». Чол Норматнига етиб келганда томошибинлар давраси анча кенгайиб қолганди. Нормат ерда лойга ва қонга беланиб ётган Анзиратни тўгри келган ерига тепарди.

Аляр чол аввалига ҳеч нарсага тушупимади, тушунгач, юраги дириллаб кетди.

Нормат кўринишидан ҳам, ҳаракатидан ҳам ақлдан озганди. Унинг кўз косалари катталашиб, юзи қорая бошлаган эди. Кўзлари қонга тўлганди.

У ерда тупроқ ялаб ётган Анзиратнинг ёқасидан ушлаб, лип этиб кўтарди — да, қўлига сочини ўраб, нафрат ва жирканиш билан сўради:

— У ким?! Ким, қанжиқ?! Айтмасанг, ҳозир бурда — бурда қиласман.

Унинг товуши хириллаб, бўғилиб чиқарди. Анзират ҳолсизгина кўзларини юмиб олди.

— Айтмайди, бузуқлик қилишга қилиб, энди тилини қисиб ўтиради... қаранглар...вой, шарманда,вой... Бутун қишлоқни шарманда қилди.

— Ким эди? Ким у нокас?! Ҳозир чопиб ташлайман! — деди Нормат унинг бўйни аралаш қамчи соларкан.

— Ундан гап сўрагунча ўлдир, — деб бақирди Бийди момо дар — дар титраб. — қишлоғимиз устидан нега куллат аримай қолди десам, гап буёқда экан — да. Ҳой, одамлар, урушга ҳам мана шундайлар сабаб бўлади, мана шундай — ларнинг дастидан уруп келиб чиқади. Болаларимиз қон тўкади, бу эса бузуқлик қип юради. Тошибурон қилинглар уни. Қорнида бола бўлгунча қишлоғимизни булғаб юрган. Яна эри билан индамай яшай берган, билмайди деб ўйлаган...

— Вой, ўлай! — деб юборди Кудурат кампир. — Писмиг — ей, ҳали мен бу билан олди — берди қип юрипман, мениям харом қипти — да. Тфу — тфу... ер юттур!..

— Бизнинг ҳаммамизни гуноҳга ботирган, ҳаммамизни хорам қилган... — Унинг гапидан янайм дадилланиб бақири Бийди момо.

— Олдинлари тошбўрон қиласарди бундайларди!

— Буни ҳам тошбўрон қилиш керак! Уруғи қўпаймасдан тошбўрон қилиш керак...

— Шундайларди деб бир куни ҳаммамизни қора ер ютади...

— Охир замоннинг хотинлари — да!..

Нормат Анзиратнинг социдан бураб оғилхонага судраб жўнади.

— Осаман, агар айтмасанг осаман!..

У оғилхонанинг равига бир қўллаб чилвир боғлади — да, сиртмоқ қила бошлади.

— Ақлингни ема, Нормат! — югуриб бориб, қўлини ушлади Аляр чол. — Эсингди йиғ!..

— Нари туриңг! — унга ўтиқирди Нормат разаб билан, — Арасашманг...

Аляр чол сиртмоқни икки қўллаб маҳкам ушлаб оди.

— Болаларингни тирик етим қилмоқчимисан?! Падар — лаънати...

— Кетинг! — итариб юборди Нормат. — Онаси шу бўлса болалариданам кечдим.

— Унда мени ос... — Унинг қўлига осилиб оди Аляр чол. — Мени ос, эртага одамлар Аляр чол бор деб юрмасин... Мени ос...

— Ҳой, эчкисоқол, — унга қараб бақирди Бийди момо хириллоқ товушда — Ақлинг етмаган нарсага аралашиб нима қласан? Ундан кўра майиб кампирингни тўсиб кел! Буни тошбўрон қилиш керак! Қишлоқни саситди.

Қудурат кампир Бийди момоининг гапидан дадилланиб, қор орасини титкилаб каттагина тошни Анзиратни қаратиб отди. Тош Анзиратнинг қаншарига тегди — да, бирон из қолдирмай сирғалиб тушди.

— Ким тош отса савоб қилган бўлади! — Бақири жиннилардек Бийди момо ерда ётган қор уюмини чанглаб тўдаларкан, қалт — қалт титраётган қўллари орасидан қор эзгиланиб тушшиб кетди. Бундан асабийлашган Бийди момо қўпроқ қорни тўдалай бошлади. Муштдай қорни

бир амаллаб отди. Қор тегмай ўтиб кетди. Яна кимдир ҳўл кесак отди.

—Осаман! — бақирди Нормат Анзиратнинг сочидақ тортиб турғизиб — Ўлдираман сен энагарди.

У Анзиратнинг сочини дор қилиб, қўллари қалт — қалт титраб бўйнига ўрай бошлади, қўллари қалтираганидан сочни њеч ўраб олоимас, бундан тобора қаҳри қўзиб, Анзиратнинг бошини силкиб — силкиб ташлаёттап эди.

— Вой, осиб қўяди! — бақирди бир аёл одинга югуриб чиққанча. — Тентак бўп қопсизлар. Нима қилаёттандарингни билласанларми?

Аёл югуриб бориб, Норматнинг қўлидаи Анзиратнинг сочини силкиб тортиди. У Анзират тенги, сарғиш озғин, юзидан касалмандлиги билиниб турган аёл эди.

— Қоч, Ханипа! — хириллади Нормат. — Қоч, йўқса икки путингди орасига пичоқ соламан.

Ханифа унинг қўлига осилиб олди — да:

— Мени ўлдир! Ўлдир, бўлақол. — шаллақилик қила бошлади у. — Бўлақол, ўлдир, мен туғмасни ўлдир, етти пушпи кўйиб кеттан мен туғмасни ўлдир, буни ўлдирсанг, анави қоракўзларинг тирик етим бўлади Ё, уларам, бузуқликдан ортирилганми? А?!

Нормат сесканиб, унга қаради — ю, бир дам туриб, қолди. Кейин яна аввалги ҳолатига қайтиб:

— Йўқол! — деб ўшқирди қутургандек талвасага тушиб. — Мени тириклай ўлдирди, ўлдирди мени! ... — У қаҳр билан Анзиратни буга бошлади. Лекин унинг қўлларига ёпишиб олган Ханифа дод солди.

— Қутурган бўлсанг, мени ўлдир. — Ханифа унинг қўлига тобора оирини сола бошлади. — Агар шу бугун одам ўлдираман деб қасам ичган бўлсанг, мени ўлдир!

У Норматнинг қўлинин Анзиратнинг социдан бўшатиб олгач, ўзини Анзиратнинг устига ташлади.

— Аввал мени ўлдир, кейин уни ўлдирасан! Йигилганлар ичидан яна кимдир, «Етар энди», деди қўрқа — писа. Нима гаплигига ҳали ҳам тушунмай ўтирган Маҳамади кал хотинининг ботирлигидан ўзига келиб, бориб, Норматнинг қўлидан ушлади, қамчини силтаб тортиб олиб, бир чеккага улоқтириди.

— Күрганлар нима дейди? — деди у чучук тилда. — Чоржетим ўзи билан ўзи қирилишиб ётибди, демайдими! Нима, жонларинг ортиқча бўп қолдими?

Яна икки келинчак даврадан чиқиб ҳушидан кеттан Анзиратни қучоқлаб турғизди — да, суяб уйга кирита бошлади.

Уларнинг ҳаракатидан Бийди момо эсанкираб қолди, яна зутумга ўтди:

— Нима, шекрикмисилар бунга? Нормат уни бугиб ўлдир!

Лекин ҳеч ким унинг айттанини қилмади. Нормат бир силкиниб, Маҳамади чўпоннинг қўлидан чиқди — да, келинларнинг олдини тўсмоқчи бўлди. Бироқ Маҳамади кал яна уни маҳкам қучоқлаб олди.

— Уят бўлади, тентак! — деди у кучаниб. — Хотининг бузуқ бўса кўчага чиқиб бақирасанми?

— Нима бўляпти бу ерда? — товуш келди Норматнинг орқасидан.

Нормат товушни таниб, ижирғаниб қўйди.

— Нима тўполон, Бийди момо? — деб сўради яна Шариф кўса — Нега ҳаммани тўдалаб олиб, қий — чув ўтирипсизлар?

— Ўлмабсан — да, кўса, — деди Бийди момо унга масхараомуз тикилиб. — қачондан бери шундай савол бериб, жавоб оладиган бўлдинг?

— Айғоқилик қилманг, — деди Шариф кўса таҳдид билан.

— Уни бирор босиб ёттанини кўзингиз билан кўрдингизми? Йўқ?! Унда нега қий — чув қилаяпсизлар? — Сўнг Норматта қаради. — Ҳа, Норматбой, сизам кўрдингизми, силар — чи? Сизлар кўрганмисизлар, бойбичалар?..

— Йўқ!

— Кўрмаганмиз.

— Ким пойлаб турибди бузуқини?! Бузуқига қоравул — мизми?

— Ҳеч ким кўрмаган?! Вой, лўлилар — ей, йўқ, нарсага шунча ғовғами?! Йўқол ҳамманг уй — уйингга!

Безрайиб қолган Норматта ҳам ҳамма эшитсин деб дўйурди.

— Яна уруш кўрган одам эмиш!.. Бор, уйингга кир, хотинларнинг ботири.

—Кирмайди.— Норматнинг олдини тўсди Бийди момо.
— Бу харом уйга кирмайди. Қачон бу бузуқи бу ердан
кетади, ана ўшанда... шунда киради. Юр, буларнинг
ҳаммасининг гапи бирга ўхшайди. Юр, сенга ўзим жой
бераман, бу харом уйда энди сениям бирон фалокат босади.
Ўзингни хор қима... Бола белингда.

Нормат бир Шариф кўсага, бир Бийди момога қаради —
да, ҳайрон бўлиб тургач, Бийди момонинг изидан судралиб
жўнади.

Улар кеттандан сўнг йигилганлар тарқала бошлиди. Фақат
бир — икки аёл Анзиратнинг изидан кириб кетди. Шариф
кўса эса молхонага сяяб қўйилган куракни олди — да, ўчоқ
бошида айланиб, унинг кўзига кўринмаслик учун икки
шақирни олиб, дарёга қараб зиппиллаб кетаётган хотинининг
изидан кетди.

IX

Анзират эрининг жаҳли чиққанини жуда кам кўрганди.
Нормат анча босиқ, аёлларнинг олдида ўзини тута оладиган,
лекин феъли келса, отасини ҳам аямайдиган одам эди. У
эрининг орияти келганини фақат бир марта, урущдан олдин,
қотнинг устида, беда ўримида кўрганди. У пайтлари Холмат
эндигина юрадиган бўлган, Анзиратнинг ташвиши купайган
кунлар эди. Холмат сал кўздан пана бўлиши билан ариқда
ёки ўрага тушиб кеттан, ё бўлмаса ўчоқ бошида кул титиб
турган бўларди. Бу ташвишларининг устига қишлоқда яна
бир ташвиш — беда ўрими бошланганди. Бир куни эрталаб
Нормат полвон уни эргаштириб қотнинг устига, беда
ўримига олиб чиқди. Холматта катта рўмолдан чайла қилиб
беришди. Эр — хотин бири чалғида ўрди, иккинчиси боғлади.
Тушга яқин Анзират чой дамлагани булоқ бошига кеттанди,
узоқдан эрининг шўро раиси — бўз отли Мирзақул билан
нимадир тортишашттанига кўзи тушди. Мирзақулнинг
қаттиқ — қаттиқ гапларини эшитиб, ажабланиб қараб қўйди.
Нормат полвон эса индамай беда ўтар, афтидан, у
гаплашишни истамаётган эди. Учоқча авора бўлган Анзират
кимнингдир чинқириб юборганидан чўчиб, ўтирилди — ю,
эрининг чалғи дастасини сермаганини, Мирзақул от

устидан учиб тушганини кўрди. У саросималик билан эрига қараб югурди. Югуриб борганда Мирзақул индамай отини етаклаб кетаётган, эри эса қайтадан ўримга тушиб кетганди. У эрининг олдига бориб юзига тикилди: эрининг юзи газабдан қип — қизариб кетган, чалғини зарб билан уради.

— Нима бўлди?

Нормат унга газаб билан қаради.

— Ҳеч нарса?! Бор, ишингни қил?

У эрининг авзойи бузуқлигини қўриб, индамай булоқ бошига қайтди. Мирзақулни нима учун урганини эри кейин ҳам айтмади. Анзират фақат бир нарсани — унинг бекорга аччиғи келмаганини биларди. Бу воқеанинг тагига анча йиллардан кейин — Нормат урушга кетган йили Мирзақулнинг ўзидан эшилди. Қишлоқ хотинлари билан ўримдан қайтаёттанди Мирзақул унинг олдига келиб, сух ва писанди билан тикилди:

— Эрингдан хат келяптима?

У, афтидан, Нормат половоннинг урушга кеттанидан, хат келмаёттанидан хурсанд эди. Юзида намойишкорана зафар ифодаси бор, буни қип — қизил юзи ниқоблаб турса ҳам, лекин, кўзлари ошкор этиб турарди.

— Давлатнинг бедаси учун хотинингни солиқ қилиб берасанми, деганимда ўлдириб қўёзганди, бошимни олиб қочмасам, бўйнимни узиб ташларди. Қони суюқ, сенсиз қандай чидаяпти экан?

Анзиратта эри ҳақида ҳақорат оҳангидаги гапириш ёқмади. Эрини согинган, уни қўмсар, шу сабабли эри ҳақидаги ҳар бир гап унинг хўрлигини келтираси эди.

— Ҳов, Мирзақул, — деди хотинларнинг олдини тўсганидан ғаши келган Қудурат кампир. — Кўзингга қара, бўлмаса, каллангданам ажраласан. Нега йўл тўсасан?

Хотинлар пиқ — пиқ кулиб, нари кетишиди — ю, бирдан ҳахолаб кулиб юборишиди.

Анзират эри ўзининг номини ҳимоя қиласман деб Марзақулни урганидан ўша пайт кўнгли тоғдек кўтарилган ва эридан қанчалик фуурланган бўлса, энди шунчалик қўрқар эди. Мирзақул қуалфсиз гап қилган, аччиқ устида шундай деган. Унинг тайини йўқ одам эканини Нормат ҳам биларди. Билиб туриб, қандайдир хотинмижоз эркакнинг

ўзини ҳақоратлашини истамаганди. Оддий, չар куни содир бўлиши мумкин бўлган бир тиийқсиз тили туфайли Нормат шунчалик қилди, бир кипини ўлдириб қўйишига сал қолди. Анзират қилган гуноҳ эса... Йўқ! Худонинг ўзи асрасин! Ҳали ҳам Шариф кўса чалғитди. Унинг ўлими аниқ эди.

Ҳаммаси Нормат полвон урушга кетганига бир йил ўтгандан кейин бошланди. Холматни уйга қўйиб, кун бўйи кохозчилар билан бирга ўроқ ўргали, бошоқ тергали, қўш ҳайдагали, буғдой янчгани борар, улар эркакларнинг ишларини қила бошлаган, зркаклар эса қишлоқда саноқлигина қолган эди. Қолганлари қари — қартанглар, майиблар ва болалар эди.

У кун бўйи тиним билмасди — ю, бешикдаги қизчаси ва Холматнинг очликдан кичрайиб бораёттан гавдасига, очликнинг даҳшатди, талвасали қадамига қарши туролмасди. Ҳамма нарса тўзиб бўлган, иккита сигирнинг биттасини кохоз олиб кетган, иккинчисини илон чақиб, шишиб ўлди. Улар бор — ўғи кохоздан бериладиган бир ҳавуч арпа унию учта ориқ эчкининг сутига қараб қолишган эди. Анзират ишлар, эчкиларга ўт олиб келар, ёзда молхона сувар, ўтин ғамлар, қишида ўтин ёпар, молхона куарар, баҳорда ҳам ўз ерида, ҳам кохоз учун қўш ҳайдар эди. Ҳаммасига улгуар, улгуриши керак эди. Кечаси эса ҳам эрини қумсаб, ҳам чарчоқдан толиқкан вужуди қалтираб, танасини совуқ кўрпанинг ичига ночоргина тиқиб йиглар, Кейин ёстигини ҳўл қилиб, ухлаб қолар, эрталаб яна шу ташвишлар билан югуруар эди.

Бу йигилар аста — секин уни чарчатди. У энди бу машаққатиларга енгила бошлади. Одамларга қўшилмай қўйди. Холмат билан икки яшар Ҳожарни урадиган, бекордан бекорга жаврайдиган одат чиқарди. Қарғиши ўрганди. Шанги бўлиб қолди. Бу ҳолатлар унинг сулув чехрасига мос келмасди; ўзи ҳам, асаблари ҳам чарчаган, шундан бошқасини кўрмаган, бошқасининг ташвишини тортмаган аёлнинг бошига бирданияга иккита вазифа тушган: у энди ҳам зрак, ҳам аёл бўлиб яшаши керак эди. У яна дунёда энг оғир юмушни бажариши — кутиши керак эди. У ҳаммасидан ҳам шу азобга тоқат қилоамасди. Ўзига тўқ

оилада — етти акаси ва обрўли ота қарамогида ташвиш нима билмай ўсган Анзиратни бу вазифалар ҳолдан тойдириб, довдиратиб қўйган эди. Уруш бошланганининг учинчи йили айниқса унга оғир бўлди. Унинг иккита акасидан қорахат келди. Онаси бу қайғуни кўтаролмади. У ҳам йиглайдиган одат чиқарди. Ҳамма ишни қилиб, болаларни жойига ётқизарди — да, туни билан йиглаб чиқарди. Бутун вужуди ўт бўлиб ёнар, қони томирдан тошиб чиққудай бўлиб, аъзои — бадани таранглашар, вужудида қўмсан... ниманидир қўмсан туйгусини сезарди. Бу қўмсан баъзи кунлари ақлдан оздирадиган даражада асабий қилиб қўяр, авж олар, тўғри унинг юрагини, бутун танини кемираради. У эркак қучогини кўрмаганига ҳам уч йил бўлганди... Ўша йилнинг охирига бориб, у кўп нарасага чидамсизлик қила бошлади. Энг катта чидамсизлиги эса кейин содир бўлди. Ўша йили у ўша эридан чалғи еган Мирзақул билан ўзи билмаган ҳолда ўралашиб қолди. Мирзақул гаргар билан Анзиратнинг узоқ қариндошлиги ҳам бор эди. Бироқ бу қариндошлик аллақачон узилган, борди — келди қилишмасди. Урушдан один Анзират уни фақат икки марта: бир марта тўйда, иккинчи марта Нормат билан қот устида жанжада кўрганди. Барваста, келишган, юзидан жаҳл ёғиб турадиган, аммо аёлларни ўзига чорлайдиган нимадир, балким, юзидан ёғилиб турган ҳирс ва сурбетлиқдир, бор эди. Ана шу узоқ қариндоши унга алоҳида зътибор бера бошлагандан кейин Анзиратта кун чиқди. Аввалига унинг зътибори эриш туюлди, балким эрининг чалғиси учун мени шармисор қилмоқчидир, деб ўйлади. Лекин Мирзақулнинг овозидан ҳеч бир ёмон ният сезилмасди, раис кўп нарсада унга қайишадиган, мулоим муомала қиладиган бўлди. Аста — секин унга бу муомалалар бегараз туюла бошлади. Унинг ёрдамини бажону дил қабул қиладиган бўлди. У баъзида Анзиратнига ҳозир тиллага ҳам топиб бўлмайдиган оппоқ буғдой уни олиб келар, бунинг учун ҳақ ҳам сўрамас, «қийналиб кетибсан, ола қол, болаларинг одам бўлса, менинг ҳам ҳожатимни чиқаришар», деб жўнаб кетарди. Бу муносабатта ҳайрон қолмаса ҳам бўларди; бу ёрдамларни қариндошликка олиб бориб тақаш мумкин эди. Буни Анзират бегараз ёрдам, деб ўйлар, унинг

олдида ўзини тобора қарздор ҳис қилиб борарди. Унинг қандай қилиб, кўнглини олишни билмасди. Раиснинг унга қайшиши, айниқса, Нормат полвондан қорахат келгандан кейин кўпайди. Энди унинг баҳонаси кўп эди: «Фронтовик оиласа ёрдам», «Кўнгли яримта, кўнглини олиш керак», ва ҳоказо, ва ҳоказо. Анзират булар учун фақат Мирзақулдан миннатдор бўларди. Унинг номига дуолар ўқир, уни ҳамма эркаклардан ва қариндошларидан яқин тутарди.

Ўттан йили қиш жуда оғир келди. Қиш билан қўпилиб Нормат полвондан қорахат келди. Ноябрнинг охирида бошланган қиш мартнинг охиригача забтига одди. Кунлар аёзли, чўл томондан изгиринали шамол эсади. Анзиратнинг йиқдан ўтини февралнинг ўрталарида тутаб қолди. Буғдой эса... Улар кейинги ҳафтадан бошлаб, арпа нон ейшаётган, арпанинг ҳам таги кўриниб қолган эди. Уруш улар ишониб ва умид қилиб ўтирган ёғиз сигирларини ҳам олиб кеттач, арпа нондан бўлак илинжлари қолмади. Арпа нон ични суриб кетар, егани юқмас, Холмат билан Ҳожар тез—тез, очқаяпмиз, опа, очқаяпмиз, деб турар, Анзират уларнинг қоринларини тўйғизишга қурби етмас эди. Арпа ҳам тутагач, улар ёғиз колхозга умид борлаб қоддилар.

Мартнинг бошларида Ҳожар тўсатдан иситмалаб ётиб қолди—ю, Анзиратни қўрқитиб юборди. Ҳожарнинг аҳволи оғир эди: қаттиқ шамоллаган, устига — устак, қорда сёёқ яланг юраман, деб ўзини совуққа олдирган эди. Анзират ўгин тиланиб уйма — уй югурар, уйлари совуқ, зах, устидан чакка ўтиб, кўлмак бўлиб қолган, синган деразанинг бир четидан ҳувиллаб изгирин кирап, қишининг охири кўринмасди. Қишлоқдошларнинг ҳам ўтини ўзига етмасди. Эркаклар етишмас, эркаклари борлари ҳам ўгин қиладиган эркаклар эмас, ўзларини зўрга амалларди. Ҳожарга иссиқ овқат зарур, лекин ёғ ҳам, гўшт ҳам қиши бўйи тутаган, фақат аталагина кунига яради.

— Товуқ шўрва ичирсанг, мадорга киради, иссиқни ўзи қувади, — деди уни кўрган Ўрол табиб. — Бу турища айрилиб қоласан...

Товуқ гўшт эса фалон пул эди. Ўнта товуқнинг пулига бир сигир сотиб олса бўларди. Анзиратда эса пулнинг ўзи ҳам йўқ, ҳаммасини урушнинг бошидаёқ Нормат олиб бориб

топширганди. Ўларида егулик нарсани топиш қийин, сотишга эса... ким ҳам сути қуриб қолган эчкига товукни алмаштиради? Эчкини сотай деса, ким ҳам эчкини Бошчорбоғта олиб бориб берарди? У отлиққа икки кунлик йўл. Пиёдага эса...

Анзират Ҳожарнинг бошида туни билан ухламай ўтириб чиқар, унинг алаҳсираб, оғриқ аралаш ҳушига келолмай ётишига қараб, ўт бўлиб ёнаётган пешонасига лабини босарди.

—Опажон, мени қутқайнинг, мени қутқайнинг, ўлиб қоламан? — алаҳсиради Ҳожар. — Сув бейинг, сув ичгим кеяялти... қор сув бейинг, опажон...

—Қизим, сенга совуқ, сув ичиш мумкинмас, — дерди Ҳожарни бағрига босиб Анзират. — Эртага тонг отсин, товуқ топиб, шўрва қили бераман, тузалиб кетасан, тонг отсин...

— Мен шуйпа ичмийман... — Йигламсиради Ҳожар. — Сув ичаман, сув бейинг...

Ҳожар кейинги кунларда кўзини умуман очмайдиган, очганда ҳам бир зумга очиб, Анзиратта ялинчоқ алфоз қараб: «Опажон, ёниб кетаяпман... опажон», дерди ва яна юмиб оларди.

—Қизим, қизгинам, дардларингни менга берсин, қизим!.. — Йигларди Анзират нима қилишни билмай. — Худойимга сен нима қиб эдинг, менга берса бўлмасмиди бу касални, қизгинам. Э, худойим, шунча қилаёттанинг каммиди!..

Ҳожар сурункасига икки кун кўз очмади. Анзират додвой қилиб, ўёққа югурди, буёққа югурди, лекин товуқ ҳеч кимдан топилмади.

Учинчи куни Анзират эрталаб туриб колхоз идорасига — Олмага, Мирзақулни излаб борди. Охирги умиди ундан эди. Агар у ҳам йўқ деса, Ҳожардан айрилини турган гап эди. Мирзақул уни очиқ юз билан кутиб олди ва унинг дардини эшитиб, кўп афсус чекди.

—Бирдан менга келабермабсан да, — деди у бош чайқаб, ўпкалангандек. — Фронтчининг оиласига шундай пайт ёрдам бермасак, қачон берамиз? Бизди ҳукумат нима учун бу ерга қўйиб қўйибди... Эҳ, сиз хотинлар кимдан талаб қилипни билмайсилар...

Мирзақул колхоз отбоқарини қаёққадир жүннатиб, бир соатларда Аңзират уч күн излаб тополмаган товуқни — яна сариқ товуқни оп — осон топиб берди.

—Худо ёрлақасин сизни! — Йиглаб дуо қилди Аңзират.

— Мендан қайтмаса, худодан қайтсинг, болаларингизнинг роҳатини кўринг, илоё, мартабангиз бундан ҳам улуғ бўлсин!..

— Бўпти, бўпти, майли боравер, эртага ҳам кел, яна битта товуқ топиб қўяман, — деди Мирзақул, сўнг ниманидир ўйлаб: — Яхиси овора бўлма, — деди.— Халил отбоқарнига ўзинг бора қол, мен обориб қўяман... Бор, бор энди.

Аңзират қайта — қайта дуо қилиб, севиниб жўнаб кетди. Бора солиб, товуқни шўрва қилиб, уч марта ичирди. Ярим кечаси Ҳожарнинг пешонасидан тер чиқа бошлади. Аңзират худога шукурлар қилиб, кечаси билан Мирзақулни дуо қилиб чиқди. Эртасига қишлоқнинг чеккасидаги Халил отбоқарнига жўнади. Халил отбоқар ўриссифат, элга аралашавермайдиган, доим ичиб юрадиган, очарчилик йиллари Фарғонами, Андижон тарафлардан келиб қолган, сўққабош одам эди. Унинг уйда бўлишидан бўлмаслиги кўп эди. Аңзират нима учун Мирзақул айнан шу жойни танлаганини хаёлига ҳам келтирмас, Мирзақулнинг имони бутун одам эканига ишонган, ҳеч қандай шубҳага бормаганди.

У Халил отбоқарнинг кичкина, худди катакка ўхшатиб қурилган уйига етиб боргандা, уй олдида ҳеч ким кўринмасди. Деразасига тахта қўйиб михлаб ташланган, эшиги қия очиқ эди. У айвонда туриб, "Халил ака!", деб чақирди. Ҳеч қандай жавоб бўлмагач, секин эшикдан ичкарига бош сўқди ва печка ёнида ўриндан туроётган Мирзақулни кўрди.

— Кел, киравер, — деди у ҳижолат бўлгандек. — Мен ҳам Халилни кутиб ўгирибмаи, келмаяпти. Кутиб, мизгиб қопман. — Мирзақулнинг юзида қандайдир хавотирлик ва аёлни кўрганда ғолиблик нашидалари бор, у нимадандир хурсанддай эди.

Аңзират ичкари кирди.

— Кел, ўтири, — деди Мирзақул, сўнг уни бошдан — оёқ кўздан кечирди — да, кўзлари йилтилаб кетди. — Анча совиб қопти, мен печка ёқай,

— Мен ёқа қолай, — деди Анзират ундан миннатдор, қарздор оҳангда.— Ўтин қаерда?

— Йўт — э! — деди Мирзақул. — Майли, ана, айвоннинг нариги бурчагида, устига пичан ташлаб қўйилган.

Анзират ўтин келтириб печкани ёқди. Мирзақул ўтирган ерида уни кузатиб туар, ниманидир режаллтираётгандек бесаранжомлик бор эди юзида. У гиљ этиб ютиниб, тох, ёнбошлар, тох яна қаддини кўтариб, ўтиради. Анзират печкани ёқдач, эшик олдида турган хуржундан боғланган товуқ чиқарди.

— Мана буни опқўй,— деди Анзиратта узатиб. — Хўш, энди айт — чи, яшашинг ёмонми?

— Бир нав, — деди Анзират. — Ўтиб турибди. Кўпчилик қатори. Элга келган тўй.

— Энди қийналмайсан,— деди Мирзақул тўсатдан унга яқин келиб, мулойим — юмшоқ оҳангда. Унинг овозида меҳр бор эди.. — Кел, яқинроқ ўтири. Нега остонаяга ўтириб олдинг? Чақиб олмайман, мана, кел, тўشاқда ўтири...

— Ҳозир тураман,—деди Анзират. — қизимди бир ўзини ташлаб келгандим.

— Товуқ шўрва ичирган бўлсанг, қизинг ухлаб қолгандир? Ҳозир кетасан, озроқ гурунг қил, мен ҳам фронтчиларнинг оиласи қандай яшаёттанини билишим керак.. Кел.. яқинроқ ўтири...

— Яшаяпмиз... — деди Анзират. Мирзақул ёмон хаёлга бормасин деб унинг қарписига, тўшакка чўқди. — Қийналганимиз билан додимизни кимга айтардик? Элга келган тўй, ака.

— Энди қийналмайсалар, — деди Мирзақул юзига ясама кулагу эндириб, Анзиратнинг тиззасига, чопонини туртиб чиқиб турган сийналарига суҳ билан тикилар экан. — Мен қийннаттириб қўймийман сизларни.

— Раҳмат, ака, шусиз ҳам кўп яхшиликлар қилдингиз, худо ярлақасин, умрингиз узун бўлсин.

— Қуруқ дуо билан иш битармиди?.. — ишшайди Мирзақул унга кўзларинини лўқ қилиб тикилиб.

Анзират унинг тикилишидан ҳижолат бўлди. Гапини ўзича тушунди.

— Биз бечораларнинг қўлидан фақат дуо келса нима қилайлик, ака, қани, биз сизнинг бир хизматингизга ярасак... ўзимизди зўрга эшлаймиз.

— Э, Анзират, ундай дема, сенинг қўлингдан кўп иш келади. Мунақа чирой билан подшони оғдириб оласан.

Анзират қизариб кетди. Қизарганда қошлари янада қорайгандек, кўзлари тўрт йилдан бери эркак кишидан эшитмаган энг роҳатбахш сўзни эшитгандек бўлди.

— Қўйинг, ака, одамди уялтирунг. Бу ҳолатимда бирор менинг чиройимди пийсириб ермиди...

— Пишириб ейдиганлар топилади. — Мирзақул сирли қилиб, сўнг оддинга эгилганга ўхшади — ю, Анзиратни чап қўлидан ўзига силтаб тортди, бўйнидан қаттиқ, қучоқлаб олиб, лабларидан очкўзлик билан ўпа бошлади.

— Вой...вой! — шивирлади қўрқиб кетган Анзират. — Вой... ака... нима қиляпсиз... кўрганлар нима дей —ди?.. Қўйиб юборинг... қўйиб юборинг...

— Бу лаҳзаларни олти ойдан бери кутаман... — деди ҳансираф Мирзақул ва Анзиратнинг сочини қўлига ўраб, чопонини еча бошлади.

Анзират унинг қўлларидан қутулишга ҳаракат қилас, бироқ кучли қўлларнинг олдида у ожис эди.

— Қўйиб юборинг! — бақирди у. — Қўйиб юборинг. Ҳозир доддайман, шарманда қилманг, қўйиб юборинг.

— Йўқ, энди қўйиб юормайман. Қачондан бери кутаман сени... чиройингни кўрган бери бери сени пойлайман. Энди етишдим деганда, қўйиб юбораманми? Сенга шунча хушомад қилганим етмайдими? Энди сен ҳам эри — да. Нимадан қўрқасан?! Эрингдан қорахот келган бўлса. Олдинг очик, даврингни сурмайсанми?!

У Анзиратни даст кўтариб, тўрдаги тўшак устига олиб ўтди. Анзират унинг қўлларида, типирчилар, юз — кўзига аямай ураг, “шарманда қилманг”, деб ялинар, Мирзақулни кўксидан нарига итарар, бироқ барибир халос бўлолмасди.

— Берган нарсаларингга куйдирги чиқсин... — йиғлаб юборди у Мирзақулнинг терлаб кетган башараси аралаш кучсизгина шапалоқ уриб. — Ҳаммасини тўлайман, фақат қўйиб юбор.

Мирзақул унинг чапонини ечиб бўлгач, қўйлагининг ёқасига қўл солиб бир тортишда охиригача айириб ташлади. Оппоқ сийналарга ҳирс ва очкўзлик билан ташланди.

— Ҳи — ҳи... — ҳансирап ва беўхшов ишшаяр эди у. — Жоним, ўзим сенга уйланаман, хотинимни қўйиб юбораман. Сени деб қанча ойдан бери тинч ухломайман... Сенсиз... сенсиз...

Анзират икки қўли билан сийналарини яширишга уринар. Мирзақулни қарғар, соchlаридан тортар эди. Бироқ Мирзақул хеч нарсага парво қилмас, ютоқиб тишлар, бўш қўли билан Анзиратнинг очиқ қорнини... силарди... Анзират кўп олишди. Охири мадори қуриб, индамай қолди...

...Ўша кундан кейин анчагагача Анзират бу воқеа қандай содир бўлганини англомай гарангсиб юрди. Ўз ёғига ўзи қоврилди. Ҳар нарсадан чўчийвериб, тентак бўлиб қолаёзди. Йигирма тўқдиз ўшида сочига оқ тушди. Кейин... гуноҳининг кечирилмаслигини англаш, Мирзақулнинг кейинги келишигига замин яратди. Эридан қорахат келгани уни бир оз хотиржам қилди: гуноҳи унча катта кўринмади. Англашилган ва содир бўлган гуноҳ иккинчи гуноҳининг остонасидир. Аслида унга барибир эди. Энди қандай қилиб бўлса ҳам яшаса бўлди, қийналмаса бўлди эди. Қийин — чиликлар унинг юрагини олиб қўйганди. У бу туйгуни тувиши билан ҳеч нарсанинг унга қизиги қолмади. Ҳаммаси тутагандек, энди бошқа бирор бўлиб яшаёттандек сезарди ўзини. У болаларимнинг ҳаётини сақлаб қолиш учун шундай қилдим, бўлмаса, улар ўлиб кетарди, ана, шусиз ҳам қишлоқда очлиқдан касал бўлиб ўлаёттандар озми, деб ўйларди ва енгил торттанга ўхшарди. Бироқ бу ерда яна бошқа бирор бор эди. Ўша бошқа бирор, бошқа бир вужуд ҳар куни Мирзақулнинг суйиб эркалашини, соқоли олинмаган чакаги билан бўйини қитиқлашини, уч йилдан бери эркак ҳидини кўрмаган соchlарини эркак қўллари силашини... хуллас, эркакни, эркакнинг дагал қилиқларини, улардан келадиган ёқимли ва эҳтиросни қўзғайдиган ҳидни кўмсарди. У зиди ўз қисматига қарши гапиролмас, гапирганда ҳам қисмат уининг бугун айбини очиб ташлаган, ҳалок қилган бўлар эди. У вужудидаги ўша бошқа бирорни бўғиб ўлдирамас, аста — секин унга таслим бўлган, ўзининг бутун

инон – ихтиёрини, келажагини, орзу – умидларини унга томширган; унинг қули, унинг одами бўлиб қолган эди.

Бироқ, қишининг бошларида, худди момақалдириқдек, гумбурлаб Нормат полвон урушдан қайтиб келди. Унинг урушдан қайтиши Анзиратнинг хаётида кескин бурилиш ясашга мажбур қилди. У эрини худди аввалгидай кутиб олишга, аввалгидай муомала қилишга уринди. Эрининг болалари ёнига қайтиб келганини кўриб, курсанд бўлиб, бўғзида тиқилиб ётган алами тарқагунча йиглади. Лекин кечаси эрининг оғушига кираётгандагина бу одам учун ўзининг энди харом эканалигини, ўзи учун энди чинакам баҳт бегона эканини ҳис қилди. Барibir яшаш, Нормат полвондаги иштиёқ унга ҳам таъсир қилди. Болаларининг чулдираши, уйда эркак овозининг борлиги унда яна яшашга иштиёқ уйғотди.

Ҳаммаси унинг учун яхши тутаган бўлса ҳам у ҳали бу нарсаларни хотима деб билмас эди. Хотимаси ҳали олдинда эканини, энг даҳшатлиси ҳам олдинда эканини ҳис қилар, ҳис қилган сайин қўрқувдан даҳшатта тушар эди. Бир куни юрагида ўлиб бораёттан ўша бирор бирдан боз кўтариб, ўзининг аччиқ ҳақиқат тўла найзасини унинг қаеригадир, эҳтимол юрагига санчишини, ундан тирик қолиши даргумон эканини билар эди.

Бир куни Нормат қайгадир чиқиб кеттан, Холмат эса эски наматнинг устида Ҳожарга ошиқларини кўрсатиб мақтаниб ўтирас, ўзи эса сўқилиб кеттан хуржуннинг бурчагини ямаёттан эди. Бигизлар тўқималар орасидан усталик билан алмашиб ўтар, қўлида чеварлик билан айланар, чок жой – жойига тушар эди. У бундай нарсаларнинг устаси эди. Кун тушдан ошган, ташқарида қор ёғар, унинг эса кўзлари тиниб, ўз – ўзидан юраги тўлиб бормоқда, ғашлик уйғонмоқда эди.

Шунда ошхона томондан Норматнинг таҳдидданми ёки қувончданми — фарқлоомади:

— Анзират, — деган ўкириғи келди.

У чўчиб тушиб, иргиб турди – ю, миясига лоп этиб урилган фикрдан тиззалари қалтираб ўтириб қолди. У энди ҳаммаси тамом, эрим бир нарсани эшитиб келди, ўша мен куттан лаҳза содир бўлди, у ана ташқарида туриб, ҳозир

мени кўриб, янчиб ташлайди, деб ўйлади, нажот кутгандек Холматта жовдираб боқди. Холмат югуриб ташқарига чиқди: кимнингдир чийиллаб гапирган товуши эшитиљди. Салдан кейин эшиқдан Холмат билан унга жуда ҳам таниш ва жуда ҳам муқаддас чеҳра — отаси Мулла Хидирнинг нигоҳи кўринди.

—Отажон! — унинг увишиб қолган тиззалари қарсиллаб кетди. димогида таниш ҳидни туйиб, отасининг бўйнидан қучоқлаганча йиглаб юборди. Унга ҳозир бу одам жуда зарур, жуда керак эди. Йўқ, у отасига гуноҳини айтиб, ўзини оқламоқчи эмасди. Фақат кўпдан бери тулиб турган юрагини бўшатиб, хижилликларини ёйиб олмоқчи эди. Отасининг бағрида узоқ йиглади. Акалари ва онаси ўлгандан кейин отасининг гавдаси кичрайиб, чўкиб қолган, анча кексайганди. Отаси уни ўзича тушунди.

—Қўй, қизим, юрагимни эзма... Мана, эринг қайтиби, болаларингнинг баҳтига шукр қил, қизим, худо де...

У отаси айтмаса ҳам худо дер, шукр қилар, худодан худди ўзидан қўрқандай қўрқар, уни Нормат билан бирга яшашга қайтарган куч ҳам уни хатоси учун доим тергаб турадиган куч ҳам худди шу қўрқоқлиги ва ишончи эди. Бироқ унга ҳозир шукр қилишнинг ўзи етмас, худо дейиш унга камлик қилаётган, бу шукроналик, бу товба унга ёрдам бермаётган, аксинча, уни иккиси ўртага олиб, сўроқ қиласарди — у бу ишга қадам қўйган кечасидан бошлаб икки киши бўлиб яшай бошлиганди.

Мулла Хидир бир кеча ётди — ю, эртасига қайтиб кетди.

—Энди бошнингдан нима ўтган бўлса, унут, — деди отаси кетиши олдидан унга худди кўнглини уққандай. — Энди у кунларни унут. Нима кўрган бўлсанг, кўрмадим де. Уруш ҳаммани йўлдан оздирди. Эринг яхши одам. Уни ҳурмат қил, унга меҳр қўй...

Анзират бу гапларга чидай олмади, хўрлиги келганидан ва аламидан ялинчоқ оҳангда:

—Отажон! — деди — ю, отасининг оғзини ёпди. У эри ҳақида бошқа гап эшитищдан, ўзининг бу гапларга бардош беролмай қолишидан қўрқди.

Отаси кетгандан кейин у Норматта меҳр қўйганга ўхшаб юрди — ю, барибир кўнглини ўша бир парча муз совутиб

турди. Яна аввалгидай гоҳ иссиқ, гоҳ совуқ яшай бошлади. Аста – секин шундай муаллақ яшашга күниқди ҳам.

X

У болалигіда Катта дарёning құйирогидаги қишлоқ – ларининг қандай ёнганини, болалар ва одамларнинг қандай осилганини күрган зди. Қишлоқларига дарёning нариги бетидан бир тұда мильтіқ күттарған одамлар ўтиб келар, қишлоқда қий –чув солар, талар, кетиш олдидан ёқиб, яна нариги қирғоққа ўтиб кетишарди.

У боладық тасаввури билан қанча кузатмасин, қишлоқдошларига ўлим, кулфат, йигі олиб келадиган ўша одамлар әмиша дарёning нариги қирғоғидан ўтиб келар, яна талаб, уриб, ёқиб қайтиб кетишарди. Ўша пайтлардан бери Аңзиратнинг тасаввурида нариги қирғоқ (у “нариги бет” дерди) жуда ёмон из қолдирған, у дарёning иккى бетидеги иккى ҳил ҳаётни ҳис қылар, бири тер тұкиб йиғар, иккінчеси талаб кетар — назариде, нариги қирғоқ баҳтсизлик келтирадиган қирғоқ зди. Энди эса ўзининг ҳозирғи ҳаётини ҳам дарёning иккى қирғоғига ўхшатар, ҳатто бу даражада ўхшашлықдан ҳайрон ҳам қоларди.

Унинг эри кеттандан кейинги ҳаёти дарёning шу қирғоғи — ўлим, очарчилик соя солиб турған, алланечук серкулфат қирғоқ зди. Бу қирғоқда у ўлиб кетиши, бутун орзу — умиддаридан айрилиши, иккى бола билан ёш, сулув бўла туриб, бева қолиши (у ҳаммасидан ҳам шу нарсадан қўрқарди) мумкин зди. У ўзининг баҳтига ўзи зомин бўлишни истамасди. У ҳам ҳамма аёлларга ўхшаб, яхши яшашни, турмуши фаровон бўлишини, ҳаётда ҳеч нарсанинг ташвишини тортмай яшашни истарди. У ҳамма гўзал аёллар каби ўз гўзллигини билар, билгани учун ҳам ўзининг ҳаётда сиқилиб яшashi мумкин эмасдай туюлар, орзу — умиди ҳам шунга яраша зди.

Бироқ у жуда таъсирчан аёл зди. Бу таъсирчанлиги унга отасидан ўтган зди. Мула Хидир ўжар бўлгани билан кўнгли бўй одам зди. У бирорни сўкар, жеркиб ташлар, ҳайдаб соларди — ю, кейин ўзи пуштаймон бўлиб юрарди. Аңзиратта отасининг худди шу феъли ўтган зди.

Норматта текканда у қызлик орзусининг амалга ошганини англади. Нормат ҳам ўзи каби ўт, олов, файрати ичига сиғмаган, қони қайноқ йигит эди. У яхши деҳқон, номи чиқдан чавандоз эди. Топари ҳам яхши, фақат кўпкарининг ўзидан тушгани билан катта бир оилани боқса бўларди. Яна келинлар учун битилгувчи қисмат — қайнона ва қайнота Анзиратта ато этмаган, улар сал олдин гойибга бирин — кетин сафар қилган эдилар. Нормат ёғиз эди, Анзират ана шу ёғизнинг файзсиз, фараҳсиз кулбасига файз ва чироқ бўлиб кириб келди. Ўзи орзу қилгандек хонадоннинг маликаси бўлди.

Келинлик либосини ечмай, Норматта ўрганиб қолди. Кечалари унга отаси ва ўзи ўқиган эртаклардан айтиб берар, "сиз келмасингиздан олдин ўзимни эртақдагидек тутар эдим", дерди қызлик пайтларини эслаб. «Негадир ўша сизни кўрган булоқ бошига келиб, хаёл суришни яхши кўрадим. Булоқ бошига қандайдир шаҳзода отини сугоргали келади, оти оппоқ бўлади, у мени отига мингизиб, ўз юртига олиб кетади, мен малика бўламан, деб ўйлар эдим. Сиз кулманг, ростдан ҳам шундай ўйлардим. Кулманг, дедим — ку! Ана, куляпсиз, чиндан шундай ўйлардим, менга ишонмаяпсиз — а? Ана, куляпсиз — ку, мен эса тўғрисини айтяпман, сиз оқ от миниб борганингизда сиздан қўрқиб кеттаниман, худди ёввойи одамга ўхшардингиз, ростдан ҳам ёввойи эдингиз, ҳозир ҳам ёввойисиз. Назаримда, ўша подшо жодугар кампирнинг гапига учиб, мени чўлдаги қудуқча ташлайди, мен эса қудуқда ҳеч нарсани кўрмай, кўп ийлар яшайман, биздан туғилган ўғил мени қутқаради, деб ўйлардим. Қаранг, жинниман — а, гирт жинниман!.. Шундайми, сиз менинг устимдан куляпсиз, мен эса сизга... Ана, ана, кулдингиз». Булар унинг энг ширин хотиралари эди. Унга ўша пайтда — серкулфат қирғоқда ёғиз қолган пайтда хотира эмас, меҳр, аёл меҳридан, одамлар меҳридан ўзгачароқ, аниқроғи, эркак меҳри керак — у шу меҳрга ташна эди. У ҳаммасига чидаши мумкин, бироқ меҳрсиз яшай олмасди, меҳрсиз тобора ўз ўзанига сиғмай бораётган эди.

Шундай кунларда дарёнинг нариги қирғогидан жуда кўркам ва худди эртаклардаги каби кема келиб, уни нариги қирғоққа олиб кетди..

Унинг ўзи ҳам бир умр фақат ғам, қайғу ташвишларнинг заҳ соясида яшагандан кўра бир кун бўлса ҳам ташвишлардан йироқ, қандай бўлишидан қатъи назар, ўша ўзи ахтарган меҳр бор қирғоқда яшашни истарди. Бунинг учун у ўзининг эски хотиралар либосини ечиб ташлаши; янги, ҳамиша таъқиб этиб юрадиган либос кийиши керак эди. У шундай қилди ҳам. Кемага ўтириб, нариги қирғоққа борди. У қирғоқнинг гарчи йигили, изтиробли бўлса ҳам, лекин қийинчилклардан, ёлғизлик ва ташналиқдан йироқ ҳаётда пусиб, чўчиб яшай бошлади.

У одамови ва ҳар бир гапдан ҳадиксирайдиган бўлиб қолди. У истамагани ҳолда Мирзақулнинг боқимандасига айланди. У бу қирғоқда қанча кўп яшаса, шунчалик тубанлашиб, шунчалик номуссиз хотинга айланиб борарди. Аммо йилнинг охирида уни жуда улкан куч нариги қирғоқдан тортиб олиб, ўзининг эски либосиин қайта кийдирди ва аввалги турмушини изга солиб юборди.

Анзират мих устида юргандай юрар экан, ўша ўзини нариги қирғоқдан тортиб олган кучга ўз ихтиёрини топширди. Бу куч унга таниш, уни баҳтиёр қилган ва зор қақшатиб, уч йил куттирган куч эди. Бу куч уни яна баҳтиёр қилмоқда, ўтмишдаги хатосини учирив ташламоқда, қалбида ҳаётта муҳаббат уйғотмоқда эди. Лекин бу муҳаббат унинг қаршисида муаллақлигини эслатиб туради. Анзират на эски – ю, энди янги ҳаётига тўла кириша олар, на уни таплаб кета оларди. У ўзи босётган қадамидан чўчиб яшар, ўз хатосидан қўрқарди. Анзират бу кунларнинг хотира, зартанг кун бўлиб, ёхуд қачонлардир бўлиб ўтган ёшлиқдаги хатоси бўлиб қолишни истар, укласам – у тонгда бошқа дунёда, мутлақо бегона одамлар орасида уйғонсан, уларнинг орасида чўчиб эмас, ҳаётга, одамларга ўша аввалги ҳалол, содиқ аёл кўзи билан қарасам, деб орзу қилар, баъзан бошқа узоқроқ қишлоққа кўчиб кетсан – чи, ахир, уруш бошлангандан бери қанчадан – қанча уйлар эгасиз, ҳувиллаб ётибди, кейинроқ уруп тугагандан сўнг ўзимизга яхшилаб уй қуриб олармиз, деб ўйларди. Бироқ кўчиш ҳақида Норматга гап ҳам очиш мумкин эмас, у сабабини суриштириб қолипшидан қўрқарди. У ҳамма одам менинг Мирзақул билан бўлган муносабатимни билади, билгани

учуи ҳам мен билан аввалгидай, билинтиrmай муносабат қиласы, ичида эса кулады, деб ўйлар, унга одамларнинг ҳар бир ҳаракати ўзининг гуноҳига шаъма, пичинг бўлиб туюлар, ҳар бир одамнинг гапини кўнглига олар, ўксир, одамларни тобора ёмон кўриб борар эди.

Бир куни Бийди момо уларникига келиб ўтириди – да, кетиши олдидан томдан тараша тушгандай қўлларини дуога очди ва:

— Илоҳи тўполонга кеттанлар омон қайтсин, тўполон бошлаганинг ўзи тўполоннинг остида қолсин, бу ерда қолиб, аскарнинг хотинини бузганларни ҳам тўполонли қора ер ютсин, — деди.

Унинг нима учун шундай деганини на Анзираг, на Норматанглай олди. Анзираг унинг гапини эшишиб, сесканиб кетди – ю, кўзини ерга олиб қочди ва энди нима бўлишини кутди. Бироқ у кутган ҳеч нарса содир бўлмади. Бийди момо ўрнидан туриб, инқилаб буқчайганча, қариб, сўлиб қолган гавдасини зўрга судраганча ичида нималардир деб гўнғиллаб чиқиб кетди. Салдан кейин унинг уйи тарафдан: «Ҳа, қора босгурлар – ей, уйда ҳеч туришмайди, нуқул эркак иси бор жойга югуришади», деган жавраши эшитилди. У кеттан – дан кейин ҳам Анзираг анчагача ўша ҳолатда, дастурхон бошида ўтириб қолди. Сўнг бирдан ҳамма одамни ёмон кўриб кетди, бу ерлардан кетписи, одамларнинг кўзидан йироқроқ яшагиси келди.

Майли, бирон чолdevор бўлса ҳам бўларди, ўйларди у, ҳаммасига чидайман, оч қолищдан қўрқмайман... Фақат эри, болалари ёнида бўлса бўлди, у ҳаммасига чидайди, музлаб ўлишта, тиланчилик қилишта, ҳаммасига рози, юрак ҳовучлаб яшамаса бўлди, ҳамма нарсага тоқат қиласы, фақат одамларнинг кўзидан нарироқ турса бўлди...

Бу фикрлар унга бир йил кечикиб келаётганига ўзи ҳам ажабланарди. Агар бу туйгуни олдинроқ, ақалли олти ой олдин ҳис қилганидами, бу воқеа содир бўлмаган; у ҳам бу тариқа зил кетиб яшамаган бўларди. Унга ҳаммасидан ҳам эрининг сокиналиги ёқмасди. Нормат ҳам деярли ҳеч нима бўлмагандай, сезмагандай, у билан аввалгидай дам қайноқ, дам жиддий муомала қиласы, болаларга кўпроқ андармон бўлар, гўё улар билан овунмоқчидаи эди. У уч

йил урушда юриб, ўзи ҳам болага айланиб қолғандай эди. Унинг ҳамма ҳаракатлари жуди боланикідай, лекин беүхпов эди. Аңзиратта атайлаб шундай килаёттандай туулар, болалар билан ўйнаётганини, унинг елкасидағи Ҳожарнинг қиқир – қиқир кулаёттанини ёки Холматнинг ҳайратланиб, эшиптан бұлса ҳам яна ўша Бобо Бойхұн ҳақидаги зертакни берилиб эшитаётганини күрса ғашы келар, күнглиниң бир чеккасида ҳасад уйғонар эди.

Гоҳида Норматнинг ва болаларининг күлгисини күриб, унинг күнглидеги ғубори бир оз ёзилар, у ҳам мана шу шовқиңи – шавқи ҳаётта құшилиб кетишни истар, лекин бу ҳаётнинг останасидан ҳатлаб ўтиш билан дарров изига қайтар, яна шубҳа уйғонар, эрининг сукуги, бу шодонликлари катта сел олдиғаги дарё жимлиги деб ўйлар, яна турли хил гумонлар уни турли томондан қыстовға олар, бадбұруш панжаларида аямай зәғиларди. У ҳамма нарасага шубҳа билан қарайдиган бўлиб қолғанди.

Мирзақұлни дарё бўйида учраттандан кейин унинг кўзлари ярқ этиб очилғандай бўлди ва эрининг майиб бўлиб келгани ногаҳон эсига тушиб қолди. У Норматнинг қайтиб келишидан шунчалик қўрқиб кетган эдик, токи Мирзақұл айтмагуича, шу қўрқув таъсирида эрининг бир оёқ бўлиб қайттанига ҳам унча зътибор бермаганди. Мирзақұлнинг гапидан кейин эрининг оёқсиз қайттани унинг қоронғи күнглига чироқ ёқандай бўлди; ахир у оёқсиз, яримжонга ким ҳам тегарди, у менинг гуноҳимни кечирса бўлади, уни фақат мен шундай авайлаб – асрояпман, унинг чўлоқлигига фақат мен кўнишиб яшаяпман, бошқа бўлганда ёш жонини шу майиб одамни деб қурбон қилиб ўтиргмаган, шартта жавобини олиб кетиб юборган бўларди. Ана, Розия шундай қилди – ку, у ҳам яшаб юрибди – ку, менга ўхшаб, қийналиб ҳам юргани йўқ, эри тирик ва соппа – соғ бўлса ҳам, боши қалтирайди деб, онасиникига ташлаб, ҳосилотнинг уйига бориб олди – ку, одамлар ҳам шунга кўниқди, одамлар ўзи ким – бир тўда фисқу фасодчи, менга ўхшаган күнгли бўшларнигина гийбат қилишади, ким ўз йўлидан қайтмаса, ўшаникини маъқуллашади; илгарилари туғри айтишган, одамлар подага ўхшайди, қаёққа ҳайдасант кетаверади деб. Мирзақұл билан ҳозир ҳам ўйнапиб юрсам, эрим хурсанд бўлиши керак,

унинг тумтгайишини, фурурини ким кўтаради, у замоналар ўтиб кетди, энди ҳар ким ўғрилик, гарлик қилиб бўлса ҳам яшаб қолсан бўлди, деган замон; унинг яримжонлигига фақат мен чидаипман, унинг сассиқ оёгини ким ҳам қучоқлаб ётарди, мен эса унинг исқиртлигига кўнишиб яшаяпман, деб ўйладиган бўлиб қолган эди. Бу ўйидан ўзи ҳам қўрқар, лекин бу ўй аста – секин тасалли бера бошлиган, Норматнинг баъзи қилиқлари энсасини қотирадиган бўлиб қолган, унинг эзмаликлари кўнглига урган, назарида эри кўп бекорчи ишлар билан шугууланаёттандай бўлар, келганидан бери бирон ишнинг бошпини тутмай, уйда ағнаб ётиши жонига тега бошлиган, ҳамма ташвиш ўзининг бошига тушганини, у шу уйни деб ўлиб – тирилаёттанини, афтидан, Нормат билмаёттандай, билса ҳам билмасликка олиб, мурдага ўхшаб чўзилиб ёгишни одат қилиб олгандай туюларди. Айниқса, эри оёгининг яраларини очганда унинг кўнгли айнир, ўзининг юрагида бу ярага ачиниш аломатини сезмас, ярани ювиш ва боғлашга зўрга чидар, баъзан яра кўнглини ағдараёттанини эридан яширмас, яра эса чўтири бўлиб, бита бошлиган бўлса ҳам йириинглаб, илвираб турар, унга ҳар ҳафтада малҳам қўйиб, боғлаб туриши керак эди.

Улар Шариф кўса қаердандир олиб келиб ташлаб кеттан бир шапалоқ гўшгни қайнатиб, шўрвасини ичиб ўтириптандади шундай қилди. Дастурхон атрофида ҳамманинг димоги чоғ эди. Анзират ҳам негадир ўша куни жуда хурсанд эди, у бундай пайтларда очилиб – сочилиб кетар, шарт бўлмаса ҳам болаларини эркалар, уларни «сизлар» эди. Ҳамма ўртадаги катта тол косадаги овқатни ҳур – ҳур ичипар, болалар бир оз шўхлик қилаёттандай бўлса ҳам дастурхон устида ширин суҳбат кетар, у эри билан бу йилги баҳор, экин – тикинлари ҳақида гаплашарди. Эрининг оёғи билан тегишишидан ийиб кеттан Анзират: «қани энди ҳамиша шундай бўлса? Яқинда уруш тутайди, кўклам келади. Яна биз учун ҳамишагидай ташвишлар бошланади. Ойдананинг ўғли галагов² ҳайдаганида қанчалар ҳавас қилгандим. Энди менга худди шундай ҳавас қиладиганлар бўлади. Биз қўш ҳайдаймиз. Холмат ҳўқизни етаклаб юради. У ҳам катта йигит бўлиб қолди. Тавба, худди отасига ўхшайди. Худди қўйиб қўйгандай. Қишлоқда ҳам тинч ҳаёт бошланади; қани

Энди мен ҳам боламнинг қўш ҳайдаб юрганини бир кўрсам. Дунёда ҳеч армоним қолмасди», деб ўйларди.

Холмат билан Ҳожар худди чумчук болаларига ўхшаб чирқиллашаётган эдилар. Нормат катта лўлаболиш қўйиб, ясама оёгини сал орқага тортиб, ёнбошлаб ўтирган эди. Шўрвадан кейин ҳил – ҳил пишиб, буғи кўтарилиб турган гўшт ўртага қўйилди. Гўштнинг қайноқ ҳиди туп этиб димоғларга урилди, ҳаммаси яна ҳам хурсанд бўлиб кетипди. Гўштни тўғрагунча, Холмат билаи Ҳожар Анзиратнинг қўлига осилишиб, шовқин кўтаришди. Анзират уларга одобсизлик қилгани учун, қовоғини уюб, дўқ уриб қўйди. Нормат қўлидаги гўштни тўғраб бўлиши билан ҳамма унга иштача билан ёпишди. Анзират икки бурда гўштни оғзига солиб, мазасини олиш учун яхшилаб чайнай бошлади. Шунда унта тегажоғлик қилиб ўтирган Нормат гўшт еяётган қўли билан ярасини шошиб қашиб қолди. Кейинги кунларда унинг устки яралари битаётган, шу сабабли, тез – тез қичиб туради. Нормат почасини тиззагача кўтариб қашлар экан, бирдан яра кўчиб кетди, бармоқлари қон аралаш йиринг бўлиб қолди. У хижолат аралаш, Анзиратта қарамай, ярасини ечиб кўра бошлади. Анзират унга қаради – ю, оғзида чайнаётган гўшти бўғзига тиқилиб қолди, кўнгли кўтарилиб, оғзини шартта юмганча югуриб чиқиб кетди, ўчоқбошига етар – етмас қайд қилди.

Ювиниб уйга кирганда, дастурхонда гўшт ўша ҳолатда турар. Холмат билан Ҳожар бир гўшта, бир тумшайиб олган Норматта, бир унга қараб, ҳайрон бўлиб туришарди. Нормат унга дағ – дағ қалтираганча, кўзлари қизариб қаради. Унинг жағлари учаётган эди. Анзират эса, касали тутиб қолдими, деб қўрқиб кетди.

Шу кечадан кейин Анзират уч кунгача Норматнинг тумтайиб юрганидан хурсанд ҳам бўлди. Кейин ярашиб кетганларида эса ўқинди. Уч кун ичида у Норматта керакли жавобларни тайёрлаб юрди. Ким ўзи у, нимасига ноз қиласди, бор – йўғи мажруҳ одам, агар бирон нарса деб тергайдиган бўлса, у шуни айтади. Бор, бошқасини топа қол, дейди, ўзига эса ўлиб турганлар сон мингта, майиб одам кимга ҳам керак, пешонам шўрлигидан менга туплиб қолган – да...

Бироқ Нормат уңдан ҳеч нарса талаб қиласа, аввал қандай бўлса шундай муомала қиласади. Бу эса уни баттар қийнар, Норматдан ўзини ҳақоратлашни, уришни, уйдан ҳайдаб солишни куттаи, шунга яраша тайёргарлик ҳам кўрган эди. Лекин Нормат ҳеч нарса демас эди.

Эрига бўлган меҳр ҳали буткул совуб улгурмагаи, икки боласи эса ана шу сўнаёттан чўғга ўт қалаб турарди. Нима бўлса ҳам Нормат унинг кўз очиб кўргани эди. Уруп, назарида, Норматни ҳам енгтан, уни кўп жаврайдиган, феъли тор одам қилиб қўйганди. У уруш ҳақида гапирав экан, Анизират бир вақтлар ўт—олов бўлган эрининг бўлар—бўлмасга жаврайдигам одам бўлиб қолганини сезар, юраги ғашланар эди.

— Биласанми, уруп дегани нима? Билмайсанми? Мен ҳам билмасдим, — дерди Нормат. — Бизни урушга солаётгандан билмасдим. Кейин билдим. Уруш дегани — иккимизнинг шундай гурунглашиб ётишимизни истамайди. Уруш — биз ҳалол пешона тери билан нон топиб ейишни, қўш ҳайдаш, экин экишмизни истамайди. Бизни ҳамиша шу нарсалардан жудо қилиши истайди. Уруш — худди оёғинг остидаги кўчиб турган тошга ўхшайди, кўтарсанг ҳам ўласан, кўтармассанг ҳам. ...Мен токи бу ерга келиб, сени кўргунимча, назаримда, сен бошқа бирорга тегиб кетганга ўхшаб туюлаверардинг. Нима учунлигини билмайман, шундай туюлаверарди. Шундай пайлари, агар Анизират бошқага тегиб, уйимнинг чирогини ўчирган бўлса, мен бораману ўзимни Бухор қоясининг устидан ташлаб, тилка — пора қиласман, бундай номуссизликка чидай олмайман, деб ўйлардим... Одамларни отар эканман, этим ҳамиша сесканиб кетар, ҳудога тавба қиласар, иложи борича тегизмай отишга ҳаракат қиласадим. Бутдойзорларда одамларнинг қони оқиб ёттанини кўрганимда, йиглагим келар, шунда қоним қайнаб, тўғри келган ҳар бир кимсанни отиб ташлагим келарди...

...Бугун уруп давомида агар урушдан омон қайтсан, фақат дэхқончилик қиласман, кўпкарини ташлайман, буғдой экаман, одамларга қандай ишлап кераклигини, қандай ишласа одам урушни эсдан чиқариб юборишни ўргатаман,

ҳар бир уйга бүгдой бошқоларидан илиб қўйиб, мана шунга сиғинаверинглар, мана шу дунёинг якка — ю ягона неъмати, ким урушга қарши бўлса, шу бүгдой бошогига сиғинсин, деб айтадим, ўзим эса бутун дунёга етадиган бүгдой экаман, уни хотиним, болаларим билан ўриб, одамларга текинга улашаман ва ҳар бир бошоққа одамларни тотувликка чақириб турадиган қўнғироқ осиб қўяман, деб орзу қилардим...

Анзират бу сўзларни эрининг ўзининг майиблигини яшириш учун қилаётган хушомади, деб ҳам тушуниши мумкин эди. Бироқ у Норматнинг гапларидағи орзу билан ўзининг ичидаги ниятларни солиштириб, уялиб кетар ва йиғлар, эзилар, бу орзулар эрига қарши тузган ҳамма режаларини ўзгартириб юборарди. Норматнинг гаплари унга жуда қаттиқ таъсир қилар, эрим урушда қон кечиб юрганда мен бу ёқда ўйнаш ортириб, давримни сурив юрдим, қандай нодон ва енгилтак аёлман, худо шунинг учун ҳам менинг пешонамни шўр қилиб яраттан, деб хилват — хилватда йиғлаб оларди.

«Менда нима гуноҳ?! — ўйларди у гоҳида, — ҳамма айб урушда, агар уруш бўлмаганда, эрим ёнимдан жилмаганда мен бундай қилмасдим. Бутун меҳримни эримга, болаларимга берган, ундан баҳра олган, уларнинг қувончини қувонч, севинчини севинч деб билган, мен ҳам бошқалардек эримга содиқ аёл бўлар эдим», — деб ўйларди у.

XI

Мирзақул Шибоқлидан — амакисининг тўйидан қайттач, эргаталаб Олмага тушиб борди — ю, Норматнинг бир оёқдан айрилиб қайттанини ва Шариф кўса идорадагиларни "аскар кўришга" айтиб кеттанини эшилди. Аввалига у ишонмади, сўнг колхоз ҳосилоти уни Лангарда, аравада келаёттанини ўзи кўрганини айттач, юрагига гулагула тушди.

— Қизиталоқ, арвоҳга ўҳшаб қопти, — деди ҳосилот ачинган киши бўлиб бошини қашларкан, тилини танглайига уриб чулпиллатди. — қандай одам эди — я?! Кўрса одам қўрқади! — Сўнг бир зум Мирзақулга синовчан кўз ташлаб турди — да, — Лекин сизга қайтмагани тузук эди. — деди

сирли товушда. — Суқсурдай хотини бор дейишади... ҳа — ҳе — ҳе, урушга кетаётганида комиссариатда “хотиним менинг ярим полвоалигим эди, энди дармон қолдими биэда”, деб айтган экан... Шундай зүр хотин қаёқдаги бир ялангоёққа тушиб қолганини қаранг...

Мирзақул ҳосилотнинг кинояли гапиришидан ғижиниб қўйди. «Туллак, фирт туллак бу! — ўйлади у алам билан. — Хотинининг йили ўтмасдан ёшгина келинчакни уйига олиб бориб ўтирибди — ю, яна нафси тўймайди...»

Идорадан чиқиб, тўғри уйга борди. «Нима қилиш керак? — деб ўйлади у. Норматнинг омон қайттани учун ўзининг кўрқаёттанини ҳис қилиб. — Агар Нормат ўша оркашлагида қолган бўлса, хотинидан ҳамма нарсани эшитади — ю, бу ерга бостириб келади. Ундан соғ қутулиш қийин. Унинг авваллари ҳам сал қони суюқлиги бор эди, деб эшитардим, нима иш қилаёттанини ўзи ҳам билмай қоларкан... Агар эшитса, шундай қилади... қўрқяпманми, ҳа, қўрқяпман. Тентақдан қўрқмай бўладими?!

У ростдан ҳам қўрқаёттан эди. Урушдан қайтиб келгандар унинг хирсадай гавдасига ҳасад билан қараб, хўмрайиб, ичларида нимадандир норози бўлиб юришар, бўйсунгиси келмасди. Унинг мансаби энди уларни чўчитолмасди, аввалидай салобатли ва ҳар нарсага қўли етадиган эмасди. Урушдан қайтганлар билан ҳисоблашиб гаплашиб кераклигини у тушунар. Норматнинг худди шу нарсасидан кўпроқ ташвишга тушаётган, қўли калта келиб қолишидан чўчиётганди.

Мирзақул умрида кўп хотинларни кўрган, бирига хушомад билан, бирига мансаби ва қўли узунлиги билан эришганди. У хотинларни шунчаки кўнгилочар тоифа деб биларди.

Шўроликка сайланган иккинчи йили Мирзақул овулма — овул юриб, биргадаларда ўримнинг кетишини текшириб юрар экан, тожик овулларидан бирига борганда, ўроқ ўраётган келинчаклардан бири, бир пайтлар ўзи орзу қиласандек истараси иссиқ, лўппигина келинчак отига ва ўзига суқ билан тикилиб, хумор қилиб жилмайиб қўйганини кўрганда, юрагида қандайдир ширин, роҳатбахш режалар уйғана бошлаганди.

Бир неча кундан кейин эса жилдираб оқаёттан булоқ сувининг роҳатбахш товушини тинглаб, тиниқ, мусаффо ёз осмонига қараганча, чакалакзор ичида тоҷик келинчагининг бутун вужудни қитиқлайдиган энтикишини ва ўзбекчани бузиб: «Око Мирзо, сиз ёмон экон», деб эрининг бўшанглиги ҳақида бидирлаб гапираёттанини эшитиб ётарди. Тонгти шабада ёқимли, хушбўй беда ҳидини олиб келарди. Мирзақул бу totли ва роҳатбахш ҳаётини беда ҳидидай бир лаҳза эмас, бир умр давом этишини истаган эди ўша саҳар.

Бу орада уруш бошланиб қолди. Уруш Мирзақулнинг ризқини эри ўлган ва енгил яшашта ўрганиб қолган уйларга сочиб ташлади. Лекин у уста одам, бу ризқини териб олиб, эл – юрт қаҳрига учрамоқчи эмасди. Шу сабабли у ўзини тийиб юрди.

У бир илож қилиб, эски танишларини ўртага солиб, урушга бошқа бир адашини жўнатиб юборгач, бутун бир аёллар армиясининг қўмондони бўлиб қолди.

Аёлларга, айниқса, қўнғирот аёлларига бош бўлиш ва уларни бир мақсадга бўйсундириш нақадар қийин бўлмасин, бу иш Мирзақулнинг қўлидан келди. У ишнинг кўзини биладиган, хушмуомала, аёлларнинг ёшига, кўнглига қараб муомала қиласидиган раис эди. Фронт учун, Ленинград учун, Москва учун ғалла, кийим – бош, пул маблаги, озиқ – овқат тўплашда у ҳамма йўллардан фойдаланди. Бирорни алдади, бирорга ялинди, бирорга дўқурди ва фронт учун ишлашда юқоридагиларнинг кўзига тушди, катталарнинг ишончини қозонгач, аста – секин ўз мақсадлари учун хизмат қила бошлади. У эридан қорахат келган аёлларга кўпроқ меҳрибон эди, кўпроқ ўшаларга хушмуомала эди.

Урушнинг учинчи йили, ёшлигида кўриб, лабини тишлаб қолган, чоретимликлардан Нормат чавандозга тушган Анзиратнинг эридан қорахат келганини эшиттач, унга шу вақттacha билдирамаган қариндошлик меҳрини намойиш қила бошлади.

У Ҳалил отбоқарникида ўз режасини амалга оширгач, бирдан хотиржам тортиди. Мирзақул, Анзират энди гаҳ десам қўлимга қўнади, уни ўзимга ром қилиб кўйдим, деб ўйлаган эди. Чунки олдинги аёллар шундай бўлганди. Бироқ Анзират

ундай қилмади; кейинги сафар уни ҳайдаб солди, худони ўртага қўйди, йиглади – сиқтади, ялинди, уришди, қарғади — барибир ожизлик қиласи: "уруш тугаса оламан, болаларингта ўзим оталик қиласман", деганига ишонди, уни қарғаб, ундан чўчиб, уни ҳайдаб, ахийри ўзини унинг ихтиёрига топширди.

Кейинги боришиларида Мирзақул дадил ҳаракат қилди, энди у бир адашган аёл кетма – кет адашаверишини, бир алданган кетма – кет алданаверишини, тоғда кўчган битта тош ҳамма тошларнинг кўчишига олиб келишини кўп йиллик тажрибасидан яхши билар эди. У Анзиратнинг қалбидаги ўша бигта тошни кўчира олган, энди бошқа тошларни осонигина қулатаверишини мумкин эди. Кўчки остида қолган Анзиратнинг қалбига у энг заиф томонлардан кириб борар, ўзи ҳам унта аста – секин боғланниб бораёттанди..

Мирзақул Норматни қайттанидан беш кунча кейин Янгибой оқсоқолнинг уйидан икки киши бўлиб чиқиб келаёттанини кўриб, бу чўлоқ одамга нисбатан юрагида англаб бўлмас ҳасад уйғонди. Нормат оқаринқираган, бир оёгини силтаб босар, юриши узоқдан беўхшов кўринар, у ҳар оёқ босгандা бир томонга майишиб кетар, оддидаги — Шариф кўса билан Мирзақул танимайдиган теллаги катта одамга у дарёнинг нариги бетида салобат солиб кўриниб турган қотнинг устини, кўкиш туманли чўққиларни кўрсатиб нимадир деб қўяр, Шариф кўса билан телпакли одам у кўрсатган томонларга қараб, бошларини қимирилатиб, тасдиқлашар эди. Мирзақул уни кўриб, бўтилиб ёттан кўксида алам олов ёниб кетди. Шундагина у Анзиратдан кўнгил узиш маҳоллигини ҳис этди. Сулув бўлгани учун эмас (қанча сулувларни қўлидан ўтказди) Анзиратда унга ёқадиган яна бир нима бордай эди. Бир вақтлар хотинининг йиглаши қанчалик ғашини келтирган, жаҳлини чиқарган, кўнглини совуттан бўлса, Анзиратнинг қарғагани ва йигиси шунчалик хуш ёқар, йиглаш ва қарғаш унинг чиройини очиб юборгандек, бу билан эркалий қилаёттандек туюлар, унинг тошдай бўлиб ёттан кўнгил музларини бу эркалиги билан эритиб юборар, жунбушга соларди. Агар у қувнаб кутиб олса, балки, кўнглим совиб кетарди, деб ўйларди у баъзан.

Нормат қайтгандан кейин у Анзиратнинг кўзига кўринмади. Фақат кечқурунлари уларнинг уйи орқасида оти билан ўралашиб юрап, Анзиратнинг ёшли кўзлари, қатиқ ҳиди келадиган нам сочларини қўмсар, у дунёдаги энг ширин неъматдан айрилиб қолгандай эди. У бундай тенгсизликдан — бир чўлоқча шундай сулувни қўшган тақдир таҳқиридан фоят ўкинар, Анзиратни согинарди.

Қиши бошларида Терсота атрофида айланиб юриб, дарё бўйида, муз ўйиб, сув олаётган Анзиратни учратиб қолди. Оқшом эндиғина чўккан, ерда енгилгина қор бор, атроф ҳали ёрут ва сокин эди.

Анзират уни кўриб қўрқиб кетди: қўлидаги пақирини ташлаб юбориб, унга ваҳима билан тикилиб қолди. Мирзақул унинг ҳолатини тушунди.

— Яхшимисан, Анзират,— деди у мулојим товушда. — Эринг келиб тинчиб қолдингми?!

Анзират индамади. Унга ҳам ҳуркиб, ҳам қўрқиб; тикилиб тураверди.

— Анча тўлишиб қолибсан,— давом этди Мирзақул ўша оҳангда. — Эринг билан турмушинг ширин шекилли — а?! Ҳеч мени ҳам ўйлайсанми, Анзират?!

Анзират қўлларини ёқасига олиб бориб, унга чўчиб тикилганча ўтириб қолди.

— Мен эса сени ҳар куни ўйлайман, ҳар куни тушимга кирасан, ҳар куни сени бир кўраманми деб, уйинг атрофида ўралашиб юраман, сен эса қиё ҳам боққинг келмайди...

Анзират бирдан кўзларини ундан олиб қочди — ю, иргиб турди.

— Кетинг, — деди у қаҳр билан шивирлаб, унинг юзи ғазабдан кўкариб кетганди.— Кетинг... Одамлар кўриб қолади... Кетинг... Шунча азоб берганингиз ҳам етади...

— Мен ўз ваъдамни унугтаним йўқ, — аланглаб пишиллади Мирзақул. — Ташла, уни...ташла, Анзират, ўзим оламан сени, бошингтacha зарга кўмиб ташлайман... Анзират, ахир ўзинг ўйланинг дегандинг — ку!.. Мен ўйлаб кўрдим... бошингни очиқ қилиб олсанг, ўйланаман...

— Керакмас... керакмас... — ҳўнграб юборди у. — Мени тинч қўйинг... Эримнинг ўзи яхши... Тинч қўйинг. Худо

хайрингизни берсин... тинч қўйинг... шусиз ҳам юзим қора бўлиб қолди...

Мирзақул унинг йигисини, таниш гапларини эшишиб, юраги орзиқиб кетди. Отдан тушиб унинг қаршисига борди.

— Нима қиласан ўша чўлоқни?! — Илтижоли сўради у.
— Бошингга урасанми? Ўзингни хор қилишга арзимайди.
У ҳеч нарсага ярамайди... Умринг азобда ўтади...

— Майли... — Тез, шошиб гапини бўлди Анзират.
Майли... ишингиз бўлмасин... фақат мени тинч қўйинг,
умрингизга дуо ўқиб ўтай, тинч қўйинг.

— Истасанг, сени ундан тортиб оламан... Истасанг,
эрингни яна қайтариб жўнатиб юбораман... ўша ёқларга...

Мирзақул Анзиратнинг қўлини ушлади. Анзират чўчиб
орқага чекинди...

— Истасанг, эртага тўй қип оламан. Эшиятсанми,
эртага... Фақат сен истасанг бўлди. Эринг ҳеч нарса
қиломай қолади.

— Йўқ, йўқ! — Анзират орқага тобора кўпроқ чекинаркан:
— Уни тинч қўйинг,— деди. — У сизга нима гуноҳ қилди...
Тинч қўйинг бизди... Менга ҳеч нарса керак эмас... — У
йиглар экан, қўллари қалтирас, кўз ёшлари юзини юваб,
лабининг бир чеккасига келиб қуйилар, пақирни қаттиқ
қучоқлаб олган эди.

— Мени ҳам ўйласанг—чи, мен ҳам одамман...— деб
аламли зорланди Мирзақул. — Сени кўриб ҳузур—
ҳаловатимдан айрилдим, ҳаётимда маъни қолмади...

— Керак эмас... — Эшитишни ҳам истамай тақрорлади
Анзират, пақирни олиб, қишлоқ томон тойғана—тойғана
чопиб кетди, эллик қадамча бориб тўхтаб, изига қаради. —
Болаларингизнинг роҳатини кўринг, бошقا келманг... бошқа
кўришмайлик!

Сўнг бўш чеалкларни даранглатганча югуриб кетди.

— Тинч қўймайман. — Хўрлиги келиб, ақдан озар
даражада хириллаб бақирди изидан Мирзақул. — Эрингни
сургун қиламан... сени тортиб оламан... ҳали қараб тур,
менини бўласан!..

Аёл гапини эшийтдими, эшитмадими — билолма — ди. У
Анзират токи қишлоққа кириб кеттунча изидан қараб турди.
Сўнг отини етаклаган кўйи Тераклига жўнади.

У бекорга Норматдан қўрқҳан эди. Унинг Норматсиз ҳам иши чатоқ эди. Уруш охирлаб, олдингидек, фақат куруқ гапларга ва раҳбарларнинг ёзма ахборотларига ишониб келинган замонлар ўтиб, урушдан нафасини ростлаб олган ва фақат уруш ҳақида змас, уруш орқаси ҳақида ҳам ўйладиган замонлар келиб, текшир – текширлар бопланган, Норматсиз ҳам унинг тагига сув кеттан эди. Йил бошларида унинг ҳарбий комиссариагдаги эски ошнасини гап – сўзсиз фронтнинг олдинги қаторига жўнатиб юборитди ва урушга бормай юрган кўпгина кишиларнинг ҳақиқий фамилия – ларини излаб топишди, уларга ҳам қайтадан чақирив қофози берилди.

Бу иш шу даражада тез юз бердики, Мирзақул танишларини орага сололмай ҳам қолди. Ошнасининг фронтта жўнатилганини эшпитиб ва колхоз раисининг ишдан кеттанидан қўрқиб юрган кунларида унга ҳам чақирив қофози берилди. Унга уруш даврида қилган катта хизматлари эвазигагина суд бўлишдан халос этилиб, ўз ихтиёри билан фронтта жўнатилаёттанини айтишди.

Анзиратнинг калтакланиши ва унинг чала туғиб қўйгани, Норматнинг уйини ташлаб кетгани, лекин ўйнаши кимлиги номаълум эканлиги, чоретимликларнинг бошқа уруғ ичидан бошини кўтара олмай қолишгани, уларининг тутантариқдай туғаб ётганилиги ҳақидаги миш – мишлар қўшилиб – чатилиб, унинг қулоғига етиб келгач, у дафъатан эсанкираб қолди. Лекин Анзиратнинг миқ этмагани ва ўз номи сирлигича қолганини билгач, кўнгли сал тинчиди. Анзиратнинг ўлим тўшагида ётганини эшпиттач, унинг кўнгли ўзи ҳам тушунмас бир меҳрга тўлди.

Урушга кетищдан олдин у Анзиратни кўп қўмсади. Агар ўлиб кетсам, у мени ҳамиша қарғаб ўтади, юрагимда армон қолади, деб ўйлади. Охирги марта унинг қатиқ ҳиди келадиган сочини ҳидлагиси, умрининг энг ширин дамларини бир зум қайта ҳис қилгиси кеди: агар шундай қилсам, урушга армонсиз кетаман деб ўйлади. Норматнинг уйини ташлаб, бошқа уйда яшаёттани унга умид багишилади.

Урушга кетиши олдидаи Анзиратни кўриш истаги унинг бутун вужудини қамраб олди ва охири бу мақсадга, ёввойи ва яна ўша тийиқсиз мақсадга айланди.

XII

...Терсотадан бошланган миш – мишлар жилгаси аста – секин узайиб, жуда катта түлқинга айланди ва тогу тош демай бир неча ҳафта ичида бутун қўнгирот элини қамраб олди. Бу тўлақин шу даражада шиддатли ва оҳанрабо здики, унинг сувига юз ювмаган одам деярли қолмади. Миш – мишлар тўлақини улкан дарёга айланиб, худди баҳор пайтидагиdek, қутуриб, қоп – қора бўлиб, йўлида учраган тўсиқларни йиқитиб, шиддат билан қишлоқма – қишлоқ бостириб кира бошлади. Терсотадан кичкина жилга бўлиб чиқдан бу дарё тезда Ҳисор тизмаларидағи қишлоқларнинг ярмини босиб олган баҳайбат кўлга айланди. Бу кўл ўз чегарасини аста – секин кенгайтира борарди.

Ҳар ким бу миш – мишлар шарини кучи борича пуфлаб, шиширипга ҳаракат қилас, урушдан чарчаган одамларга бу шар жуда қулай эрмак эди. Воқеалар пуфаги шу даражада семириб кетдики, охир – оқибатда одамлар бу воқеа қайси қишлоқда, қай маҳал, қайтарзда содир бўлганини ҳам эсдан чиқариб, қуруқ воқеанинг ўзини ҳикоя қила бошладилар. Фалон қишлоқда, фалон киши урушдан уйига қайтиб келса, хотини ўйнаши билан ётган эмиш, у аламидан ўзини осиб қўйибди... Ёки, фалон киши урушдан қайтса, хотини ўйнашидан бола орттириб ўтирганмиш, у бола – сола билан хотинини уйига қўшиб ёқиб юборибди... Фалон киши урушдан келса, хотини бошқа биронга тегиб кетибди, бечора номустга чидай олмай яна урушга қайтиб кетибди ва ҳакоза...

Бироқ Норматнинг ўзигина юз берган ҳодисага ишонтиси келмас ва бу воқеадан ўзига келолмасди. У бунинг ҳаммасини қандайдир ёмон туш ва мен туш кўряпман, тезда уйғониб кетаман, ҳаммаси биратўла тугайди, деб ўйларди. Аммо, бу туш узоқ ва сўнгсиз тушга ўхшарди, уни азоблар, ўзини ўнгариб олишга имкон бермасди. У ўша куни нималар қилганини эслай олмас, Анзиратни бугдими ёки урдими, ҳаммаси аланг – жаланг эсида қолган, бошидаги жароҳат қўзиб, хотирасини заифлаштириб қўйганди. Унинг алданган кўнглида хилма – хил режалар кезар, булар ҳам алданган ва хўрланган кишининг режалари эди. Бу шармандаликка

чиңдай олмай, қаёққадир бош олиб кеттиси келарди. Унинг хәёлида дам – бадам бу номуссизликларни кўргунча, нега ўша ёқларда ўлиб кетмадим, нега мен қабрини худо ҳам унуттан кишиларнинг бири бўлмадим, деган афсус ва надомат кезар эди. У элим – юртим, болам – чақам деб, қирғинлардан омон қайтдим, бошқалардай бегона хотинларга кўз олайтирудим, хотинимни ўйладим, уни энг вафодор, деб билдим, унга хиёнат қилмадим, уни деб етиб келсам – у мен сиғинган эл мени мана бундай кутиб олди, деб ўйлар, ўқинар, ўксинар эди. Шундай пайтлар оёгини кесган врачни, унинг далдаларини, ураллик солдатни ва доимо “сизлар бу ердан туриб ўз ерларингни, бола – чақаларингни ҳимоя қиласизлар, голиб бўлсангиз, элларинг сизларни поёндоз тушаб кутиб олади, мағлуб бўлсаларинг, сизларни қувиб ҳайдайди”, деб ташвиқ қиласидиган замполитни эслар экан, уларнинг ҳаммаси уни алдагандек ва гаплари ҳам бемаъни, кераксиз нарсага, ўзининг устидан кулиш учун атайлаб тўқилган маталларга ўхшаб қолган эди. Мени, аввало, урушга бор, деб алдашган, кейин урушда алдашган, хотинини йўлдан уриш учун уни урушга юборишган – урущда ишларни битказиш учун алдашган, уни ҳамма алдаган, кўрган ҳар бир киши алдаган, келган биринчи кунлари ёқ алдашган, йўлларда алдашган, госпиталда алдашган, уни мана шу машъум воқеани кўрсатиш учун уйига қайтаришган, сўнг устидан кулиб юришган, уни ҳамиша алдаб келишган... деб ўйлар эди. Келган кунлари одамларнинг жилмайишлари ҳам, ҳаракатлари ҳамма – ҳаммаси мана шу нарсадан дарақ бўлган. У эса уларнинг масҳараомуз жилмайишларига кўр – кўронга қўшилиб, жилмайиб юраверган.

Юраги туб – тубидан оғрирди. Бу оғриқ асабларини эзив ташлаётган ва бошидаги яра ҳам оғрий бошлаганди. Нимадир игнага ўхшаш нарсалар унинг юрагига келиб урилар, ичи, бўғзи ёниб, қуруқшаб, ачишиб борар, бошидаги оғриқ тобора кучаяётган эди. Кимдир унинг миясини тинмай чангллар – эзғилар эди.

У қайтган кунлари Анзиратда алланечук бегонасираш сезган, лекин буни урушга ва кўришмаган тўрт йилга йўйган эди. У Анзиратга хос бўлган кўнгилчанлик ва ўзига

ярашадиган нозли ишваларидан энди қандайдир енгилтаклик топғандай, у бутун умр бир бузуқ хотин билан ўзини булғаб келгандай, қўйнида илонни сақлаб юргандай бўларди. Анзиратнинг авваллари унга ёқадиган барча келинлик одатлари энди унга ўша бузуқликдан даракчилик туюларди. Унинг ожиз ва бекарор қалби яна урушда юрган кунларида гидек тушкун ҳолатта қайттан, ишончсизлик ва қайгуга тўлган эди.

У боғ тўридаги уч йилдан бери қаровсиз ёттан Бийди момонинг кенжা ўғли уйида яшай бошлагач, бошқа ҳеч қаёққа чиқмай қўйди. Унинг бош кўтариб юришга қурби етмас эди. Уни кам кишилар йўқлаб келарди. Баъзида иссиқ – совуғидан хабар олгани Бийди момо ёки катта келини ва Шариф кўса келарди. Бийди момо унга жавраб – жавраб кетарди. Кейинги кунларда Норматнинг шу аммасидан бўлак яқин кишиси қолмагани учун у аммасидан кўпроқ миннатдор бўларди. У боғнинг ўртасидаги бу уйда худди беватан дарвишларга ўхшаб кун кечирарди. Бийди момо унга уйланишни ва шунда хотини куйиб қолишини, аёл зоти азалдан куйинчак бўлиб яратилганини, уйланса бўлди, Анзиратдан муносиб уч олган бўлишини айтиб, Норматни ҳоли жонига қўймасди. Нормат эса бошқа уйланишни хаёлига ҳам келтирмасди. У шундай пайтлари ёлғизликни истарди. У ерга кигиз, пўстак тўшаб ташланган кенг хонада ёлғиз ётар экан, ичи совиб бораёттанини, кўксидан қандайдир муз пайдо бўлганини, унга ҳаммасидан ҳам шу муз кўп азоб беришини ҳис қиласар, муз эса тобора катталашиб бораарди. Хонанинг чирогини ҳам ёқмай ётаркан, музлаб ётган вужудида қандайдир ўлимтиқ ҳис кезаёттанини сезар, ўзини дунёдаги энг баҳтсиз киши деб ҳисобларди.

Баъзи – баъзида уни Шариф кўса йўқлаб келарди, эски гапдан оғиз очиб, ошнасининг кўнглига озор бергиси келмай, унинг олдида соатлаб ўтириб кетарди. Нормат уни кўриб гижиниб ўтирас, гапларини истамай эшитар, хўмрайиб олар, ўзининг ожизлигини кўрсатмаслик учун шундай қиласарди. У ҳали ҳам ўзини бечора, тақдирга тан берган киши қилиб кўрсатишни истамасди.

— Бу йил шерикчиликка экамизми? — Сўради орадаги совуқларни юмшатиш учун Шариф кўса. — Ер роса тобга

келяпти — да. Жонивор қор изма — из ёғди — я! — Шундай дея Норматта ўгринча назар ташларди.

— Мен ўзим экмоқчиман, — деди Нормат унинг ҳафсаласини пир қилиб.

— Қаерга? Ҳамишаги жойингтами?!

— Ҳа.

— Нўхат экасанми, нўхат бозорда қиммат дейишади. Бир торозисига бир эчки бераётган эмиш. Ёки зигир экасанми?..

— Ҳа! — Бақириб берарди ўрнидан даст кўтарилиб Нормат.— Нўхат ҳам экаман, қовун — тарвузам... Ҳаммасини экаман, тинч қўясанми, йўқми?! Нега менга канага ўхшаб ёпишиб олдинг?!

— Нега бақирасан! — Шариф кўса ҳам тутиб кетарди.— Нега менга бақирасан? Нима, отангни мен ўлдирдимми? Сенма фақат... шундай бўлган? Одамларнинг боласи, отаси ўлиб келяпти. Улар сенга ўхшаб таркидунё қилиб олгани йўқ, эркакмисан ўзи, бундай бовурингди кўтар!.. Ётишингни қара... Ҳе, менга деса ўлиб кетмайсанми?!

Шариф кўса хафа бўлгандай чиқиб кетар, бари бир яна гуноҳкордек: «Ҳа, ётибсанми, ота ули», — деб кириб келарди.

— Балки ҳаммаси бўлмагур гапдир, а, Нормат? — деди бир куни ўтириб — ўтириб Шариф кўса.— Балки шунчаки аёлларнинг ваҳимасидир. Ҳеч ким биронта билан кўрмаган — ку.

Нормат унга ҳафсаласизлик билан қаради. У ҳам бир неча кундан бери шундай шубҳага борар, бироқ уни ўзи олдин юзага чиқаришга қўрқарди.

— Ким айтди бу гапни? — деб сўради жаҳл билан.

— Ҳамма, бутун қишлоқ айтяпти.

— Хотинингам шундай деяптима?

Шариф кўса энсаси қотгандек қўл силкиди:

— Хотинларнинг ҳаммаси шундай, ваҳимчи бўлади. Аёллар нима, сигир нима, миш — мишни кавш қайтариб турмаса еганлари ҳазм бўлмайди.

Шундай пайтларда Норматнинг қоронги ва зулмат бостан ичида хира бир чироқ ёнгандай бўларди. Ичи ёриша бошларди. Бу нур ҳали кучсиз ва заиф бўлса ҳам вужуди алланечук исирди.

XIII

Анзират қорлар эриб, кунлар исий боiplагачгина зўрга туриб юрадиган, ташқарига ўзи чиқиб кирадиган бўлди. У озиб кеттан, аввалги чиройидан асар ҳам йўқ, сочи бирдан оқариб, қариб қолганди. Ҳомиласи тушганидан кейин кўп қон йўқотавериб, сарак – сарак касали бошланганди. Бошини тик тутиб юролмас, доим муштипар тикилар, юзида қони йўқлигидан оппоқ юзи мурданикidek совуқ эди. Кўзлари чўкиб киртайган, косаси қорайиб кеттан, атрофга маънисиз ва илтижоли кўз югуртар, боши қалтирайвергандан унинг қаерга ва нима учун тикилаёттанини билиб бўлмасди. Унинг ўзи ҳам бир нарсани яхшилаб кўриб олиш учун узоқ тикилиб тургандан сўнгтина англар эди. Худди бир нарсадан уялаёттандай, бир кафти билан тез – тез юзини яшириб, кафтлари орасидан нозланаёттандага ўхшаб қарап, секин, заиф товушда,вой, мен ўлай, деб қўярди. Унинг бу қилиғи ярашмасдигина эмас, кипида қандайдир ачиниш туйгусини туғдирап эди. Уни аввал кўрган кишилар бу ўша Анзират эканига дафъатан сира ишонгилари келмасди. Унинг кўзлари шу даражада бепарво йилтиллардики, гўё иккита чуқур горда ноҷоргина ёниб турган мойчироқларга ўхшарди. Ҳатто Ҳолмат билан Ҳожарни ҳам зўрга, анча тикилиб тургандан сўнгтина танирди. Юрганда ҳам худди суриниб кетишдан қўрқсан ёки сув тўла идип кўтариб бораёттанду сувнинг тўкилишидан қўрқиб, атайлаб секин ва эҳтиёт бўлиб юраёттандек қадам ташларди.

Икки ойдан бери бошида ўтириб чиқсан Ҳанифа ҳам унга қараб бошини чайқар ва лабини қаттиқ тишлиб, йиглаб юбормаслик учун кўзларини тиззасига босарди. Кўргани келган келинчаклар унга кўзлари тушиши билан ташқарига югуриб чиқиб кетар, том орқасига ўтиб, йиглашар, қишлоқдошлари унинг икки ойда бунчалик қариб ва чўп – устухон бўлиб қолганига ажабланишар, бироқ ҳеч ким бирон нарса дея олмасди. Мулла Ҳидир ҳам қизининг кимдандир бола орттирганини, Норматнинг уйини ташлаб чиқиб кетганини эшиттач, келмай турибоқ: «Менинг ундан қизим йўқ, оқ қилдим», деб овоза қилди. Отасининг оқ қилгани Анзиратта, айниқса, қаттиқ таъсир қилди. У бир ҳафта ҳеч

нарса емай, ҳеч кимга гапирмай шифтта тикилиб ётди. Бир ҳафтадан кейин бошини күтариб, "Отам келмадими?" — деб сўради. Келмаганини эшиттач, ниҳоят, сўнгти бир ой ичида кўэзига ўш олиб: «Мен отам келди, деб, кўзимни очибман», — деди — ю йиглаб юборди. У ўрнидан туриб юра бошлагач ҳам мадорсиз эди. Сал нарсага йиқилиб тушай дер, оёғини сал нотуғри босса ҳам довдира бетар, юрганда қўлларини оддинга чўзиб, худди ҳеч нарса кўрмаётгандай лапанглаб, зўрга юрарди. Қўллари ҳам тинимсиз қалтираб турар, доим ниманидир излаётгандай ёки кимнидир кўришни истагандай атрофига ҳам қўрқув, ҳам умид билан тикиларди.

Кўлига теккан нарсани секин кўтариб кўрар, сўнг ҳафсаласи пир бўлиб ташлар ва яна ниманидир излай бошларди. «Нимани излаяпсиз?» — деган саволга жавоб ҳам бермас, тимирскилай — тимирскилай, қўллари толгач, ҳориб, қўлларини кўрпа остига тиқар, кўзини юмар, шу ҳолатда узоқ ётар, сўнг яна ниманидир излаб, қўллари тимирскиланар эди.

— Нимани излаяпсиз? — сўради Ханифа унинг жуда безовта бўлаёттанини сезиб.

— Йўқ — йўқ... ҳеч нарса... — дерди у ва қўлларини кўрпага яширап, Ханифага синовчан кўз ташлар, унга узоқ тикилгач, худди тўсатдан таниб қолганидек: — Туморим қани?... — дерди заиф товушда. — Кўк туморим... Отам Боқоҳон эшонбободан обериб эди... қизгинамга... қизгинамга деб, обериб эди... отажонгинам...

Ханифа нима қилишини билмас, лабларини қонаттудай бўлиб тишлар, хонага кўз югуртириб:

— Мен уни олиб қўйдим... йўқолиб қолмасин деб олиб қўйдим, — дерди ўйлаб топган гапидан хурсанд бўлиб кетиб.

— Сал мадорга кирсангиз, тақиб юрасиз.

— Отам, бу сени бало — қазолардан асрайди, деб обберганди. Сен менинг ёлгиз қизимсан, шуни тақиб юрсанг, ҳамма кўргилик сендан нари юради, деб, обберганди...

— Отангиз кўп яхши одам... — Ханифа иложи борича унинг кўнглини қолдиргиси келмасди. — Ҳали сизга кўп туморлар обберади, сиз ҳеч нарсани кўрмагандай бўп кетасиз...

— Энам... мени күргани ҳам кемайсан, дермиш түшімдә...
Мен яқында күргали бораман, знажон, фақат туморимни
топиб олай, дермишман. Тақиб юрмасам, отам ҳафа бўлади,
депман...

— Яхшиликка бўлсин, илоё, яхшиликка бўлсин! —
Ханифа кўзларидағи ёшни артарди.

— Сиз йиглаяпсизми?.. — Сўради бирдан авзойини
ўзгартириб Анзират. — Мента ачиниб йиглаяпсизми?..
Пешонам шўр экан, нима қилай, опажон... — Бирдан кўзидан
ёш қуиилиб келарди. — Мени худо урган экан азалдан...
опажон... Сиздан яхшиликлар кўрдим... Агар мен думалаб
кетсам, Холмат билан Ҳожар ҳоварда (асли текислик, лекин
шевада "ташландиқ", "кимссиз" дейиомқчи) қолмасин,
опажон...

— Вой, ундей деманг, айланай, ҳали бу дардларди
кўрмагандай бўп кетасиз.

— Биламан... опа, куним калта... ҳар кеча энам тезроқ
келсанг — чи, сочим битлаб кетди деб, бошини титиб туради...
Куним калталигини биламан, опажон.

— Ёмон хаёл қилманг, айланай. Ҳали болаларингизнинг
роҳатини кўрасиз.

— Мен ҳам умрим бўйи шуни орзу қилардим. Нима
қилай, ниятимга етмайдиганга ўхшайман...

— Етасиз, ҳали бу кунларди кўрмагандай бўп кетасиз...

Анзиратта ҳеч ким Нормат ҳақида гапирмасди. Ундан
ҳол сўрагани келганлар фақат ўз ташвишларини гапириб,
Анзиратнинг кўнглини овлаган бўлишарди — да, шу билан
бурчларини бажарган бўлиб, изига қайтишарди.
Келинчакларнинг ҳаммаси Анзиратнинг олдида қувноқ
бўлишга, уни оз бўлса ҳам нимадандир қувонтиришга
ҳаракат қилишарди.

Бироқ у кундан — кунга озиб, мадорсизланиб ҳолдан тойиб
борарди. Икки ой ичида унинг танаси чўшга кўйлак кийгизиб
қўйилгандаи қуриб қолди. Кўкиш тусга кирган соchlари жуда
тез оқармоқда эди. Уни биринчи кўрган киши элликларга
бориб қолган бўлса керак деб гумон қиласарди.

Ўрнидан туриб юра бошлагандан бир ҳафталар кейин
унинг касали қайта ўринга ётқизиб қўйди. Энди унинг бутун
танаси кўкара бошлаган эди. Дастваб чакка томирлар

кўкарди. Сўнг тирноқларга ўтди. Шу ҳафта ичида кўргали келган Сора деган тенгдош келинчак унга кўзи тушар — тушмас, серрайиб қотиб қолди ва югуриб айвонга чиқиб, йиглаб юборди.

— Аёлларнинг шўри қурисин! — Йиглар эди у девор муштлаб. — Аёлларнинг бошига шўр бўлиб тушган урушининг номи ўчсин. Уни ўйлаб топғанларнинг ҳаммасини қора ер ютсин, илойим. Эй, худо, биз сенга нима гуноҳ қиб эдик, бизга бунча азоб юклайсан!.. Худойим, бу нимаси?! Тирик мурданинг ўзи — ку!.. Шунчаям азоб бўладими?!

Анзират кўргани келган нўғай фельдшер унга дорилар ташлаб кеттач, яна қайта юра бошлиди.

Отасининг опасини уриб, яна уларни ташлаб кетиб, ўзи Бийди момоникида юрганига ҳеч тушунолмаган Холмат жуда мулоҳазали бола бўлиб қолган эди. Опаси касал бўлганидан бери у болалар билан ўйнамас, Ҳожарни овутар, онасига иссиқ сув қайнатиб, чой ичирар, печка ёқар, ўй супурар, молхона қурагар, ўтин ёради. Кечалари опасининг бошида ўтириб, шу ҳолатда ухлаб қолар, опасининг ётиб қолгани уни бирдан катта одам қилиб қўйган эди.

— Холматингиз зўр йигит бўлади, — дейишарди келинчаклар унинг эслилигидан қувонишиб.

Холмат, опаси қанча ётса, шунча кўп яхши кўриб бораради. Ҳали бола қалби биланоқ опасининг қандайдир гуноҳ, тенгдош болаларининг айтишича, «бузуқлик» қилганини, отаси шунинг учун уларни ташлаб кеттанини англағандек бўлар, назарида одасининг гуноҳи унчалик катта эмасдай туюларди. Опаси битта гуноҳ қиласа нима бўлти? Эҳе, у кунига қанчадан — қанча айб иш қилади — ку, ҳамма уни кечиради. Опасини ҳам кечиришса бўларди — ку? Ҳаммасини анови ялмогиз кампир қилди, деб ўйларди Холмат. Набирасини икки марта, отаси урушда ўлган, деб йиглатган эди. Шунинг аламига отасини тортиб олди. Бўлмаса отаси келмасдан олдин қандай яхши эди. Холматни нуқул мақтарди. «Катта бўлса, отасидай полвон йигит бўлади», деб. Унга желагининг узун енгидан жийда, баъзида оққанд берарди. «Урушмай ўйнанглар, бўлмаса, олбир — шолбирларингни кесиб оламан», деб пўписа қиласади. Холматнинг назарида ундан яхшироқ амма йўқ эди. Отаси

келди – ю бирдан айниди. Онажонисини урдириб, отасини тортиб олди. Отаси онасини ўридан туролмайдиган қилиб ташлади. Энди онаси касал бўлиб ётибди. Отасидан бу иши учун ҳали ўч олади...

Бир марта у болалар билан Кўк қирда тоймачоқ ўйнаёттанди. Келдиёр сўпининг кенжа ўғли уни ораларига қўшмаган ва «бузуқнинг ули, онаси бузуқ», деб ҳақоратлаганди. Кейин мактабда ҳам ҳамма унга ҳарашганини сезар ва мурғаккина қалб азобланар эди.

— Сен энди биз билан ўтирма, — деди бир куни Шариф калтанинг бирга ўқийдиган қизи.— Онанг бузуқ, биз сен билан ўқимаймиз...

Ҳамма бола бирдан унинг олдидаи чекиниб, бўлак – бўлак ўтирди. Шунда Холмат хўрлиги келди ва йиглаб юборди – да, ҳалтасини олиб, чопиб синфдан чиқиб кетди.

У мактабга бормай қўйганини онасига айтиб, хафа қиласи келмас, онасининг кўзига тикилиб туриб, негадир йиглагиси келар, онаси аввалгидаи эмас, бошқача бўлиб қолганига ҳайрон бўлар, Ханифа ёки бошқа бирор келмаса, опасига ўзи атала қайнатиб берарди.

— Ўзимнинг улгинам, суюнчиқгинам,— дерди шундай пайтлари онаси уни эркалаб. — Силарни деб бу дунёда яшаб юрибман – да, менинг меҳрибонгинам.

Холмат онасининг товупидаги заиф илтижони англаб, юраги фаш тортгар, ниманидир сезганга ўхшар, агар онаси инқилламай гапирса, тузалаёттан, инқиллай бошласа яна касал бўлаёттанини билар эди. Онаси касал бўлгандан бери кам ўйнар, деярли уйдан чиқмас, уйдан чиқса, қандайдир оғир нарсани кўтариб юрганга ўхшар, ҳамма «ана, онаси бузуқ, онаси бузуқ келяпти», деяёттандай бўларди. Отаси кетиб, онаси ётиб қолгандан бери бутун қишлоқ унга қанақадир бошқача муомала қилар, энди кимдир ўқрайиб ўтар, кимдир ачинганга ўхшаб, ўта меҳрибончилик қилар, кимдир индамай ўтиб кетарди. Холмат буларнинг барини сезар, сезиб, қаеридир ачишганга ўхшар, лекин қаери эканига ақли етмасди.

Ҳожар ҳам ниманидир сезгандек, оғир бўлиб қолган, кўзлари алам чекаёттандек мўлтиллаб турарди. Лекин уйда бирори – бир чўчимай ва ҳеч нарсани ўйламай куладиган,

ўз — ўзидан қувониб юрадиган ёлғиз у эди. У ҳам уйдаги фожиани англаёттандай бўлар, кўзлари доим савол аломати билан ёнар, юзи изтироб чекаёттандек хўмрайиб олар, опасининг нега бунча узоқ ёттанини, баъзан кунлаб кўзини очмаётганини тушунгиси келар, бу унга ниманидир эслаттандай ва у ҳам уйдаги умумий ҳолатта қўшилиб, қайгураёттандек бўлар эди. Бироқ, бари бир ҳамма нарсани тез унтар, қайғу ҳам, қанақадир бахтсизликлар ҳам уни буткул изтиробга соломласди. Ташвишни ва аламларни тезда эсдан чиқариб, яна уйнинг ичидаги ўзини ўзи қувалаб, тахмондаги кўрпачалар уюмидан сакраб, мушукни қитиқлаб, қиқирлаб кула бошлар, у катталарга ўхшаб узоқ қайгуришни истамас эди. Унинг учун ҳамма нарса ўйин ва кўнгил ёзадиган нарса бўлиб туюлар, ҳамма нарсадан қувонар, шодланар, ҳамма нарсага кўнгил берар эди. У «онаси бузуқ» деган гапларга ҳам эъниб бераб, қийналиб ўтирмасди. Гоҳида онасига қўшилиб, онасига ўхшаб, кўзларини юмиб узоқ ётар, бироқ ҳеч қандай қизиқ нарса йўқлигидан дарров ўрнидан туриб кетар ва онасининг нима учун бу қизиқ бўлмаган «ўйинини» бунча кўп ўйнашига ҳеч тушунолмасди. Ўлик оралагандек бўлиб қолган уйда бирдан — бир жонли овоз ва бирдан — бир ҳаёт нишонаси — унинг кулагиси эди.

Холмат ҳам шундай, бироқ у кўп нарсани англар, шу сабабли Ҳожарга ўхшаб бу сўкиш ёки ҳақоратларни тезда унуга олмасди. Печка олдида бир халта ошиқларни очиб, ўз — ўзича гўлдираб ўйнар, шу билан ўзини овутмоқчи бўларди.

— Болам, сен ҳам ташқарига чиқиб, ўйнаб келсанг — чи,
— дерди Анзират, боласининг ёлғиз ўйнаб ўтирганидан эзилиб.

— Бормайман, — дерди Холмат хўмрайиб. — Болалар маскара қиласди...

Анзират унинг гапларидан уялиб кетар, шоша — пиша ўзини кўрпа ичига торттар ва йиглаб юборарди.

— Ҳали сизларга ҳам азоб беряпманми?! — деб Холматта тикилиб, узоқ йигларди. — Илоё, бу кунидан онанг ўласин, ўлим, силарни шарманда қилмай, опанг ўлсин... ўлим тила. Онангта ўлим тилянглар!..

— Сиз бузуқ эмассиз, шундайми? — дерди **Холмат** унинг йиглаётганидан ўзининг ҳам йиглагиси келиб. — Мен биламан ..

— Йўқ, бузуқ эмасман. — Йигларди она **Холматни** қучиб.

— Сен ишонсанг... бузуқ эмасман.

— Она, ҳаммасини анави ёлмоғиз қилган. Биламан, биздан отамни тортиб олиш учун шундай қилган. Мен биламан. Ўшанинг набираси биринч бошлиди — «онаси бузуқ билан ўйнамайман», деб.

— Уларга қулоқ солма. — Ўпкасини босолмасди **Анзират**.

— Менга ишонсанг бўлди. Бузуқ эмасман, уларнинг ўзлари бузуқ.

— Улар билан ҳеч ўйнамайман, улар мени етимча ҳам дейишади, яна айтишадики...

— Кўй, болам, қўй, айтгма...

Анзират **Холматни** қучганича ўкириб йиглар, ҳозир ўғли ўзининг бошқа бир айбини айтиб юборишидан қўрқиб, унинг оғзини ёпарди. У қилган хато фақат ўзини эмас, болаларини ҳам, отасини ва бутун қишлоқнинг тилини қисик, шарманда қилганини англар ва бундай номусга чидай олмай ўзига ўлим тиларди. Елғиз ўлим... Болаларининг ташқарига чиқмай қўйганини, уларнинг сиқилиб ўтирганини кўрган сайнин, эзилиб йиглаб, азоб ва номус уни тобора еб, унинг бутун мадорини суғуриб борар, уни яна тўшакка михлаб ташларди.

У энди ўрнидан туриб юра бошлаган пайтларда бир куни **Холмат** уйга югуриб кириб келди. Унинг уст — боши ҳўл, юзи қизариб кетган, худди бир айб қилиб қўйгандай кўзлари бежо чақнар, ташқарига қараб — қараб қўярди.

— Нима бўлди, ўглим? — сўради қўрқиб кеттан **Анзират** унинг важоҳатини кўриб.

— Урдим, — деди ҳансираф **Холмат**.

У гапириб бўлмасдан эшиқдан **Неъмат** узуннинг бурни катта тожик башара хотини кўринди. У қўлига тол хивич қўтариб олган, қарғаниб келарди. У эшиқдан кира солиб: «Ҳали қутуриб қодингми, сен етимча», деб, хивич билан **Холматнинг** юзи аралаш туширди. **Холмат** чийиллаб йигланча, **Анзиратнинг** орқасига ўтиб яширинди.

— Нега бирордиг боласини урасиз! — Бирдан тутоқиб бақирди Анзират. Унинг кела солиб, юз — кўзи демай, ўғлини савалаб қолгани, худди у йўқдай, худди у ўлгандай, болалари кўчада қолгандай қилиб савалагани алам қилиб кетди. — Нега урасиз?! — Яна бақирди бўғилиб ва туйқус йўтали тутиб қолди. — Нега ура — сиз?!. Уҳу, уҳу — ҳу — ҳу, нима? Уҳу, уҳу... мен ҳали шундай — оёқ остида қолдимми? Уҳу, уҳу, нима қилди сизга?..

— Нима гуноҳ қилганини ўзидан сўранг, келин, — деди заҳарли ва кинояли товушда. — Болажонингиздан сўранг, қонга бўяб ташлабди — ку, яна нима қилиши керак?

— Ўзи «онанг бузук», деди, масхара қилди, — деди Холмат онасининг ортидан йиглаб... — Шундай дегач ураман — да!..

— Вой, ўргилдим, сиздай энасининг ҳимоячисидан! — Шангиллади Неъмат узуннинг хотини.— Нима, энангни бузуклиги ёлғонма? Ана, энангдан сўра ёлғон бўлса, бузукни бузук дейди, кўрни кўр, карни кар дейди — да! Ҳам гарлик, ҳам шангиллик дегани шу — да. Ана, ёлғон бўлса опангдан сўра, жувонмарг кеттур!..

Яширингандан жойидан чиқиб Холмат онасига қаради. У онасининг бузук эмаслигини марави рақибнинг онасига кўрсатиб қўйишни, бузук эмаслигини исботлашни истарди. Анзират довдира б қолди. Неъмат узуннинг хотинидан кўзларини олиб қочди. Ўғлини бошини қучоқлаб олиб, қалтироқ товушда:

— Ундей деманг! — деди у заиф ва аламли товушда. — Ундей деб болани бузманг. Ҳали тирик эканман, ҳеч кимга уришга йўл қўймайман, эшитяпсизми?! Йўл қўймайман... Ҳеч кимга қалтаклатиб ҳам қўймай — ман... Мен ўлганимдан кейин урасиз буларни...

— Оҳо! — деди Неъмат узуннинг хотини, бутун қишлоқ эшитсин дегандай қўлларини белига қўйиб, гавдасини ликиллатиб, баттар шангиллай бошлади. — Оҳо, ҳали мен оппоқман ҳам дерсиз, ҳали болани ҳам сен туғдинг дерсиз? Йўқ, нега ҳам гарлик қилиб, ҳам баланд келасан... — У бирдан сенсирай бошлади.— Болани мен эмас, сен туғтансан, бузуқликни сен қилгансан, яна болангни ҳам бузасан, бирорларни ур, деб ўргатасан!.. Ўйнаш ортириб, қишлоқни шарманда қилганинг етмагандай болангни ҳам босмачиликка

үргатасан, сенга ким қўйибди гапиришни?!. Олдин этагингдаги дөгни ювиб ол. Кейин гапирасан. Олдин болаларингни тийиб юр, катта бўлса, буларният ўйнашлика ўргатасан...

— Бас қилинг!.. — Телбалардай ўкириб ўрнидан турди Анзират. Унга охирги гап жуда ўтиб кетган, у дағ—дағ титрар эди. Кўзларидан ёш қўйилиб оқар, лекин артишни хаёлига ҳам келтирмасди.— Бас қилинг ҳозз—зир чопиб ташлайман! — У пекканинг олдида турган болтага ташланди.— Чопиб ташлайман... жонимдан тўйиб кетдим.— Болтани кўтариб олдинга югурди.— Тинч қўяссанми, йўқми?! Нега мени ўйимга бостириб кириб айғоқлик қиласан... Нега болаларимга кун бермайсилар? Мен сенларга нима гуноҳ қилдим, нима айб қилдим... сенларга... арпаларингни хом ўрдимми? Эрингни ўйнаш қилдимми?! Нега ҳамманг менга осиласан?! — Унинг важоҳати қўрқинчли эди. Кўзлари қутургандай қизариб кетган, рўмоли тушиб, оқиши соchlари тўзиб кеттанди. Лаблари ғазабдан титрар, қўллари қалтиравр эди.— Ҳамманг мени гап қиласан, ҳамманг аламингни мендан оласан. Нима, ўзларинг оппоқми?! Ўзларинг ҳеч айб қилмаганимисанлар?! Айбимни билмайди деб ўйлайсизларми?! Ҳаммангни ўлдираман... ўлдираман!..

У серрайиб қолган Неъмат узуннинг хотинига қараб болтани кўтарди. Неъмат узуннинг хотини унинг авзойини қуриб, қўрқиб кетди ва орқага чекина бошлади...

— Вой, одамлар, ўлдириб қўяди! Жинни бўп қопти! — деганча ташқарига югуриб чиқиб кетди.—Ўлдириб қўяди... қутқаринглар... войдод, одамлар!..

У ташқаридаги тўплланган уч—тўрут одамнинг орасига ўзини урди ва баланд овозда ишангиллай бошлади:

— Бу қишлоқда туриб бўлмай қолди, бу бузук ҳаммани шарманда қилди! Ўйнаш орттириб энди зўравонлик қиляпти. Иштонини бошига кийиб олган бу. Боласини ҳам бузуқликка ўргатяпти... Бу билан бир қишлоқда яшаб бўлмай қолди. Ё у турсин бу ерда, ё биз турайлик, бу нима шармандалик?..

Анзират у чиқиб кеттач, эшикнинг ичидан тамбалади—да, болтани четта улоқтириб, ўзини пекканинг ёнидаги пўстакҳа ташлаб, ҳўнграб юборди, оғир ва баланд товушда тақдирини, қисматини, яраттани қарғаб, узоқ, йиглади. У

хўрланган, ҳақорат этилган, дунёдан умид узган, орзу – умидлари парчинланган, забун, кераксиз киши бўлиб қолган алфозда, токи ҳушидан кеттунча, ўзини босолмай, ҳўнграб – ҳўнграб йиглади.

Ҳушидан кетиб қолгач, уни овута олмай ўтирган Холмат ташқарига югуриб чиқди – да: «Онам ўлиб қолди», деб бақирганча йиглаб, Ханифаникига қараб жонҳолатда югуриб кетди...

Кунлар илий бошлагач, Анзират касалдан тез тузала бошлади. Нўғай фельдшер ташлаб кетган дорилар унга кор қилди. Қишлоқ келинчаклари уни ёлғиз қолдирмай навбатма – навбат келиб туришди. Улар ўзларининг шўх ва самимий кулгилари билан Анзиратнинг ўтмишини оз бўлса ҳам унугиб, ҳаётта ҳавас билан қарашга мажбур қилишди.

XIV

Норматнинг кейинги кунларда қишлоқда тургиси келмай қолди. У ўзининг ҳаётидан хабардор бўлган кишиларни кўргиси, уларнинг ҳамдардона ёки масхараомуз тиржайишларига чидағ, кўнглини бузгиси келмас эди. Ов милтигини олиб, Қоратўшда қишлоқма – қишлоқ кезиб юрар, юрагини шундай қилиб бир оз ёзган бўларди. Тоғлар эса уни гоҳ туманли, гоҳ очилиб, гоҳ хўмрайиб кутиб олар, унинг кўнглига мос равишда гунг ва соқов эди. Огриёттан эркак қалби кимга ёрилсин? Тоғу тошларгами? Йўлларгами ёки асрий, бунақа дардларни кўравериб, афти ҳам, пешонаси ҳам тиришиб кеттан арчаларгами? Улар огриқ нима эканини қаердан билсин? Эркак қалбини қаердан тушунсин? Қаердан англасин?!

Нормат деярли ов қилмасди. Фақат олдидан чиқиб қолганда ёки завқи келгандагина ов қилар, номигагина милтиқ елкасида юрарди. У ҳафталаб қишлоқда келмас, тоғдан – тоғта ўтиб, таниш қишлоқларда ёки эски горларда тунаб юрарди. Ҳамма жойдан у хўшлашмай кетиб, кутилмаганда пайдо бўлиб қоларди.

Аста – секин у бошига тушган кулфатни бир оз унугтган, шундай сўққабош яшашга кўнига бошлаган бўлса ҳам, Холмат билан Ҳожарни соғинарди. Шу сабабли ачишган

юрагига малжам излар, бироқ дунёда ундаи малжам йўқ эди. Аслида қишлоқда у болаларини узоқдан бўлса ҳам бир кўриш учунгина келар, уларни соғ — саломат кўргач, яна овга чиқиб кетарди.

Қишининг ўрталарида у қишлоқда бир ҳафтача турди — ю, ойнинг охирларида яна овга жўнаб кетди. У бу гал Башчорбог томонлардаги адирларга жўнади. Кечта яқин ўзи ҳам номини билмайдиган тўрт — бешта уйнинг чироги ёниб турган кичкина қишлоққа кириб борди. Унинг қорни жуда очқаган, Қоратўш ҳам чарчаб сурина бошлаган эди. Бугун шу қишлоқда дам олмоқчи бўлди ва дарага туташ ялангда жойлашган, ҳаёти каттагина, кўпроқ терак экилган бори бор, эски бир уйга отини бурди. Уйга етмасдан уни катта олапар ит бутун дарани ларзага солиб, ҳуриб кутиб олди. Итнинг кўринишиёқ ваҳимали эди: жунлари узун ва ҳурпайган, ўзи нақ эшакдай келадиган, товуши дағал, одамга тикка ташланадиган орлон кучук эди. У Норматни ўзига қарашли мулқда кўргач, қорни саҷратиб югуриб келди. Унинг шарпасидан Қоратўш ҳуркиб, қулоқларини динг қилди ва тўхтаб қолди. Ит кела солиб, отнинг думига ташланди — ю, ўзига ўгирилган милитиқни кўргач, ириллаб, пичноқ тишларини кўрсатиб, орқага тисланди. Қоратўшнинг олдини тўсди.

— Олапар, маҳ — маҳ, жим бўл, — деди Нормат унинг тусиға қараб, таваккалига. — Жим, х.е... харом қоттур, танимаяпсанми?!

Ит унинг товушини эшишиб, баттар вовиллай бошлади. Ит қаёққа ўтса, Нормат ўша ёққа милитиқни бурарди. Ит айланга туриб, бирдан отнинг тумшуғига ташланди: қўрқиб кеттан от ўзини бирдан орқага олиб, олдинги оёқларини тикка кўтарди — да, кишинаб юборди, сал бўлмаса Нормат эгардан учиб кетаёзди.

— Олапар... Тўрткўз... ким бор?.. — деди у жонҳолатда итнинг номини топишга ҳаракат қилиб. — Кўр бўлгур, жим бўл!..

Пастаккина уйнинг эшиги очилиб, бир кишининг қораси кўринди. Изидан хирагина фонус чиқди. Уй агаси фонусни бўйи баробар кўтариб:

— Ким у? — деб сўради ингичка товуцда.

Нормат итниңг ўзини жойидан қимирлатмай қўйганидан боши қотиб турар эди, товушни эшитиб, хурсанд бўлди:

— Қариндош, итингизни чақириб олинг, тоза овора қилди — ку.

Ит эса эгасининг товушини эшитиши билан дадилланиб, ҳайта ҳужумга ўтган, отни айланиб баттар ҳура бошлаган эди.

— Сиртлон, маҳ — маҳ, тур жойингга бор. Ҳе, ўл, бор!..

Ит думини ликиллатиб бир — икки ҳурди — да, отта йўл берди, боя деворнинг бир четига бориб, кузатиб турди.

— Меҳмон керак эмасми? — сўради Нормат енгил тортиб, эшикнинг олдидағи супада отдан тушар экан, фонус кўтарган кишининг сийрак соқол, ориқцина киши эканини кўрди.

— Қайси ўзбек меҳмонни қувлабдики, биз қувласак, — деди қувноқ ва мулойим товушда фонус кўтарган киши. — Қани, отингизни беринг, сиз ичкарига кираверинг... Эшмат! — деб чақирди ичкарига қараб. — Қани чиқ, меҳмонни уйга бошла... — уй эгаси фонусни чап қўлда кўтариб, отни боғнинг этагида қорайиб кўринаётган молхона тарафга етаклаб кетди. Ичкаридан чиқсан ўн бир яшарлардаги бола аввал унга ҳайрон бўлиб қараб турди — да, сўнг уялинқираб салом берди ва Норматни уйга бошлади. Уй айвонсиз, биринчи эшикдан даҳлизга кирилар, даҳлизнинг икки томонида икки эшиги бор эди. Бола даҳлизда катта, ичи кигиз этигини ечди — да, Норматнинг оёғига бир қараб, ўнг томондаги эшикни итарди. Нормат ясама оёғидаги этигини зўрга ечиб, ичкарига, торгина, лекин шифти баланд, кираверишига тунука печка ўрнатилган хонага кирди. Хонада иккита бола ва бир қиз бор эди: болалар саккиз ва беш ёшларда, қиз эса ўн учлар атрофида эди. Болаларнинг каттаси билан қиз печка олдида, беш ёшлардагиси эса уйнинг ўртасида катта ёғоч косага қатиқ солиб, ичиб ўтиради. Қиз билан бола Нормат кириши билан печка атрофини унга бўшатиб беришди. Нормат олдиға қатиқ қўйиб ўтирган болага кўз қисди ва бесўнақай ҳолатда ясама оёғини сал эгиб, печка олдидағи пўстакка чўқди. Бола қатиқни оёқларининг орасига олиб, ёғоч қошиқда хўриллатиб ичди — да, Норматта бир қараб, уни обдан қўздан кечиргач,

яна қатигини ича бошлади. Қизил баҳмал дўппи кийган, озғингина қиз шарақлаб қайнаган қумғонни печка устидан олар экан, Норматнинг оёғига ажабланиб қаради, сўнг уялиб кўзларини олиб қочди.

Хонанинг тўрига кўрпа — ёстиқ тахланган, яккаю ягона деразага аёл кишининг чопони илиниб, совуқдан тўсилган, кўрпа тахмони олдида катта ёғоч сандиқ турар, сандиқ юзидағи расмларни бола чизгани ўхшовсизроқ гулларидан кўриниб турар, унга катта қулф осилган, деворларга кашталар илиб ташланган, ерга кигиз устидан наматлар тўшалган, қатиқ ичиб ўтирган боланинг олдида кири чиқиб кеттап дастурхон ёзилган эди. Печка устида қол — қора идиша ёвғон қайнар, ёвғонга қурт солинган бўлса керак, ҳиди хонани туттанди. Печка олдидағи чолма'ни(қотирилган тезак) айтмаса, хона анча шинам ва тоза эди.

— Адашиб қолдингизми? — сўради ундан боядан бери оёғидан кўз узмай ўтирган, отаси "Эшмат" деб чақирган бола.

— Қаердан — билдинг?

— Бу ерларда кўп адашишади,— деди бола катта одамлардек. — Бошчорбог бозоридан қайтаёттандар адашиб, бизнинг қишлоққа келиб қолишади. Сизни итимиз қандай ўтказиб юборди. У ҳаётдан берига ҳеч кимни ўтказмайди...

— Билмай қолган бўлса керак, — деди Нормат. — Богта кирганимда кўриб қолди.

— Итимиз бўри тутди,— деди боядан бери Норматдан чўчиёттандай бегонасираб ўтирган саккиз ёшлардаги, отасидек сарғиш бола.

— Бўрини итимиз туттани йўқ, — деди Эшмат унга "жим ўтири" дегандай қараб. — Бўрининг ўзи музлаб қопти. Кимдир оёғидан отган экан. Қишлоғимизгача судралиб келиби.

— Итларинг зўр экан — да, — деди Нормат Эшматнинг гапига эътибор ҳам бермай сариқ болага қараб. Боланинг қаериидир Холматни эслатарди. Нормат болаларини эслаб юраги орзиқди. — Ит сеникими?

Бола Эшматта бир қараб олди — да:

— Ҳа, — деди ишончсизроқ қилиб, яна Эшматта қаради.

— Алдаяпти, алдаяпти! — деди Эшмат. — Ит меники, мен уни ўзим йўлдан топиб олган эдим.

— Э, чатоқ — ку, — деди Нормат сарғимтири болага қараб.
— Сенинг ҳеч нарсанг йўқ, шекилли?

Бола хафа бўлгандай, бошини зиди — ю, хўмрайиб олди.

— Тойхори бор, — деди унинг ўрнига Эшмат. — Отам шу йил олиб берди.

— Зўракан тойхоринг бўлса, — деди Нормат, қитмирилик билан боланинг кўнглини кўтариб. — Ҳангими?..

— Урғочи, урғочи! — Чийиллади Эшмат қиқирлаб кулиб.

— Урғочи бўлса янам зўр, — деди Нормат Эшматта кўз қисиб. Сарғиш бола икковига хавфсираб қаради. — Йигиттики урғочи бўлиши керак...

Эшмат кулиб юборди. Унинг кулгиси бегубор ва самимий эди. Бу самимийлик Норматнинг ҳам қалбига ўтди. У ҳам сўнгти ойларда биринчи марта яйраб жилмайиб қўйди.

Озгингина қиз ўртага чойни келтириб, суви қочган иккита нон қўйгач, эшиқдан фонуснинг шилини пасайтириб Тутаб турган қорачироқ нурида Нормат унинг ўрга бўй, сийрак соқол, қирқадарга яқинлашиб қолган киши эканини кўрди.

— Э... меҳмон — ей, шуни айтади — да, чақирилмаган меҳмон азиз, деб! — деди у фонуснинг шилини пасайтириб бир чеккага қўяр экан. — Буни қарант, бугун ўзимдан — ўзим оқ шўрва қил, деб тайинлагандим. Қадамингиз хосиятли экан...

Уй эгаси кир чопонини ечиб, печка устидаги қозиқча илиб қўйди ва Норматни дастурхонга таклиф қилди.

— Хўш, меҳмон, йўл бўлсин, асли қаерликсиз? — деб сўради у ўтиришгач.

Нормат қаерлик эканини айтди.

— Қариндош эканмиз — да, — деди уй эгаси, унга мулоим кўз ташлаб. — Шуни айтадилар — да, билмасдан учратмас, деб. Биз ҳам илгарилар Кўкабулоқда ўтирадик. Қани, қизим, келтир — чи овқатингни. Меҳмон, кимлардан бўласиз?

— Мамат мерғанинг ўғлиман.

— Ўтроқи Мамат мерғанингми?

— Ҳа.

— Кўрмаганман — у, лекин зап одам ўтган дейипади. Қани, овқатдан олинг, қурутни ўзим қўлим билан қилганиман.

Овқатдан кейин болалар печка атрофига ўғиб ухлаб қолищди. Нормат уй эгаси ўзи билан түрга, юк тахмонининг оддига жой содди. Уй эгаси анча сариштали одам экан. Тиниб – тинчимаслиги, кўнгли очиқлиги озғин, чавандоз юзиданоқ билиниб турарди. Гапирганда доимо бировнинг кўнглига озор беришдан қўрққандек мулоийм ва юмшоқ қилиб гапирарди. Унинг ҳаракатидан, гапларидан одам ажратмаслик, бегонасирамаслик одати борлиги билиниб турарди. Кўринишидан куйинчак одамга ўхіпарди.

— Боя янгам кўринмайди деб сўрадингиз, — деди ёттанларида уй эгаси. — Янгангиз бечора қазо қилдилар. Бир йилдан ошди .. ўзини еб қўйди бечора. Номусига чидай олмади... қайту олиб кетди... Ҳаммасига мана шу лаънати уруш сабабчи. Сиз оёқдан ажраб қайтибсиз, одамларга кўрингали уяляпман, деяпсиз, уруш нималар қилмади? Унинг келтирган кулфатини санаб бўладими! Мана, ўзингиз айтинг, биз деҳқонларнинг одам ўлдириш тушимизга кирибдими?! Мажбур қилдириши – ўлдиридик! Ҳозир ўлдирган одамларим тушимдаям тинч қўймайди. Кечаси билан бўғиб чиқади. Ҳали айтдим, асли Кўкабулоқданмиз, деб. Агар Мулла Турди дегани эшиттан бўлсангиз, ўша кишининг жияниман, етим ўстанмиз.

—Мулла Турдининг?! – ажабланди Нормат. — Унда бизга ҳам жиян бўларкансиз – да. Сизни Кўкабулоқда кўрмаган эканман.

—Очарчиллик йилларида бу ерларга келиб қолгандик. Кўкабулоқча фақат меҳмон бўлиб борганиман. Аввал чўпон, кейин қишлоқ шўросида аравакаш бўлдим.

—Буни ҳаранг, сизни ҳеч тўйларда ҳам кўрмаган эканман. Айтандай, бу қўлингиз урушдан майиб бўлганми?

Мезбон бош чайқади. У гапдон ва негадир, ичидагини биратўла айттиси келаётган одамга ўхшарди. Бу Норматта эрим туюди. Лекин мезбон ичида гап ётмайдиган оқкўнгил эди. Нормат буни сезиб, жилмайиб қўйди. Бунақа одамлар билан зерикмайсан. Ҳаммасини ўzlари айтиб беради.

—Тўққиз йил арава ҳайдадим. Деҳқонобод, Шаҳрисабз, Китоб йўллари менга беш қўлдай таниш... Уруп бошланар йили нима бўлди – ю, Лангарота довонидан арава ағдарилиб, беш қоп бугдой дарёга тушиб кетди. Дарё қутурган пайт

эди, ҳеч нарса қилолмадим. Бориб раисга айтдим. У менга дүк урди. Қаматаман деди, ўша беіп қоп буғдойни бўйнимга юклиди. Ўзингиз ўйланг, ўзим аравакаш бўлсам, беш қоп буғдойни кимдан оламан? Мени роса тергащди, идорама — идора судращди. Кейин тўсатдан уруш бошланиб қолди — ю, мени урушга жўнатиб юборищи. Орқамда янгангиз тўрт боласи билан чирқиллаб қолаверди. Уч йил уруш кездим. Қанча одам ўлдирдим, билмайман, санаб ўтирадиган пайт эмасди. Охири ўзимни ҳам ярадор қилиши. Чап қўлим ишламай қолди. Дўхтирлар, аста — секин ишлаб кетади, деб уйга жавоб бериши.

Мезбон негадир хомуш бўлиб қолди ва уфлаб қўйди.

—Янга урушдалигингиздэ қазо қилибдими, — сўради Нормат унинг хомуш бўлиб қолганидан таъсиrlаниб.

Мезбон бош чайқади. Кейин яна ўша очиқ — сочиқлигига қайтиб, уфлаганча гапини давом эттирди.

—Уйдан уч йилдан бери хат олганим йўқ денг, савод йўқ эди. Уйга келсам, нимани кўрдим денг, ҳувиллаб ёттан уйимни! Ҳеч ким йўқ. Қўшнилардан сўрасам, сени ўлди деб эшидик, оғирчилик хотинингни эзиб қўйди. Ноилож бир ҳисобчига тегиб кетди, дейишди. Роса газабим қайнади. Хотинимди бориб ўлдирмоқчи бўлдим ҳам. Э, бор — э, деб ўрус шаҳарларига қайтиб кетмоқчи ҳам бўлдим. Лекин кўнглим бўлмади. Хотинимни — ку, кўрарга кўзим йўқ, ахир у мени шарманда қилди — да, аммо болаларим ҳеч хаёлимдан кетмади. Кечалари тушларимга кириб чиқади. Айниқса, кенжам!.. Мен кетаётганда энди «атта — атта» дейишни ўрганганди. Ухласам ҳам уни кўраман, юрсам ҳам. Тушимда ҳам у «атта — атта» деётгандай бўлади. Охири бўлмади. «Маллабой, сен шунча қонни ким учун кечдинг, хотининг учунми ёки болаларинг учунми, хотинингга ўчакишиб болаларингни тирик етим қиалмоқчимисан, ўргилдим, сендай номусли одамдан», деб ўйладим — у, шартта Ёнгоқлига жўнадим. Идорага кириб, раисга шундай — шундай, ҳисобчининг менинг хотинимди йўлдан уриб, уйига келтириб олибди, агар яхшиликча кўнса кўнсин, бўлмаса военкоматга бориб айтаман, дедим. Раис қўрқиб кетди. Мени ҳисобчининг уйига ўзи бошлаб борди. Ўша ерда

хотинимни күрдим: бечора, озиб – түзиб, бир ҳолатда бўп қопти, устида ўчоқ кўйлак, касалманд, зўрга оёқда юрибди. Ҳисобчи уни иккинчи хотин қилиб олган экан. Мени кўриб, серрайиб қолди: арвойимни кўрдим, деб ўйлаган экан. Қизим ҳам молхонада экан, мени кўра солиб югуриб келди. «Отажон, отажон», дея бўйнимга ўзини ташлади. Уйдан Эшмат улим ҳам югуриб чиқди. У ҳам кела солиб, менга ўзини отди. Уларнинг қувонганини кўриб, хотинимга бўлган газабим ҳам ўз – ўзидан ўчиб қолди. Фақат икки улим товуқхонанинг олдида менга ҳайрон бўлиб қараб туради. Ҳисобчига бир нарса демай, болаларимни олдиму, хотинимнинг қўлидан етаклаб жўнадим. Югуриб чиқдан ҳисобчи нимадир деди, мен эшигтмадим, эшитиш ҳолатида эмасдим. Раис уни уришиб берди. Шундай қилиб, хотинимни, болаларимни уйга қайтариб келдим. Хотиним бечора кўп йиглади, кўп азоб чекди. Доим: «Уйингизнинг чирогини ўчирдим», деб йигларди. Мен бирон марта ҳам айбини юзига солмадим. Аввал қандай бўлсам, ўзимни шундай тутдим. Болаларим қайтиб келиб бағрим тўлди, кўнглимдан дардлар ариди. Улар менга ҳаёт берди. Мен эди шулар учун яшшим кераклигини тушундим. Ўзингиз ўйланг, биздан бу дунёда нима қолади? Шулар – да! Буларнинг олдида ҳар қандай гуноҳини кечирса бўлади, қолган ҳамма нарса ўткинчи. Хотиним олти ой ҳам бирга яшамади. Ўттан қишида ётиб қолди – ю, қайтиб турмади. Бундай ўйлаб қарасангиз, уларгаям қийин бўлган: нима бўлсаем худонинг ожизлари – да, уруш уларниам шундай қилишга мажбур қилган. Биз эркаклар бир оз шошиб ҳукм чиқарамиз. Мен ҳозир хотинимнинг ўлимига мен сабабчи бўлдим, деб ўйлайман. Агар мен кенг феъл бўлиб, унинг кўнглига шубҳа солмаганимда, у тузалиб кетармиди? Энди ўз ёғимга ўзим қовриламан. Яхшиям болаларим бор. Бўлмаса аллақачон бу ерлардан бош олиб кетган бўлардим. Энди мана шу саккиз жуфт қорак ўзни бироннинг қўлига қаратмай ўстирсам, шу менинг умрим, деб ўйлайман...

Уй эгаси жим бўлди. Кейин ўрнидан туриб ташқарига чиқиб кетди. Нормат бу одамнинг гапларидан кейин бирдан ўзидан уяди. Маллабой унга шунча кунлар иккиланиб

юрган ва юрагини тирмаёттан саволларга худди унинг келишини билгандай, ўзининг тақдиди билан бирпасда жавоб топиб берган эди.

Маллабой қайтиб кирди. Нормат у билан ортиқ гаплашгиси йўқ, эди. Агар яна гаплашса, ўзининг нималари дир фош бўлиб қолишидан қўрқиб, кўзларини юмиб ётди. Маллабой уни ухлаган деб ўйлаб, устига чопонини олди – да, пишшилаганча дам у ёқса, дам бу ёқса ўтириб ётди.

Нормат кўз юмиб, унинг қийналиб нафас олишини эшишиб турарди.. Ўзининг ҳам уйқуси келмади, ўзиникига ўхшаб кетадиган бу одамнинг қисматида негадир у ўз тақдидини кўрди. Бу ўхшаш туйғу болаларни кўргандаёқ бошланган, энди кўксини ловиллатиб кўйдирмоқда эди. Маллабойнинг ўзиdek содда, кўримсиз, мулоим ҳукми унинг баландпарвоз хаёлларини парчалаб ташлаганди. Бу ҳукм гарчи бошқа бир пайтда қарор топган таомил мезонига мувофиқ келмаса – да, шу тобда адолатли ва инсонпарвар эди. Ана шу инсонпарварлиги Норматнинг шу вақтгача сиғиниб келган номус, орият, шаън ва гурур дегани тушунчалардан устунроқ эди.

Эртасига Маллабой билан хайрлашмай ҳам тонг қоронгисида чиқиб кетди. Қишлоққа қайтди – ю, марта ning адогигача овга чиқмади.

Ўн беш кунлар ўтгандан кейин кечга яқин Бийди момоникига ўзи кириб борди. У ҳаммасини ўйлаб, тарозута солиб кўрган ва қатъий қарорга келган эди. Унинг азиятли ва хаста қалби урушдан олдинги ориятли Нормат полвонни синдириб ташлаган, оддий, уруш кулфатлари эзиб ташлаган, унга таслим бўлган, кўнинкан, тақдидига тан берган эди. У мана шу қарорни, мана шу оддий ҳақиқатни тоғу тошлардан аслида ўзи икки ойдан бўён излаб юрганини фақат Маллабойнинг гапларидан сўнггина англаған эди.

У кириб борганда Бийди момо бошига эски қора чопонни ташлаб, сарғайиб кеттан жунни олдидағи тароқдан ўтказиб олмоқда эди. Кичик келин яланг бош бўлиб олиб, тўрда, олдиға кичкина қуроқли бўхчани ёзиб, ичидаги кийимларни тахлаёттан эди. У Норматни кўрди – ю дик этиб ўрнидан

турди ва ерда ёттан рўмолини олиб, бошига илди, шоша — пиша бўхчани ўрай бошлади.

— Едирдим, ичирдим, — дерди Бийди момо кириб келганга ҳам эътибор бермай, бошини тароқдан кўтармасдан. — Кўзимнинг нури деб ўстирдим, қариганда тепкилаб кўмишади, деб ўйлапман мен бечора, энди эса ҳузурини бегоналар кўрди. Бегона юртларда ўлиб кетди. Одамларнидай ҳеч қурса биттасиям тирик қолмади. Бошимни азалдан ўзи шур қилиб яраттан экан... Кетсанг, бор кетавер. Сени ушлаб турганим йўқ, сизлар ўзи шундайсизлар, бироннинг бошига кўргулик тушса, дарров қўшилиб тепкилайсизлар... Бор, тезроқ жўна... Ҳамма лаш — лушларингниям опкет, ҳаммасини кўтариб жўна...

— Амма, — деди кичкина келин, Норматта бир қараб, ҳижолат бўлгандай. — Бўлди энди...

— Нимаси бўлди! — Жағ — жағлади унга қараб Бийди момо. — Тўғри гап ёқмайди — да, зинг ўлган бўлса, гуноҳкор менми?.. Нега менга зарда қиласан... Ё сенам биронтани топдингми? Топган бўлсанг бор, кетавер, мени шарманда қилмасдан кет, қорангниям кўрмайин.

— Амма, — деди яна ҳижолатли қилиб кичик келин, Норматта яна бир қаради — ю, дув қизариб, юзларини яшириб, йиглаб юборди.

— Яна йиглашинг нимаси, йиглаб кўнглимни бўшатаман деяпсанми?! Овора бўлма, ўзи тош бўп кетган бу юрак. — Бийди момо шахд билан жунни тароқдан ўтказар экан, қўллари қалтираб тароқда бармоғини уриб олди. — Ҳе, сафанд қол, сенам, тароқ бўлмай! — деди қонаған бармоғига титраб — қақшаб жун босар экан, тароқни олиб пекканинг орқасига улоқтирди. — Авваласиям пешонам қурсин, бўлмаса куним шуларга қолармиди! Келиб — келиб шуларнинг қўлида хор бўлиб ўлиб кетаманми?..

Нормат ноқулай пайтда кириб қолганидан ҳижолат бўлиб ўтади. Бийди момо қонаётган бармоғини сиқиб ушлаб, бошини кўтарди — да, уни кўриб тумшайиб олди. Индамай олдиаги жунларни йигиштира бошлади.

— Мана, яна биттаси кеди, — тўнгиллади у ўзига — ўзи галираёттандек. — Ҳаммаси бошига ғам тушганда Бийдини эслашади, бошқа вақти эсигаям келмайди.

— Ҳа, амма, — деди Нормат ўзини хурсанд күрсатиб, орадаги ноқулалиқдан чиқып учун.— Түнингизди тескари кийиб опсиз, нима бало, жезда^м(почча демоқчи) түшингизга кирдими?..

— Эҳ, аввали ўша Бухор полвон қуриб кетсин. — Жаврай бошлади Бийди момо.— Менга шунча етимчани қолдирди, ўзи жүнади — борди. Энди эса унинг етимлари болалариниям менга қолдирив кетмоқчи... Гүё Байдининг бутун умрига қора меңнат ёзилгандай... Сен нима қип турипсан? — деди пиқ — пиқ йиглаёттан келинига қараб. — Мәхмөнгә чой — пой қўй, кейин қиласан нозимойишингни.

Кичик келин бурнини тортиб кўзидан ёшини ҳам артмай, токчадаги дастурхонни олиб, печканинг олдига ёзди. Сўнг Норматта қайрилиб ҳам қарамай катта, кўкиш, сири кўчган чойнакка печканинг устида шақиллаб қайнаётган қумғонни ағдарди.

— Кўзингни ёшини арт, — деди Бийди момо унга гижиниб қараб. — Ҳозир чойнакка оқиб тушади.

Кичик келин бошини четта бурди — да, яна пиқ — пиқ йиглай бошлади.

— Менда нима гуноҳ? — деди у йиглай туриб, аламли товушда. — Тўрт йил кутдим уалингизни... Тўрт йил... Одамларга ўхшаб, бир ой ҳам бундай келин бўлиб яшаганим йўқ... Келганимдан бери қора меңнатдан бошим чиқмайди... Одамлардай ақалли бир ой келин бўлсан ҳам майли эди... Бир ойам бўлмадим. Пепонам шўрлигидан... Энди қариб, сўлиб қолганимда кимга керак бўламан... ўлдириб бўлди — ку мени бу уй...

— Кўзингта қара, чой тўкиляпти, — деди таҳдид билан Бийди момо унга. — Бўлмаса эрингни беш — олти ой қўйнингда яшириб ёт эди — да, шунда одамлардай эрингнинг исига тўярдинг...

Кичик келин чойни дастурхонга келтириб қўйиб, бояги жойига бориб, изиллаб йиглаб юборди.

— Бўлди, бўлди! — деди қайнонаси жеркиб. — Уйда меҳмондан уялмайди — я бу, тавба!

Нормат этигини ечмай, ясама оёгини сал букиб, пўстакнинг устига ёнбошлади — да, нима деярини билмай, Бийди момо узаттан чойни ҳўплай бошлади. Орага яна

жималик чўқди. Кичик келин ҳамон изиллаб йигларди. Печканинг орқасида ёттан мушук нон исини сезиб ўрнидан туриб керишди, миёвлаб, Норматнинг атрофини айлана бошлади. Бийди момо ўрнидан туриб, юқ тахмонига борди ва ниманидир «тир» этиб йиртиб, сўнг қўлига боғлади, қайтиб, Норматнинг қаршисига ўтиреди.

— Пиш — э! — деди зарда билан оёғига бориб суйкала — ёттан мушукнинг қулогига уриб.

Мушук тарсаки еган қулогини бир силкиди — да, Норматнинг олдига ўтиб, унинг оғзига қараб «мийёв», деди. Нормат мушукнинг бошини силаған бўлиб, иккита ушоқ олиб бурчакка ташлади. Мушук югуриб бориб, ушоқларнинг бирини оғзига солди. Шарақ этиб очилган эшикка чўчиб қаради — да, хотиржам иккинчи ушоқни чайнай бошлади. Эшикда катта келин кўринди. У сариқ сатин чопони устидан эски, енглари титилиб кетган, бели чилвир билан боғланган эркакча йўл — йўл яктак, балчиқча беланганд катта кирза этик кийган, қизишиш рўмолини бошидан сиқиб ўраб олганди. Унинг заиф ва муштдай гавдасига этик жуда хунук кўринар, узоқдан ботқоқча ботиб бораётганга ўхшарди. У эшикни ёпиши билан иссиқ хонага гўнг ҳиди гуп этиб урилди. Яктакка ҳам, унинг юзига ҳам лой теккан, лой совуқдан қизарган юзида худди холдай кўринарди. Норматни кўриб у уялгандай бўлди. Уятчан ва қизарган кўзлари билан Норматта илиқ термилиб қўйди. Унинг юзи озгин, олд тишидан биттаси ярим синган, соchlари палапартиш рўмол ичига тиқиб қўйилган эди.

— Молхонани кураб бўлдим, — деди у ўқрайиб қараган қайнонасига изоҳ бергандай. — Шундай шилта бўп кетибди, яна бир жойдан чакка томяпти. Бирам совуқчи, аёз қаттиқ бўлади, шекилли, ҳалитдан ер музлаб қолди. Қўлим қотиб кетди...

— Сарғилинг турдими? — деди Бийди момо хўмрайиб.

— Қаерда? Думидан кўтардим, қулогидан тортдим. Кучим етмади, емиш қанча берса индамай ейди. Кўтарам бўп қопти.

— Ёғли атала қип берса, мадорга кираарди, — деди Бийди момо куйинчак овозда. — Ёғни отлиқ тополмайди, биз қаердан топамиз.

— Амма, — деди катта келин қайнонасининг юмшагани — дан хурсанд бўлиб. — Эргага чувоқча чиқарсанмикан, ҳарна

иссиқда... Агар акам уйда бўлса ёрам берарди,— деб Норматта савол назари билан қаради.

— Билганингни қил,— деди Бийди момо.— Битта инак³ ни эплай олмадинглар, энди хуморларингта пишириб енглар. Бир вағтлари ўн бештараб инакка ўзим қарагич эдим, яна осмондай — осмондай оққулоқ инаклар эди... Э, нимасини айтаман!..

Катта келин қайноасининг авзойи бузилганини кўриб, этигини ҳам қуритмай:

— Майли, мен ўтиң чопайин,— деди — да, катта этигини тўқ — тўқ эткизиб чиқиб кетди.

Кичик келин унинг изидан ижирғаниб қараб қолди.

— Э, худойим — эй! — кўзларини юмиб пичирлади Бийди момо. — Биз сенга нима ёмонлик қилдик, ҳаммасини бизга ташлайсан... Нуқул бизни кўрасан, касофат қилғонларга, ўгриларга, имонсизларга берсанг бўлмайди — ми... худойим!..

Орага ноқулай жимлик чўқди. Нормат айтмоқчи бўп келган гапини энди айтиб бўлмаслигини англаб ўрнидан турди.

— Нега турдинг?— деди Бийди момо унга саволчан қараб. — Ўтири, манавилар бирон ёвғон қилас...

Нормат ўзининг нима учун келганини айтмоқчи эди, бироқ гурури йўл бермади, эшикдан чиқаверишда ўйланиб туриб қолди.

— Менда галинг борми?!— деб сўради Бийди момо, унинг остонода қаққайиб турганини кўриб.

Нормат Бийди момога қайрилиб қаради ва унинг юзида анча юмашаломатини кўриб, секин изига қайтди, тезак солинглан тогорани тўнкариб ясама оёгини кериб ўтирди.

— Ҳа, нима бўлди? — деб сўради Бийди момо ажабсиниб.

— Бунча эри урган хотинга ўхшаб шумшайиб одинг?

Нормат баттар бошини эгди:

— Амма, — деди синиқ овозда бошини кўтармай,— мен... мен уйга қайтсамми, деб эдим... Бўлар иш бўлди... Энди нима фойда... шунга бизни орага тушиб яраштириб қўйсангиз.

— А?!— Бийди момо қулоғига ишонмагандай қайтиб сўради.— Қайтасан?! Ўша бузуқининг оддига — я?! Нима... сини соғиниб қолдингми?.. Орият борми сен — да... Эркакмисан ўзи?! Ёки матоҳингни урушга ташлаб

келдингми?! Ўша бузуқнинг сассиқ думбасини қучоқлаб ётмоқчимисан?!

— Амма! — унга илтижоли тикилди Нормат. — Мен болаларимни тирик етим бўл қолишини истамайман... Ўша ёқлардан ҳам шу қора кўзларди деб қайтдим. Энди уларнинг хор бўлиб юришини истамайман. Қўйинг эски гапларни. Келинингиз адашган бўлса ўзидан кўрсин! Худодан топсин... бироқ болаларда нима айб?! Кеча Ҳожар Ҳуррам чолнинг хотинидан қатиқ тиланиб юриби, кўриб юрагим эзилиб кетди. Ҳамма уларга худди етимга қарагандай қарайди, худди отаси ўлган — дай, амма! — Нормат йигламсираб кўзидағи ёшни зўрга ютди.— Мен уларни чирқиллатиб қўя олмайман... Нима бўлса бўлди, худодан кўрдим.

— Тўгрисини айтавермайсанми, Нормат. — Унга бирдан жагиллаб ёпишди Бийди момо.— Хотинсирадим, деявер — майсанми?! Тўгрисини айт, нозимойим, хотинсирадингми, а? Мана сенга хотин!— Бийди момо иргиб ўрнидан туриб, кичик келиннинг олдига бориб сочидан судраб кеди.— Мана хотин... Бу эрсираган, сен хотинсираган, оллаху акбар... боринглар, икковинг эр — хотинсизлар, олиб бор, бор!. Нега анграяпсан, мени ҳазиллашяпти деяпсанми?! Отанг бечора сенинг шу гапингни эшиттандами, ўзини зовдан(қоядан демоқчи) ташларди... Болаларим, дейсан... бузуқнинг боласи бузуқ бўлади, бошқа гўр бўладими?!. Сени обигар' (сарсон қиласи демоқчи) қип ўлдиради... Хотин мана, Мулла Соқини ҳозир айтиб келиб, никоҳлатиб қўяман...

— Амма! — бақириб юборди Нормат гарангсиб ўрнидан турар экан. — Мени... мени нима деб ўйлаяпсиз, мен ахир бу... амма, эсингизди йигинг!..

Нормат довдираф қолди. У Бийди момонинг аччиғи бунчалар оловтоб бўлиб турганини билмай, уни ёқиб юборган эди. Кичик келин ўзини қайнонасининг қўлидан бўшатиб, ўтирган ерида орқага тислана — тислана, бир Норматта, бир Бийди момога илинж билан қараб, йиглаб юборди.

— Ҳа! — бор овози билан шангиллади Бийди момо.— Мен шундай ўладим. Бузуқни қучоқлагунча, буни қучоқлаш савоб бўлади... Шарманда эркак бўлгандан хотинбоз бўлган минг марта яхши!!!

Бийди момо ақлдан озғандек депсиниб, ерга муштлади, унинг юзи кўкариб, кўзи намиқдан, оғзидан тупук сачрай бошлаганди. Унга шу тобда қарап қўрқинчли эди. Юзидағи ажинларгача қизариб, дириллаб кетди,

— Мен бари бир уйга қайтаман,— деди Нормат унга ўчакишгандай қилиб. — Болаларимни бирорларга хор қип қўймайман...

— Жўна! — Бақирди Бийди момо. — Ҳозироқ жўна. Ҳозироқ бориб ҳаром путини яла... Сен бутун борсанг, у эртага ўйнашини уйингта киритиб, сени қоровул қип қўяди... у ўйнаши билан остинма — устин бўп ётганда сен тешикдан қараб, қўлингди сўриб ўтирасан...

Норматнинг миясига бирдан лоп этиб қон уриди. Ўзининг шунчалик ҳақоратланашаркан дафъатан эсига тушгандай ёноқлари қалтирай бошлади.

— Бас қилинг! — ўкирди у ёввойи овозда таҳдид билан Бийди момога яқинлашаркан. — Мендан нима истайсиз?! Ўлишимними?! Агар шуйтиб яна бир гапирсангиз...

— Ур! — Бақирди Бийди момо унга кўкрагини тутиб. — Ур, агар кучинг менга еттан бўлса ур!. Одамлар хотинининг аламини аммасидан оғти десин. Ур, нега қараб турибсан?!.

Нормат бирдан ўзига келди — ю, уялиб кетди. Шартта бурилиб, эшикни шарақлатиб ёпиб чиқиб кетди.

— Бор ўша бузуқнинг олдига! — Изидан бақирди Бийди момо. — Менинг кейин номимниям тутма. Бор, бобола — рингнинг арвайи урсин сени... Илоё, хотининг билан қўшмозор бўл!..

Нормат ташқарига чиқиб, совуқ изгириндан энтикиб кетди. Қишлоқда кеч тушган, аёзли тун бошланган эди. Қоп — қора осмон қозонида юлдузлар қайнар, кунботар тараф қонли шафаққа беланганд, қорли чўққилар ухлаб ётган оппоқ итларга ўҳшаб гира — шира кўзга ташланарди.

XV

Ҳамал ойининг бошларида кунлар илиб кетди. Нормат бу йил экин экадиган жойни буталардан тозалаш учун қотнинг устига чиқди. Қотнинг устида ҳам қор эрий бошлаган, кўпдан бери ҳайдалмаган ер ҳаприқиб, қорни

ютоқар, ундан ер ҳиди бор ҳовур күтарилаётган эди. Ер ўз одамларини, ўз эгаларини кутиб, келинчақдек ястаниб ётарди. Норматнинг қалбида дәжқончилик түйгуси жўшурди. «Ҳе—е—е—е...» — бақиргиси келди... Чўлоқданиб югурди, ерни харислик ва ташналик билан бағирлади, тупроқларни кўзига сурди, ўпди. Нормат кўзларини йириб, суқ билан ҳовур күтарилаётган қорга, узоқ — узоқларга термулди. Қуёш бошида турар, оёқ остидаги қор аста сизиб эрир, илиқ ва енгил эсаёттан шабада баҳор кунлари бошланганидан дарак бериб, мунғайиб қолган зиркнинг шохларини силаб ўтарди. Нормат юрагидаги ҳислар қайтадан тирила бошлаганини, ўзида яратиш қуввати пайдо бўлаёттанини сөзди. Бу — ўша афсонадаги Ер одамларидан, бобоси Бойхундан қолган Ерга бўлган Мұҳаббат эканини оғриқ ва роҳат билан тўйди. Унинг кулфат, азоб, изтироб, кўрқув, шубҳа ва иккиланиш эзib ташдаган қалбида умид уйғона бошлади...

...Яна баҳор келади. Оlam баҳорнинг шавқига тўлади. Қирларда худди олдингидек уруш билан иши йўқ, урушдан қўрқмайдиган лолалар очилади. Ер пишади. Ер етилади. Қир — адирларни чигирткалар чириллаши уйғотади... ухлатади. Қоп — қора бўлиб етилган мана шу ерни қўши билан бир киши ҳайдайётган бўлади. Омочнинг босқонини ушлаганча, бир қўлида гаврон билан ҳўкизларини ҳайдайди: «Ҳая — ҳуйт, ҳая — ҳуйт!..» Унинг пешонасидан, бўйинларидан сизилиб тер оқади. Тердан кўйлаклари ҳўл бўлиб кетади. Лекин у завқ билан, бахт билан ҳайдайверади..., Унинг эгнидан чиқаётган ҳовур билан ердан күтарилаётган ҳовур қўшилиб, узоқда, қўш томон ҳаволайди. У эса завқ билан қўшиқ айтиб, қўш ҳайдайди. У юрагида, баданида занглаб қолган уруш хотираларини, жароҳатларини тер билан юваётган, ўзини поклаёттан Нормат полвон бўлади...

...Яна баҳор келади...

Нормат кўксидаги туйғулар олдида ожиз қолди. Уларни порлаб турган кўзлари орқали қўйиб юборди. Улар соғинган, тириклик ва ҳаёт барқ ураётган, буғ күтарилаёттан кенг далага худди бир тўда болалар қаби қувноқ қийқириб юргургилаб кетишиди. Нормат улкан калтакесакка ўхшаш тош соясида эримай қолган қордан

ҳовучлаб олиб, юзларига, күксига ишқади, завқланиб күлди. Авваллари англамаган ва тўймаган ҳисни у тўрт йиллик урушда кўрган шунча азобларидан сўнг оёғи остидаги, уни, унга ўхшаш миллионларча ўз қўпчиларини кутиб ҳансираётган дунёдаги ҳамма нарсалардан муқаддас бўлган, унинг аждодлари бир умр қидириб ўтган – урушсиз юргни кўрди.

„Нормат қотнинг устидан тўгри Читта чиқиб кетди. У Оқбўта оқсоқолдан насияга битта ҳўкиз сотиб олмоқчи эди. У ерда эски чавандоз ошиналари билан валақлашиб қолиб, жуда кеч қайтди.

На қиш, на баҳор ҳисобланган илимилиқ кеча гўзал ва мафтункор эди. Қуёш ботиб кеттан тарафда қирмизи бўлиб из қолган. Бу қирмизилик шу даражада ҳарир эди – ки, худди осмон деразасига бирор атайлаб қизғиши шоҳи парда илиб қўйгандай. Тун зим – зиё, осмон юлдузли эди. Қаердадир безовта бўлиб каклик сайрарди. Узоқ тоғ орти қишлоқлардан итларнинг вовиллашлари эшитиларди. Нормат Қоратўшни секин ҳайдаб, тунга қулоқ солиб борар, елкасига оғирлик қилаётган миљигини дам у, дам бўёғига олиб қўярди. Тунда қандайдир жимирилаш товуши эшитилгандай бўларди. Бу эриёттан қорнинг шарпаси эди. Қоратўш туёғининг садоси тошлардан акс олиб қайтар, отгоҳ – гоҳ қулогини олдинга динг қилиб, бир пишқиради – да, яна йўлида давом этарди. Нормат тун қўйнида ғайришгурий ҳисга берилганди: унинг қўшиқ айтгиси келарди.

—И – и – им – и – и – и.. Ҳи – и – им – ҳи – ҳим – им, — хиргойи қиласи у. Унинг ҳозир бутун вужудини қувонч қамраган бўлса ҳам, хиргойиси ғамгин ва мўнгли эди. Хиргойиси думбиранинг нағоҳ чертилиб кеттан торига ўхшарди. Унинг хиргойисида сўз йўқ, ғамгин, ғуссали оҳанг тараларди. Юраги унга ер, баҳор ва ҳаёт ҳақида сўйлаб бермоқда эди.

У қишлоққа ярим кечаси кириб борди. Қишлоқда уни биринчи бўлиб Ўрми чўпоннинг ити кутиб олди. Қишлоқда кириб келаётган шарпани сезиши билан ит қаттиқ ҳуриб, югуриб кедди. Изидан бир қанча итлар қўшилиб ҳура бошлиди. Ўрин чўпоннинг каттакон, сарғиш ити ириллаганча

Қоратүшнинг йўлини тўсди. Бироқ қари от бунаقا йўлтўсарларни кўп кўргани ва итни танигани учун йўлида бепарво давом этди. Шундан кейин бир гала ит отнинг орқасидан ҳура бошлашди.

—Тир — р... — Нормат узангидан тишлаган сарғишидан кўрқиб кетди.

—Саритой, ҳе, энанг ўлгур, танимаяпсанми!.. Саритой..

Саритой ўзининг отини эшишиб, узангини қўйиб юборди — ю, лекин орқага тисарилиб ҳура бошлади.

—Саритой... Саритой.. бас қил, нима, кўзинг кўрми!...

Саритой отлиқ ўзларининг одами эканига ишонди шекиали, орқада қолиб, яна бир — икки бор ҳуриб қўйди. Унинг тинганини кўрган бошқа итлар ҳам орқада қолишли.

Нормат йўрин чўпоннинг ҳаётидан ўтиши билан уйнинг чироги ёниб турганини кўриб ҳайрон бўлди. Қортўшни Бийди момонинг отхонаси эшигига боғлаб, кўнгли бир нарсани сезгандай, отни ялонғочламай ҳам уй томон юрди. Назарида уйнинг эшиги очиқдек, ичкарида кимдир ўтиргандай туюлди — ю, ажабланиши баттар ошди. Катта — катта қадам ташлаб айвонгача борди ва уй ичида соchlари ёйилиб кетган, эгнига узун чопон кийган кампирнинг чироқ олдида ўтирганини кўриб қўрқиб кетди. Кампирнинг пичирлаёттани айвончага эшитилиб турар эди. Нормат эшиккача борди — ю, кампирнинг Бийди момо эканини кўриб, турган жойида қотиб қолди.

—Худоё балолардан қишлоғимизни ўзинг халос қил, бузуқиларди тезроқ қора ерга торт, одамларди меҳри оқибатли қил, имонсизлардинг жазосини ўзинг бер.. алҳамдиуллоҳи раббил оламин, бирраҳматика дарҳамар раҳими.. вал.. амин қасд қиғонлар паст бўлсин, қирғин опкеганлар қирғиндан ҳалок бўлсин!..

Нормат шошиб қолди. Бу оддий намозга ўхшамасди. Бийди момонинг кўриниши бир ҳолатда эди.

—Амма! — бақириб юборди Нормат елкасидан милтиқни қўлига оларкан чўчинқираб. — Бу нима қилик?

Бийди момо чўчиб тушди — ю, ранги гезарив унга қаради. Сўнг шошиб ердаги оқ гарди рўмоли билан желагини бошига олиб, Норматтага чақчайиб тикилди.

—Сизга нима бўлди, амма?! — деб суради Нормат яна чинқириб. — Совмисиз?!

Бийди момо Норматнинг гапларига жавоб бермасдан, чироқнинг қаршисида туриб олди. Нормат ўша кунги жанжалдан кейин яна аммасига мазах бўлгиси, заҳар гапларни эшитгиси келмай, унга кўриниш бермай юрганди. У ҳозир, аммасини яна келинлари билан жанжаллашиб қолдими, деган фикрга борди.

—Худоё ўзинг кечир, — деди Бийди момо ўзига гапиргандай, кўзларини юмиб олиб. — Ҳаммамиз ожиз бандамиз, ўзинг бизларди кечир. — Юзига фотиҳа тортиб, кўзларини очди. Яна мазах қилаётгандай юзларини бужмайтирди. — Сени кутиб ўтирибман... Хотинжонингни ўйнаши келди... Сен яна уни қулоқламоқчи бўласан. Гўё ҳаммасини мен ўйлаб топгандай, бузигингдики яна қичиб қопти... Индамай сенинг очиқ эшитгиніта кириб кетди...

Бу гапларни у худди Норматнинг устидан кулаёғандай, ярим тантана, ярим масхара билан айтди. Нормат қўлидаги миљтиқни сиқиб ушларкан, тўсатдан пайдо бўлган бу хабардан қалқиб кетиб:

— Ёлғон?! — деб вишиллади. Унинг кўзлари каттариб, юзига қон қўйчиди. Юрагида тоғдаги туйгулардан асар ҳам қолмай, ўрнини оғриқ, жуда улкан оғриқ эгаллади.

— Ёлғон?! — деди Бийди момо кўзлари олайиб, бирдан кулиб юборди. — Ха — ха — ха... ёлғо — о — он!.. Ҳали мен ёлғончи бўп қолиб, хотининг тоза бўп қолдими? Ҳа — ҳа, бор, ўзинг кўр... ёлғон бўлса... бор... ўша бузуқингни... яна ўйнаши билан қандай топишиб олганини кўр. Ҳозир ўйнаши хотинжонингни иштонини ечиб бўлди... Ҳа — ҳа, ҳа... авваласи қилигини қип ҳам бўлгандир... Мен роса етмиш уч кун пойладим. Йўлинни пойладим. Барibir келишини билардим... ҳар куни пойладим... Совуқларда музлаб бўлсаям пойладим. Ниҳоят шубҳам тўғри чиқди. Биласанми, у ким... Айтмайман!.. Ўзинг бориб кўр... агар эркак бўлсанг ўлдир икковиниям... чавақлаб ташла! Болаламай йўқот... кўкрагингда озгина эркаклик фурури бўлса, ўлдир!

— Ўлдираман! — Ўкирди Нормат, Бийди момонинг ёқасидан шаппа ушлаб олиб бўға бошлиди. — Қари шайтон... ўлдираман!..

— Менга дўқ қилганинг — ча бориб хотинингди этагини ёп! — Хириллаб шанғиллай бошлади Бийди момо. — Ўша хотининг қишлоққа касофат келтирди. Ҳамма балога у сабабчи. Агар шу ҳолатда қўйса, яқинда бутун қишлоқни ер тортиб кетади.

— Ёлғон! — Нормат куч билан Бийди момонинг оғзини ёпиб ўшқирди. Бирдан миясида оғриқ туриб, терлай бошлади. — Агар шу мартаям ўшак сурган бўлсант, келиб сен ялмогизни отаман!..

Бийди момони итариб ташлаб, талнаиглаб чиқиб кетди. Бийди момо зарб билан бориб деворга урилди йиқилиб тушди. У ётган ерида гурс — гурс этиб ташлананаётган икки хил қадам товушини эшишиб ётаркан, жонҷолатда бошини кутариб, эшикка қараб бақирди:

— Ўлдир, ўлдир уларни, уругини йўқот бу дунёдан! Сўнг келиб, мени от, майли... мен бечора... бир қаровсиз кампирни от, майлига... Оҳу — уҳу — у ҳу! — Йўталиб, йиглаб юборди — да, мадорсизланиб, ўмгани билан гиламнинг устига ётиб қолди.

Анча вақтдан кейин қалтироғи босилгач, ниманидир эслагандай иргиб ўрнидан турди — да, ялангбош ҳолатда: «Вой, ўлай, ўлдириб қўяди бу аҳмоқ чўлоқ», деган — ча Норматнинг изидан югуриб кетди. У довдираб чопар, кўзи ҳеч нарсани кўрмасди. У фақат тезроқ юришини ўйларди. Бироқ ўзининг хаётидан чиқаверишдаги тошга қоқилиб, кўкраги билан йиқилиб тушди — ю, боши тошга тегди, кўзидан ўт чақнади, бошини икки қўли билан қисиб ушлаган ҳолда ҳушидан кетди.

XVI

Анзират болаларини ухлатиб, пекка ёди. Катта пақирга сув қўйди. Ташқарига чиқиб, тогорани олиб кирди. Ўзига ҳам ўрин тўшаб, пишиллаб ухлаб қолган Ҳожарнинг пешонасидан ўпди — да, чаккасига секин шаппатилаб эркалаб қўйди. Ҳожар бурни қуриллаб, сал жилмайиб ухларди. Унинг қошлиари, ингичка ияги ва чўзиқ кичкина юз Анзиратта ўхшар, қолган жойлари — баджовоқлиги ва лўпшилиги Норматнинг Анзират келин

бўлиб тушганда номаълум касалликдан ўлган опасига ўхшарди.

— Қачон эсларинг киради сизларнинг,— деди у эрка оҳанга, тураётиб Ҳолматнинг пешонасидан ўпаркан.— Пешонамга сизлардан бошқа суюнчиқ ёзилмаган шекилли...

Сўнг чопонини ўринга ташлаб, бошидаги қора шол рўмолни Ҳожарнинг устига ёпди—да, очиқ қолдирган эшикни ёпиш учун ўрнидан турди—ю, остоноада худди гуноҳкордай ҳижолатли жилмайиб турган, қўлида тўқима қамчи ушлаган, юзи сал—пал оқарган, бир оз озган, қовоқлари халта бўлиб қолган, қоракўл телпак, узун пўстин кийиб олган Мирзақулни кўриб, турган койида қотиб қолди.

— Мана, мен келдим,— деди Мирзақул пишиллаб, нима учун келганини ўзи ҳам билмаёттандек гуноҳкор оҳанга.

— Мана, келдим, Анзират.

Анзиратнинг оёғида дармон қуриб, ўтириб қолди ва Мирзақулга чўчиб, худди мушук чангалида қолган қуш боласидай илтижоли термилиб турди.

— Сенинг хаёлингта бошқа нарса келмасин, Анзират,— деди Мирзақул телпагини бошидан олиб.— Сен билан хўшлашгали келдим... Мен ҳам у ёқقا кетяпман... Мени қадрлашмади. Анзират, қадримга етишмади... Ишлатиб, ишлатиб... Энди керак бўлмай қолганимда жўнатишяпти... Сенинг олдингдан ўттани келдим... Ким билади... тирик қайтаманми, йўқми? Мендан рози бўл, энди...

— Нега келдингиз?— Ваҳимали шивирлади Анзират, унинг тиззалири дириллай бошлаганди.— Нега келдингиз?.. Сизни деб чеккан шунча азобларим етмасмиди... бошимга орттан шунча савдоларингиз етмасмиди?..

Мирзақул ерга қаради ва бошига телпагини қайтадан кийди. Сўнг ниманидир айтмоқчи бўлиб тарафдуудланди—ю, лекин айтмай, индамай қолди. Унинг ҳозирги туришида илгариги савлатидан асар ҳам йўқ, аввалги гердайиш, ўзига зеб бериб гапириш ва доимо ўзининг мансабини эслатиб турадиган салобати қолмаган эди. Унинг кўзлари чўйкан, соқоллари ҳам аввалгидек қиртишлаб олинмаган, ўсиқ, палапартиш кийинган эди.

— Мен кўп ўйландим,— деди у мунгли ва муштипар товушда хириллаб, Анзиратта қарамасдан.— Кўп ўйландим... Хотин зотини эрмак деб ўйлардим олдин. Хоти зоти эркакка эрмак учун яратилган, деб ўйлар эдим. Умримда ҳамиша шундай қилиб келдим, Анзират, сени кўргунча шундай деб ўйлардим. Сени кўрган биринчи ойлари ҳам шундай деб ўйлардим... Дунёда ҳамма нарса эрмак, қўлингда пулинг, остингда отинг бўлса, маликаниям қўйнингга олишинг мумкин, деб ўйлар эдим. Сени кўрдим — у, ҳамма ўйларим чил — чил синди. Олдинлари хотин зотини аламдан, учакишиб эрмак қиласадим... Сен мен кўрган хотинларнинг ичидаги бўлакчасан, Анзират... Сен ҳаммадан бўлакчасан, Анзират, сен ҳаммамиздан устун турасан... Агар рози бўлганингда сенга ўша пайтдаёқ ўйланган, сени буйтиб хор қип қўймаган бўлардим.

Анзират ўзини йўлдан уриб, хўрлатиб ва ҳақоратлатиб, энди эса унинг олдига бўйин эгиб келгани ва ўзини ҳаммадан устун қўяётгани учун кўнгли тўлиб борар, алам, хўрлик унинг бўғзини куйдирмоқда эди.

— Кетинг, — деди Анзират ва деворга бошини тираб йиглаб юборди. — Кетинг... Мени тинч қўйинг, худо ёрлақасин сизни... Одамлар кўриб қолса нима дейди... Ақалли болаларимни ўйланг, уларни тирик етим қилманг...

— Агар урушдан омон қайтсан, сени ҳеч кимга хўрлатиб қўймайман. Мени деб чеккан азобларинг учун сени бошимда кўтариб юраман, Анзират. Мени деб ҳеч ким сенчалик азоб чекмаган... Ҳамма менга олдимда тиржайиб, изимдан қарғаган, хотинлар бирон нарса ундирамсан, деб қийишанг — лаган, мендан кўпроқ нарса олишни ўйлашган... Сен эса... Агар урушда ўлиб — шўлиб кетсан, ҳамма дарров эсдан чиқариб юборади... фақат сен эслайсан, фақат сен азоб чекасан, биламан. Сенинг кўнглинг шундай... Мени фақат сен эслайсан... — Тез — тез гапира бошлиди Мирзацул.

— Кетинг! — Шивирлади Анзират. — Кетинг... — Мирзақулга қарамай ҳўнграб йиглаб юборди. Бу хўрлик ва гина йигиси эди. Қилган гуноҳи учун доимо кишилардан туртки еб келган, ҳақоратланган, хўрланган қалб шу бир оғиз ширин гап эшитиши билан зриб кетган эди. Унинг шу одам туфайли чеккан азобларидан, изтиробларидан

хўрлиги келар, ўпкаси тўлиб борар, ўзини босолмаётган эди, бу эркалик йигиси эди. Анзират бир неча ойдан бери биринчи марта чин кўнгилдан эркалик билан йигламоқда эди.

— Йиглама, — деди Мирзақул ва унинг аввалгидай сочини силаш ва овутиш учун одига борди. — Йиглама... Анзиратнинг қаршисига тиз чўқди. У ҳозир ҳамма нарсага тайёр эди. — Йиглама... Йиглама, биронтамиз ҳам сенинг кўз ёшининг арзимаймиз. Сени хўрлаганлар йигласин, мен йиглайн, сен йиглама... Менинг ўпкамни тўлдирма, урушга кўнглим ғаш бўп кетмайин... Кулиб хўшлаш... Анзират... йиглама...

Анзират бу юмшоқ товушни эшитиб, Мирзақулнинг юзига қаради. Мирзақулнинг кўзларида ҳижолат ва бошқа одамларницидан ўзгача, ўзи учун аталган меҳр кўриб, бирдан кўнгли юмшаб кетди. Кўзига Мирзақул жуда муштипар бўлиб кўринди. Ундан кўрган барча азобларини унугди ва йиглаган кўйи:

— Кетинг, мен сиздан розиман, кетинг... худо хайрингизни берсин, тезроқ кетинг... — деди ва деворга суяниб, йиглай боплади.

Мирзақул серрайиб қараб турди — ю, бирдан ўзини унинг оёқларига ташлади.

— Мени кечирдингми?! Мени — я! — деди у Анзиратнинг оёгини қучоқлаб олиб. — Нега кечирдинг? Нега? Нега бошқаларга ўхшаб жар солмайсан? Нега мени қарғамайсан, нега менинг шармандамни чиқармайсан?! Нега менинг гўримта гишт қаламайсан? Нега?! Шунда мен балким енгил торғтан, юрагим бундай ғаш бўлмаган бўларди...

— Вой, бу нимаси, — қўрқиб орқага тисланди Анзират.

— Бу нимаси? Кетинг, кетинг деяпман сизга, бундай қилманг... Сиздан розиман, дедим — ку... Кетинг, оҳ, кетинг!..

— Хўш, хўп, — деди Мирзақул унинг оёгини қўйиб юбориб, ерда ётган теллагини қўлига олди. — Хўш... Кет десанг, кетаман... Ўл десанг, ўламан... Майли, хўш қол... Мен ўлиб кетсан, қарғаб юрма, рози бўл... рози...

У шартта изига бурилди ва бир қадам ҳам юрар — юрмас эшик зарб билан очилди — ю, қўлида милиқ туттган, эски, кири чиқиб кеттан паҳталигининг ёқаси осилиб, ички

күйлаклари кўриниб турган, кўкиш аскарий телпагининг бир қулоқчини шалпайган, узоқ югурган отек ҳансирааб, кўзлари қизариб кеттан Нормат кириб келди. Уни кўриб Мирзақул орқага чекинди ва Анзират билан ёнма — ён туриб қолиб, унга қўрқув ҳамда ваҳима билан тикилди.

Нормат соchlари тўзиб, бир ҳолатда бўлиб ётган, ёлғиз чит кўйлакда деворга қапишиб турган Анзиратни кўргач, ҳаммасига тушунди.

— Ҳали сен эдингми?! — деди у ғазабдан овози бўғилгудек хириллаб. — Ҳали сен эдингми, менинг ҳаётимни булғаган, мени болаларимдан жудо қилган!.. Ҳали сен эдингми... ҳезалак!..

Мирзақул индамай бошини зғди. Унинг юзида ҳеч қандай ифода ийӯқ эди.

— Сен шунинг учун ҳам бизларни урушга жўнаттан экансан — да? — деди яна ёввойи товуцда. Унинг кўзлари қизариб бораради, вужудида қалтироқ турган эди.— Бизни урушга жўнатиб, хотинларни бузиб, маишат қилмоқ — чи экансан — да, айғир!..

Мирзақул ўзини олиб қочишига улгурмади. Милтиқ қўндоғи чап биқинига зарб билан тегди — ю, у биқинини ушлаганча, Анзиратнинг оёғи остига йиқилди.

Анзират Норматга қўрқув билан тикилиб орқага тисланди. Бироқ Норматнинг кўзидағи ёввойи бир назарни англаб, бирдан тақдирига тан берди, кўзини ерга қадаганча ўтириб қолди.

Нормат унинг олдига бориб, лой ва балчиқса белангани қўли билан унинг иягидан кўтарди.

— Сени яна кечирмоқчи ҳам бўпман — а! — деди у алам билан бош сараклатиб, қутурган оҳангда. — Ҳа, майли, депман — а! Майли, адашибди, деб кечирмоқчи бўпман — а!.. Қанжиқ, мени харом... инг билан булғаган экансан — да... Мени мана бу харомтомоқ ҳезалакка алмаштиromoқчи экансан — да... Қанжиқ!..

Анзират ҳўнграганича деворга ёпишиб қолди... Нормат партизанлар билан бир қишлоқни қутқаргандағи воқеани: бир взвод фашистлар зерини боғлаб қўйиб, кўз олдида хотинини зўрлаб ўлдирганини, серсоқол деҳқоннинг номусдан жинни бўлиб қолганини эслади. Кўзига қон тўлди...

Бутун вужудида қалтироқ турди. У нафрат ва жирканиш аралаш тұрт йилдан бери бутун вужудини булғаб ёттан манфур сүзни айтди.

— Фашист! — деди ярим хириллаб ва бу сүз тиғ каби күксини тилимлаб ташлади. — Фашист... сизлар фашистсизлар! — Алам аралаш шивирлади. — Яна нималардир дегиси, юрагини тұлдыриб турған хүрлик ва нафратни яна бошқа тубанроқ сүз билан ифодалагиси келди. Бироқ, билган сүзларининг ичидан у бундан ҳам қабиқ сүз топа олмади.— Фашистлар! — деди у ҳоргии, лекин кескин ва хирқироқ товушда. Сүнг миясида чаңнаган ўтдан сесканиб кетиб, күзи тиний бошлади. Күз олдида туман пайдо бўлди. Туман тарқаб, у ўзини отмоқчи бўлиб кемёттан сонсиз фашист аскарларини кўрди, қулоги остида яна ўқ овозлари, портлашлар эшитила бошлади. Таҳқирланган қалбида жирканиш түйди, лабининг икки чеккасида кўпик излари кўринди. У соғ ёёгининг устига қўйиб миљиқни ўқлади. Унинг бу ҳаракатини, кўрган Мирзақул ўрнидан иргиб турди. Оғриқнинг зўридан чап бидинини ушлаганча, юзи бужмайиб, эгилиб қолди ва бошини сал кўтариб:

— Нормат, эсингни йиғ — деди алаҳсираган ҳолатда.

Нормат унинг товушини олисдан, минг йиллар наридан эшитаётандек бўлди. У аллақачон ўлаш қобилиятини йўқоттан эди. Унинг кўз олдида ёнгларини шимариб олган, уни отиш, уни ўлдириш, ҳаётици сўлдириш учун келаёттаи, у уч йил урушган душман аскарларини кўрар, миясида бошланган портлаш ва ўқ товушлари томирларини кенгайтириб юборган, кўз олди чанг — тўзонга тўлган эди.

Варанглаб отилган ўқдан Анзират чўчиб тушиб, унга даҳшат аралац қўзлари косасидан чиққудек, бақрайиб қарди.

Нормат Мирзақулнинг жон талвасасида иҳраб, тицирчилашини кузатаркан, кўнглининг бир чеккасида ёввойи хушнудлик уйғонди, миљиқни маҳкам қисганча, қўзлари қизариб, узоқ югуриб, бирдан тўхтати бўри қаби ҳансирай бошлади, шу туриши раџибини тилка — пора қилиб ташлаган ва яна тилка — пора қилишга тайёр турган ўзининг миљион йиллар олдинги ёввойи аждодларига

жуда ўхшар эди. Авзойи ваҳимали тусга кирган, чакка томирлари бўртиб чиққан, оғзининг икки чеккасида сарғиш, қуюқ кўпик кўпираёттан эди. Салдан кейин унинг кўзи на миатиқ овозидан уйғониб, юқ тахмони орқасида қўрқиб йиглаётган Холмат билан Ҳожарни, на кўзлари аллақачон сўниб бўлган Мирзақулни, на ўзига қўрқув билан гужанак бўлиб тикилиб турган хотинини кўрарди. У аллақачон ўзини урушдаман деб ҳисоблар ва фақат қандай отишнигина ўйлар, бутун вужуди қалт – қалт титрай бошлиганди. У хотинига қўзичноқни кўрган оч бўридек йиртқич назар билан қаради – да, қаҳ – қаҳ уриб кулиб юборди. Тўхтаб – тўхтаб узоқ кулади. Унинг бу кулагиси соғлом одамнинг кулагиси эмасди, ваҳшиёна йиртқичнинг бўкиришига ўхшарди. Салдан кейин қишлоқ сукунатини бузиб иккинчи ўқ отилди. Кейин жимиб қолди. Ўқ овозидан безовта бўлган қишлоқ илари ҳуришганча у ёқдан – бу ёқда югурга бошлилди.

Бийди момонинг отхонаси эшигига боғланган Қоратўш чўзиб – чўзиб, ғалати кишинаб қўйди. Итларнинг акиллашлари анчагача, тонг қип – қизил шоҳи пардасини осмон дарчасига туттунча тинмади... Ўқ овозидан ўзига келган Бийди момо ўрнидан иргиб турди – да, туртина – суртина Норматнинг уйига қараб югурга кетди. Пешонасидан оқаётган қон юзлари орқали секин кўйлагини ичига сизиб ўта бошлиди. Бироқ ҳозир у ҳеч нарсани сезмас ва англамас эди. Унинг изидан уч – тўрут ит ҳуриб чопа бошлиди. Бийди момо айвонга кираверишда яна бир йиқилиб тушди – ю, қаериидир қирсиллаб кетди. Жонҳолатда ўрнидан туриб, эшиккача борди. Хонада қонга беланиб ётган Анзират билан Мирзақулни, қўрқиб кетиб, бир – бирини қучоқлаб йиглаётган Холмат билан Ҳожарни қўриб, айвонга югуриб чиқди – да, ўзини деворга уриб бор овози билан хир – хирлаб, бақира бошлиди:

— Одамлар!.. Қиёмат қойим бўлди. Нормат хотинини отиб қўйди. Одамлар!..

Унинг овози оқара бошлиган тонг қўйнига сингиб кетди.

Уч кундан кейин қарплоқча келган милиционерлар бутун ўтроқ қўнғирот уруғидан Нормат полвонни ахтара бошлилди. Нормат полвонга яқин бўлган ҳамманинг уйи тинтиб

чиқилди. Фақат бир ҳафтадан кейингина Бухор қоялари остидан бўрилар ғажиб ташлаган, пешонаси ёрилган, қўллари синиб, панжалари мушт бўлиб тутилган жасадини топдилар.

* * *

...Ниҳоят қўнгирот элига баҳор кириб келди. У минг хил ноз, минг хил карашма билан уруш заҳматлари эзид ташлаган уруш одамларининг юрагига яшаш ва яшнаш ишқини солди. Уларни эркалади, соchlарини силади, адиrlарни қип – қизил лолаларга тўлдириди, бутун борлиққа гўзаллик гиламини ёйди. Қирларни бахт тиллари – майсалар қоплади. Жанжалкаш, асабий бўлиб қолган одамларнинг димогини эркалади, уларни қирларга етаклаб чиқди, кўзларидан ўпди.

Ёмғир бу йил хосиятли келишидан дарак бериб, тошларни, дараҳтларни аламидан чиққунча савалади, жилғаларга шўхлик қилиб, буралиб – буралиб оқди.

Баҳор қаровсиз қолган Норматнинг уйини ҳам эсдан чиқармади, унинг томига майсалар ундириди, айвонига қизғалдоқлар экди, дараҳтларини гулга кўмди, ариғида азобланиб, лойқаланиб оқди. Бузилиб кетаёзган ўчоқ бошида икки бойчечак ўсиб чиқди. Улар ҳеч ким эшитмас қилиб, «Бахт, бахт, бахт», дея қўнгироқ чалдилар, ёмғир деразасига урилиб – урилиб йиглади, шамол айвонга йигилиб қолган хас – хусларни учирив, узоқ – узоқларга олиб кетди...

...Осмон юзини икки марта қора булат қопласа ҳам майборотнинг охирларига бориб кунлар исиб кетди. Катта дарёдан лойқа сув келмай қўйди. Дараҳтларнинг гуллари тўқилиб бўлди. Енгил ва илимилиқ шабада эса бошлади.

Саратоннинг бошларида, ўрик довуччалари сарғая бошлаганда, кўзлари ожиз бўлиб қолган Бийди момонинг катта келинидан бошқа терсоталиклар қотнинг устига кўчиб чиқишиди. Бийди момонинг катта келини қайнонасини ёлғиз ташламаслик ва уйнинг чироғини ўчирмаслик учун бу йил қишлоқда қолди. Кичик келин баҳорнинг охирларида қамашилиқ бир муаллим бола билан қочиб кетди.

Катта келин Бухор подвоннинг авлодини ёғиз ўзи давом эттиришга аҳд қиёлди ва эрининг олишларда киядиган қора яктагини кийиб, белини маҳкам бояглаб, саккиз яшар ўғли билан уй суваш, ўтии терипи ва сомон тўдалашга киришиб кетди.

Қотнинг устидаги буғдоилар сарғайди. Улар тўрт йиллик ҳорғин сукунатини бузиб, қувноқ шовулладилар. Бахт ва зэгулик, муҳаббат ва хаёт, меҳр ва оқибат ҳақида шивирлашиб, дунёдаги энг муҳаддас куйни олтин қўнгироқлари билан чала бошладилар.

Т а м о м

МУНДАРИЖА

Хикоялар

Шамолни тутиб бўлмайди	3
Ялпиз ҳиди	14
Бевақт чалинган бонг	34
Очилмаган эшик	58
Ажр	73
Кисса	
Уруш одамлари	90

Агадий – бадий нашр

НАЗАР ЭШОНҚУЛ

**ШАМОЛНИ
ТУТИБ БҮЛМАЙДИ**

Қисса ва ҳикоялар

*Муаллиф ушбу китобнинг чоп этилишига яқиндан ёргам
Сагригдин Қурбоновга ўз миннатдорчалигини билдиради.*

Босишга 01.01.2006 й.да рухсат этилди.
Бичими 84x108 1/32. Босма тобори 10,71.
Шартли босма тобори 6,375. Адади 700 нусха.
Баҳоси келишилган нархда. Буюртма № 1.